







# ସୁକ୍ତିସୁଦ୍ଧେ ଆଦିବାସୀ

( ଋଗ୍ବେଦମଞ୍ଜରୀ )

ପ୍ରଥମ ଓଡ଼ିଆ



ସ ମ ଶା



# MUKTI JUDDHEY ADIBASI

১৫ই আগস্ট ১৯৫৯  
( স্বাধীনতা দিবস )

প্রকাশক :

মণি সান্যাল

মনীষা গ্রন্থালয় (প্রাঃ) লিঃ

৪/৩বি বঙ্কিম চ্যাটার্জী স্ট্রিট, কলিকাতা-৭৩

প্রচ্ছদ :

স্বর্ণাল রায়

গভঃ আর্ট কলেজ, কলিকাতা

মুদ্রক :

শঙ্কুনাথ চক্রবর্তী

লক্ষ্মী নারায়ণ প্রেস

৪৫/১/এইচ/১৪ মুরারী পুকুর রোড, কলিকাতা-৫৬

শহীদদের উদ্দেশ্যে :—

## : সূচীপত্র :

নিবেদন ক ॥ ভূমিকা ৬ ॥ পাহাড় সীমান্ত অঞ্চল ১১ ॥ হাজং ১৪ ॥  
ডালু ২৪ ॥ বানাই ২৫ ॥ কোচ ২৬ ॥ হৃদি ক্ষত্রিয় ২৮ ॥ গারো ৩০ ॥  
খ্রীষ্টীয় মিশন ৩৪ ॥ সামন্ততন্ত্রের গোড়াপত্তন ৩৬ ॥ সংগ্রামী  
ঐতিহ্য ৩৯ ॥ ভূমি ব্যবস্থা ৪৮ ॥ নব জাগরণ ৫৮ ॥ নানকার  
আন্দোলন ৬২ ॥ ভাওয়ালী আন্দোলন ৬৫ ॥ স্বাধীনতা সংগ্রাম ৬৬ ॥  
প্রাদেশিক কৃষক সম্মেলন ৭৫ ॥ যুদ্ধোত্তর যুগের গণ-অভ্যুত্থান ৮০ ॥  
ভারতের মুক্তি ৮৮ ॥ ময়মনসিংহ জেলার শহীদদের সংক্ষিপ্ত

পরিচয় ১—৯

## নিবেদন

“মুক্তি যুদ্ধে আদিবাসী”র পরিবর্দ্ধিত ও সংশোধিত সংস্করণ প্রকাশিত হইল। এই জন্ত আমি আনন্দিত ও গৌরবান্বিত।

প্রথম সংস্করণের ভুল-ত্রুটিগুলি যথাসম্ভব সংশোধিত করা হইল। তাহা ছাড়া এই সব আদিবাসীদের সম্পর্কে বিভিন্ন প্রামাণ্য গ্রন্থ হইতে কিছু সংখ্যক তথ্য এবং অভিমতও উদ্ধৃত করা হইল; যাহা উহাদের সমাজবিকাশের ধারা সম্যক উপলব্ধির পক্ষে একান্ত প্রয়োজন। শাসক ও শোষক শ্রেণীর সশস্ত্র আক্রমণের বিরুদ্ধে তাহাদের প্রতিরোধ সংগ্রামের কিছুটা প্রামাণ্য রিপোর্ট ও এই সংস্করণে সংযোজিত হইল।

ত্রিশের দশকের শেষ দিকে রাজবন্দী জীবন হইতে মুক্তি পাইয়াই কমিউনিষ্ট পার্টির নির্দেশে কৃষক সভার কাজে আত্মনিয়োগ করি। ১৯৪০ হইতে ১৯৫৪ সন পর্য্যন্ত আমি প্রধানতঃ ময়মনসিংহ জেলার পাহাড় সীমান্ত অঞ্চলে আদিবাসী কৃষকদিগের মধ্যে থাকিয়া তাহা-দিগকে ব্রিটিশ সাম্রাজ্যবাদ ও সামন্ততন্ত্রের বিরুদ্ধে সচেতন ও সংগ্রামে সংগঠিত করিতে চেষ্টা করি। সেই সুবাদে তাহাদের সমাজ জীবন হইতে বিস্ময়কর ও আকর্ষণীয় অনেক শিক্ষাই আমি লাভ করিয়াছি, এইগুলি আমার জীবনে অবিস্মরণীয় পরম সম্পদস্বরূপ।

দেশ বিভাগ ও রাজনৈতিক বিপর্যয়ের ফলে এই অঞ্চলের প্রায় সমস্ত আদিবাসী কৃষকই মেঘালয়, আসাম, অরুণাচল, নাগাল্যান্ড ও দণ্ডকারণ্য প্রভৃতি স্থানে বিক্ষিপ্তভাবে উদ্বাস্তু জীবন যাপন করিতে বাধ্য হইয়াছেন। এখন তাহাদের সম্মুখে কোন রাজনৈতিক নেতৃত্ব ও আর্থিক সাহায্য প্রাপ্তির সম্ভাবনা নাই, কিন্তু তবুও লালবাণ্ডাকে তাহারা ভুলে নাই। সমাজতন্ত্রে বিশ্বাসী সমস্ত দলমতের প্রতি তাহারা গভীর আস্থা-শীল। তাই তাহাদের প্রতি আজ আমি দেশবাসীর দৃষ্টি আকর্ষণ করি।

আমি লেখক নই। লেখা আমার পেশা নয়, শখও নয়। তবুও কেন এই বই লেখায় হাত দিলাম? ভূমিকায় শ্রদ্ধেয় অধ্যাপক শ্রীযুক্ত

হীরেন্দ্র নাথ মুখোপাধ্যায়, মহাশয় যাহা বলিয়াছেন—তাহাই আমার অন্তরের কথা। তাঁহার লেখা এই ভূমিকা বইখানার মূল্য ও মর্যাদা বৃদ্ধি করিয়াছে। এই জন্য আমি তাঁহার নিকট কৃতজ্ঞ রহিলাম।

আমার বিশ্বাস ১৭৫৭ সালের পরবর্তীকালে ভারতবর্ষের যেখানে যত কৃষি সংগ্রাম বা কৃষক বিদ্রোহ হইয়াছে, তাহার মধ্যে ময়মনসিংহ জেলার কৃষকদের খণ্ড বিক্ষিপ্ত স্বতঃস্ফূর্ত বিদ্রোহগুলি বিশেষভাবে উল্লেখযোগ্য। দ্বিতীয় মহাযুদ্ধ ও যুদ্ধোত্তর যুগের আন্দোলনগুলি তো আমাদের জাতীয় যুক্তি সংগ্রামে অগ্রতম শ্রেষ্ঠ নিদর্শন। তাই ময়মনসিংহ জেলার কৃষক সংগঠন ও কৃষকদের বহুমুখী সংগ্রাম এক সময় সারা ভারত কৃষক আন্দোলনকে উৎসাহিত ও অনুপ্রাণিত করিত। আজ পৃথক এক রাষ্ট্রের অন্তর্ভুক্ত হওয়া স্বত্ত্বেও তাঁহাদের অতীত অবদানকে আমরা অস্বীকার করিতে পারি না। সংগ্রামী কৃষকদের দৃষ্ট জীবন ও গৌরবোজ্জ্বল দিনগুলির কথা ভুলিতে পারি না। তাঁহাদের আত্মবলিদান স্বার্থত্যাগের আদর্শ আমাদের স্বাধীনতা আন্দোলনের ইতিহাসে অতুলনীয় সম্পদ হইয়া রহিয়াছে।

আমি জানি, ময়মনসিংহ জেলার কৃষক আন্দোলনের ইতিবৃত্ত কয়েকজন লেখক ও রাজনৈতিক নেতা বিশদভাবেই জানেন। তাঁহারা লিখিলে খুব ভালই হইত। দেশ বিভাগের বিপর্যয়ে ও বর্তমান পরিস্থিতিতে হয় তো তাঁহারা অগ্রত ব্যাপৃত। অথচ আমাদের জাতীয় মুক্তি আন্দোলনের একটি গৌরবময় অধ্যায় উপেক্ষায় ক্রমশ বিশ্বস্তির অতলে ডুবিয়া যাইতেছে। ভবিষ্যৎ ঐতিহাসিকদের অনুসন্ধানী দৃষ্টি আকর্ষণ করিবার মতো কোন নিদর্শন থাকিতেছে না, এই কথা স্মরণ করিয়াই আমি আমার সমস্ত অক্ষমতা ও দুর্বলতা সম্পর্কে সম্পূর্ণ সচেতন থাকিয়া ময়মনসিংহ জেলার কৃষক আন্দোলনের কিছুটা অংশ, —পাহাড় সীমান্ত অঞ্চলের কৃষকদের ঐতিহ্যময় আন্দোলনকে সংক্ষিপ্তভাবে লিপিবদ্ধ করিতে চেষ্টা করিলাম। কারণ, সমস্ত বিষয় বিশদভাবে বর্ণনার এখনও অনুকূল পরিবেশ সৃষ্টি হয়

নাই। আমি আশা করি ভবিষ্যতে যে-কোন যোগ্য ব্যক্তি সমস্ত ময়মনসিংহ জেলার কৃষক আন্দোলনের এক পূর্ণাঙ্গ ইতিহাস আরো উন্নততর ও বিস্তৃতভাবে রচনা করিবেন।

দেশ বিভাগের বিপর্যয়—পুনঃপুনঃ সাম্প্রদায়িক দাঙ্গা এবং কায়েমী স্বার্থের অবিরাম অত্যাচার উৎপীড়ন সত্ত্বেও এই “এই আংশিক শাসন-সংস্কার বহির্ভূত” অঞ্চলের আদিবাসীগণ তাঁহাদের সুপ্রাচীন আবাসভূমি ত্যাগ করার কথা কল্পনা করেন নাই। কিন্তু সম্প্রতি সংবাদ পাওয়া যাইতেছে যে নিতান্ত অনিবার্য কারণে নিরুপায় হইয়াই তাহারা নিজেদের আবাসভূমি চিরতরে ছাড়িতে বাধ্য হইতেছেন। এই সব উদ্বাস্তু আদিবাসীগণ আসামের গারো হীলস্, খাসি হীলস্, গোয়ালপাড়া, কামরূপ ও দরং জেলার বিভিন্ন স্থানে বিচ্ছিন্নভাবে আশ্রয় লইতেছেন। তাঁহাদের মধ্যে বিশেষ করিয়া হাজং, ডালু ও হদি সম্প্রদায়ের কৃষকগণ শতাব্দীকাল যাবৎ বাঙালী হিন্দু-সংস্কৃতির প্রভাবে পরিবর্তিত হইতেছিলেন। আমাদের স্বাধীনতা আন্দোলনের বিভিন্ন স্রোতধারার সাথে যুক্ত হইয়া অনেক দূর অগ্রসর হইয়াছিলেন। আজ আবার তাঁহাদের জীবন বিকাশের পথে এক কঠিন সঙ্কট উপস্থিত। সমাজতান্ত্রিক ভাবধারা ও স্বাধীন ভারতের প্রগতিশীল গণআন্দোলনই তাঁহাদের একমাত্র ভরসা। এই ছিন্নমূল চাষীদের প্রতি দেশবাসীর দৃষ্টি আকর্ষণ করিতে চাই।

এই বইয়ের প্রথম রচনা পড়িয়া সংশোধন করিয়া দিয়াছেন শ্রীজিতেন্দ্রনাথ সেন এবং পাণ্ডুলিপি ‘কপি’ করা হইতে শুরু করিয়া ইহা পুস্তকাকারে প্রকাশ করা পর্যন্ত সমস্ত রকম পরিশ্রম ও পরামর্শ দিয়া সাহায্য করিয়াছেন বন্ধুবর শ্রীজলধর পাল। আর হাজং নেতা ললিত সরকার প্রমুখ খ্যাত-অখ্যাত কৃষক ভাইদের কাছ হইতে পাইয়াছি বিভিন্ন তথ্য। তাঁহাদের সকলের সক্রিয় সাহায্য না পাইলে এই বই লেখার দায়িত্ব কিছুতেই পালন করিতে পারিতাম না। এই বইয়ে প্রকাশিত ফটোগুলি বিখ্যাত আলোকচিত্র-শিল্পী শ্রীযুক্ত সুনীল কুমার জ্ঞানার দান। তাঁহাদের সকলের নিকট আমি ঋণী।

(ঘ)

একদিন কমরেড মুজফ্ফর আহমদ-এর নির্দেশ ও পরামর্শে কৃষক আন্দোলনে যোগদান করিয়াছিলাম। আজ তাঁহার পরিচয় পত্র লইয়া বইখানা আত্মপ্রকাশ করিতেছে। ইহা আমার পরম গর্বের কথা। আমার রাজনৈতিক সন্তা যাহার কাছে ঋণী তাঁহার কাছে নূতন করিয়া ঋণ স্বীকারের অবকাশ কোথায় ?

পরিশেষে, এই পুস্তক প্রকাশে প্রতি পদক্ষেপে সাহায্য পাইয়াছি সতীর্থ জলধর পালের—তাহার নিকট ঋণ অপরিশোধ্য। সেই সাথে কৃতজ্ঞতা জানাই মনিষা গ্রন্থালয় প্রাঃ লিমিটেডের পরিচালক মণ্ডলী ও কর্মীদের।

‘বলরাম ভবন’

৬ নং, শেঠ বাগান প্লেস,  
কলিকাতা-৩০

প্রমথ গুপ্ত

## ভূমিকা

সাগর পার হয়ে এসে গ্রীষ্টান পাদ্রির। আজ কয়েক পুরুষ ধরে আমাদের দেশের বিভিন্ন আদিবাসী অঞ্চলে ধর্ম প্রচার ব্যাপদেশে বসবাস করেছেন, তাদের ভাষা, রীতি-নীতি ইত্যাদি আলোচনা করেছেন, ভারতের সামগ্রিক জীবন থেকে যাতে বিচ্ছিন্ন হয়ে থেকে দেশের সংহিতিকে দুর্বল করে ফেলে, জ্বাতে বা অজ্বাতে সেই চেষ্টায় লেগে থেকেছেন। এদের দোষ দিয়ে নিজেদের দোষস্বালনের অভ্যাস আমাদের আছে, কিন্তু সে-অভ্যাস ছাড়তে পারলেই মঙ্গল। শ্রীযুক্ত প্রমথ গুপ্ত ময়মনসিংহের পার্বত্য সীমান্তের আদিবাসীদের নিয়ে এই গ্রন্থটি রচনা করে তাই আমাদের ধন্যবাদাহ'।

দেশ বিভাগের মূল্য দিয়ে স্বাধীনতা সংগ্রহ করার কিছু আগে ময়মনসিংহ জেলার হাজং কৃষকেরা 'তেভাগার' লড়াইয়ে দেশজোড়া খ্যাতি লাভ করেছিলেন। আজ পাকিস্তানের উদ্ভট রাজনৈতিক আবহাওয়ায় অ-মুসলমান বলে উপেক্ষিত জীবন-যাপন তাঁরা করেছেন। সর্ববিধ জনপ্রচেষ্টা সেখানে স্তব্ধ-শৃংখলিত অবস্থায় আছে বলে নিরন্তর অসস্তির মধ্যে বাস করেছেন। তাঁদের কথা আমরা যখন ভুলতে বসেছি তখন এ-বইয়ের প্রকাশ খুবই সময়োচিত হয়েছে।

আমাদের দেশের আদিবাসী যারা, তাদের সম্বন্ধে জিজ্ঞাসা, আগ্রহ ও সৌহার্দ্যের অভাব আমাদের যে কবে ঘুচবে, কে জানে? আমরা মাঝে মাঝে বলেই খুশী যে আমাদের ইতিহাসে আছে সহিষ্ণুতার পরাকর্ষা, আদিম সভ্যতাকে প্রগতির রথচক্রে নির্মমভাবে গুঁড়িয়ে ফেলার মনোবৃত্তি আমাদের পূর্বপুরুষেরা দেখাননি। কথাটা যে ভুল, তা নয়। ভারতবর্ষের বহুমুখী, জটিল সংস্কৃতিতে আদিবাসীদের স্থান আছে, বেশ সহজ ও স্বচ্ছন্দভাবেই আছে। কিন্তু জাতিভিত্তিক সমাজে এই স্বাধীনতাপ্রিয় আদিবাসীর উপেক্ষিত



হয়ে এসেছে। এখনও তাদের সম্পর্কে আমাদের মনোভাব প্রকৃত সহানুভূতির সিঁধে বিকশিত হয়নি।

এটা যে একান্ত পরিতাপের বিষয় তা বহু সূত্র থেকেই আমরা বুঝি। প্রাতঃস্মরণীয় বিজ্ঞানাগর মহাশয় এই সরল আদিবাসীদের সত্যসন্ধতায় মুগ্ধ হয়েছিলেন, তাঁর দরাজ বুকে বাংলা-বিহারের সাঁওতালরা মস্ত বড় একটা জায়গা জুড়ে থেকেছে। যারাই আমাদের আদিবাসীদের কোলে টানতে পেরেছে, তাদের কাছেই আমরা জেনেছি তাদের স্বভাবমাদুর্যের কথা।

কিন্তু শুধু প্রকৃতির শিশু হিসাবে তাদের দেখলে প্রচণ্ড ভুল ঘটবে। একটা জায়গায় আমাদের আদিবাসীরা একেবারে সুপরিণত, নিজেদের সত্তা সম্বন্ধে পরিপূর্ণ সজাগ। ঠিক এ জন্মই দেখি যে দেশের দুর্দশায় তারা মুক-বধির অবস্থায় স্থির হয়ে থাকেনি, লড়াইয়ের ময়দানে অকুতোভয় মন নিয়ে ঝাঁপিয়ে পড়ছে।

কেন যে আমরা মনে রাখি না ১৮৫৫-৫৬ সালের সাঁওতাল বিদ্রোহের কথা, যা ইংরেজ রাজত্বের আঁতে ঘা দিতে পেরেছিল? কার মনে আছে বারবার ছোটনাগপুরের কোল, মুণ্ডা, সাঁওতালদের অসমসাহসিক অভ্যুত্থানের কথা, যা ঘটেছিল ১৮৩১, ১৮৭১, ১৮৯৮-১৯০০ সালে? তাদের নেতা ভগরিং আর বিরসার কথা আমরা ক'জন জানা দরকার মনে করি? আজও যখন নাগা অঞ্চলে বিদ্রোহ হয়, কিনা আসামের পার্বত্য এলাকার উপজাতিদের হাজার নালিশ জড়ো হওয়ার খবর পাই, তখন ঘরে বসে খবরের কাগজ পড়ে বোধ হয় মনে করি যে এগুলো ছোটখাট আপদ, এর কোন অর্থ নেই, গোলাগুলি চালিয়ে সহজেই এদের দাবিয়ে রাখা চলে। আমাদের মধ্যে ক'জন ভাবি যে প্রকৃতপক্ষে ভারত যখন স্বাধীন জীবন যাপন করবে, তখন এই আদিবাসীদের মধ্য থেকেই তো আমাদের কয়েকজন শ্রেষ্ঠ নায়ক খুঁজে পাব— মধ্যপ্রদেশের জঙ্গল আর আসামের পাহাড় থেকে অনেক ভারতরত্নের সাক্ষাৎ পেয়ে আমরা গর্ব করব?

(ছ)

কথা বাড়াবার দরকার নেই। হাজংদের কাহিনী নিয়ে গ্রন্থকার বইটি লিখেছেন, দরদ দিয়ে লিখেছেন, যথাসাধ্য অনুসন্ধান করে লিখেছেন। তিনি নিজে ময়মনসিংহের গারো পাহাড় এলাকায় বহুদিন থেকেছেন, হাজং প্রভৃতি উপজাতিদের সঙ্গে ঘনিষ্ঠভাবে মিশেছেন। একেবারে পক্ষপাতহীন পণ্ডিতী বিবরণ লিখতে ইনি পারেননি—সেজ্ঞা পাঠকই তাঁকে ধন্যবাদ দেবেন। পক্ষপাত পরিপূর্ণ যিনি বর্জন করতে পারেন, তিনি তুরীয় মার্গে বাস করতে পারেন, কিন্তু ইতিহাস লেখা তেমন ব্যক্তির কর্ম নয়। প্রমথবাবুর এই আদিবাসীদের সম্বন্ধে পক্ষপাত আছে, আর থাকবে না-ই বা কেন? তিনি কিশোর বয়স থেকে রাজনীতি করেছেন, ইংরেজ আমলে বহু বৎসর রাজবন্দী থেকেছেন, মার্কসবাদকে বোঝার চেষ্টা করেছেন। কৃষক-আন্দোলনে সক্রিয় থেকেছেন। আমি তাঁর এই লেখাকে স্বাগত জানাচ্ছি, আর চাইছি যে এর যেন বহুল প্রচার ঘটে।

হীরেন্দ্রনাথ মুখোপাধ্যায়

“মুক্তিযুদ্ধে আদিবাসী”র লেখক পাকিস্তানের (অধুনা বাংলাদেশ) ময়মনসিংহ জিলায় জন্মেছেন। কিশোর বয়সে তিনি সন্ত্রাসবাদী বিপ্লবী দলের (‘যুগান্তর’ গ্রুপের) সংস্পর্শে আসেন। ১৯৩০ সালে আইন অমান্ত আন্দোলনে যোগ দিয়ে তিনি তিন মাস জেলও খাটেন। ১৯৩১ সালে তিনি “শালধা ডাকাতি” মকদ্দমায় অভিযুক্ত হন এবং বিচারে বে-কসুর ছাড়া পেয়ে যান। সেকালে বৈপ্লবিক কাজ চালানোর উদ্দেশ্যে সন্ত্রাসবাদী বিপ্লবীরা ডাকাতি ক’রেও অর্থ সংগ্রহ করতেন।

কথায় বলে ‘বাঘে ছুঁলে আঠারো ঘা।’ ডাকাতির মোকদ্দমা হতে বে-কসুর খালাস পেয়েও কমরেড প্রমথ গুপ্ত রেহাই পেলেন না। ১৯৩২ সালে ভারতের ব্রিটিশ গভর্নমেন্ট তাঁকে বিনা বিচারে বন্দী করলেন এবং তাঁকে ক্রমান্বয়ে পাঁচ বছর কাটাতে হলো হিজলী ও দেউলির বন্দীশিবিরে। তারপরে তিনি কিছুকাল আটক থাকলেন উত্তরবঙ্গ ও পশ্চিমবঙ্গের বিভিন্ন গ্রামে। বন্দীদশায় অগ্র অনেক সন্ত্রাসবাদী বিপ্লবীদের মতো কমরেড প্রমথ গুপ্তও মার্কসবাদ-লেনিনবাদের প্রতি আকৃষ্ট হন। ১৯৩৮ সালে তিনি মুক্তি পান। তার পরেই হয় তাঁর সঙ্গে আমার প্রথম পরিচয়।

ভারতের কমিউনিষ্ট পার্টি তখন বে-আইনী প্রতিষ্ঠান ছিল। তবে নানান কারণে, বিশেষ করে মীরট কমিউনিষ্ট ষড়যন্ত্র মোকদ্দমায় আমার বিচার হওয়ায় বন্দীশিবিরে ও জেলে মার্কসবাদ-লেনিনবাদ-পড়া মুক্ত রাজবন্দীরা ধ’রে নিতেন যে আমি ভারতের কমিউনিষ্ট পার্টির একজন স্বেচ্ছা। তাঁরা আমার নিকটে এসে ভারতের কমিউনিষ্ট পার্টিতে তাঁদের যোগ দেওয়ার ইচ্ছা আমায় জানাতেন। ১৯৩৮ সালে কমরেড প্রমথ গুপ্তও এই সূত্র ধরেই আমার নিকটে এসেছিলেন এবং বলেছিলেন যে তিনি কমিউনিষ্ট পার্টিতে যোগ দিতে চান। তখনকার

দিনের নীতি অনুসারে আমি তাঁকে তাঁর নিজের জিলা ময়মনসিংহে গিয়ে কৃষক সংগঠন গড়ে তুলতে অমুরোধ করেছিলাম এবং ব'লে দিয়েছিলাম যে এই কাজের ভিতর দিয়েই তাঁকে পার্টির সভ্যপদ অর্জন ক'রে নিতে হবে। বলা বাহুল্য, তিনি পার্টির সভ্যপদ অর্জন করেছিলেন।

ময়মনসিংহ জিলার আদিবাসী অঞ্চলের কৃষকদের কৃষক সমিতিতে সজ্জবদ্ধ করার অবিরাম চেষ্টাই শুধু তিনি করেননি, আদিবাসী কৃষকেরা যে বীরত্বপূর্ণ সংগ্রাম চালিয়েছেন সেই সংগ্রামেরও তিনি একজন সংগঠক। ব্রিটিশ আমলে তিনি এই সংগ্রামে লিপ্ত তো ছিলেনই, দেশ ভাগ হওয়ার পরেও, অর্থাৎ পাকিস্তানী আমলেও তিনি সংগ্রামে লিপ্ত থেকেছেন।

ভারতের কত জায়গায়, দেশ ভাগ হওয়ার পরে ভারত ও পাকিস্তানের কত জায়গায় জনগণের কত সংগ্রাম যে হয়ে গেছে কালীর আঁচড়ের ভিতরে ধরে না রাখলে দেশ এই সকল সংগ্রামের কথা বিলকুল ভুলে যাবে। অথচ এই সমসাময়িক ঘটনাগুলি জড়ো করেই তো ভবিষ্যতের ইতিহাস রচিত হবে। ধনিক-বণিক-জমীদারের পার্টি ইণ্ডিয়ান ন্যাশনাল কংগ্রেস আজ ভারতের শাসন ক্ষমতায় জঁাকিয়ে বসেছেন। এই ক্ষমতার সুযোগ নিয়ে বিরামহীন প্রচারের দ্বারা তাঁরা জনসাধারণের মনে বিশ্বাস জন্মিয়ে দিচ্ছেন যে কংগ্রেসই দেশে স্বাধীনতা এনেছেন। কথাটা ষোল আনা সত্য নয়। দেশের স্বাধীনতা লাভে কংগ্রেসের কোনো অবদানই নেই এমন কথা আমি বলতে চাইনে, কিন্তু স্বাধীনতা এসেছে বহুকালের বহু সংগ্রামে হাজার হাজার লোকের জীবন বলিদানের ভিতর দিয়ে। ভারতের বহু জায়গায় বহু কৃষক-অভ্যুত্থান হয়েছে। তার অনেকগুলি সশস্ত্র অভ্যুত্থান। সন্ত্রাসবাদী বিপ্লবী আন্দোলন আমাদের জীবনকালের ঘটনা। সব কিছুর ওপরে আমরা দেখেছি নৌবিদ্রোহ। এই নৌবিদ্রোহই শেষে ব্রিটিশের মন ভেঙে দিয়েছিল। তাঁরা বুঝেছিলেন এই দেশের শাসন ক্ষমতায় তাঁদের আর থাকা চলবে না। ইংরেজ এই দেশ

ছেড়ে চলে যেতে বাধ্য হওয়ায় তাঁদের সমশ্রেণীর কংগ্রেসের হাতে আপোসে ক্ষমতা দিয়ে গেছেন। কংগ্রেস ক্ষমতা দখল করেনি। পাকিস্তানে মুসলিম লীগ সম্বন্ধেও এই একই কথা। এক সময়ে কংগ্রেসের মঞ্চ হতে স্বাধীনতার কথা উচ্চারণ করাও নিষিদ্ধ ছিল। তার লক্ষ্য ছিল ব্রিটিশ সাম্রাজ্যের ভিতরে ডোমিনিয়ন স্টেটাস্ লাভ। ১৯২৮ সালের মোতিলাল নেহরু কমিটির কথা কে না জানেন ?

কমরেড প্রমথ গুপ্ত তাঁর অভিজ্ঞতা হতে “মুক্তিযুদ্ধে আদিবাসী” লিখেছেন। যে সব কথা দেশ হয় তো ভুলে যেত সে সব কথা তিনি যে ভবিষ্যতের ঐতিহাসিকদের জগ্নে লিখে রাখলেন তার জগ্নে তাঁকে আমি অভিনন্দন জানাই।

মুজফ্ফর আহমদ





## পাহাড় সীমান্ত অঞ্চল

শিক্ষিত ভারতবাসী আদিবাসী সমাজ সম্বন্ধে খোঁজ খবর করলে আরও বহু আদিবাসী বীর ও শহীদেব কথ্য জানতে পারবেন। আদিবাসীদের রাজনৈতিক তথ্য ব্রিটিশ বিরোধী সংগ্রামের ইতিহাসে শ্রদ্ধার সঙ্গে স্মরণ ও আলোচনা ভারতীয় সমাজে সাধারণতঃ দেখতে পাওয়া যায় না। যুদ্ধে আদিবাসীদের শোণিত তর্পণ বহু পার্বত্য উপত্যকায় ও অরণ্যভূমিতে বহু পবিত্র হলদীঘাট রচনা করেছে। সে কাহিনী আজও নিরালা বনমর্মরের মতো ভারতীয় নাগরিকের কাছ থেকে দূরে রয়ে গেছে। (ভারতের আদিবাসী : সুবোধ ঘোষ)

ময়মনসিংহ জেলার পাহাড় সীমান্ত অঞ্চলের আদিবাসী কৃষকদের বীরত্বপূর্ণ সংগ্রাম কাহিনী জাতীয় আন্দোলনের ইতিহাসে আজও কোন স্থান পায় নাই। এই সুবিস্তীর্ণ অঞ্চলের হাজং, ডালু, কোচ, বানাই, হুদি (ক্ষত্রিয়) ও গারো চাষীদের কৃষিবিপ্লব তথ্য ব্রিটিশ-বিরোধী মুক্তি সংগ্রামের ধারাবাহিক বিবরণ আজও আমাদের জাতীয় ইতিহাসে উপেক্ষিত ও অনাদৃতই রহিয়াছে। অথচ অসহযোগ আন্দোলন, আইন অমান্য আন্দোলন ও যুদ্ধোত্তর যুগের প্রতিটি মুক্তি-সংগ্রামে এই আদিবাসী কৃষকদের গৌরবময় ভূমিকা ও আত্মোৎসর্গ মোটেই নগণ্য বা ভুলিবার মতো নয়। ইহাদের হৃদয় সংগ্রাম এক-দিকে যেমন আঞ্চলিক, খণ্ড বিক্ষিপ্ত বিদ্রোহ ও স্বতঃস্ফূর্ত অভ্যুত্থান—অন্যদিকে আবার তেমনি জাতীয় ও আন্তর্জাতিক সাত্ত্ববাদ বিরোধী মানবমুক্তি সংগ্রামের সঙ্গে যুক্ত ও সমআদর্শে উদ্ভূত। ভারতের জাতীয় মুক্তি-আন্দোলনে ইহাদের আত্মবলিদান, স্বার্থত্যাগ ও সর্ব-প্রকার নির্ধাতন ও দুঃখবরণ বাস্তবিকই সপ্রতাপভাবে স্মরণ করিবার মতো,—আমাদের স্বাধীনতা সংগ্রামের অমর ইতিহাসে ইহা



নিঃসন্দেহেই একটি গৌরবময় অধ্যায়। স্বাধীনতা-উত্তর যুগের শিক্ষিত ভারতবাসীদের কাছে এই সংগ্রামের সংক্ষিপ্ত পরিচয় প্রদান ও ভবিষ্যৎ ঐতিহাসিকের অপেক্ষায় ইহার প্রধান প্রধান সূত্রগুলিকে সযত্নে রক্ষা করাই এই ক্ষুদ্র পুস্তিকা প্রণয়নের মূল উদ্দেশ্য।

কিন্তু সন্ধ্যায় প্রদীপ জ্বলাইতে হইলে যেমন সকালেই সলিতা পাকাইতে হয় তেমনি গারো পাহাড় সীমান্তের এই আদিবাসী জনতার সংগ্রামের কাহিনী বর্ণনা করিতে হইলেও প্রথমেই প্রয়োজন এই অঞ্চলের ভৌগোলিক অবস্থান ও এখানকার আদিবাসীদের অতীত ও বর্তমান জীবনপদ্ধতি সম্বন্ধে দুই চারিটি কথা বলা। মূল কাহিনী অনুসরণ ও উপলব্ধির পক্ষে এইটুকু নিতান্তই অপরিহার্য। ময়মনসিংহ জেলার উত্তরে গারো পাহাড়। ছোট বড় অসংখ্য পাহাড়। ঘন নীল গহন বন, অজস্র ঝরণা, নদী ও উপলে ঘেরা এই সীমান্ত প্রায় দুই লক্ষ আদিবাসীর শান্ত আবাসভূমি।

প্রাকৃতিক সৌন্দর্যের লীলাভূমি এই গারো পাহাড়। এই পাহাড়ের পাদদেশে দক্ষিণে ব্রহ্মপুত্র নদ এবং পূর্বে শ্রীহট্ট জেলার বিশরপাশা থানা হইতে পশ্চিমে রংপুর জেলা পর্যন্ত সুবিস্তীর্ণ শ্যামল সমতল অঞ্চল জুড়িয়া হাজং, ডালু, বানাই, কোচ, হদি ক্ষত্রিয় ও গারো আদিবাসীদের বাস। এই জেলায় হুইটি পরগণা—সুসং, সেরপুর এবং তিনটি মহকুমা—জামালপুর, সদর-উত্তর ও নেত্রকোণার মোট সাতটি থানা—সেরপুর, নখলা, শ্রীবর্দি, নালিতাবাড়ী, হালুয়াঘাট, সুসং দুর্গাপুর ও কলমাকান্দা এবং শ্রীহট্টের বিশরপাশা থানার সমভূমি হইতেছে আদিবাসী কৃষকদের আন্দোলন ও সংগ্রাম ক্ষেত্র।

ময়মনসিংহের এই পাহাড় সীমান্ত অঞ্চল পূর্ব বাংলার অন্যতম শ্রেষ্ঠ শস্য ভাণ্ডার। সেরপুর, শমুগঞ্জ, নালিতাবাড়ি, চন্দ্রকোণা, নখলা, হালুয়াঘাট, মুন্সিরহাট, কলসিন্দুর, শিবগঞ্জ, দুর্গাপুর, কল-মাকান্দা, নাজিরপুর, তাহিরপুর প্রভৃতি ইহার প্রধান বন্দর ও গঞ্জ। এই সব বন্দর হইতে প্রতি বৎসর লক্ষ লক্ষ মন উৎকৃষ্ট ধান, পাট, পরিষা, লঙ্কা, তুলা, মুরী, মোম, কলা, কমলা, আনারস, আলু, মধু,

কচু প্রভৃতি কৃষিজাত দ্রব্য এবং শাল (গজারী) কাঠ, বাঁশ, জ্বালানী কাঠ প্রভৃতি বনজ সম্পদ সারা বাংলার বিভিন্ন স্থানে রপ্তানী হইত।

কর্ণঝোরা, ভটপুর, বিনাইগাতী, বারোয়ামারী, নল্লী, হাতী, পাগার, বাঘাইতলা, ফুলবাড়ী, ঘোষণাও, কামারখালি, লেঙ্গুরা, খাড়নে এবং পোড়াকশিয়া, ডালু, বাঘমারা, শিববাড়ী, মহিষখলা প্রভৃতি হইতেছে এই অঞ্চলের আদিবাসীদের প্রধান হাট-বাজার। এই সব হাট-বাজারেই প্রথম আমদানি হয় পাহাড়ের সব রকম কৃষি পণ্য সামগ্রী। তারপর আদিবাসীদের নিজস্ব বুলিতে টাকার মাধ্যমে অথবা লবণ, কেরোসিন, মোটাসুতা, শুকনামাছ প্রভৃতির বিনিময়ে এইগুলি বিকিকিনি হইত। মাপজোক, ওজন, গুণতি এবং দরদস্তুর সবই হইত খুব সহজ ও সরল আদিম পদ্ধতিতে।

মালঝিং, থলং, ভোগাই, নিতাই, সুরেশ্বরী, গণেশ্বরী, মহাদেব, দর্শা এবং কংস হইতেছে এই অঞ্চলের ছোটবড় নদী-উপনদী—এই সব দ্রব্য আমদানী-রপ্তানীর প্রধান জলপথ। চুর্গম গারো পাহাড় হইতে এই সব নদীর জলে ভাসাইয়া আনা হইত বিভিন্ন বনজ সম্পদ যেমন গজারী, তারাই বাঁশ প্রভৃতি। ধানশাইল, কালীনগর, চুয়া, খুলিয়া, চিনাকুরী, প্রভৃতি প্রতিটি বিরাট বিরাট বিল ও হাওড় হইল এই অঞ্চলের জলাভূমি—মাছের জন্য বিখ্যাত। তাহা ছাড়া মাঝে মাঝে সামান্য ছোট ছোট বন জঙ্গল ও টিলা (Hillock) বাদ দিলে সমস্ত অঞ্চলটাই হইল অবাদযোগ্য কৃষিভূমি।

সোমেশ্বরী নদী গারো পাহাড়ের কোরকুক শিখর হইতে প্রবাহিত হইয়া তুরা ও আরবেলা পর্বতশ্রেণীর জলধারা লইয়া সুরংএর সমভূমিকে সিঞ্চিত করিতেছে। আর নকরেক শিখর হইতে বাহির হইয়া দূরবান্দা গিরি, সান্দং, লোগা, চন্দাপাড়া, বান্দাপানি ও ভগী গিরির অসংখ্য ঝর্ণাধারা বৃকে লইয়া—ভোগাই নদী প্রবাহিত হইয়াছে নলিতাবাড়ীর মধ্য দিয়া দক্ষিণের কংস নদী পর্যন্ত। প্রধানত, এই সোমেশ্বরী ও ভোগাই নদী বিধৌত সমভূমিতেই হাজং, ডালু, বানাই, কোচ, হদি ও গারো উপজাতীয়দের বাস।

সমভূমির এই সুবিস্তীর্ণ অঞ্চলের আদিবাসীদের মধ্যে হাজং সম্প্রদায়ই অগ্রগন্য। তাই স্বাভাবিকভাবেই সর্ববিষয়ে তাহাদের ভূমিকাই প্রধান।

## হাজং

নৃতাত্ত্বিক পরিচয়ের দিক হইতে হাজংদের বলা যায় আদি মঙ্গোলীয় (Pale-Mongoloid) বা অষ্ট্রিক জাতীয়। ইহাদের দেহের রং পীতাভ, নাক চেপ্টা, চক্ষু গোল, মুখমণ্ডল শাশ্রু বিরল, শরীরের গঠন দৃঢ় ও মজবুত। ইহারা কষ্টসহিষ্ণু, পরিশ্রমী, নির্ভীক ও আনন্দপ্রিয়, — একান্তভাবে বিশ্বস্ত, সরল, বন্ধুবৎসল ও অতিথি-পরায়ণ। শোনা যায় যে সুদূর অতীতে ইহারা বর্মা ও ইন্দোচীন হইতে আসাম প্রদেশের কামরূপ জেলার অন্তর্গত হাজো নগরে আসিয়া প্রথম বসতি স্থাপন করে। কথিত আছে যে হাজো নগরের ভাস্কর বর্মা নাকি হাজংদের পূর্বপুরুষ। পরবর্তীকালে জীবন ও জীবিকার প্রয়োজনে এবং তাহার উপায় উপকরণের তাগিদে ইহারা ছোট ছোট দলে বিভক্ত হইয়া আসামের গোয়াল পাড়া ও গারো হীলস জেলার অপেক্ষাকৃত সমতল ভূমিতে এবং রংপুর জেলার সামান্য অংশে ও সমগ্র উত্তর ময়মনসিংহের উর্বরভূমিতে ছড়াইয়া পড়ে। হাজংদের এই সব ছোট ছোট দল নিজেদের প্রয়োজনীয় সাধারণ তৈজসপত্র, তীর, ধনুক, ঢাল, তলোয়ার, বল্লম, চেণ্ডয়ার প্রভৃতি নানা ধরণের সহস্রে তৈয়ারী লোহার অস্ত্রশস্ত্র এবং লাউল-জোয়াল, গরু, মহিষ প্রভৃতিসহ কিছুটা দূরে দূরে এক একটি পাড়া গড়িয়া তোলে ও বসবাস শুরু করে। নিজেদের সমবেত শক্তিতে

ক্রমে তাহারা স্রুং ও সেরপুর অঞ্চলের বহু স্থান অধিকার করিয়া বসে। স্রুংলা স্রুংলা ভূমি পাইয়া এই অঞ্চলের বিরাট বিরাট বন জঙ্গল কাটিয়া তাহারা আবাদযোগ্য ভূমিতে পরিণত করে।

রংপুরের কড়ইবাড়ী, পুঠিমাড়ী, বারোহাজারী হইতে আরম্ভ করিয়া দশ কাহনিয়া, সেরপুর, স্রুং ছুর্গাপুর, বংশীকুণ্ডা, লাউর পর্যন্ত বিস্তীর্ণ অঞ্চলের বিভিন্ন স্থানে তাহারা স্থায়ী বসতি স্থাপন করে। জনশ্রুতি আছে যে ব্রহ্মপুত্র নদের দক্ষিণ-পূর্ব তীরে জিজিরাম ও কালোনদী বিধৌত উর্বর ভূমিতে হাজং সদীর কমলাকান্ত ও মহন্ত কুমার এক সময় একচ্ছত্র রাজা ছিলেন। হাজংদের এইসব বসতি স্থাপনের সময় কৃষিকার্যে পশ্চাৎপদ গারোদের সঙ্গে তাহাদের ছোট ছোট সংঘর্ষ ঘটে। হাজংরা চাষ করিত হালের সাহায্যে আর গারোরা করিত “জুম”\* চাষ। সংঘর্ষের ফলে গারোরা ক্রমে সমতলের জমি হইতে সরিয়া দাঁড়াইল। কেবল জুম চাষের জমি রহিয়া গেল গারোদের দখলে।

হাজংদের নামাকরণ সম্বন্ধেও একাধিক মত বর্তমান। এক মতানুযায়ী হাজো নগর হইতে আগত বলিয়া তাহারা হাজং নামে পরিচিত। দ্বিতীয় মতে হাজংরা যেহেতু হাল চাষ করিয়া জীবনযাত্রা নির্বাহ করেন এবং কৃষিকার্যে তাহাদের যথেষ্ট নৈপুণ্য আছে তাই তাহাদের বলা হয় হাজং। কারণ, গারো ভাষায় হাজং শব্দের আক্ষরিক অর্থ মাটির পোকা। “হাজং কুল প্রদীপ” নামক গ্রন্থে বলা হইয়াছে, ভারত ভূখণ্ডের যে অংশে আমরা অবস্থান করিতেছি ইহাতে বহু শ্রেণীর হিন্দু ও অহিন্দু বসতি করেন। তন্মধ্যে হাজং একটি গণনীয় ও বরণ্য জাতি। এই জাতি বাংলা ও আসামের কিয়দংশ স্থান ব্যাপিয়া অবস্থিতি করিতেছে ইহারা ক্ষত্রিয়।” জাতিতত্ত্বের আধুনিক সংজ্ঞা অনুযায়ী অবশ্য হাজংদের একটি জাতি বলা চলে না, বলা

---

**\*জুম চাষ :**—পাহাড়ী টিলার ( Hillock ) বন-জঙ্গল আগুনে পোড়ানোর পর ঝাঁশের কাঠির সাহায্যে মাটিতে গর্ত খুঁড়িয়া তাহাতে বীজ রোপন করা হয়। ইহা আদীম প্রথা চাষ।

যায় উপজাতীয় একটি শাখা সম্প্রদায়। ইহাদের পৃথক কোন ধর্ম নাই। হিন্দুসমাজের সাথে মেলামেশার ফলে তাহারা হিন্দুধর্মের আচার-আচরণ গ্রহণে চালিত হইয়াছে। ইহারা হিন্দু ধর্মীয় অনুষ্ঠান ও উৎসব পালন করে। পূজা-পার্বনে অঞ্জলী-অর্ঘ্য প্রদান করে। বর্তমানে সাধারণ নিম্ন বর্ণের হিন্দু সম্প্রদায় বলিয়া গণ্য হয়। তাহারা কৃষিজীবী, পশু শিকার, কাঠকাটা, জ্বালানী কাঠ বিক্রয় করিয়া জীবন যাপন করে।\*

হাজংরা হিন্দু; কিন্তু দেহের গঠন ও অবয়বের দিক হইতে গারোদের সাথে সাদৃশ্য। বলা হয় স্রসং-এর রাজাগণ “হাতি খেদা” প্রস্তুত করা ও হাতি ধরার অন্য ইহাদিগকে দুর্গাপুরে আনেন; কারণ, স্থানীয় বাঙালী প্রজাগণ এ কাজে উপযোগী ছিল না।\*\*

এই জেলার কড়ইবাড়ী এলাকা সংলগ্ন সিংহীমারী অঞ্চলে অনুমান ৬০টি প্রাচীন হাজং পরিবার আছে।

তাদের প্রধান মোড়লই এই অঞ্চলের মালিক। ইহাদের জনসংখ্যা খুব কম বলিয়া সাধারণ ভাবে উল্লেখ করা যায় যে ভাষার দিক হইতে ইহারা বাংলা ভাষা গ্রহণ করিয়াছে। কিন্তু “পাতিরাভা”দের মতই নোংরা ও অপরিচ্ছন্ন রহিয়াছে। যাহা হোক মোড়ল, যাহার পূর্ব-পুরুষ দীর্ঘকাল এই অঞ্চল ভোগ দখল করিয়া আছে, নিজেদের রাজ-বংশী বলিয়া পরিচয় দিয়া থাকে এবং কিছু কিছু ভদ্র আচার ব্যবহার ও পালন করে। তাহারা শূকর বা মোরগ খায় না। প্রকাশ্যে তীব্র কোন সুরা পান করে না এবং ব্রাহ্মণের উপদেশ ও নির্দেশ গ্রহণ করে। পরবর্তীকালে বিহার রাজার নামে তাহার সম্পত্তি বিক্রী হইয়া যায়।\*\*\*

\* Statistical Account of Bengal (Vol.—v. p. 402) by—W. W. Hunter, B.A. L.L.B.

\*\* Dist. Gazetteer of Mymensingh by—F. A. Saches, I.C.S.

\*\*\* Account of Dist. of Rangpur by—Francis Buchanan

হাজংরা ছইদল বা ছই মতবাদে বিভক্ত—শাক্ত ও ভক্ত (বৈষ্ণব)। শাক্ত মতবাদী হাজংবা প্রধানত কালী ও কামাখ্যা দেবীর উপাসক। নিজেদের তৈরি মদ, ছাগ, মেঘ, হরিণ ও বন্য শূকরের মাংস ইহাদের প্রিয় খাদ্য। শাক্ত হাজংরা ছুঁদাস্ত, দক্ষ শিকারী। ভক্ত (বৈষ্ণব) হাজংরা মদ, মাংস স্পর্শ করে না। তাহারা মাছ খায় বটে তবে ছুঁ, দৈ, ছানা, মাখন তাহাদের প্রিয়। ভাং-সিদ্ধি তাহাদের প্রধান নেশা। আতপ চাল ও খেসাবী ডাল সব হাজংএরই দৈনন্দিন প্রধান খাদ্য। “খার পানি” “লেবা হাগ” অর্থাৎ মোড়া বা নিজেদের তৈয়ারী খার ও আতপ চাউলের গুড়া অর্থাৎ পিঠুলি সহযোগে রান্না করা যে কোন ব্যঞ্জন, এমনকি মাছও ইহারা পছন্দ করে। তেল-ঘিও পরিবর্তে এই খারপানি ও লেবা ব্যবহার করা হয়। কাছিমের মাংস ও শুকনা মাছ (ছিদল) হাজংদের নিকট অতি উপাদেয় খাদ্য। তাহাদের আর একটি উৎকৃষ্ট খাদ্য “বিচি” ভাত। বিন্নি ধানের আতপ চাউল বিভিন্ন প্রক্রিয়ায় বাষ্পের সাহায্যে সিদ্ধ করিয়া ইহা রান্না করা হয়। সম্পূর্ণ কাঁচা বাঁশের চোঙে ভরিয়া ঈষৎ জ্বলের সাহায্যে বাঁশের চোঙাগুলি আগুনে পোড়াইয়াও বিচি ভাত রান্না করা যায়। এই ভাত যত্ন করিয়া রাখিলে সাত আট দিন পর্যন্ত কোন রকম পচন ধরে না—নষ্ট হয় না। ইহা অল্পত ধরণের সুস্বাদু ও পুষ্টিকর খাদ্য। দূরের পথযাত্রায় এই খাদ্য বিশেষভাবে সহায়ক।

দৈ, চিড়া, বিচি-ভাত

খার পানি, লেবা হাগ,

কাছিম-মাংস

ছিদল-মাছ

গুটি বাড়ীর বুকুনী ভাত \*

এই আটটি ছইতেছে হাজংদের প্রিয় খাদ্য।

\* বুকুনীভাত এক প্রকার সুমিষ্ট ভাত। ধান গাজাইয়া চাউল করিয়া Yeast form করিলে এই ভাত হয় অথচ ইহা কোন নেশা বা মদ নয়।

ইহার মাটির ভিটিতে কাঠের খুটিতে বাঁশের বেড়ায় ছনের কুটিরে বাস করে। ঘরের বেড়ার উভয় দিকে পরিষ্কার মাটিতে নেপানো থাকে। কেহ কেহ বেড়ায় নানা জীব-জন্তুর চিত্র আঁকিয়া রাখে, কিন্তু ঘরের দরজা ৪'×৩" ফুটের বেশী বড় নয়, কোনও জানালা থাকে না। ইহার প্রধান কারণ, হিংস্র জীবজন্তু ও অপদেবতার ভয়।

হাজংরা প্রধানত নিজেদের তাঁতে বোনা কাপড়ই ব্যবহার করে। পুরুষেরা পরে ৫×২ হাত গামছা এবং ৩×২ হাত গামছা কাঁধে রাখে। মেয়েরা নিজেদের “বানায়” গড়া হাতের তাঁতে তৈয়ারী পাতিন ও আগন পরে। “পাতিন” সাধারণতঃ ৫×৩৬ হাত বিভিন্ন রকমের হয়। নানা রং মেশানো ও কারুকার্যখচিত এই পাতিন মেয়েরা পরে বাহুদ্বয়কে মুক্ত রাখিয়া বক্ষের উপর হইতে হাটুর নীচ পর্যন্ত। আর আগন অনেকটা ওড়নার কাজ করে, বাহুদ্বয় ও কাঁধের উপর হালকাভাবে জড়াইয়া থাকে। হাজং মেয়েরা কখনও মাথায় ঘোমটা দেয় না অবগুণ্ঠনকে তাহারা ঘুণা করে। বিচিত্র কেশ-বিষ্ণাস ও বিভিন্ন ছাঁদে খোঁপা বাঁধার ব্যাপারে ইহাদের একটু বিলাসীই বলা চলে। মাঠের কাজে বা বনে জালানি কাটিতে গেলেও হাজং মেয়েরা কেশবিষ্ণাস ভোলে না। তাহা ছাড়া গলায় মালা, কানে কানফুল, হাতে পিতলের বালা এবং মনিবন্ধ হইতে প্রায় কমুই পর্যন্ত যতগুলি সম্ভব মোটা মোটা শাঁখা পরিতে তাহারা ভালবাসে। বিধবা মেয়েরা রঙিন কাপড় ও শাঁখা ব্যবহার করিতে পারে না। সমাজের প্রায় সর্বক্ষেত্রেই হাজং মেয়েদের পুরুষের সমান অধিকার ও মর্যাদা স্বীকৃত। যেমন, সম্পত্তিভোগের ক্ষেত্রে তেমনই দৈনন্দিন জীবনের সমস্ত রকম গৃহস্থালী কাজকর্ম ও কৃষিকাজেও।

হাজংদের মধ্যে বিবাহ ব্যবস্থা খুবই সহজ ও স্বাভাবিক। একমাত্র নিকট আত্মীয় ছাড়া যে কোন বয়সের যে কোন মেয়ে পুরুষ জীবনে একাধিকবার বিবাহ করিতে পারে এবং উভয়ে ইচ্ছা করিলে যে

কোন কারণে বিবাহ বিচ্ছেদও করিতে পারে। সাধারণত ইহাদের মধ্যে এক সাথে এক স্ত্রীর বেশী দেখা যায় না। বিধবা বিবাহ সমাজে সহজভাবে গৃহীত ও প্রচলিত। বিপত্নীক ও বিধবার মধ্যে বিবাহকে ‘শ্রাভা’ করা বলা হয়। অবাধ চলাফেরা ও মেলামেশার ফলে মেয়ে পুরুষ পরস্পরের প্রেমে আকৃষ্ট হইয়া বিবাহ করিলে তাহাকে বলে “দায়পড়া” বা “দায়মারা” বিবাহ। এই দায়পড়া বিবাহের পূর্বে আত্মীয়স্বজন বা সমাজের কাহারো কোন অনুমতির প্রয়োজন হয় না। প্রেমিক-প্রেমিকা দুই জনই যে কোন উপায়ে এক বা একাধিক রাত্রি “মধুচন্দ্রিকা” যাপন করিতে পারিলেই এই দায়পড়া বিবাহ সিদ্ধ হয়। ইহা আমাদের শাস্ত্রোক্ত গন্ধর্ব্ব বিবাহেরই রকম ফের। অবশ্য এই বিবাহের জন্ত পরে গ্রামবাসীদের একটা ভোজ দিতে হয়। হাজংদের আনুষ্ঠানিক শুভ বিবাহের মতো ইহা মোটেই ব্যয়বহুল নয়। তাই খুব সহজেই ইহা সম্পন্ন হইতে দেখা যায়। পাত্র-কন্যা নির্বাচন পূর্বক আনুষ্ঠানিক বিবাহ বেশ ব্যয় সাধ্য। ইহা করিতে যাইয়া অনেক হাজং চাষীকে নিজের জমি-জমা ও হাল-বলদ মহাজনদের নিকট হারাইতে হয়। এই আনুষ্ঠানিক বিবাহ পুরোহিত ছাড়াও হয়। পাত্র-পাত্রী উভয় পক্ষের জানা শোনা যে কোন মোড়ল অথবা সমাজের সম্মানিত দম্পতিকে উভয় পক্ষে “ধনী মা” ও “ধনী বাপ” ঠিক করা হয়। এই ধনী মা বাপ (ধর্মের মা বাবা) বিবাহের জন্ত নির্দিষ্ট রাত্রে প্রচুর ধূপ-দীপ-আলো জ্বালাইয়া অগ্নি ও উপস্থিত নিমজ্জিতদের সাক্ষ্য রাখিয়া বর-কনেকে কার্পাস তুলা, ধান-চুর্বা ও কিছু নগদ টাকা দিয়া আশীর্বাদ করেন। পরে সমবেত নিমজ্জিত ব্যক্তিগণও আশীর্বাদ করেন। এই আশীর্বাদের পালা শেষ হইলেই বিবাহ সিদ্ধ বলিয়া গণ্য হয়। ধনী মা বাপকে অবশ্য একটা মোটা টাকা লৌকিকতা বাবদ খরচ করিতে হয়। হাজংদের এই আনুষ্ঠানিক বিবাহ উৎসব চার-পাঁচ দিন পর্যন্ত চলে। এই উৎসবের যদৃচ্ছ ব্যয়ের পরিণামে নবদম্পতীকে পরবর্তী জীবনে অনেক সময় এক করুণ অর্থনৈতিক জংকটে পড়িতে হয়। হাজং



সম্প্রদায় ডালু বা কোচদের সহিত বিবাহ নিয়গামী বলিয়া গ্রহণ করে, কিন্তু গারোদের সহিত বিবাহ কিছুতেই সমর্থন করে না। গারোকে বিবাহ করিলে সমাজচ্যুত ও পতিত হইতে হয়।\*

হাজংদের ধর্মীয় অনুষ্ঠানে কোন প্রকার বিগ্রহ বা প্রতিমা পূজা করিতে দেখা যায় না। ভক্তদল গলায় কণ্ঠি ধারণ করেন—কোঁটা তিলক কাটেন ও মাথায় শিখা রাখেন এবং নিজেদের বাড়িতে একটি ছোট ঘরে বসিয়া উপাস্ত্র দেবতার উদ্দেশ্যে জপতপ করেন। শাক্তরা গ্রামের মধ্যে বা গ্রামের উপকণ্ঠে যে কোন অক্ষয়বট, অশথ বা শেওড়া গাছের তলায় ছোট ছোট মাটির বেদী রচনা করিয়া অথবা ছোট একটি কুড়ে ঘর তৈরারী করিয়া উহাতে সামান্য একটু মাটির টিপির মতো গড়িয়া নিজেদের উপাস্ত্র দেবতা কালী, কামাখ্যার পূজা করেন। ধর্মের দিক থেকে হাজংদের জড়োপাসক মনে হইলেও বাঙালী হিন্দুধর্ম এবং হাজংদের জড়োপাসনার মধ্যে কোন মীমাংসারেখা টানা যায় না। এই সব পূজা অর্চনা অধিকাংশ ক্ষেত্রেই হাজংরা নিজেরাই করেন। যিনি এই পূজা অর্চনা ও বলিদান করেন তাহাকে “দেউসী” (দেবর্ষি) বলা হয়।

গ্রামবাসীরা নিজেদের মধ্যে অপেক্ষাকৃত সৎচরিত্র সাস্থিক ও নিষ্ঠাবানব্যক্তিকে এই দেউসী পদে নির্বাচন করেন। ঘোষগাঁও, মোজাখালি, নালিতাবাড়ী, চরণতলা প্রভৃতি কালী, কামাখ্যা মন্দিরে দেউসীরাই পূজারী এবং সমস্ত হিন্দু সম্প্রদায়ই তাহাদের পূজায় অংশ গ্রহণ করিয়া প্রসাদ গ্রহণ করে। হাজংদের মধ্যে আবার “পুরোহিত” ও “অনাপুরোহিত” বলিয়া দুইটি ভাগ আছে। পুরোহিত দল শ্রোত্রীয় ব্রাহ্মণদ্বারা পূজা পার্বন ক্রিয়াকাণ্ড করানোর পক্ষপাতী। অনাপুরোহিতরা দেউসীপ্রথার সমর্থক। হাজংদের অগ্রাগ্র আনন্দ উৎসব ও পর্ব হিসাবে বর্ষায় আবনী ব্রত, (মনসা পূজা) শরতে নয়া-খাওয়া (নবান্ন উৎসব) শীতে চোরমাগা, (পৌষপার্বন) বসন্তে গ্রামপূজা

(বাস্তুপূজা) বিশেষ উল্লেখযোগ্য। নবান্ন ও বাস্তু পূজায় অফুরন্ত পানভোজন চলে। শীতকালে নিজেদের লোকনৃত্য ও লোক-সঙ্গীতের অনুষ্ঠান হয়।

ইহা ছাড়া প্রাচীনপন্থী ও কুসংস্কারাচ্ছন্নরা অনেকে ভূত, প্রেত ও অপদেবতার পূজা করেন। যেমন—মইলা দেও, গংস দেও, চোখধাপা ডাইনী, পেতনী, কালপিশাচ, বনদেও, ছুহুমহাকা, দেশফোড়া, নিকানী, ফুলদেও ইত্যাদি। কালাপাঠা, হাঁস, মোরগ, মুরগী, কবুতর, কচ্ছপ, প্রভৃতি জ্যান্ত বা বলি দিয়া এই সব অপদেবতার পূজা করেন। খই, আতপ চাউল, ফুল ও নিজেদের তৈরি পচাই মদ প্রধান উপকরণ। ওঝা বা বৃদ্ধ-বৃদ্ধারা ইহার প্রধান হোতা। গ্রামের উপকণ্ঠে, পথের ধারে বা ঝোরার তীরে এই সব ‘বিধান’ দেওয়া হয়।

এখানে উল্লেখ্য যে আদিম যুগ হইতেই এই সব ঝাড়ফুক মন্ত্রতন্ত্রের উৎপত্তি হইয়াছে, ইহার প্রমাণ অথর্ব বেদে লক্ষ করা যায়। আর্ধ-জাতি ও সমাজের মধ্যেও ইহার ব্যাপক প্রচার ছিল, তাই অথর্ব বেদকে Knowledge of mosic formulas বলা হয়। অজ্ঞ, অনগ্রসর জাতি গোষ্ঠীর উপর এই সব তন্ত্রমন্ত্রের প্রভাব রহিয়াছে। মারণ, বাচন, উচাটন ও বশীকরণে ইহারা অন্ধ বিশ্বাসী। অবশ্য পরবর্তী কালে রাজনৈতিক আন্দোলন ও সংগঠনের ফলে এই সব কুসংস্কার লোপ পাইতে থাকে।

হাজং, ডালুদের জন্মের পরে কোন অশৌচ পালন করা হয় না। শিশুদের মাতৃস্তন পানই একমাত্র খাদ্য। তিন-চার মাস পরে পাকা কলা বা লেই ভাত খাইতে শুরু করে। অন্নপ্রাশন, নামকরণ জাতীয় কোন ক্রিয়া অনুষ্ঠিত হয় না। শিশু অবস্থায় মৃতকে সমাধিস্থ করা হয়। বয়স্ক ও বৃদ্ধ মৃতদের দাহ করা হয়। কোন পারলৌকিক ক্রিয়া অনুষ্ঠিত হয় না। মৃত্যুর সাত দিন পরে গ্রামের মোড়লদের নির্দেশে ও উপস্থিতিতে সমাজে একটা ‘পান-ভোজন’ হয় মাত্র।

এই আদিবাসী সমাজে মুখ্যত ইন্দোমঙ্গোলয়েড জাতি সংস্কৃতির ছাপই প্রধান। “লওয়া টানা,” “জাখা মারা,” “অষ্টমখী,” সিপাহি-

গান প্রভৃতি বিভিন্ন ধরনের বা আজিকের পল্লীগীতি পল্লীগাথা, নৃত্য, ছড়া, পাঁচালী, প্রেমপূর্ণ রোমাঞ্চকর গল্প কাহিনী ছাড়াও ধর্মমূলক কীর্তন, টপ্পা, কবিতাগুলোর পালাগান প্রভৃতি সমগ্র অঞ্চলের বিশিষ্ট সাংস্কৃতিক সম্পদ। পূর্ববঙ্গগীতিকা, ময়মনসিংহ গীতিকার বিখ্যাত গীতিনাট্য মজুয়া, রাণী কমলা ও আধা বধু এই অঞ্চলের বাস্তব বিষয়-বস্তুর উপর প্রতিষ্ঠিত ও রচিত। “হাজংদিগের আবাসভূমি হইতেই মৈমনসিংহ গীতিকার অভিনয় ক্ষেত্র আরম্ভ হইয়া তাহা দক্ষিণদিকে মেঘনা নদীর তীর পর্যন্ত অগ্রসর হইয়া গিয়াছে”। আধুনিক যুগেও হাজং সম্প্রদায়ের কবিতা চন্দ্র সরকার, কীর্তনীয়া হৃদয়নাথ, পল্লী-গীতিকার মকরন্দ ও গায়ক ধনেশ্বরের নাম বিশেষভাবে উল্লেখযোগ্য।

হাজংদের ভাষা বাংলা, বাংলা বর্ণমালা ও লিপি তাহাদেরও লিপি। এমনকি আসামের যে সকল স্থানে হাজংরা বসবাস করিতেছেন তাহাদের ভাষা ও লিপি বাংলা, তবে আঞ্চলিক কথ্য ভাষায় কিছু কিছু প্রাচীন শব্দ ও উপজাতীয় ভাষার প্রভাব রহিয়াছে।

যেমন জল—পানি, আগুন—জুই, ভূমি—ভূই, নদী—গাং, আমি—ময়, তুমি—তয়, পুরুষ—মরদ, স্ত্রী—তিমাং। সাধারণ শিক্ষায় সংখ্যাগত হিসাবে হাজংরা পশ্চাৎপদ হইলেও শিক্ষার প্রতি তাহাদের প্রচুর আগ্রহ রহিয়াছে। বর্ণপরিচয় আছে ও নাম স্বাক্ষর করিতে পারে এমন লোকের সংখ্যাও কম নয়। বর্তমানে বেশ কিছু সংখ্যক হাজং যুবক ইংরাজী উচ্চশিক্ষা লাভ করিয়া সরকারী-বেসরকারী চাকুরী, স্থলে শিক্ষকতা এবং চেতনাসম্পন্ন রাজনৈতিক জীবনযাপন করিতেছেন। এই নব-শিক্ষিত সম্প্রদায় আচার ব্যবহার শিক্ষা-দিক্ষা ও চিন্তা-ভাবনার দিক হইতে খাঁটি বাঙালী এবং স্ব-সম্প্রদায়কে সেই আদর্শে গড়িয়া তোলার জন্য উদ্যোগী। বর্তমান যুগে সামাজিক ও অর্থনৈতিক দিক হইতে হাজং সম্প্রদায় বাংলার সমাজ জীবনের সঙ্গে ওতপ্রোত ভাবে জড়িত। বহু উত্থান-পতন ও অশুকল-প্রতিকূল অবস্থার মধ্য দিয়া সুদীর্ঘকাল সংগ্রামী জীবনযাপন করার কলে আজ হাজংদের সমাজচেতনা অনেকটা বিকাশলাভ করিয়াছে—

সমৃদ্ধিশালী হইয়াছে। বাংলার আদিবাসী নামক পুস্তকে শ্রীসুবোধ ঘোষ লিখিয়াছেন :—“বাংলা দেশে এমন কয়েকটি সমাজ আছে যাহারা কোনকালে গোষ্ঠীবদ্ধ আদিবাসী বা উপজাতীয় সমাজে ছিল, কিন্তু বর্তমানে তাদের মধ্যে উপজাতীয়ত্ব এবং গোষ্ঠীবদ্ধ জীবনের কোন নিদর্শন নাই এবং তারা ধর্মে ভাষায় ও সামাজিক আচারে হিন্দু হয়ে গেছে। সুতরাং নৃতত্ত্বের দিক দিয়ে এরা আদিবাসী হলেও আজ এরা হিন্দু।” হাজংদের সম্বন্ধেও এই উক্তি অনেকখানি সত্য। ইহাদের উপজাতীয় চরিত্র একেবারেই বিলুপ্ত হইয়া না গেলেও হিন্দুত্ব ও বাঙালীত্বের দিকে ইহারা অনেক দূর অগ্রসর। মোটামুটি আজ ইহাদের বলা চলে বাঙালী হিন্দু।

দেশ ভাগের ফলে এবং পর পর কয়েকটি রাজনৈতিক ও সামাজিক বিপর্যয়ে পূর্ববঙ্গের আদিবাসীগণ নিজেদের সুপ্রাচীন আবাসভূমি হইতে উচ্ছেদ হইয়া মেঘালয়, আসাম, অরুণাচল প্রভৃতি প্রদেশে আশ্রয় লইতেছে। তাই এই সব উদ্বাস্তু-উপজাতিগুলির জাতীয় বিকাশের স্বাভাবিক ধারা ব্যাহত হইতেছে। সমাজতান্ত্রিক সমাজ-ব্যবস্থাই ইহাদের ভবিষ্যৎ আশা-ভরসার একমাত্র স্থল।



## ডালু

ডালুৱাও ইন্দোমঙ্গোলয়েড গোষ্ঠীৰ একটা শাখা। ব্ৰহ্ম ও ইন্দোচীন হইতে তাহাৱাও আসামেৰ পথে এই ময়মনসিংহ পাহাড় সীমান্তে আসিয়াছিল বলিয়া মনে হয়। ডালুৱা দাবি কৰে যে, তাহাৱা মহাভাৰতে বৰ্ণিত অৰ্জুনপুত্ৰ বক্ৰবাহনেৰ বংশধৰ। মনিপুৰী ক্ষত্ৰিয় বলিয়া তাহাৱা নিজেদেৰ পৰিচয় দেয়। কিংবদন্তী আছে যে, কোন এক সময় সুবলা সিং নামে জনৈক মনিপুৰী সৰ্দাৰ স্বীয় দলবল সহ প্ৰাগজ্যোতিষপুৰ হইয়া অৰ্থাৎ ব্ৰহ্মপুত্ৰ নদেৰ দক্ষিণ তীৰ ধৰিয়া গাৱো পাহাড়ৰে দুৰ্গম গিৰিপথ অতিক্ৰম কৰিয়া পূৰ্ববঙ্গ ও আসামেৰ মিলনস্থল বাৰেঙ্গাপাড়াৰ সমতল ভূমিতে— ভোগাই নদীৰ তীৰে প্ৰথম বসতি স্থাপন কৰেন। ইহাই বৰ্তমানে ডালুকিল্লা ও ডালুগাঁও নামে পৰিচিত। পৰবৰ্তীকালে উত্তৰে হাড়িগাও হইতে দক্ষিণে হাতীপাগাৱ, কুমাৰগাতী সংগ্ৰা, যুগলী প্ৰভৃতি ও কংস নদী পৰ্যন্ত তাহাদেৰ গ্ৰাম গড়িয়া উঠে। হাজংদেৰ তুলনায় তাহাদেৰ জনসংখ্যা অনেক কম। তাই স্বভাবতই সীমাবদ্ধ স্থানেই তাহাদেৰ বসবাস। ডালুদেৰ বেশভূষা, আচাৰ ব্যবহাৰ, ৰীতিনীতি, সামাজিক ক্ৰিয়াকাণ্ড অমুৰ্চানাদি প্ৰায় সমস্ত কিছুই হাজংদেৰ অমুৰূপ। তাই এই অঞ্চলেৰ আদিবাসীদেৰ বিশ্বাস যে ইহাৱা হাজংদেৰই একটা অংশ। অনেকেৰ বিশ্বাস যে স্থানীয় গাৱো ও হাজংদেৰ সংমিশ্ৰণেই ডালুদেৰ উদ্ভব এবং হাজং গাৱো উভয় কুল হইতেই ব্ৰহ্ম হইয়া তাহাৱা ডালু নামে পৰিচিত হইয়াছে। পাগল বিদ্ৰোহেৰ নাযুক বিখ্যাত টিপু পাগলা এই ডালুদেৰ পূৰ্বপুৰুষ বলিয়া অনেকেৰ ধাৰণা। এখনও ডালুদেৰ মध्ये প্ৰচুৰ সংখ্যক পাগল-পন্থী দেখা যায়। এই পাগলপন্থীৱা পৌত্তলিকতা বিৰোধী এবং একেশ্বৰবাদী। পাগলপন্থী ডালুৱা মাখায় জটা বা বড় বড় চুল ও

দাড়ি-গোঁফ রাখেন। গলায় মোটা সাদা-কালো নীল রঙের পুঁতির মালা পরেন। মেয়েরা শাঁখা-সিন্দূর ব্যবহার করে না। ইহারা বিখ্যাত মীরের অনুগামী বলিয়া অনেকের বিশ্বাস। হিন্দু ধর্মীয় ডালুরা শ্রোত্রীয় ব্রাহ্মণের দ্বারা পূজা-অর্চনার কাজ করায়। ১৯৪১ সনের আদামসুমারী হইতে ডালুদের অনুল্লত তপশীলভুক্ত জাতি ( scheduled cast ) বলিয়া গণ্য করা হইয়াছে।

## বানাই

বানাইরাও ডালুদের মতোই হাজং সম্প্রদায়ের অংশ—তাহাদেরই গোষ্ঠীভুক্ত বলিয়া মনে হয়। তাহাদের জন্ম মৃত্যু, বিবাহাদি সংক্রান্ত যাবতীয় ক্রিয়াকাণ্ড হাজংদের মতোই। বানাইদের জনসংখ্যা খুবই কম। পূর্বে কমলাকান্দা থানার গোঁরীপুর হইতে গলইভাড়া, গাবরাখালি, আয়লাতলি, জামপড়া, নলগড়া রাণীপুর পর্যন্ত বিভিন্ন গ্রামে বানাইদের বসতি রহিয়াছে। তাহাদের প্রধান উপজীবিকা কৃষিকর্ম। কিন্তু দুধ, দৈ প্রভৃতির ব্যবসা করিতেও তাহাদের দেখা যায়। ১৯৪১ সনের আদামসুমারী হইতে তাহাদের অনুল্লত তপশীলভুক্ত জাতি বলিয়া গণ্য করা হয়।

## কোচ

হিন্দু শাস্ত্রগ্রন্থ “যোগিনীতন্ত্রে” কোচ জাতির বর্ণনা রহিয়াছে, বিশ্বকোষ পুস্তকেও ইহাদের নাম উল্লেখ করা হইয়াছে। অন্ত্যজ জাতি বলিয়া সংস্কৃত শাস্ত্রগ্রন্থে যে উল্লেখ রহিয়াছে তাহাতেও কোচ জাতির নাম পাওয়া যায়। তাই কোচরা যে একটি বিশেষ ভৌগোলিক পরিবেশে একটি সুপ্রাচীন জাতি তাহা নিঃসন্দেহে বলা যায়। আসামের কামরূপ, গোয়ালপাড়া জেলা এবং উত্তরবঙ্গ ও পূর্ববঙ্গের সমগ্র উত্তর সীমান্তের বিভিন্ন স্থানে কোচদের বসতি রহিয়াছে। ইহারা ইন্দোমঙ্গোলয়েড জাতিরই “বোড়া” নামক এক শাখা। “পূর্ববঙ্গ মৈমনসিং অঞ্চলে মধ্যযুগ পর্যন্ত এই বোড়ো জাতিরই এক শাখাভুক্ত জাতির বসবাস ছিল, তাহারা কোচ নামে পরিচিত। ইন্দোমঙ্গোলয়েড জাতির এই সকল শাখা প্রবল মাতৃতান্ত্রিক।\*

গারো পাহাড়ের পশ্চিম পাদদেশ হইতে প্রবাহিত মালাবী নদীর তীরে কোচনীপাড়া, তাওকুচা, তুধনই হইতে শুরু করিয়া রাংটিয়া, চান্দুভুই, কড়ইতলা গোবরাকুড়া পর্যন্ত ৫০।৬০টি গ্রামে কোচদের বসতি রহিয়াছে।

সামাজিক রীতিনীতি, আচার-ব্যবহার এবং অনুষ্ঠানাদির ব্যাপারে ইহারা এখনো রক্ষণশীল। বর্তমানে বাংলা ভাষা ও লিপি গ্রহণ করিলেও নিজেদের কথ্য ভাষা সম্পূর্ণ আলাদা, প্রতিবেশী গারো বা হাজংদের কথ্য ভাষার সঙ্গেও কোন সাদৃশ্য দেখা যায় না। যথা : আমি—আং, তুমি—নাং, জল—টিকা, মাটি—হা, বাতাস—নাংপার, আগুন—গুয়ার, সূর্য—রাসেন, যাওয়া—লাইতো, ভাত, চাউল, ধান—মায়, মাছ—না, মাংস—কান, ইত্যাদি। বেশভূষা অনেকটা হাজংদের

---

\* বাংলার লোক সাহিত্য ডাঃ আবুতোষ ভট্টাচার্য।

মতো। পুরুষেরা গামছা ও মেয়েরা পাতিন ও আগন ব্যবহার করে। মেয়েরা হাতে গলায় মোটা মোটা দস্তার বালা ও হামুলী কানে তেমনই দস্তার ভারি কানফুল বা কানবালা পরে। মুখমণ্ডলে, হাতে, বাহুতে ও বক্ষে উষ্ণি দেয়; হাতের আট আঙুলেই দস্তার আংটি পরিতে ভালবাসে। খাদ্যের ব্যাপারে গো মাংস ছাড়া প্রায় সবই তাহাদের ভক্ষ্য। নিজেদের তৈয়ারী মদ ও তামাক তাহাদের প্রধান নেশা। ইহাদের দৈহিক গঠন দৃঢ়। খালি হাতে বা সামান্য লাঠির সাহায্যে তাহারা বাঘ, ভালুক ও বন্য শূকর তাড়াইতে পারে। বল্লম, চেওয়াড়ের সাহায্যে তাহারা বড় বড় হিংস্র জন্তু শিকার করিয়া থাকে।

কোচদের জন্ম, মৃত্যু, বিবাহ প্রভৃতি উৎসব ও অনুষ্ঠান নিত্যন্ত স্বাভাবিক ও সাধারণভাবে হইয়া থাকে। তাহাদের পরস্পরের বিবাদ বিসংবাদের মীমাংসা নিজেদের সমাজেই হইয়া থাকে, কোন সরকারী আদলত বা বিচারালয়ের সম্মুখীন তাহারা সাধারণত হয় না। গাঁও বুড়া মুখ্য বিচারক।

কোচগণ “ঋষি ও জগ” এই দুই দেব-দেবীর উপাসক। ঋষি ও জগ বলিতে শিব-দুর্গা বা হর-পার্বতীকে বুঝায়। এই দেব-দেবীর কোন মূর্তি তাহারা গড়ে না। উপাস্য দেবতার উদ্দেশ্যে ছাগ, মহিষ, পায়রা, হাস, মুরগী ও কাছিম বলি দিয়া সেই রক্ত ছড়াইয়া দেয়। এই সব পূজা অর্চনা নিজ সম্প্রদায়ের দেউসীরাই করিয়া থাকেন। কঠিন রোগের হাত হইতে মুক্তির জন্ত তাহারা প্রেতের উদ্দেশ্যে, “বিধান” অর্থাৎ পূজা দেয়, — ঝাড়-ফুক-মস্ত্রে বিশ্বাস করে। এই কোচ জাতি আসাম ও বাংলার বিভিন্ন অঞ্চলে বিচ্ছিন্ন বিচ্ছিন্ন হইয়া পড়ায় তাহাদের বিকাশেও প্রচুর বিভিন্নতা লক্ষ্য করা যায়। মূলত ভৌগোলিক পরিবেশের পার্থক্যের দরুণই তাহাদের জীবন, জীবিকায় ও সামাজিক অগ্রগতিতে এই বিভিন্নতার সৃষ্টি হইয়াছে। এই অঞ্চলের কোচরা বর্তমানে রক্ষণশীলতা বর্জন করিয়া প্রতিবেশী হাজং, ডালু ও বানাইদের



অনুসরণ করিতেছে। আসামের কোচদের তুলনায় ময়মনসিংহ জেলার কোচ সম্প্রদায় গারোদের সহিত অধিকতর যুক্ত। তাঁহারা বাস্তবপক্ষে হিন্দুধর্মে পরিণত হইয়াছে। গারোদের আগমন বা আক্রমণের আগে সম্ভবত এই পাহাড় অঞ্চলে শুধু কোচরাই বসবাস করিতেন। এই অঞ্চলে কোচগণই প্রথম বহিরাগত ‘বড়ো’ গোষ্ঠীভুক্ত উপজাতি। \*

## হদি ক্ষত্রিয়

উত্তর ময়মনসিংহের আদিবাসীদের মধ্যে হদি বা হৈহয় ক্ষত্রিয় সম্প্রদায় বিশেষভাবে উল্লেখযোগ্য। হিন্দুধর্মের ছত্রছায়ায় থাকা সত্ত্বেও সুদীর্ঘকাল যাবৎ ইহাদের অস্পৃশ্য বলিয়া ঘৃণা ও নানা ধরনের নির্ধাতন চলিয়া আসিয়াছে। অথচ এই হদি ক্ষত্রিয়ের দৈহিক শক্তি বীর্যবন্তার উপর নির্ভর করিয়াই এই অঞ্চলের বর্ণহিন্দুগণ অগ্ন ধর্মের আক্রমণ হইতে আত্মরক্ষা করিয়াছে। এই কথা নিশ্চিতভাবেই বলা যায় যে এই হদি ক্ষত্রিয়দের সংঘবদ্ধ ক্ষাত্রশক্তির বলেই এই অঞ্চলের বর্ণহিন্দু ভূস্বামীগণ পুরুষানুক্রমে বিষয়সম্পত্তি ভোগ দখল করিতেন। সেরপুর পরগণার জমিদার শ্রেণীর প্রধান সামরিক শক্তিই ছিল এই হদি সম্প্রদায়।

• এই হদি ক্ষত্রিয়গণও আসলে ইন্দোমঙ্গোলেয়েড নরগোষ্ঠীর (সহিত সম্পর্কিত) একটি শাখা সম্প্রদায়। তাহারা নিজেদের ব্রহ্ম-বৈকবত' পুরাণ বর্ণিত সূর্যবংশীয় ক্ষত্রিয় রাজা হৈহয়ৎ-এর বংশধর বলিয়া পরিচয় দেয়। জীবনের তাগিদে হদিগণ কৃষিকাজ করিতে বাধ্য হইলেও প্রকৃত পক্ষে তাহাদের কাজ ও চরিত্রে ক্ষত্রিয়শুলভ বৈশিষ্ট্যই খুব স্পষ্ট। হিন্দু সমাজ ও হিন্দু ধর্মের বিরুদ্ধে যে কোন রকম আক্রমণের সম্মুখে তাহারা মরণপণ সংগ্রাম করেন। মল্লযুদ্ধ, লাঠিখেলা, বর্শাবল্লম, জাঠা চালনা ও রামদা ব্যবহারে তাহাদের সমকক্ষ অপর কোন সম্প্রদায়কে দেখা যায় না। কৃষিজীবী হইলেও হদি ক্ষত্রিয়গণ কৃষিকাজে তেমন দক্ষ নয়। গ্রাম্য হাট বাজারে ব্যবসা বাণিজ্য ও বাঁশ-বেতসের জিনিস তৈয়ার করা—গৃহস্থালির কাজকর্ম এবং জমিদারদের পাইক, পেয়াদা, বরকনদাজ, পাহারাদার ও লাঠিয়ালের কাজ প্রভৃতি বর্তমানে ইহাদের অন্যতম উপজীবিকা। তাহাদের দৈহিক গঠন দৃঢ় ও মজবুত, মানসিক শক্তি প্রবল এবং নিজ সম্প্রদায়ের সংঘবদ্ধতা আদর্শস্থানীয়।

এই হদি ক্ষত্রিয় সমাজ হিন্দু সমাজপতি ও জমিদারদের নিকট দীর্ঘ দিন বহু আবেদন নিবেদন করিয়াও সামান্য জলচল বলিয়া গণ্য হইবার ও ধোপা-নাপিত ব্যবহারের অধিকারটুকু পায় নাই। হিন্দু সমাজের সমস্ত রকম অপমান, উপেক্ষা ইহাদের উপর বর্ষিত হইয়াছে।

এই জেলার উত্তর দিকে কালীনগর, নালিতাবাড়ী হালুয়াঘাট হইতে দক্ষিণে ব্রহ্মপুত্র নদ পর্যন্ত ইহাদের বসতি রহিয়াছে। ১৮৩১ সনের কৃষিবিদ্রোহের নায়ক জানকু পাথর ও ছুবরাজ পাথর ইহাদের পূর্বপুরুষ।

## গারো

ভারতের আদিবাসীদের মধ্যে গারো সম্প্রদায় বিশেষ পরিচিত। ইহারা গারো পাহাড়ের আদিম অধিবাসী। ইহাদের সমাজব্যবস্থা এখনো পুরাপুরি মাতৃতান্ত্রিক। সাধারণত গারোদের ব্যবহার খুবই বন্ধুত্বপূর্ণ ও প্রীতিকর, তাহারা সরল, সচ্চরিত্র, সত্যবাদী ও শান্ত প্রকৃতির। “জুম” চাষ আবাদই গারোদের প্রধান উপজীবিকা।

ময়মনসিংহের গারোগণ পাহাড়ের পাদদেশে নিজেদের ছোট ছোট গ্রামে বাস করে। তাহারা পরিশ্রমী, দৃঢ় শক্ত সমর্থ দেহী। সাধারণত মাটি হইতে বেশ কিছু উঁচুতে শক্ত কাঠের খুঁটির উপর বাঁশের বেড়া, ছনের ছাউনীর চাঙ বা টঙ অর্থাৎ মাচায় বাস করে। স্বভাব চরিত্র ও অভ্যাসের দিক হইতে গারোগণ খুবই নোংরা। খাদ্য দ্রব্য সম্বন্ধে কোন বাচবিচার নাই। মদ খুবই পছন্দ করে এবং নিজেরাই ভাত পচাইয়া এই মদ (পচাই) প্রস্তুত করে এবং উহা প্রচুর পরিমাণে পান করে। \*

গারোগণ বেঁটে খাটো, কিন্তু শক্তিশালী। মেয়েরা শাড়ীর পরিবর্তে নিজেদের হাতেবোনা লাল, কালো গেনা (পেটাকোট) পরে। পুরুষরা লজ্জানিবারণ করার মত কাপড় পরে মাত্র। পাহাড়ের আদিম পরিধেয় এখনও চালু আছে। তাহারা প্রায় সমস্ত জীব জন্তুর মাংস খায়, কিন্তু দুধ বা দুধের প্রস্তুত খাদ্য কিছুতেই গ্রহণ করে না। অবশ্য বর্তমানে গারোদের খাদ্য পরিধেয় অনেকটা উন্নত হইয়াছে। \*\*

---

\* Statistical Account of Bengal vol—5 p—402 By—W. W. Hunter.

\*\* Dist. Gazetter of Mymensingh—F. A. Saches

গারো পাহাড়ের গারোদের সঙ্গে এই সমতল অঞ্চলের গারোদের মৌলিক কোন পার্থক্য না থাকিলেও চাষ আবাদ শিক্ষা-দীক্ষায় বর্তমানে বাংলার গারো সম্প্রদায় অনেক দূর অগ্রসর। গারোরা প্রধানত “আচিক্”, “আতক্” ও “আবেং” এই তিন পাহাড়ী উপত্যকাবাসী বলিয়া অভিহিত। তাহারা তিনটি মাতৃ-ভাস্করিক গোষ্ঠীতে বিভক্ত, যথা—সাংমা, মারাক ও মোমিন। এই তিন গোষ্ঠীরও আবার পৃথক পৃথক গোত্র বা উপাধি আছে। যেমন সাংমা :—চেরাং, ঠিকিদি, চিচিম, দারিং, দাপুদেও, কোকসী ইত্যাদি। মারাক :—আজং, চানুগং, বালোয়ারী, ত্রাং, নকরেং, রিচিল, রেমা ইত্যাদি। মোমিন :—ওয়াটরে, গোবিল, চেরাং, মরিন্দা ইত্যাদি।

নক্মা—গোষ্ঠীপতি, সে এক-একটি অঞ্চলের মালিক। ইহাকে বলে আখি। প্রকৃতপক্ষে নক্মা হইতেছে স্ত্রী বা মেয়ে; স্বামী স্ত্রীর বকলমে কাজ করেন। ইহাদের কয়েকটি প্রতিশব্দ :—জল—চি, মাটি—আ, আগুন—ওয়াল, রাত্রি—অল, বাতাস—বাল-ওয়া, ব্যোম—বন্বন, চন্দ্র—যাজং, সূর্য—ওয়াল, দিন—শাল, গ্রহতারা—আশিকি, ভাল—নাম্বা, মন্দ—নাজ্‌মা, ধান—মিগিল, চাউল—মেরং, ভাত—মি, মাছ—নায়ক, মাংস—বিন্, ইত্যাদি। ইহাদের মধ্যে আবার দুই ধর্মাবলম্বী লোক রহিয়াছে : খ্রীষ্টান অখ্রীষ্টান বা সংসারী।

১। খ্রীষ্টানরা বিভিন্ন চার্চের আশ্রয়ে রহিয়াছে। শিক্ষা, আদব-কায়দা ও শিষ্টাচারে ইহারা কিছুটা অগ্রসর বটে, কিন্তু ভারতীয় জাতীয়তাবাদ সম্পর্কে ইহারা অজ্ঞ ও বিমুখ।

২। সংসারী গারোরা পূর্বপুরুষের রীতিনীতি, আচার-ব্যবহার ও ধর্ম বিশ্বাস মানিয়া চলে। হিন্দুধর্মের প্রতিও তাহারা অম্লরস ও আগ্রহশীল। সংসারী গারোরা প্রকৃতপক্ষে জড়োপাসক। ইহারা বাঁশের গায়ে নানা ধরনের চিত্র বা রেখা আঁকিয়া সাদা, কালো, সবুজ প্রভৃতি রঙের নিলাম উড়াইয়া “পাবম” (পার্বন)

করিয়া থাকে। \* প্রায় সব ঋতুতেই কোন না কোন “পাবন” অনুষ্ঠিত হয়। তখন পানভোজন চলে ও সেই সঙ্গে ঢাক ঢোল কঁাসর বাজাইয়া নানা ধরনের নৃত্য গীতও হয়। একই পরিবারে খ্রীষ্টান, সংসারী ও হিন্দু মতাবলম্বী গারোদের স্বচ্ছন্দে বসবাস করিতে দেখা যায়।

প্রথম মহাযুদ্ধের পরবর্তীকালে জাতীয় মুক্তি আন্দোলনের ঢেউ অস্পৃশ্যতা দূরীকরণের অভিযান ও হিন্দুধর্মের সংস্কারকদের প্রচার আন্দোলন এই সম্প্রদায়ের উপরও বিশেষ প্রভাব বিস্তার করে। তাই এই অঞ্চলের সমস্ত আদিবাসী জনতার জীবনেই এক পরিবর্তন দেখা যায়। প্রায় সকলেই জাতীয়তাবাদ দেশাত্মবোধের দ্বারা অনুপ্রাণিত হয়। পরবর্তীকালে, দ্বিতীয় মহাযুদ্ধের শুরু হইতেই কমিউনিস্ট পার্টি ও কৃষকসভার আন্দোলনের ফলে ইহাদের মধ্যে সামন্ততন্ত্র ও সাম্রাজ্যবাদ বিরোধী চেতনাও বিকাশ লাভ করে।

এই অঞ্চলের আদিবাসীরা সম্প্রদায় নির্বিশেষে সকলেই রাজ-নৈতিক, সামাজিক ও অর্থনৈতিক জীবনে অভিন্ন ও পরস্পর নির্ভরশীল।

এই আদিবাসীদের নিকটতম প্রতিবেশী হইতেছে নিম্ন-লিখিত ২৪টি আধা-উপজাতি, এই অঞ্চলের সংগ্রামের অংশীদার—বাহেলিয়া, ভূইঞা, ডোম, নিশি, দোসাধ, চামার, বেদিয়া, বিন্দ, বূনা, চং, মালো, মান্দাই, পান, পাশী, শিকারী, কোচ, পলিয়া, রাজবংশী, হার্তি, কেওরা, হাড়ি, মোচাহার, ভূইমালী ও মেথর। বালো ও মুসলমান কৃষকগণ। রাজবংশী কৃষক সম্প্রদায় বাংলাদেশে

\* There are no temples nor images before their house, a dry bamboo with branches adhering is fixed in the ground. To this garos tie tufts of cotton threads and flowers and before it they make their offerings, “Kamal”.

(Statistical Account of Assam. By—Francis Hamilton. M. D. F.R.S. )

সুপরিচিত। সেরপুর পরগণার নাচনমৌরী, ভটপুর, কান্দুলী, ঘোনাপাড়া প্রভৃতি গ্রামে ইহাদের বসতি রহিয়াছে। পরবর্তীকালে এই অঞ্চলের “ভাওয়ালী” প্রথার বিরুদ্ধে রাজবংশী কৃষকদের আন্দোলন বিশেষভাবে উল্লেখযোগ্য। ইহারা আদিবাসীদের সবচেয়ে বিশ্বস্ত প্রতিবেশী।

নিলখিয়া, যোগিনিয়া, মরিচপুরান, কাপাশিয়া, চন্দ্রকোনা, প্রভৃতি গ্রামের ঝালো সম্প্রদায় এই অঞ্চলের কৃষিবিদ্রোহের সাথী।

সাধারণভাবে এই জেলার সমস্ত গরিব মুসলমান চাষী এই অঞ্চলের আন্দোলনে প্রত্যক্ষ ও পরোক্ষভাবে অংশ গ্রহন করিয়াছেন।



## খ্রীষ্টীয় মিশন

এই আদিবাসী অধ্যুষিত অঞ্চলের আর একটি উল্লেখযোগ্য বিষয় হইল খ্রীষ্টীয় চার্চ ও মিশনারীদের ভূমিকা। এই সমগ্র অঞ্চলে রোমান ক্যাথলিক, অষ্ট্রেলীয় ব্যাপটিস্ট ও ভারতীয় খ্রীষ্টান (অক্সফোর্ড শাখা) এই তিনি সম্প্রদায়ের চার্চ এবং তৎসংলগ্ন স্কুল, দাতব্য চিকিৎসালয় ও চাষের জমি রহিয়াছে। সুসং পরগণার রানীকং, হালুয়াঘাটের বিকুইডাকিনী, নালিতাবাড়ী, বারোয়ামারী হইতেছে রোমান ক্যাথলিকদের প্রধান কেন্দ্র। বিরিশিরিও বা ঐবাদা হইতেছে অষ্ট্রেলীয় মিশনারীদের ঘাঁটি, আর হালুয়াঘাটের সেন্ট এণ্ড্রুজ চার্চ হইল ভারতীয় খ্রীষ্টান মিশনারীদের অগ্রতম কেন্দ্র। এই শেষোক্ত সম্প্রদায়ের কথা বাদ দিলে খুব স্পষ্ট ভাষাতেই বলিতে পারা যায় যে এই সব মিশনের পাদ্রীরা ধর্ম প্রচার ও আত্ম মানবতার সেবার নামে গভীর ও ব্যাপকভাবে ভারতীয় জাতীয়তাবাদ, শিক্ষা, সভ্যতা ও সংস্কৃতির বিরুদ্ধে সযত্নে ও সচেতনভাবে গড়িয়া তুলিয়াছিল এক প্রতিক্রিয়াশীল চিন্তাধারা ও দৃষ্টিভঙ্গি। খুব স্কুল ভাবেও দেখা গিয়াছে যে এই সব বিদেশী মিশনারী পাদ্রীরা প্রত্যেকটি গীর্জায় প্রচুর পরিমাণে বিদেশী শিল্পজাত দ্রব্য (যথা—কাপড়, জামা, কম্বল, প্রসাধন দ্রব্য, কাগজ, কলম, পেন্সিল, পুঁথি-পুস্তক, ঔষধ-পথ্য, ছোট-খাট যন্ত্রপাতি) আমদানি করিয়া বিক্রয় বা বিতরণ করিত এবং তাহার মাধ্যমে ভারতীয় দ্রব্যের প্রতি ঘৃণা সৃষ্টির অপকৌশল গ্রহণ করিত। এই সব পাদ্রীরা ভারতের জাতীয় মুক্তি আন্দোলন হইতে আদিবাসীদের দূরে সরাইয়া রাখার জন্য সর্বদা সর্বরকমে চেষ্টা করিত। তাহারা আদিবাসীদের মধ্যে বিভেদ ও সংঘর্ষ সৃষ্টির জন্য চক্রান্ত করিত। এমনকি ভারতের মহান জাতীয় নেতাদের প্রতি অবজ্ঞা প্রকাশ করিত। এই সব প্রতিক্রিয়াশীল কাজকর্ম

ও মনোভাব থাকা সত্ত্বেও এই অঞ্চলের প্রাথমিক শিক্ষা, সাধারণ স্বাস্থ্য ও জ্ঞান বিস্তারে তাহাদের দান অনস্বীকার্য'।

কোন প্রতিক্রিয়াশীল চিন্তা ও কর্মই সুদীর্ঘকালের জ্ঞাত দেশ-প্রেমের উন্মেষ ও অগ্রগতিকে অবরুদ্ধ করিতে পারে না,—দেশপ্রেমের মৃত্যু নাই। মানুষের জন্ম ও বয়োবৃদ্ধির সঙ্গে তাহার জন্মভূমি ও পরিবেশের মধ্যে এই দেশপ্রেমের বীজ উগ্ৰ হয়,—প্রতিকূল পরিবেশে তাহা ব্যাহত হইলেও অনুকূল পরিবেশে অতি দ্রুত পুষ্টিলাভ করে। জাতীয় ঐতিহ্য মানুষের মনপ্রাণ ও দেহের উপর যে অদৃশ্য প্রভাব বিস্তার করে তাহা বাহির হইতে আমদানি করা কোন অন্ধ মতবাদ বা প্রতিক্রিয়াশীল কর্মধারাই সুদীর্ঘকাল প্রতিহত করিতে অক্ষম। বৃহত্তম জাতীয় পরিবেশ ও ভাবধারা হইতে মুক্ত থাকা কাকারো পক্ষে সম্ভব নয়। তাই আমরা দেখি খ্রীষ্টান মিশনারীদের শত অপপ্রচার ও অপকৌশল সত্ত্বেও ভারতের জাতীয় মুক্তি আন্দোলনে এই অঞ্চলের সমস্ত আদিবাসী সম্প্রদায় ঐক্যবদ্ধভাবে এক বিরাট সাম্রাজ্যবাদ-সামন্ততন্ত্র-বিরোধী গণআন্দোলনে আত্মনিয়োগ করিয়াছিলেন। এই ঘটনা হইতে এই সত্যই প্রমাণিত হয় যে আদিবাসীদের চিন্তাধারা আর নিতান্ত সংকীর্ণ গোষ্ঠীপ্রীতির মধ্যে সীমাবদ্ধ নাই। তাহাদের মধ্যে জাতিপ্রীতির বৃহত্তম সংস্কার ও চেতনা দেখা দিয়াছে। তাহারা সর্বভারতীয় সমাজের সঙ্গে মহান এক জাতীয়ত্ব লাভ করার জ্ঞাত প্রস্তুত।



## সামন্ততন্ত্রের গোড়াপত্তন

ইতিহাস আলোচনা করিলে দেখা যায় যে চতুর্দশ শতাব্দী পর্যন্ত কোচ, হাজং, গারো সদারগণ এই সীমান্ত অঞ্চলের বিভিন্ন স্থানে প্রায় স্বাধীন ও স্বতন্ত্রভাবে রাজত্ব করিতেন। ১৪১২ খ্রীষ্টাব্দে দলিপা নামে জনৈক কোচ রাজা সেরপুর অঞ্চলে রাজত্ব করিতেন। তাহার রাজধানী ছিল গড়দলিপা (বর্তমান গড়জরিপাড়) নামক স্থানে। দ্বিতীয় ফিরোজ শাহ বাংলার সিংহাসন অধিকার করিয়া সেনাপতি মজলিস খাঁ হুমায়ূনের সাহায্যে দলিপাকে নিহত করেন এবং সমগ্র সেরপুর অঞ্চল সর্বপ্রথম মুসলমান রাজত্বের অন্তর্ভুক্ত করেন। গড়দলিপা বর্তমানে গড়জরিপার নামে পরিচিত। ইহা সেরপুরের উত্তর-পশ্চিমে সাত মাইল দূরে ১১ শত একর জমির উপর অবস্থিত। এই গড় (বা দুর্গ) সাতটি মাটির প্রাচীর দ্বারা পরিবেষ্টিত ছিল। এই সব প্রাচীরের মধ্যবর্তী স্থানে ৬০ হাত প্রশস্ত এক-একটি পরিখা ছিল। এই গড়ের চারিদিকে ৪টি বিরাট বিরাট তোরণ এবং মাঝে মাঝে গবাক্সও ছিল। উত্তর দিকের তোরণের পাশেই কোচদের একটি মন্দির ছিল। পরে এই মন্দিরটি নাকি একটি মসজিদে রূপান্তরিত হয়। ১৮৯৭ সনের (১৩০৪ বাঃ) ভীষণ ভূমিকম্পে এই গড় ও পরিখাগুলি বিশেষভাবে ক্ষতিগ্রস্ত হইয়াছে। এই প্রাচীরগুলির ভগ্নাবশেষ এখনও রহিয়াছে। প্রতি বৎসর বৈশাখ-জ্যৈষ্ঠ মাসে দলিপার স্মৃতির উদ্দেশ্যে এই অঞ্চলের কৃষকদের ৭ দিন ব্যাপী এক মেলা বসে।\*

১৫৮৪ সনে সাহাবাজ খাঁ কুশো বাংলার শাসনকর্তা নিযুক্ত হন। তাহার অধীনে শের আলি গাজি ছিলেন সেরপুরের ভূম্যধিকারী। এই শের আলী গাজীর নাম হইতেই এই পরগণা সেরপুর নামে

---

\* Dist. Gazetter of Mymensingh by—F. A. Sachès, I.C.S.

অভিহিত হয়। বর্তমান “গাজীর খামার” গাজীর ভিটা প্রভৃতি ছিল শাসনকর্তা গাজীদের আবাসভূমি। এই অঞ্চলের রাজস্ব আদায়কারী রমাবল্লভ মজুমদারের বিধবা স্ত্রীর এক আবেদনক্রমে “আরবী কেসার” বিধিমতে শের আলি গাজীর সমস্ত সম্পত্তি বাজেয়াপ্ত হয়, এবং তাহার পুত্র রামনাথ চৌধুরী এই জমিদারী লাভ করেন। ১৮৯০ সনে জেলা ম্যাজিস্ট্রেট মিঃ ডব্লুউ রঙটন (Mr. W. Wrongton) প্রথমেই জমিদারগণের সহিত দশশালা বন্দোবস্ত করেন। পরে মিঃ স্ট্রিফেন বায়ার্ড (Mr. Stephen Beyard) চৌধুরীদের সঙ্গে চিরস্থায়ী বন্দোবস্ত করেন। সংক্ষেপে, এইভাবেই হয় সেরপুর পরগণার জমিদারীর গোড়াপত্তন।

অপর দিকে ১৬শ শতাব্দীর মধ্যভাগে ঈশা খাঁর জনৈক সৈনিক সোমেশ্বর সিং (পাঠক) এই পরগণার পূর্ব দিকে সোমেশ্বরীর তীরে আসে। খুব সহজেই তিনি অতিথিপরায়ণ ও বন্ধুবৎসল হাজংদের বন্ধুত্ব ও আত্মগত্য লাভ করেন। এই সোমেশ্বর সিং হাজংদের বাহুবলের সাহায্যে এই অঞ্চলের দুর্গাস্ত হোচং ও দুর্গা গারো সর্দারদ্বয়কে পরাজিত ও নিহত করিয়া সমস্ত গারো সম্প্রদায়কে বশতা স্বীকারে বাধ্য করেন। কথিত আছে যে হাজংদের সাহায্যে সোমেশ্বর সিংহের স্ত্রসং লাভ করায় দুর্গা গারোর স্বতি বজায় রাখার উদ্দেশ্যেই এই রাজ্যের নাম রাখা হইয়াছিল স্ত্রসং দুর্গাপুর। সোমেশ্বর সিং ছিলেন স্ত্রসং জমিদারীর প্রতিষ্ঠাতা—তাহার বংশই এই অঞ্চলের প্রাচীনতম জমিদার বংশ বলিয়া পরিচিত।

এই আদিবাসী অঞ্চলের দক্ষিণ ও দক্ষিণ-পূর্ব সীমান্তে দুইজন পরাক্রান্ত কোচ সদাঁরের রাজত্ব ছিল। “দিল্লীশ্বর আকবরের রাজত্বকালে ঈশা খাঁ যখন পূর্ব ময়মনসিংহ আক্রমণ করে তখনও এই অঞ্চলে দুইজন কোচ রাজা রাজত্ব করিতেন। একজনের রাজধানী ছিল মৈমনসিংহ শহরের অনতিদূরবর্তী বোকাইনগর ও আর একজনের রাজধানী ছিল কিশোরগঞ্জের অনতিদূরবর্তী জঙ্গলবাড়ী। ঈশা খাঁর আধিকারের পর হইতে এই অঞ্চলের কোচ

অধিবাসীদিগের উপর মুসলমান ধর্ম' ব্যাপক বিস্তার লাভ করিতে আরম্ভ করে।” \*

এইভাবে পূর্ব, পশ্চিম ও দক্ষিণ দিক হইতে আক্রান্ত হইয়াও আদিবাসী সদাঁরগণ কিন্তু খুব সহজে আত্মসমর্পণ করেন নাই। পর পর অনেকগুলি খণ্ড সংগ্রামে হয় তাহারা মৃত্যুবরণ করিয়াছে না হয় পশ্চাদ্‌পসরণ করিয়াছে। এমনকি প্রয়োজন হইলে গভীর হইতে গভীরতর অরণ্য-পর্বতেও আত্মগোপন করিয়াছে, তবুও তাহারা বশুতা স্বীকার করিতে চায় নাই। আদিম অধিবাসীরা স্বাধীন স্বতন্ত্র ভাবে জীবনধারণ করাই শ্রেয় মনে করে। ইহা তাহাদের সহজাত গৌর্ভিগত প্রকৃতি। এই মনোভাব নিঃসন্দেহে আদিবাসীদের স্বাধীনতাপ্রীতিরই পরিচায়ক। সভ্য মানুষের মনে স্বাধীনতার চেতনা যতটা সত্য ও গভীর আদিবাসীদের তাহা হইতে কম নয়। অবশ্য তাহাদের আঞ্চলিক দেশাত্মবোধ ও অমুভূতিও তেমনই প্রবল। তাই বহু ক্ষেত্রেই ইহাদের প্রাণ বলিদান দিয়াও আঞ্চলিক স্বাধীনতা ও নিজেদের সমাজস্বাতন্ত্র্য রক্ষা করিতে দেখা গিয়াছে।

— — —

## সংগ্রামী ঐতিহ্য

অষ্টাদশ শতাব্দীতে পলাশীর যুদ্ধে বিজয়লাভ ও ইস্ট ইণ্ডিয়া কোম্পানী কর্তৃক বাংলা ও বিহারের দেওয়ানী লাভ করার ফলে ভারতীয় সমাজের সুপ্রাচীন কাঠামো একদম ভাঙিয়া যায়। ইংরাজ বা ইংরাজদের আশ্রিত রাজা, জমিদারদের বিরুদ্ধে সেই সময় প্রকাশ্য ও প্রত্যক্ষভাবে সহসা কেহ বিদ্রোহ করিতে অগ্রসর হইত না। ঠিক এই সময় দেখা দেয় সন্ন্যাসী বিদ্রোহ। সামন্ত-তান্ত্রিক অবিচার ও শোষণের বিরুদ্ধে এবং বিশেষ করিয়া ইংরাজ শাসনের বিরুদ্ধে এই বিদ্রোহের তাৎপর্য অনুধাবন ও মূল্যায়ন করিতে হইলে নূতন দৃষ্টিভঙ্গির প্রয়োজন।

১৭৬৩ সনে সন্ন্যাসী বিদ্রোহীরা ঢাকা শহরের উপর হানা দিয়া ইংরাজ ফিরিঙ্গিদের কারখানা লুণ্ঠ করে। বিশেষ করিয়া ১৭৬৯-৭০ সনের দুর্ভিক্ষের দিনে রাজস্ব আদায়ের জুলুমের ফলে সন্ন্যাসী বিদ্রোহ সর্বত্র ছড়াইয়া পড়ে। ১৭৭৩ সনে এই অঞ্চলের কৃষকগণ সন্ন্যাসীদের নেতৃত্বে সেরপুর, আলাপসিং ও জাফরশাহী পরগণার জমিদারদের তথা ইংরাজদের রাজস্ব আদায়ের কাছারিগুলি উচ্ছেদ করার জন্য আক্রমণ লুণ্ঠরাজ্য শুরু করে। এই অঞ্চলে প্রচলিত কিংবদন্তি হইতে বিশ্বাস করার যথেষ্ট কারণ রহিয়াছে যে, পূর্ববঙ্গে এই বিদ্রোহের সন্ন্যাসী নেতৃবৃন্দ দুই দলে বিভক্ত হইয়া একদল উত্তরবঙ্গ হইতে কুড়িগ্রাম ও গাইবান্ধা মহকুমার চিলমারী—রৌমারী—মহেন্দ্রগঞ্জ পথে এবং কামারজানি-দেওয়ানগঞ্জ হইয়া গভীর অরণ্য ও বালুকাময় পথে সেরপুর ও আলাপসিং পরগণায় প্রবেশ করে। এই দলের অগ্রতম প্রধান কেন্দ্র ছিল গারো পাহাড়ের শাহ কামালের দরগা। অপর দল অর্থাৎ অধিকাংশ বিদ্রোহীগণ জলপথে দক্ষিণে চলিয়া যায়। সেরপুরের উত্তরে চরণতলায়

সন্ন্যাসীদের গোপন ঘাঁটি ছিল। এই অঞ্চলে বিক্ষুব্ধ কৃষকদের সঙ্গে লইয়া তাহারা দক্ষিণে জমিদারদের রাজস্ব আদায়ের কেন্দ্রগুলি আক্রমণ করিত। চরণতলায় যে অক্ষয়বটের নীচে সন্ন্যাসীরা প্রথম আশ্রয় নিয়াছিল সেইখানে এখনও প্রতি বৎসর বৈশাখ মাসে হাজং, কোচ, হদি প্রভৃতি আদিবাসীগণ মেলায় জমায়েত হয় এবং কালীপূজায় প্রায় লক্ষ ছাগ, মহিষ, কবুতর বলি দেয়। সমবেত মেলার জনতা সন্ন্যাসীদের উদ্দেশ্যে জয়ধ্বনি করে। হাজংদের পূর্বপুরুষ বলিয়া কথিত বিজোহী ভূপাল গিরিকে স্মরণ করিয়া এখনও তাহারা গৌরব বোধ করে। নালিতাবাড়ীর দুই মাইল পশ্চিমে সন্ন্যাসী ভিটা, ব্রহ্মপুত্রের বেলা-ভূমিতে সন্ন্যাসীর চর আজ সেই বিজোহীদের অমর স্মৃতির স্বাক্ষর বহন করিতেছে।

১৮৮৩ সনে সন্ন্যাসীগঞ্জে (বর্তমান জামালপুর মহকুমা শহর) সেনানিবাস (Cantonment) স্থাপিত হয় এবং মিঃ লজ (Lodge) সন্ন্যাসীদের দমন করে। \*

১৭৯৬ সনে বাংলার ভূমিব্যবস্থা ও বাঙালী সমাজজীবনে এক বিরাট পরিবর্তন ঘটে। ইংল্যান্ডের সামন্তপ্রথার অম্লকরণে বাংলার ভূমিব্যবস্থার চিরস্থায়ী বন্দোবস্ত প্রবর্তিত হয়। ইংল্যান্ডের ন্যায় বাংলা দেশেও সৃষ্ট হয় ইংরাজদের অম্লরক্ত একদল জমিদার। এই জমিদারগণ বাংলার সমাজ ও রাষ্ট্রক্ষেত্রে কতৃৎ লাভ করিয়া সাংস্কৃতিক জীবনে উল্লেখযোগ্য প্রভাব বিস্তার করে। এই পশ্চাৎপদ অরণ্যময় ভূমি ও হাওড় অঞ্চল তাহাদের স্বার্থে ক্রমশঃ স্তূন্য কৃষিভূমি ও বাসোপযোগী ভূমিতে পরিণত হয়। ক্রমে ব্রাহ্মণ, বৈজ্ঞ, বঙ্গজ কায়স্থ ও তাহাদের অনুগামী অগ্রাগ্র সন্ত্রদায় ও আদিবাসীদের প্রতিবেশী হিসাবে বসবাস শুরু করে। ফলে এই অঞ্চলের আদিবাসীদের

---

\*“As the centre of Sanyasi rebellion Jamalpur was known as Sanyasiganj when in 1845 it became the first Sub-division of Mymensingh (District-Gazetter, Mymensingh-P 148 by—F. A. Sachse, I. C. S.)

প্রাচীন সমাজজীবনে উহার প্রতিফলন দেখা দিল ;—তাহাদের সাংস্কৃতিক জীবনও নানাভাবে প্রভাবিত করিল। অর্থনৈতিক ক্ষেত্রে অবাধ শোষণ ও অত্যাচারের নীতি প্রবর্তিত হইল। জমিদারদের নিয়ন্ত্রণে সৃষ্টি হইল তালুকদার, জোতদার, পত্তনীয়াদার, দরপত্তনীয়া-দার প্রভৃতি কৃষির উপর নির্ভরশীল বিরাট একদল মধ্যস্বত্বভোগী। কোন কোন স্থলে কৃষক ও জমিদারদের মধ্যস্থলে মধ্যস্বত্বভোগীর সংখ্যা ১২ হইতে ২৫ রকম পর্যন্ত পৌঁছিয়া ছিল। সেরপুর পরগণায় এই মধ্যস্বত্বভোগীদের মোট ৮৭টি এস্টেট ছিল। গবর্নমেন্টের বা জমিদারের রাজস্ব যাহাই হোক না কেন বাস্তব ক্ষেত্রে বহুগুণ বৃদ্ধি পাইয়া উহাই নির্মম বর্ধিত শোষণের সৃষ্টি করিল। কৃষকদের স্বাভাবিক সহজ সরল জীবন কঠিন হইতে কঠিনতর হইতে লাগিল। “কোন বৎসর শস্য হোক বা না হোক তাহারা নিয়মিত রাজস্বের একটি পয়সাও পরিত্যাগ করেন না, এতদ্ভিন্ন ইজারাদার পত্তনীয়াদার ও দরপত্তনীয়াদার ইত্যাদি বহু লোক কৃষকের পরিশ্রমার্জিত বস্তুর অংশ গ্রহণ পূর্বক আপনাপন উপার্জনে তৎপর থাকাতে কৃষকের অবস্থা অতিশয় ক্লেশদায়ক হইয়াছে, কোন দয়াবান মনুষ্য যতপি মফঃস্বলে কৃষকের বাটীতে প্রবেশ পূর্বক তাহার অবস্থা সন্দর্শন করেন তবে তাহার অন্তঃকরণ বিদীর্ণ হইয়া নয়নযুগে কেবল আক্ষেপবারি নির্গত হইতে থাকে এবং তিনি দীর্ঘ-নিশ্বাস পরিত্যাগ পূর্বক এমত ক্লেশসূচক অভিপ্রায় ব্যক্ত করেন। হা পরমেশ্বর ! যাহাদিগের অধীনস্থ প্রজামণ্ডলীর ইদৃশ হ্রবস্থা তাহাদিগের সুসভ্য ও রাজনীতিজ্ঞ বলিয়া অভিমান করিতে কি লজ্জাবোধ হয় না ?

পল্লীগ্রামের ক্ষুদ্র ক্ষুদ্র জমিদার ও ইজারাদার ও বাড়ীদারদিগের অত্যাচারের ব্যাপার আমরা পুনঃ পুনঃ প্রভাকরে প্রকাশ করিয়া থাকি, ঐ সকল দৌরাণ্ড্য কোন কালে নিবারণ হয় এমত বোধ করি না, দীন ও দুঃখীদিগের দুঃখ বিবরণ বর্ণনা করিতে আমাদের লেখনী করুণ রসে আর্জ হইতেছে। জমিদার, ইজারাদার,

জোতদার প্রভৃতি দ্বার হইতে মুক্ত হইলেও বাড়ীদারদের বাড়ির প্রহার হইতে রক্ষা কখনও সম্ভব না।” \*

ইহাই হইল সেদিনকার কৃষি বাংলার বাস্তব জীবনচিত্র। জমিদার তথা জমিদার-কর্মচারীগণ যেমন নায়েব, মহরীর হইতে পেয়াদা পর্যন্ত আবওয়াব, মাথট, তহশীলদারের রাহা ও বাসা খরচ, পেয়াদার রোজ প্রভৃতি হরেক রকমের উচস্তুি ছলে বলে কৌশলে আদায় করিত। এমনকি দাখিলায় টাকার অঙ্ক মিথ্যা লিখিয়া নানা প্রকারে সরলচিত্ত অগ্র চাষীদের প্রতারণা করিত, শোষণ করিত। তাই প্রায় সমস্ত কৃষকই ছিল ভিতরে ভিতরে উত্তেজিত ও বিক্ষুব্ধ। অল্প সময়ের মধ্যেই বাস্তব ঘটনাবলী ও জীবনের অভিজ্ঞতা হইতে প্রজারা বুঝিল যে চিরস্থায়ী বন্দোবস্তে তাহাদের কোন স্বার্থ রক্ষিত হয় নাই। ভূমিতে তাহাদের পুরাতন স্বত্ব স্বামীত্ব একেবারেই বিলোপ করা হইয়াছে।

অতীত ইতিহাসের দিকে তাকাইলে দেখা যায় যে ঊনবিংশ শতাব্দীর প্রথম ত্রিশ বৎসর কৃষকগণ বিদ্রোহের পর শুধু বিদ্রোহই করিয়াছে। এই সময়ে এই অঞ্চলের আর একটি উল্লেখযোগ্য বিদ্রোহ হইতেছে বাধ্যতামূলক “হাতীখেদার” বিরুদ্ধে সূসং পরগণার হাজং বিদ্রোহ। হাজংগণ এই এলাকার গভীর অরণ্যের মধ্যে সুবিধাজনক স্থানে মজবুত গজারী গাছের খুঁটি দিয়া ঘেরাও করিয়া ভিতরে হাতীর লোভনীয় খাদ্য কলাগাছ ও ধানের আবাদ করিত এবং পোষা শিক্ষিত “কুনকী” হাতীর সহায়তায় নিজেদের জীবন বিপন্ন করিয়া কৌশলে বহু হাতী ধরিত। সূসং এর জমিদার-গণ হাজংদের নিকট হইতে এই সব হাতী লইয়া ঢাকা, মুর্শিদাবাদ, দিল্লী প্রভৃতি স্থানে বিক্রয় করিতেন।

এই হাতি বিক্রয় করিয়া তাহারা শুধু অর্থ উপার্জন করিত না, সুনাম, সূর্যশ ও খেতাবও পাইত। তাই প্রতি বৎসর হাতীখেদা তৈরি

করিয়া অধিকসংখ্যক হাতী ধরার জন্তু তাহারা হাজংদের উপর চাপ দিত। পরবর্তী পর্যায়ে হাতীখেদায় কাজ করার জন্তু বাধ্যতামূলক বেগার প্রথাও চালু করিতে চেষ্টা করে। হাজংরা এই বাধ্যতামূলক বেগার প্রথার বিরুদ্ধে প্রতিবাদ করিলে জমিদারগণ নানাভাবে অত্যাচার ও উৎপীড়ন শুরু করে। মনা সর্দারের নেতৃত্বে হাজং-গণ সুসং জমিদারদের বিরুদ্ধে বিদ্রোহ ঘোষণা করে। এই বিদ্রোহে কয়েকজন বিক্ষুব্ধ গারো সর্দারও সক্রিয়ভাবে অংশ গ্রহণ করে। ফলে সারা সুসং পরগণায় একটা বিরাট কৃষক-বিদ্রোহ দেখা দেয়। জমিদারগণ হাতী ধরায় ওস্তাদ মনা সর্দারকে হাতীর পায়ের তলায় ফেলিয়া হত্যা করে। ফলে সমগ্র হাজং, গারো কৃষক সম্প্রদায় সুসং-এর বারোমাসি ময়দানে প্রকাশ্য ভাবে জমিদারদের এক বাহিনীকে আক্রমণ করে। দক্ষ ও উপযুক্ত হাতীর মাহতরা হাতী ছাড়িয়া দিয়া বিদ্রোহে সক্রিয় অংশ গ্রহণ করে। হাতী চালনায় ও হাতীর বোধগম্য সব রকম বুলিতে (ভাষা) দক্ষ হাজং-গণ বিভিন্ন কৌশলে জমিদারদের সমস্ত হাতীগুলিকে ক্ষিপ্ত করিয়া দিল। অপর দিকে বিদ্রোহী কৃষকগণ সুসং, দুর্গাপুর আক্রমণ করিলে জমিদারগণ নেত্রকোণায় আশ্রয় গ্রহণ করে। ফারাংপাড়া, বিজয়পুর, চেংগী, ধেনকী, আড়াপাড়া, ভরতপুর প্রভৃতি জঙ্গলের খেদাগুলি তাহারা নষ্ট করিয়া ফেলে। চার-পাঁচ বৎসর পর্যন্ত এই বিদ্রোহ ও সংঘর্ষ চলিয়াছিল। এই হাতী খেদা বিদ্রোহে বেতগড়ার রাতিয়া হাজং ধেনকীর মঙ্গলা, লেঙ্গুরার বিহারী, সুজারু হদিপাড়ার বাঘা, ফান্দাগ্রামের জগ, বিজয়পুরের সোয়া হাজং প্রভৃতি মারা যান। বাগপাড়ার গয়া মোড়লকে জমিদারগণ ধরিয়া লইয়া যায়। সে আর গৃহে ফিরে নাই। মলা ও তংলু নিখোঁজ হয়। সুসং পরগণার এই হাতী খেদা বিদ্রোহের পর আর বাধ্যতামূলক ভাবে হাতী খেদার কাজ হয় নাই। এই হাতী খেদার বিরুদ্ধে এই অঞ্চলের কৃষক-বিদ্রোহের বিভিন্ন কাহিনী আজও আদিবাসীদের গ্রামে গ্রামে উপকথার মতো ছড়াইয়া আছে। সুসং পাহাড়ের



পাদদেশে বহু হাজং পরিবারের বসতিস্থাপন করিয়া এবং হাতী ধরার কাজ করিয়া রেহু সিংহের পুত্র রাজকিশোর যথেষ্ট কৃতিত্ব লাভ করে, কিন্তু পরে “খেদার” কাজে যথেষ্ট লাভ না হওয়ায় ও রাজস্ব নিয়মিত না দিতে পারার অপরাধে রাজকিশোর ও তাহার ভাইকে গ্রেপ্তার করিয়া ঢাকা চালান দেওয়া হয়। সেখানে বিচারে উভয়কে সাজা দেওয়া হয়, —সপ্তাহকাল প্রত্যহ বেত্রাঘাত এবং এই সময়ের মধ্যে রাজস্ব না দিতে পারিলে গুলি করিয়া মৃত্যু, কিন্তু ব্রিটিশ ফৌজের হস্তক্ষেপে তাহারা রক্ষা পায়। \*

এই অঞ্চলের স্রুং পরগণায় যখন বিরাট একটা কৃষক-বিদ্রোহ চলিতেছিল ঠিক সেই সমসাময়িক সময়েই ১৮২০ সালে সেরপুরের জমিদারী নিজেদের মধ্যে ভাগ বাটোয়ারা হইল। জমিদারগণ এই বাটোয়ারার যাবতীয় খরচপত্র এমন কি নূতন নূতন ডিহি কাছারি খোলার খরচ পর্যন্ত প্রজাদের ঘাড়ে চাপাইল। জমির জন্ম দেয় রাজস্বের পরিমাণও কিছুটা বৃদ্ধি করিল। ইহার ফলে প্রথমে সমস্ত প্রজা বিনীতভাবে এই ধরনের ব্যবস্থার বিরুদ্ধে আবেদন নিবেদন জানাইল, কিন্তু জমিদারগণ তাহাতে কর্ণপাত করিল না। বরং নূতন আবওয়ার, মাথট সহ ধার্য খাজনা আদায় করার জন্ম জোর জুলুম অত্যাচার উৎপীড়ন শুরু করিল। ফলে ইতিহাসের স্বাভাবিক পরিণতি হিসাবেই দেখা দিল আর একটি বিদ্রোহের সূচনা। বিশেষ বিশেষ মৌজায় প্রজারা একযোগে বাড়তি খাজনা দিতে অস্বীকার করিল,— জমিদার উহা আদায়ের জন্ম দৈহিক নির্যাতন আরম্ভ করিল। এইভাবে দুই বৎসর চলার পর ১৮২২ সালে এই অঞ্চলের বিদ্রোহী নায়ক বকসু ও দ্বীপটান প্রমুখ স্রুং ভূগাঁপুরের পাগলপন্থী নেতা টিপু সরদারকে সেরপুর অঞ্চলের বিদ্রোহ পরিচালনা করার জন্ম আহ্বান করেন। পাগলপন্থী টিপু তাহার অনুগামীদের লইয়া কৃষকদের স্বার্থে দণ্ডায়মান হন

এবং সমস্ত বিক্ষুব্ধ প্রজাকে লইয়া সেরপুর জমিদারদের বিরুদ্ধে প্রকাশ্যে বিদ্রোহ ঘোষণা করেন। জমিদাররা খাজনা আদায়ের জন্য বলপ্রয়োগ করিলে কৃষকগণ সংজ্ঞাবদ্ধভাবে জমিদারদের পাইক, পেয়াদা, বরকন্দাজেদের আক্রমণ করে। শহরের বাহিরের ডিহি কাছারিগুলি বিদ্রোহীরা দখল করিয়া আক্রমণের এক-একটি ঘাটিতে পরিণত করে। এই সব ঘাটি হইতে বিদ্রোহী কৃষকগণ সেরপুর শহরের উপর মুহূঁ মুহূঁ আক্রমণ করে। বিদ্রোহী প্রজারা জমিদারদের বাড়িঘর লুণ্ঠন করে। বিদ্রোহীদের আক্রমণে বিপর্যস্ত হইয়া জমিদাররা সপরিবারে দলে দলে সেরপুরের উত্তরে তদানীন্তন কালীগঞ্জের জয়েন্ট ম্যাজিস্ট্রেট ডেম্পিয়ার সাহেবের কাছারিবাড়িতে আশ্রয় গ্রহণ করে। বর্তমান নোহাটার পশ্চিমে মৃগী নদীর তীরে এই কালীগঞ্জ মহকুমায় একটি সেনানিবাস ছিল।

এই কৃষক বিদ্রোহে টিপুর নেতৃত্বে কৃষকগণ সেরপুরে একটি স্বাধীন রাজ্য স্থাপন করে। বিদ্রোহীরা গরজরীপার প্রাচীরবেষ্টিত স্থানে তাহাদের সরকার স্থাপন করে। বিদ্রোহীদের এই স্বাধীন রাজ্যে নায়ক বকসু ছিলেন বিচার বিভাগের দায়িত্বে, দীপচাঁদ ম্যাজিস্ট্রেটের কাজ করিতেন আর গুমানু সরকার সমস্ত দলিল দস্তাবেজ কাগজ পত্র রক্ষা করিতেন। টিপুর নেতৃত্বে তিন বৎসর-কাল কৃষকদের এই স্বাধীন রাজ্য চলিয়াছিল।

বিদ্রোহী কৃষকদের এই স্বাধীন রাজ্য সম্পর্কে বর্ণনা করিতে যাইয়া সেরপুরের রামনাথ বিদ্যাভূষণ মহাশয় লিখিয়াছেন :—

“বকসু জজিয়তি করে, দীপচাঁদ কালেক্টার  
নথীপত্র পেশ করে গুমানু সরকার।”

এই বিদ্রোহ দমন করার জন্য কালীগঞ্জের জয়েন্ট ম্যাজিস্ট্রেট মিঃ ডেম্পিয়ার ( Mr. Dampier ), জেলা ম্যাজিস্ট্রেট মিঃ ডানবার ( Mr. Dunbar ) -এর নিকট আরও অধিক পরিমাণে সৈন্যের জন্য আবেদন করেন। রংপুরের সৈন্যশিবির ও জামালপুর হইতে বিপুল পরিমাণে Light Infantry সমাবেশ

করিয়া মিঃ ডেমপিয়ার ও ডানবার ক্যাপ্টেন গারেট ( Capt. Garret )-এর নেতৃত্বে বিদ্রোহীদের বিরুদ্ধে অভিযান শুরু করেন। এই বিদ্রোহে বহু কৃষক প্রাণ দেয়। ১৮২৭ সালে নায়ক টিপু বন্দী হন এবং ময়মনসিংহের দায়রা জজের বিচারে যাবজ্জীবন কারাদণ্ড হয়। ‘কালাপানির’ জেলে টিপুর মৃত্যু হয়।

ইংরাজ সৈন্যের হস্তক্ষেপের পরেও এই কৃষক-বিদ্রোহ অল্প কিছুদিনের মধ্যেই আবার নূতন করিয়া অস্বপ্রকাশ করে। ১৯৩১ সালে কালীগঞ্জ হইতে জয়েন্ট ম্যাজিস্ট্রেটের কাছারি ও সেনানিবাস উঠিয়া যায়। কালীগঞ্জের সেনানিবাস উঠিয়া যাইবার সঙ্গেসঙ্গেই আত্মগোপনকারী বিদ্রোহী কৃষকগণ আবার বিদ্রোহ শুরু করে। এই অঞ্চলের দুর্ধর্ষ হদি সম্প্রদায়ের দুইজন সর্দার জানকু পাথর ও ছবরাজ পাথর এই বিদ্রোহের নেতৃত্ব করেন। এই দুই জনের নেতৃত্বে কৃষকরা নালিতাবাড়ি ও বাটাজুর হইতে সেরপুর আক্রমণ করে। বিদ্রোহীরা প্রথমে থানায় আগুন লাগাইয়া দেয় এবং কিছু অস্ত্রশস্ত্র হস্তগত করে। পরে জমিদারদের কাছারি বাড়ি লুণ্ঠন করে। সশস্ত্র সিপাহী পুলিশ বরকন্দাছদের মিলিত বাহিনী ছবরাজ জানকুর গেরিলা আক্রমণে বিপর্যস্ত ও বিমূঢ় হয়। তাহারা দুইজন কখনও পৃথকভাবে কখনও একযোগে পরিকল্পনা করিয়া আক্রমণ করিতেন।

এই বিদ্রোহে ভীত হইয়া ম্যাজিস্ট্রেট ডানবার কতৃপক্ষকে লেখেন— “Fresh disturbances of a very serious nature have occurred in Sherpur.” এই চিঠিতে তিনি অবিলম্বে প্রচুর সৈন্য ও গোলাবারুদ চাহিয়া আবেদন করেন। ক্যাপ্টেন সীল ( Capt. Seal ) ও লেফটানেন্ট ইয়ংহাজব্যাণ্ড ( Lt. Young husband ) প্রচুর সৈন্য সামন্ত ও গোলাবারুদ লইয়া সাময়িকভাবে সেরপুরে শিবির স্থাপন করেন এবং ধারাবাহিকভাবে বিদ্রোহীর উপর কঠিন আক্রমণ চালান। \*

হুবরাজ ও জানকু পাথরের নেতৃত্ব হাজার হাজার সশস্ত্র কৃষক প্রতিরোধ করে। টোগলাপাড়া, জলাঙ্গী, নালিতাবাড়ি, হালুয়াঘাট প্রভৃতি স্থানে উভয় পক্ষে প্রচণ্ড সংঘর্ষ হয়। দীর্ঘদিন বহু বীরত্বপূর্ণ লড়াই করিয়া বিদ্রোহী কৃষকগণ আধুনিক অস্ত্রের বিরুদ্ধে ক্রমে হীনবল হইয়া পড়ে। কাল ভদ্র ও পণ্ডিত মণ্ডল নামে দুইজন বিদ্রোহী নায়ক বন্দী হন এবং পাঁচজন সর্দার বহু সংখ্যক বিদ্রোহী সহ আত্মসমর্পণ করেন। বাদবাকি বিদ্রোহীদের মধ্যে অনেকে কড়ইবাড়ি ও গারো পাহাড়ে পশ্চাদপসরণ করেন। কিন্তু বহু চেষ্টা করিয়াও বিদ্রোহের নায়ক জানকু ও হুবরাজকে ধরিতে পারা যায় নাই। এমনকি তাহাদের খোঁজ খবর পর্যন্ত সংগ্রহ করিতে পারে নাই। ১৮২১ হইতে ১৮৩৩ পর্যন্ত এই কৃষক-বিদ্রোহ প্রায় বিরামহীন ভাবেই চলিয়াছিল।

“১৮৩৩ সনে দুই দল পাগলপন্থী বিদ্রোহী জানকু ও হুবরাজের নেতৃত্বে সেরপুর লুণ্ঠন করে এবং থানা আগুনে জ্বলাইয়া দেয়। জয়েন্ট ম্যাজিস্ট্রেট মিঃ ড্যামপিয়ান পুলিশ বরকন্দাজ সহ এই বিদ্রোহ দমন করেন, কিন্তু পরে হুবরাজ হঠাৎ আক্রমণ করিয়া তাহার ৪ জন লোককে বন্দী করিয়া লইয়া যায়। ফলে কালেক্টার জামালপুর হইতে ১৫০ জন সৈন্যের এক সামরিক বাহিনী প্রেরণ করেন এবং ক্যাপ্টেন সীল গারো পাহাড়ের পাদদেশ উত্তর গোয়াল-পাড়ার জলাঙ্গীতে ৪০০০ বিদ্রোহীর এক ঘাটি অবরোধ করে এবং বহু লোক গ্রেপ্তার করে। ইহার পরে আর কোন উত্তেজনার কথা শোনা যায় নাই।” \*

## ভূমিব্যবস্থা

১৮৫৭ খ্রীষ্টাব্দে ঐতিহাসিক সিপাহী-বিদ্রোহ হয়। তারপর বিভিন্ন সময়ে প্রজাদের স্বার্থরক্ষার নামে প্রজাস্বত্ব আইন প্রবর্তিত হয়। ১৮৫৯ সালে প্রজাস্বত্ব আইনকে তো কৃষকদের “সনন্দ পত্র” নামে অভিহিত করা হয়। কিন্তু এই সনন্দ পত্রও কৃষকদিগকে জুলুমের হাত হইতে রক্ষা করিতে পারে নাই। এই সব আইনের মাধ্যমে জমিদারগণ বর’ নিজ নিজ জমিদারীতে সুবিধা মতো কিছু কিছু মধ্য-যুগীয় ভূমিব্যবস্থা কায়েম করার ব্যবস্থা করে। তাহার কদর্য রূপ দেখা যাইবে প্রকৃতির রম্য লীলাভূমি এই উত্তর ময়মনসিংহের শান্ত স্নিগ্ধ আদিবাসীদের গ্রামগুলিতে। টঙ্ক, নানকার, ভাওয়ালী, খামার প্রভৃতি মধ্যযুগীয় দৃষ্ট প্রথা দূষিত ক্ষতের মতো দীর্ঘদিন এই এলাকার ভূমিব্যবস্থায় টিকিয়া থাকে। পরবর্তীকালে ইহার বিরুদ্ধেই হয় বীর আদিবাসীদের মরণবিজয়ী অভিযান।

টঙ্ক প্রথায় প্রজা বা রায়তকে নির্দিষ্ট পরিমাণ জমির বাবদ জমিদারকে নির্দিষ্ট পরিমাণ শস্য দিতে হয় অর্থাৎ জমির খাজনা টাকায় পরিশোধ না করিয়া উৎপন্ন শস্যে করিতে হয়।

টঙ্ক হঠাৎ মনে হইতে পারে যে, ইহাতে দোষনীয় বা আপত্তিজনক কি আছে? প্রথমত, আপত্তি এই যে, অনাবৃষ্টি, অতিবৃষ্টি, প্রতিকূল আবহাওয়া অথবা কীট পতঙ্গ (পঙ্গপাল, লোহাজুড়ি) বগ্ন জন্তুর আক্রমণে উক্ত জমিতে শস্য উৎপাদন না হইলেও টঙ্কচারী তাহার উপর ধার্য খাজনা বাবদ শস্য দিতে বাধ্য। এই টঙ্ক জমিতে চাষ-আবাদ করার জগ্ন জমিদার হাল, বীজ, সার, জল সেচ, আল বাঁধা প্রভৃতি কোন রকম দয়িত্বই গ্রহণ করে না; ব্যয়ভারও বহন করে না। অথচ প্রজা বা রায়তের নিকট হইতে ধার্য ফসল গ্রহণ করার সে সম্পূর্ণ অধিকারী। টঙ্ক জমি প্রথম

অবস্থায় সন পাট্টা অর্থাৎ ১ সনের মেয়াদে বিলি ব্যবস্থা বা পত্তন করা হইত, পরবর্তীকালে স্থায়ীভাবে পত্তন করা হইত। জমিদার প্রতি বৎসর ফসল ওঠার সঙ্গে সঙ্গে তাহার প্রাপ্য টঙ্ক ধান বুঝিয়া পাইয়া পরবর্তী বৎসরের জন্ম আরো উচ্চ হারে খাজনার দাবী স্থির করিয়া পুরাতন চাষী অথবা অল্প কোন নুতন চাষীর নিকট জমি পত্তন করিত। এক কথায় টঙ্ক জমিতে প্রজা বা রায়তের কোনরকম স্ব-স্বামিত্ব জন্মিত না। জমিদার ইচ্ছামত টঙ্ক জমি হাত বদল করিয়া প্রজাপত্তন করিতে বা খাস পতিত রাখিতে পারিতেন। হিসাব করিয়া দেখা গিয়াছে যে, কোন স্রবৎসরেও টঙ্ক চাষীকে উৎপাদিত শস্যের অর্ধেকই জমিদারকে খাজনা বাবদ দিতে হইত। বাকি অর্ধেক চাষী নিজের সমগ্র পরিবারের ভরণ-পোষণ, শ্রম, হাল, বলদ, কৃষিযন্ত্র, বীজের মূল্য প্রভৃতি বাবদ রাখিতে পারিত। টঙ্ক জমিতে শস্য কম বেশী যাহাই হেউক না কেন, অনিবার্য কারণে যদি শস্য হানি হয় অথবা তুর্ঘটনাবশতঃ চাষী যদি কখনও জমি চাষ করিতে না পারিয়া থাকে তবুও চাষীকে কবলা বর্ণিত ধার্য ধান ক্রয় বা ঋণ করিয়া হইলেও জমিদারকে দিতে হইত। অবস্থা বিশেষে বাকি বকেয়া টঙ্ক ধান পরবর্তী বৎসরে সুদ সহ আদায় করিবারও ব্যবস্থা ছিল। এমন ঘটনাও দেখা গিয়াছে যে, বাকি টঙ্ক ধান পরিশোধ করার ফলে চাষীকে সমস্ত উৎপন্ন শস্যই জমিদারকে দিতে হইয়াছে। শুধু তাহাই নহে, জমিদার-গণ মহাজনী কায়দায় বাকি টঙ্ক ধানের সর্বোচ্চ মূল্য ধরিয়া তাহার উপর সুদ কষিয়া পরবর্তী মরসুমে উক্ত টাকার বিনিময়ে ফসল আদায় করিত। অসমর্থ-চাষীদের হালের বলদ, গরু-বাছুর, ঘরের টিন বা থালা ঘটি পর্যন্ত ফ্রোক করা হইত। টঙ্ক প্রথায় আবাদী জমির সংলগ্ন অনাবাদী ছোট টিলা, ভাঙা, খানা-ডোবা পর্যন্ত জমির সহিত যোগ করিয়া চাষীর নামে পত্তন দেখাইয়া উক্ত অনাবাদী জমির দরুণও কৌশলে টঙ্ক ধান আদায় করা হইত। টঙ্ক চাষীর অবর্তমানে তাহার বংশধরদের উপর বাকি বকেয়া ঋণ বর্তাইত। কিন্তু টঙ্ক জমির উপর উত্তরাধিকারীদের কোন স্ব-স্বামিত্ব বা অধিকার স্বীকৃত হয়

নাই। কোন-কোন ক্ষেত্রে চাষীকে টঙ্ক ধান স্বয়ং বহন করিয়া জমিদারদের গোলায় পৌঁছাইয়া দিতে বাধ্য করা হইত’ অথবা চাষীর নিকট হইতে পৌঁছানোর খরচ আদায় করা হইত। এই অঞ্চলে বিশেষ করিয়া সুসং পরগণায় এই টঙ্ক প্রথা ছিল ব্যাপক; আর ইহার প্রধান বলি ছিল হাজং কৃষকরা। এই টঙ্ক প্রথার শোষণের তীব্রতা কত গভীর ছিল তাহার প্রকৃষ্ট প্রমাণ মেলে লেঙ্গুরা মৌজায়। শুরুতে এই মৌজার স্থিত ছিল মাত্র ৩৩ টাকা, আর তাহাই ১৯৪০ সালে দাঁড়ায় ৫ হাজার টাকায়। ইহা এক নির্মম সামন্ততান্ত্রিক শোষণ প্রথা। তাই ইহার ফলে প্রতিক্রিয়াও সৃষ্টি হইয়াছিল ভীষণ-তম। ১৯৪৭ সালের পরেও অনেকদিন পর্যন্ত এই জঘন্য প্রথা ইহার হ্রষিত ও কদর্য চেহারা লইয়া বর্তমান ছিল। তাই টঙ্ক প্রথা উচ্ছেদ না হওয়া পর্যন্ত বার বার ইহার বিরুদ্ধে বিদ্রোহ দেখা দিয়াছে। “.....এই টঙ্ক আন্দোলনের মধ্য দিয়াই হাজং মেয়েদের মনে সর্বপ্রথম সংগ্রামী চেতনা দেখা দেয়। তাহারা যে কেবল দলে দলে এই আন্দোলনে যোগ দিয়াছিল তাহাই নহে, বহু বীরত্ব প্রদর্শন ও বিশিষ্ট ভূমিকা গ্রহণ করিয়াছিল। ১৯৩৭ সন হইতে ১৯৫০ সন পর্যন্ত, “কৃষিসংস্কার আইন” পাশ হইবার পর, এই টঙ্ক আন্দোলনের অবসান হয়। এই সংগ্রামে হাজং এবং ডালু উপজাতির অস্থান ৬০ জন স্ত্রী-পুরুষ প্রাণ বিসর্জন করে।

তে-ভাগা আন্দোলনেও হাজং মেয়েরা বহু সংখ্যায় যোগদান করে। তাহাদের অনেকেই অতুলনীয় সাহসের পরিচয় দিয়া শহীদ হন। এই নারী শহীদদের মধ্যে রাসমণি, শঙ্খমণি, রেবতী প্রমুখের নাম বিশেষ-ভাবে উল্লেখযোগ্য।”\*

নানকার প্রথাকে বেগার বা চাকরান প্রথাও বলা হয়। স্থানীয় ভাবে এই নানকারী প্রজা বা রায়তদের “বেগারী” বলিয়া সম্বোধন

করা হইত। এই প্রথায় নির্দিষ্ট পরিমাণ জমি ভোগ-দখলের বিনিময়ে প্রজা বা রায়ত প্রতিমাসে বা বৎসরে নির্দিষ্ট কিছুদিন নানকার জমিদার বাড়িতে দৈহিক শ্রম দিতে বাধ্য থাকিত অর্থাৎ নানকার প্রজা বা রায়তকে ভূস্বামীর বাড়িতে বিনা পারিশ্রমিকে যাবতীয় হীন ও কষ্টসাধ্য কাজকর্ম করিতে বাধ্য করা হইত। ইহাদিগকে গৃহদাস বলা চলে। এই প্রথায় প্রতি একর জমির প্রজা জমিদারকে প্রতি মাসে ৫ হইতে ৭ দিন পর্যন্ত দৈহিক শ্রম দিত, তাহা ছাড়া বিশেষ কোন কাজ উপলক্ষে বা জরুরী প্রয়োজনে তলব করিলেও নানকারী প্রজাকে জমিদারের হুকুম তামিল করিতে হইত। নানকারী জমিতে প্রজার কোন স্বত্ব ছিল না। অর্থাৎ এই জমি ক্রয় বিক্রয় বা কোন রকমে হস্তান্তর করা চলিত না। কবলা বর্ণিত নির্দেশ মতো নানকারী প্রজা নিজে অথবা অগ্র কোন প্রতিনিধি পাঠাইয়া মালিক সরকারে নিয়মিত দৈহিক শ্রম দিয়া গেলে পুরুষানুক্রমে এই জমি ভোগ দখল করিতে পারিত। নানকারী প্রজার অবর্তমানে তাহার বিধবা স্ত্রী বা নাবালক পুত্র কোন লোক নিযুক্ত করিয়া জমিদারকে শ্রম দিবার ব্যবস্থা করিলে উক্ত জমি ভোগ-দখল করিতে পারিত। এই বর্বর প্রথা আমাদিগকে মধ্যযুগের দাস প্রথা, ছোটনাগপুরের “কমিউতি”, উড়িষ্যার “গোষ্ঠী-প্রথা”, উত্তর-পূর্ব সীমান্তের “ডুডাং” প্রথার কথা স্মরণ করাইয়া দেয়।

সেরপুর পরগণার হদি ক্ষত্রিয়দের মধ্যেই এই প্রথা ব্যাপকভাবে প্রচলিত ছিল। নানকারী প্রজাগণ প্রতি ৭ দিন, ১০ দিন বা ১৫ দিন অন্তর অন্তর ছোট ছোট দলে বিভক্ত হইয়া জমিদারদের সদর কাছারিতে আসিত এবং নিজেদের উপস্থিতি লিখাইয়া ভারপ্রাপ্ত কর্মচারীর নির্দেশ মতো নিজেদের মধ্যে যাবতীয় কাজ ভাগ করিয়া লইত। জমিদার-বাড়ির সমস্ত রকম গৃহস্থালীর কাজ, যেমন, খালা-বাসন মাজা, কাপড় কাচা, ঘর-দুয়ার পরিষ্কার-পরিচ্ছন্ন করা, পাখা টানা, বাগানবাড়ি, ফলের বাগান, খোলার মাঠ, রাস্তাঘাট পরিষ্কার



এবং পালা করিয়া সমস্ত রাত্রি জমিদার বাড়ি চৌকি দেওয়া প্রভৃতি ছিল তাহাদের প্রধান কাজ। বিশেষ করিয়া কোন দাঙ্গা-হাজ্জামার জমি দখল ও চর দখলের কাজে বা কোন বিদ্রোহী প্রজার জমি দখল, বাড়ি উচ্ছেদের নিষ্ঠুর কাজে এই নানকারী প্রজাদের নিয়োগ করা হইত। নানকারী প্রজাদের শৌর্য-বীর্য শক্তি-সামর্থ্য এমন কি অমূল্য জীবনের মূল্যে জমিদারগণ তাহাদের স্বার্থ রক্ষা করিত। এক-একটি ক্ষত্রিয় পরিবার নানকার জমির পরিবর্তে পুরুষানুক্রমে আত্মবিক্রয় করিয়া জমিদার বংশের সেবা করিয়া যাইত। অথচ নিয়তির এমনই পরিহাস যে, এই নানকার প্রজাদের উপর আর্থিক ও সামাজিক নির্যাতন ছিল সীমাহীন ও বর্ণনাভীত। মানবতার সামান্যতম অধিকারটুকু পর্যন্ত ইহাদের দেওয়া হয় নাই।

ভাওয়ালী প্রথা এই অঞ্চলে সর্বত্র দেখা যায় না এবং ইহা খুব পুরাতনপ্রথাও নয়। সেরপুর পরগণার তালুকদারগণ ধানশাইল, ভটপুর, কান্দুলী, বিনাইগাতী প্রভৃতি ইউনিয়নের রাজবংশী ও হাজ্জ প্রজাদের উপর এই প্রথা চালু করে। এই ভাওয়ালী প্রথায় প্রজা বা রায়তকে নির্দিষ্ট পরিমাণ জমির জন্ত কিছুটা অর্থ ও কিছুটা দ্রব্য খাজনা দিতে বাধ্য করা হইত অর্থাৎ একই জমির জন্ত অর্থ ও দ্রব্য এক সাথে দুই রকমের খাজনা চলিত; যেমন এক একর জমির জন্ত বাৎসরিক খাজনা নগদ চার টাকা এবং এক জোড়া পাঁঠা অথবা উক্ত পরিমাণ জমির জন্ত নগদ চার টাকা এবং দুই ছড়ি মালভোগ কলা বা ২৫টি ফুট। টাকায় খাজনা বৎসরের দুই

ভাওয়ালী কিস্তিতে দেওয়া চলিত, কিন্তু দ্রব্যে খাজনা অর্থাৎ পাঁঠা, কলা, ফুটি ইত্যাদি কবলায় বর্ণিত নির্দিষ্ট দিনে অবশ্যই দিতে হইত। যথা দুর্গাপূজা, কালীপূজা, মনসাপূজা প্রভৃতি পূজা-পার্বণ উপলক্ষে উহা অবশ্যই দিতে হইত। এই সব দ্রব্য প্রজার নিজের থাকুক বা না থাকুক তাহাকে যে কোন মূল্যে খরিদ করিয়া হইলেও দিতে বাধ্য করা হইত। অত্যাচার এই দ্রব্যে খাজনার জন্ত অসম্ভব রকমের মূল্য ধরিয়া সেই টাকা প্রজার নিকট

হইতে আদায় করা হইত। এই ভাওয়ালী প্রথায় প্রজা বা রায়ত জমিতে স্বত্বান হইলেও কোন জরুরী প্রয়োজনে এই জমি বিক্রয় বা অন্য কোন ভাবে হস্তান্তরিত করিতে হইলে জমির মালিকের অনুমতি প্রয়োজন হইত; ফলে ক্রেতা ও বিক্রেতা উভয়কেই মালিককে একটা নজর সেলামী না দিয়া উপায় ছিল না। এই ধরনের অলিখিত বে-আইনী আবোয়াব ছিল হরেক রকমের।

জমিদারগণ পুণ্যাহে, বিবাহে, অন্তপ্রাশনে, পূজা-পার্বণে এমনকি শ্রাদ্ধে পর্যন্ত প্রজা বা রায়তের নিকট হইতে অর্থ, দ্রব্য শ্রম আদায় করিত। এই অঞ্চলের প্রজারা ছিল জমিদার ও তালুকদারের কামধেনু।

জমিদারী প্রথার শুরু হইতেই জমিদারগণ “খাস খামার” হিসাবে বহু উৎকৃষ্ট শ্রেণীর জমি নিজেদের দখলে রাখিত। এই খাস খামার জমিতে প্রজা পত্তন না করিয়া শস্যের চুক্তিতে জমি বিলি করা হইত। এই খাস খামার হইতে জমিদারদের আয় হইত প্রচুর।

প্রথম মহাযুদ্ধের পরবর্তী কালে শিল্পে ও কৃষিতে পুঁজি বিনিয়োগের একটা প্রচেষ্টা দেখা যায়। এই সময় কিছু কিছু সূচতর ভূস্বামীও

কৃষিতে কলের লাঙ্গল ও যন্ত্রের আমদানী করে এবং খামার প্রথা ধনতান্ত্রিক পদ্ধতিতে বিভিন্ন কৃষিপণ্য উৎপাদনে সচেষ্ট হয় কিন্তু বাস্তব ক্ষেত্রে এই ধরনের জমিদারদের সংখ্যা কম হইলেও সুদখোর মহাজনেরা কিন্তু ব্যাপকভাবে পাহাড় অঞ্চলে কৃষিজমিতে পুঁজি বিনিয়োগ করিয়া বহু খামার স্থাপন করিল। কল-কজা, ট্রাকটার ইত্যাদি আমদানী না করিলেও সস্তায় কৃষিমজুর খাটাইয়া অনেক বেশী মুনাফা অর্জনের ফন্দি করিল। প্রচুর পরিমাণে ধানের আবাদ ও ফলন হয় এমন সব অঞ্চলে ২।৩ বর্গমাইল জুড়িয়া এক-একটি খামার গঠন করিয়া হাল, বলদ ও কৃষিমজুর নিয়োগ করিল এবং নিজেদের ব্যবস্থাপনায় প্রচুর পরিমাণে শস্য উৎপাদন শুরু করিল। এই সব খামারের মালিকদের আর একটি কৌশল ছিল বাড়তি পুঁজি-দ্রব্য চাষীদের মধ্যে অধিক সুদে

দাদন করিয়া ঠিক মরসুমের সময় খাতকদের নিকট হইতে জমিতে উৎপন্ন ধান আদায় করা। এই উদ্দেশ্যে খাতকদের 'নিজ্জের জমির ধান কাটিয়া এই সব খামারে তুলিয়া ঝাড়াই-মাড়াই করিতে বাধ্য করা হইত এবং মহাজনরা তখন তাহাদের পাওনা সুদে-আসলে আদায় করিয়া রাখিত।

এই খামার প্রথায় খাতক ও বর্গাদার চাষীরা তাহাদের জমির যাবতীয় ফসল মহাজনদের খামারে তুলিতে বাধ্য হইত। মালিকের হিসাব মতো সব পাওনা বুঝাইয়া দেওয়ার পরে যদি কিছু উদ্ভূত থাকিত তবেই চাষী তাহা নিজের ঘরে লইয়া যাইতে পারিত। দেখা গিয়াছে যে এই খামার প্রথার ফলে মহাজনদের হিসাবের জালে ছুঃছু চাষীগণ ক্রমেই যেন অক্টোপাশের বন্ধনে জড়াইয়া পড়িয়াছে এবং শেষ পর্যন্ত কৃষক খাতক তাহার স্ত্রী-পুত্র-পরিবার সহ রিক্ত হস্তে শুধু কুলা ডালা লইয়া কাঁদিতে কাঁদিতে নিজের কুঁড়ে ঘরে ফিরিয়াছে। দুই মহাযুদ্ধের মধ্যবর্তীকালে এই খামার প্রথা হাজং, ডালু, বানাই, কোচ, গারো এবং সাধারণ ভাবে সমস্ত মুসলমান কৃষকদের জীবনে এক বিভীষিকার সৃষ্টি করিয়াছিল। “ঋণ সালিশী বোর্ড” গঠনের ফলে মহাজনদের যে ক্ষতি হয়, খামার প্রথা চালু করিয়া তাহারা তাহার চতুর্গুণ সুবিধা আদায় করিয়া লয়। এই প্রথা অসংখ্য চাষীকে নিজের জমি বাড়ি হইতে উচ্ছেদ করিয়াছে এবং ঋণের দায়ে তাহার জমি মহাজনের খামারের অন্তর্ভুক্ত হইয়াছে। আর কৃষকগণ সপরিবারে পরিণত হইয়াছে খামারের সস্তা ক্ষেতমজুরে। এ এক নির্মম করুণ কাহিনী।

এই ধরনের মধ্যযুগীয় সামন্ততান্ত্রিক ভূমিব্যবস্থার সঙ্গে ওতপ্রোত-ভাবে যুক্ত রহিয়াছে নির্মম শোষণমূলক এক ধনতান্ত্রিক অর্থনীতি। এই অর্থনীতির উপর সম্পূর্ণ কজা করিয়া রহিয়াছে টাকা লগ্নিকারী, ধারে ব্যবসায়ী, দাদনদার একাধারে ক্রয়-বিক্রয়কারী একদল মহাজন। এই অঞ্চলের মহাজনদের অকথ্য শোষণের ইতিহাস বাস্তবিকই চমকপ্রদ, রোমাঞ্চকর ও লোমহর্ষক রূপকথার মতো। এখানকার

চাষী ও মহাজনদের বাস্তব ঘটনার উপর ভিত্তি করিয়াই লেখা হইয়াছিল “ছাতী না হাতী” । \*

এই প্রসঙ্গে ‘সংবাদ প্রভাকর’ পত্রিকার একটি উদ্ধৃতি বিশেষ তাৎপর্যপূর্ণ :—“মহাজন সকল অসময়ে কৃষককে শস্তাদি কর্জ দেয় এবং বীজ বপন সময়ে বীজ ধানও প্রদান করিয়া থাকে একথা অতি যথার্থ বটে কিন্তু যে পরিমাণে তাহারা গ্রহণ করিয়া থাকে তাহা প্রায় অর্দ্ধাংশ বলিলেই হয়, কারণ তাহারা কৃষককে ধাত্ত ও নগদ টাকা দিয়া থাকে, যত্বপি দশ টাকা নগদ প্রদান করে তবে কোন সময় :২৥ টাকা, কোন সময় ১৫ টাকা খত্ লেখাইয়া লয় এবং সেই খতের উপর :১২ পার্সেন্টের হিসাবে সুদ চলিয়া থাকে, আর মহাজনগণ যত্বপি ধাত্ত কর্জ দেয় তবে আড়ি হিসাবে তাহার বৃদ্ধি ধরিয়া থাকে কিন্তু আড়ি প্রভৃতি পরিমাণ যদিও এদেশে চলিত আছে কিন্তু সর্বত্র একরূপ নহে । অতএব আমরা দৃষ্টান্ত প্রয়োগ স্থলে মোণের হিসাব লিখিতেছি, মহাজনরা যত্বপি কোন কৃষককে এক মোণ ধাত্ত কর্জ দেয় তবে কেহ সোয়া মোণ কেহ বা দেড় মোণ আপনার খাতায় লেখাইয়া লয় এবং প্রতি মোণে সেরের হিসাবে তাহার সুদ অর্থাৎ বৃদ্ধি ধরিয়া থাকে, বীজ বপন সময়ে বীজ ধান কর্জ দিলে তাহার নিয়ম আবার স্বতন্ত্র প্রকার, এক গুণ দিলে চতুর্গুণ গ্রহণ করিয়া থাকে । এই নিয়মক্রমে কঠোরোপার্জিত শস্যের দ্বারা গ্রাম্য মহাজনদিগের বিলক্ষণ পুষ্টি বর্দ্ধন হইয়া আসিতেছে, তাহাদিগের কোন বিষয়ের অভাব নাই, কেবল কৃষকদিগেরি পর্ণকুটীর এবং ছিন্ন বসন সার হইয়াছে, তাহারা দিবা-যামিনী অবিজ্ঞান-রূপে পরিশ্রম করিয়াও স্বচ্ছন্দপূর্বক উদরান্ন নির্বাহ করিতে পারে না । তাহাদিগের উপার্জনের প্রায় সমুদয়াংশই অপরের উদরগ্রাৎ হইয়া থাকে ।” \*\* দীর্ঘ এক শতাব্দী উত্তীর্ণ হইয়া গেলেও ছবছ এই চিত্রই এখনও এই অঞ্চলে দেখা যাইবে ।

টঙ্ক, নানকার, ভাওয়ালী, খামার প্রথা ছাড়াও এই অঞ্চলের

\* আমার বাংলা— সুভাষ মুখার্জী ।

\*\* সংবাদ প্রভাকর—সম্পাদকীয় । ৮-৮-১২৭০

অনগ্রসর চাষীদের শোষণের আরও নানা ধরনের প্রথা বা ব্যবস্থা কালক্রমে চালু করা হইয়াছিল। এই রকম একটি ব্যবস্থা হইল বন-জঙ্গলকে জমিদারের 'রিজার্ভ' বলিয়া ঘোষণা করা। সুদূর অতীত হইতেই আদিবাসীরা নিজেদের প্রয়োজনীয় জ্বালানি কাঠ প্রকৃতির অপৰ্যাপ্ত দান হিসাবে এই অঞ্চলের স্বাভাবিক বন-জঙ্গল হইতে অবাধে সংগ্রহ করিত; কিন্তু জমিদারগণ হঠাৎ উহা তাহাদের 'রিজার্ভ' বলিয়া ঘোষণা করিয়া তাহার উপর জমা আদায় শুরু করিল, এমনকি তথাকথিত হঠাৎ হওয়া "রিজার্ভ" জঙ্গলে গরু, মহিষ চরাইতে হইলেও মাশুল আদায় আরম্ভ করিল। ফলে স্বভাবতই কৃষকদের দৈনন্দিন জীবন ক্রমশঃ কঠিন হইতে কঠিনতর হইয়া দাঁড়াইল। ইহা তাহাদের মানসিক ক্ষেত্রেও একটা প্রতিক্রিয়ার সৃষ্টি করিল।

শোষণের দ্বিতীয় ব্যবস্থাটি এইরূপ :— এই অঞ্চলের কৃষকরা আবহমানকাল ধরিয়া তাহাদের গ্রামের নিকটস্থ জলায় (খাল-বিলে) অবাধে নিজেদের প্রয়োজনীয় মাছ ধরিতে পারিত। কোন বাধা-নিষেধ ছিল না। কিন্তু জমিদার হঠাৎ জেলেদের নিকট অর্থের বিনিময়ে জলা পত্তন করিল, পরে চাষীদের উপরও বাধা-নিষেধ আরোপ করিয়া জলায় মাছ ধরা বন্ধ করিয়া দিল।

হাট বাজারের মারফৎ নানা ধরনের পীড়নমূলক শোষণ ব্যবস্থাও জমিদারগণ চালু করে। জমিদারেরা প্রত্যক্ষভাবে অথবা ইজারাদার নিযুক্ত করিয়া হাটে কৃষকদের উপর শোষণের মাত্রা বাড়াইয়া তোলে। কোন কোন হাটের বাৎসরিক আয় ১৫২০ গুণ পর্যন্ত বৃদ্ধি পাইতে দেখা গিয়াছে। এই সব হাটে-বাজারে জমিদারদের জমা আদায়ের ব্যবস্থা ছিল হিস্তা হিসাবে নিজেদের মধ্যে ভাগ বাটোয়ারা করিয়া লওয়া। যেমন, সেরপুরের হাটগুলি :—

সোম-গুরু—রঘুনাথ ( আড়াই আনী বড় তরফ )

শনি-মঙ্গল—তেরা ( আড়াই আনী ছোট তরফ )

রবি—গুরু নয় আনী ( নয় আনী জমিদার )

খালী বুধে—তিন আনী ( তিন আনী তরফ )

আবার, ঝিনাইগাতীতে নয় আনী জমিদার হাট বসাইল তো নরীতে আড়াই আনী বসাইল ; নালিতাবাড়ীতে নদীর এক পাড়ে নয় আনী, অপর পাড়ে আড়াই আনী, হালুয়াঘাটে এক হাটেই পর পর ৪ জন জমিদার হাট অধিকার করিল। ঘোষণাওর হাট মহারাজার, ঠিক তেমনই স্রুং ছুর্গাপুরে কমলাকান্দা, নাজিরপুর, তাহেরপুরের স্টেটের মালিকানা জমিদারদের মধ্যে ভাগাভাগি। “এই সব হাট-বাজার বসাইয়া জমিদারগণ জনসাধারণের তথা সমাজের নৈতিক চরিত্রের অবনতি ঘটাইত। এক জমিদারের হাট-বাজারের পাশে অগ্র্য্য আব এক জমিদার প্রতিযোগিতা করিয়া লাভের জগ্গ হাট বসাইত। আর এই কাজে প্রধান ও প্রথম পদক্ষেপ ছিল—বাজারের সন্নিহিতে বেশ্যা আমদানী করা এবং হাট-বাজারের সংলগ্ন একটি করিয়া বেশ্যা পট্টী স্থাপন করা।” \*

জমিদারদের এই সব প্রথা ও ব্যবস্থা চালু রাখার জগ্গ এই অঞ্চলের প্রধান প্রধান হাট ও বন্দরে তাহাদের ডিহি কাছারি এবং মহাজনদের তেজ্জারতি গদি বা মোকাম থাকিত। টঙ্ক ধান, দাদনি টাকার ধান ও নানা ভাবে সংগৃহীত শস্ত মজুত রাখার জগ্গ হাজার হাজার মণের এক একটি গোলাও ছিল। শুধু তাহাই নয়, এই সব ডিহি কাছারি ও গদির সংলগ্ন একটি করিয়া মালখানা বা কয়েদঘরও থাকিত। জমিদারের খাজনা ও মহাজনের ঋণ পরিশোধ করিতে অক্ষম হইলে চাষীদের এই সব মালখানায় আবদ্ধ করিয়া দৈহিক নির্ধাতন করা হইত ;—জুতাপেটা, বাঁশডলা, বেতমারা হইতে শুরু করিয়া সব রকম দৈহিক অত্যাচারই করা হইত। মৃত পিতা বা স্বামীর ঋণের দায়ে নাবালক পুত্র বা বিধবা স্ত্রীকে পর্যন্ত এই সব মালখানায় আটক করিয়া টাকা আদায়ের রেওয়াজ ছিল। এই ধরনের নির্মম শোষণ পীড়ন ও অত্যাচার ছিল এই অঞ্চলের দৈনন্দিন করুণ ইতিহাস। তাই পরবর্তীকালে নিতান্ত স্বাভাবিকভাবেই দীর্ঘ দিনের পুঞ্জীভূত ব্যথা, বেদনা ও বিকোভ ভীষণ বিদ্রোহরূপে আত্মপ্রকাশ করে।

## নব জাগরন

প্রথম মহাযুদ্ধের পরবর্তীকালে গান্ধীজি তাঁহার কর্মপদ্ধতি দ্বারা ভারতবর্ষের রাজনৈতিক ও সামাজিক ক্ষেত্রে বিশেষ প্রতিষ্ঠা অর্জন করেন এবং জাতীয় স্বাধীনতা আন্দোলনের অগ্রতম শ্রেষ্ঠ নেতা রূপে গণ্য হন। খুব অল্প সময়ের মধ্যেই তিনি জনসাধারণের উপর প্রচণ্ড প্রভাব বিস্তার করেন। এই অঞ্চলের আদিবাসীদের মধ্যেও তিনি “গান্ধীরাজা” বলিয়া খ্যাতি লাভ করেন। খুব স্পষ্ট না বুঝিলেও “গান্ধীরাজা” স্বরাজ চান, বিলাতি কাপড়, ছাতা ইত্যাদি তিনি কিনিতে নিষেধ করিয়াছেন এইটুকু তাহারা জানিত। সেরপুর, সূসং, নালিতা-বাড়ি, হালুয়াঘাট প্রভৃতি হাট-বাজারে অসহযোগ আন্দোলনের স্বেচ্ছাসেবকদের বক্তৃতা শুনিয়া কেহ কেহ অনুপ্রাণিত হইয়াছে ; —“স্বরাজ চাই” “স্বেচ্ছাসেবক” প্রভৃতি মার্কোয়াল গান্ধীটুপী মাথায় পরিয়া গ্রামে গ্রামে বেড়াইয়াছে। অসহযোগ আন্দোলনের যুগে এই অঞ্চলের আদিবাসীরা গান করিয়া প্রচার করিত ;—

“গান্ধীরাজা আইল দেশে  
লড়াই করে সিয়ার দাশে \*  
পরিও না রেশমী চুড়ি  
আর নম্বরী শাড়ী  
হারেরে রে হারে রে রে ॥”

স্কুলের ছাত্র মহেশ, নবীন, বেলীকান্ত, মণিকান্ত, গজেন্দ্র, ললিত ও নয়ান প্রভৃতি হাজং ছেলেরা ইংরেজী পড়া “বয়কট” করিল। দলিত ও নয়ান গান্ধীটুপি মাথায় করিয়া একদম “গান্ধী রাজার” লোক বলিয়া পরিচয় লাভ করিল। এই অসহযোগ আন্দোলনের সময়

বাংলার বিপ্লবী দলের কোন কোন কর্মীও আদিবাসীদের গ্রামে রাজনৈতিক উদ্দেশ্য লইয়া গিয়াছিলেন।

মহাত্মা গান্ধীর অস্পৃশ্যতা বর্জন আন্দোলনও আদিবাসীদের মনে এক নবজাগরণ আনয়ন করে। তাঁহার বাণী “যতদিন হিন্দুধর্মের অস্পৃশ্যতার গ্লানি দূর না হইবে ততদিন স্বরাজ পাওয়া অসম্ভব”— অসহযোগ আন্দোলনের কর্মীদের মনে নূতন কর্মপ্রেরণা ও পথনির্দেশ দিল। স্রসং, পূর্বাধলা, চন্দ্রকোনা, নখলা ও সেরপুর থানার কর্মীরা অস্পৃশ্যতা দূরীকরণের জন্য সমাজসংস্কারমূলক কাজে আত্মনিয়োগ করিলেন। হাজং, ডালু, হদি সম্প্রদায়ের মধ্যে আন্দোলন বেশ ব্যাপকতা লাভ করিল। প্রথমত, জল-চল ও ধোপা-নাপিত ব্যবহারের দাবিতে গ্রামে গ্রামে সভা বৈঠক ও কমিটি গঠনের কাজ চলিল, পরে নির্দিষ্ট দিনে জেলা শহরের হুর্গাবাড়ি প্রাঙ্গণে সকলে দলে দলে সমবেত হইয়া জল-চল হওয়া ও ধোপা-নাপিত ব্যবহারের দাবী ঘোষণা করিলেন। এই সমাবেশে উদার ও প্রগতিশীল ব্যক্তিগণ উপস্থিত হইয়া তাহাদের হাতের জল গ্রহণ করিলেন। সমবেত জনসাধারণ ইহাতে উৎসাহিত হইয়া গ্রামে ফিরিলেন। কিন্তু পরে দেখা গেল যে, ইহা জনসভায় আনুষ্ঠানিক প্রস্তাব গ্রহণেই পর্যবসিত হইল, বাস্তব জীবনে অবস্থা যেমন ছিল তেমনই রহিয়া গেল।

১৯২৫-২৭ সালে সেরপুর পরগণার হদিগণ হিন্দুশাস্ত্র হইতে তথ্য-প্রমাণ উদ্ধৃত করিয়া নিজদিগকে হৈহয় ক্ষত্রিয় বলিয়া ঘোষণা করিলেন এবং দলবদ্ধ ভাবে উপবীত ধারণ করিলেন। হদি ক্ষত্রিয়দের এই উপবীত গ্রহণ প্রায় ৫০টি গ্রামের হদিদের মধ্যে বিপুল আলোড়ন উৎসাহের সৃষ্টি করিল। এই সময় সেরপুর টাউনের প্রগতিশীল যুবকবৃন্দ ও কতিপয় ব্যক্তি “সর্বজনীন” জগদ্ধাত্রী পূজার আয়োজন করিয়া এই অঞ্চলে সর্বপ্রথম বারোয়ারী পূজার অয়োজন করিলেন। অস্পৃশ্যতা দূরীকরণ এইভাবে অনেকখানি আগাইয়া গেল।

ইহার পর ১৯২৯ সালে স্ত্রীভাষচন্দ্র বসু ও দেশপ্রিয় যতীন্দ্রমোহন সেনগুপ্তের নেতৃত্বে জামালপুরে যে রাজনৈতিক সম্মেলন হইল তাহাতে



পাঁচ শত হুদি ক্ষত্রিয় শোভাযাত্রা করিয়া যোগদান করেন। এই সময় চন্দ্রকোনা, নখলা, নালিতাবাড়ী ও সেরপুর থানার ক্ষত্রিয়দের গ্রামে খাদি প্রতিষ্ঠানের শাখা ও স্কুল স্থাপিত হয়। চর মধুয়া গ্রামের কমরেড সুধীন্দ্র দাম সর্বপ্রথম এই দাস-প্রথার বিরুদ্ধে সোচ্চার হন। পরে ১৯৩৮ সনে আন্দামান সেলুলার জেল হইতে মুক্তি পাইয়াই তিনি হুদি-ক্ষত্রিয়দের মধ্যে সংগঠন গড়িয়া তোলেন।

বিশ্ব-বাণিজ্য সংকট-জনিত আর্থিক মন্দার ঢেউ এই সময় এই অঞ্চলের হাট বাজারগুলিকে ভীষণভাবে আঘাত করে। কৃষিপণ্যের দাম একেবারে পড়িয়া যায় ও শিল্পজাত পণ্য অগ্নিমূল্য হইয়া উঠে। ৪। ৫ মণ ধান বিক্রয় করিয়াও চাষীরা একখানা আট হাতি কাপড় বা একখানা কোদাল ক্রয় করিতে পারে না। কৃষকদের আর্থিক সহনশীলতা সীমা ছাড়াইয়া যায়। এক শনিবারে বাগাইতলা হাটে স্বতঃস্ফূর্তভাবে জনতার বিক্ষোভ ফাটিয়া পড়ে, হাটের শিল্পজাত দ্রব্যের দোকানগুলি লুণ্ঠিত হয়। হালুয়াঘাট কাছারীর সুপারিনটেন্ডেন্ট তখন চার পাঁচ জন পেয়াদা, বরকন্দাজ লইয়া ক্ষিপ্ত জনতাকে শাস্ত করিবার জন্ত বন্দুকের ভয় দেখাইলেন, তুই গারো চাষীকে বন্দী করিয়া কাছারীতে আটক করিলেন। ইহার ফলে বিক্ষুব্ধ জনতা আরো উত্তেজিত হইয়া কাছারী বাড়ী আক্রমণ করিল, সুপারিনটেন্ডেন্ট ও তাহার পেয়াদা, বরকন্দাজদের ভীষণভাবে প্রহার করিয়া মৃত বলিয়া ফেলিয়া দিল আর বন্দী গারো তুই জনকে মুক্ত করিয়া লইয়া গেল। এই ঘটনার পরে প্রতি হাটে হাটে সশস্ত্র সিপাহিদের টহলের ব্যবস্থা হইল।

১৯৩০ সালের ২৬ শে জানুয়ারী। সারা ভারতে এই দিন স্বাধীনতা দিবস উদ্‌যাপিত হয়। সংগ্রামের শপথ গৃহীত হয়। এই স্বাধীনতা দিবস পালন ও শপথ গ্রহণ সারা ভারতবর্ষে সংগ্রামের আগুন জ্বালাইয়া দিল, দীর্ঘকালের জন্ত এক বিরাট জন-সংগ্রামের ঝড় উঠিল। নালিতাবাড়ী, হালুয়াঘাট, দুর্গাপুরে ঘরে ঘরে জাতীয় পতাকা উড়িল, অগণিত জনসভায় স্বাধীনতার শপথ গ্রহণ করা হইল। ময়মনসিংহ জেলায় সর্বপ্রথম সেরপুর হইতে যে ১৭ জন আইন অমান্য

আন্দোলনে কারাবরণ করিলেন, তাদের মধ্যে একজন স্বৈচ্ছাসেবক ছিলেন হৈহয় ক্ষত্রিয়। ইহার পর চন্দ্রকোনার সুধেন্দু দামের নেতৃত্বে নালিতাবাড়ী হইতে আইন অমান্ত করিয়া জেলে যান। হাজং কৃষক-গণও এই আন্দোলনে যোগ দেন। হরিণকুরার রনবীর, গোবিন্দপুরের সুরেন্দ্র, ভরতপুরের রজনী, কালিকাপুরের সুরেন ও বসন্ত এই আইন অমান্ত করিয়া কারাবরণ করেন। ময়মনসিংহের কুখ্যাত জিলা ম্যাজিস্ট্রেট গ্রাহামসাহেব লেজুরার কংগ্রেস ভবনটিকে আগুন দিয়া পোড়াইয়া দেয়। এই সময় চট্টগ্রাম অস্ত্রাগার লুণ্ঠন প্রভৃতি বিপ্লবী অভ্যুত্থান-গুলির কথাও আদিবাসীদের মধ্যে উৎসাহ ও উদ্দীপনা সৃষ্টি করিয়াছিল।

তারপর ১৯৩৫ সালে “ভারত শাসন আইন”, বিধিবদ্ধ হইলে ১৯৩৭ সালের নির্বাচনে জয়লাভ করিয়া মোঃ এ. কে. ফজলুল হক বাংলা দেশে মন্ত্রীমণ্ডলী গঠন করিলেন। এই সময় সুসং হুগাপুরের রাজবন্দী মণি সিং স্বগ্রহে অন্তরীণ ছিলেন। তিনি পুলিশের চোখে ধূলা দিয়া গোপনে দশাল গ্রামের মুসলমান চাষী ও লেজুরা, ভরতপুর, জিগাতলা প্রভৃতি গ্রামের হাজং চাষীদের মধ্যে কৃষক সংগঠন গড়িয়া তোলেন ও তাহাদের মধ্যে শ্রেণীচেতনা জাগ্রত করার প্রাথমিক ভিত্তি রচনা করেন। এই অপরাধে ও অন্তরীণাদেশ অমান্তের অভিযোগে তাঁহাকে সশ্রম কারাদণ্ড ভোগ করিতে হয়। এই সময় সুসং-এর ৩৫ মাইল পশ্চিমে নালিতাবাড়ি থানায় অন্তরীণ ছিলেন রাজবন্দী কুঞ্জ দাশগুপ্ত, বরিশাল ও সুরেন দাশ। তাঁহারা ও বন্দরের শচী রায় (শহীদ) প্রমুখ ৫৭ জন যুবককে কৃষক-শ্রমিক আন্দোলনে অংশ গ্রহণ করার জন্য উদ্বুদ্ধ ও উৎসাহিত করেন। ইতিমধ্যে জলধর পাল, প্রমথ গুপ্ত, রবি নিয়োগী প্রমুখ গণ-আন্দোলনের নূতন দৃষ্টিভঙ্গি লইয়া কিছুসংখ্যক রাজনৈতিক কর্মী বিভিন্ন কারাগার অন্তরীণাবাস হইতে মুক্তিলাভ করিয়া এই অঞ্চলে ফিরিয়া আসিলেন এবং কমিউনিষ্ট পার্টির নেতৃত্বে প্রচার আন্দোলন শুরু করেন। ফলে সুসং ও সেরপুর পরগণার এই আদিবাসী অঞ্চলে টংক, নানকার ও ভাওয়ালী প্রাণার বিরুদ্ধে নিয়মতান্ত্রিক আন্দোলনের সূচনা হইল, নির্বাচিত হক মন্ত্রিমণ্ডলীর নিকট দাবী-

দাওয়া সহ ডেপুটেশন পাঠান হইল। জনাব হুসাইন দমন-মূলক আইন প্রত্যাহার, রাজনৈতিক বন্দীদের মুক্তি, প্রজস্ব স্বত্ব আইনের সংশোধন ও ঋণভার লাঘবের প্রতিশ্রুতি দিলেন। উক্ত ময়মনসিংহের আদিবাসী অধ্যুষিত এই পাঁচটি থানা এলাকা নূতন করিয়া জরিপ করিয়া টঙ্ক জমির খাজনার নিরিখ ও স্বত্ব বিবেচনা করার ঘোষণাও তিনি করিলেন।

## নানকার আন্দোলন

সেরপুর পরগণার নানকার প্রজাদের (হৃদিক্ত্রিয়) আন্দোলন বেশী দিন অস্পৃশ্যতা বর্জন, জমিদার বাড়িতে দৈনিক শ্রমের মাত্রা হ্রাস বা জমিতে স্বত্ব প্রতিষ্ঠার দাবীতে সীমাবদ্ধ থাকিল না। কতিপয় রাজনৈতিক কর্মীর নেতৃত্বে হৃদিক্ত্রিয়গণ নানকার প্রথারই অবসান দাবী করিলেন। চান্দের নগর, নাকসী, পাজুরভাঙ্গা, নখলা, বালিয়া, শালিয়া, মোবারকপুর, কালীনগর, কলসপার, কদমতলী প্রভৃতি প্রায় ত্রিশটি গ্রামের পাঁচ শত সক্রিয় প্রতিনিধি তারাগড় গ্রামে নানকার প্রথা উচ্ছেদের দাবীতে সম্মেলন করিলেন। প্রথমত নানকারী প্রজারা জমিদারদের নিকট লিখিতভাবে তাহাদের দাবী-দাওয়া পেশ করিলেন। বিভিন্ন সরকারী ও বেসরকারী প্রতিষ্ঠানের নিকটও তাহারা উক্ত দাবিপত্রের অনুলিপি পৃষ্ঠাইলেন। নানকারী প্রজাদের দাবী ছিল :—

১। নানকারী প্রথার অবসান।

২। নানকারী জমির উপর মৌজা ভিত্তিতে পার্শ্ববর্তী অঞ্চলের নিরিখের অনুরূপ খাজনা ধার্য।

৩। অল্পমোদিত দাখিলা দিয়া নানকারী প্রজা ও রায়তদের নিকট হইতে খাজনা আদায়।

৪। মালিক-বাড়িতে বিশেষ ক্ষেত্রে ও সময়ে নিম্নশর্তে শ্রম দান করা যাইতে পারে :—

(ক) মন্দিরে প্রবেশ ও অঞ্জলী প্রদানের অধিকার স্বীকার।

(খ) কেবল পদ্মফুল, বেলপাতা, দেবদারুপাতা সংগ্রহ নয়, সব রকম ফুল তোলার অধিকার প্রদান।

(গ) মন্দিরে প্রবেশাধিকার না দিলে পূজা-পার্বন সম্পর্কিত কোন কঠিন ও শ্রমসাধ্য কাজ এমনকি বিসর্জনের জন্তু প্রতিমা বহন করা হইবে না।

১৯৩৮ সালের জুন, জুলাই ও আগষ্ট এই তিন মাস ব্যাপকভাবে সভা, বৈঠক, শোভাযাত্রা ও জমিদারদের সঙ্গে আলাপ আলোচনা চলিল। কিন্তু কোনই ফল হইল না। বরং জমিদারগণ সরিয়াবাড়ি, বাহাচুরাবাদ প্রভৃতি দূরবর্তী স্থান হইতে কয়েকশত বিহারী কুলি ও দাঙ্গাবাজ হিন্দু-মুসলমান লাঠিয়াল আমদানী করিল। তাঁহারা গোপনে জেলা ম্যাজিস্ট্রেট ও পুলিশ সুপারিনটেন্ডেন্টের নিকট শান্তিভঙ্গের আশঙ্কার কথা জানাইয়া জরুরী তারযোগে সশস্ত্র পুলিশ বাহিনী প্রেরণের প্রার্থনা করিল। অন্যদিকে আবার প্রচুর পরিমাণে বন্দুকের কাতুঁজ, বুলেট মজুত করিল এবং অতীত যুগের ঢাল, তলোয়ার, বর্শা, বল্লম, খড়্গ, রামদা প্রভৃতি রঙীন কাপড়ে ঢাকিয়া সেইগুলি ভাড়া করা কিছু লোকজন লইয়া শোভাযাত্রা বাহির করিল। নানকারীদের গ্রামে গ্রামে প্রচার করা হইল যে জমিদারদের তরফ হইতে প্রয়োজন হইলে বন্দুক চালান হইবে এবং এই ব্যাপারে সরকারের অনুমতি পাওয়া গিয়াছে। এইভাবে প্ররোচনা ও উত্তেজনা চরমে উঠিল। নানকারী প্রজারা বলিষ্ঠ নেতৃত্বে ও সম্পূর্ণ ঐক্যবদ্ধভাবে তাহাদের নিজেদের ভৈরী সব রকমের মারাত্মক অস্ত্র লইয়া হাজারে হাজারে জাঠা মার্চ করিল। জমিদারগণ প্রমাদ গণিলেন, তাহাদের অন্তরাখা কাঁপিয়া উঠিল। শতাধিক বৎসর আগেকার সেই পাগল বিজোহ ও হৃদি ক্ষত্রিয়

নেতা জানকু পাখর ও ছুররাজ পাখরের নেতৃত্বে কৃষক সংগ্রামের কথা হয়ত মনে পড়িল। জমিদারগণ তখন সরাসরি আক্রমণের পথ ছাড়িয়া হীন চক্রান্ত ও সাম্প্রদায়িকতার সৃষ্টির তুর পথের আশ্রয় লইল। ১৯৩৮ সালের শরৎকালীন উৎসব চরম উত্তেজনার মধ্য দিয়া অতিবাহিত হইল। সক্রিয় প্রজারা সংঘবদ্ধভাবে আইনত না হইলেও কার্যত নানকারী প্রথার উচ্ছেদ করিল। কেহই জমিদারবাড়িতে বেগার খাটিতে গেল না।

এই ভাবে ১৯৩৯ হইতে ১৯৪২ সাল পর্যন্ত নানকার আন্দোলন একটানা ভাবে চলে। আশ্রিত প্রজারা কেহই জমিদারবাড়ি দৈহিক শ্রম দিতে গেল না। জমিদারগণও নানকার জমির জন্য নগদ টাকায় খাজনা নিল না; জমি সম্পূর্ণভাবে চাষীদের দখলেই রহিল। জমিদারগণ তখন দাঙ্গাবাজ গুণ্ডাশ্রেণীর মুসলমান চাষীদের সঙ্গে চক্রান্ত করিয়া নানকার জমি তাহাদের কাছে পস্তন দেবার চেষ্টা করিল। তাহাদের জমি দখল করিবার জন্য উৎসাহিত করিল। কিন্তু জমিদারের পাইক-বরকন্দাজ-লাঠিয়ালদের সাহায্যে উক্ত জমি দখল করার জন্য পর পর চেষ্টা করিয়াও ইহারা ব্যর্থ হইল। সেরপুর পরগণার জমিদারদের জমি দখলের কলঙ্কিত ইতিহাসে যে হৃদি ক্ষত্রিয়রা ছিল লাঠিয়াল হিসাবে জমিদারদের সেরা হাতিয়ার ও সবচেয়ে বড় সহায়—যুগ পরিবর্তনে তারাই আজ ঐক্যবদ্ধ ভাবে রুখিয়া দাঁড়াইল নিজেদের জমি, বাড়ি দখলে রাখিবার জমিদার-বিরোধী সংগ্রামে। সত্যই ইতিহাসের ইহা এক নির্মম পরিহাস। শ্রেণীচেতনা উন্মেষের ফলে যুগে যুগে এমনভাবেই দাসশ্রেণীর অস্ত্রের গতি পরিবর্তিত হয় প্রভুদের বিরুদ্ধে। এখানেও ঘটিল তাহাই। ১৯৪৭ সনের ১৫ই আগস্ট স্বাধীনতা দিবস পর্যন্ত ক্ষত্রিয় চাষীদের এই সংগ্রামী সংকল্প ও একতা একদিনের জন্য শিথিল হয় নাই। জমির মালিকানা হইতে জমিদারদের উচ্ছেদ করিয়া কার্যত তাহারা নানকার প্রথার অবসান করিয়াছে।

## ভাওয়ালী আন্দোলন

১৯৩৭-৩৮ সালে এই অঞ্চলে নূতন করিয়া জরিপের কাজ চলার সঙ্গে সঙ্গে ধানশাইল, কান্দুলী, ভটপুর প্রভৃতি গ্রামের রাজবংশী কৃষকগণ বলাই সরকার, রামু নাগ ও কৈলাস সরকারের নেতৃত্বে ভাওয়ালী প্রথা উচ্ছেদের দাবিতে আন্দোলন শুরু করিল। তাহারা ঐক্যবদ্ধভাবে সভা-মিছিল, ডেপুটেশন ও গণদরখাস্ত প্রভৃতি মারফৎ জমির মালিক সেরপুরের তালুকদারদের জানাইয়া দিল যে ভাওয়ালী জমির জন্ত কবুলিয়তে উল্লিখিত টাকা ছাড়া তাহারা অতিরিক্ত কোন দ্রব্য খাজনা বাবদ দিবে না। দুই বৎসর জোর আন্দোলন চলার পর ১৯৩৯ সালে ভাওয়ালী প্রথার অবসান হয়। ইহা প্রধানত রাজবংশী কৃষক সম্প্রদায়ের আন্দোলন হইলেও এই অঞ্চলের অন্ততম উল্লেখযোগ্য কৃষক সংগ্রাম।

সেরপুর পরগণার নানকার ও ভাওয়ালী প্রথার বিরুদ্ধে আন্দোলন চলার সঙ্গে সঙ্গে হুসং পরগণায় চলিতেছিল টঙ্ক প্রথা উচ্ছেদের দাবিকে ভিত্তি করিয়া জমিদারদের রিজার্ভ বনে জ্বালানী কাঠ কাটা ও জলায় মাছ ধরার আন্দোলন। কাঠ কাটার অপরাধে ভরতপুর, লেঙ্গুরা অঞ্চলের কৃষকরা গ্রেপ্তার হইল। পাঁচগাঁও অঞ্চলে হাওড়ে মাছ ধরার সময়ে জমিদাররা গুলি চালাইল এবং পুলিশের সাহায্যে চাষীদের গ্রেপ্তার করা হইল। এই অঞ্চলের বিভিন্ন হাটে জমিদারদের জুলুম, অত্যাচারের প্রতিবাদে জনতা জমিদারদের হাট বয়কট করিল। হাতীপাগার প্রভৃতি গ্রামে তাহারা নিজেরা পাণ্টা হাট বসাইল। এই ভাবে কৃষকদের বিভিন্ন দাবি-দাওয়া লইয়া আন্দোলন চলার সঙ্গে সঙ্গে গ্রামে গ্রামে সারা ভারত কৃষকসভার সংগঠন গড়িয়া উঠিল। ১৯৩৮ সালে ২৪শে ফেব্রুয়ারি বিখ্যাত কৃষকনেতা মুজফ্ফর আহমদ সাহেবের সভাপতিত্বে ময়মনসিংহ শহরের উপকণ্ঠে কেওয়াটখালী

আঃ বাঃ—৫

ময়দানে জেলা কৃষকসমিতির প্রথম সম্মেলন অনুষ্ঠিত হইল। এই একই মঞ্চে ২৬শে ফেব্রুয়ারি বঙ্কিম মুখার্জীর সভাপতিত্বে অনুষ্ঠিত হইল জেলার প্রথম যুব সম্মেলন। এই ভাবে ভারত-বিখ্যাত দুই জন কৃষক-শ্রমিক নেতার মাধ্যমে ময়মনসিংহ পাহাড় সীমান্ত অঞ্চলের সংগঠন ও আন্দোলন সারা ভারত কৃষক-আন্দোলনের সঙ্গে যুক্ত হইল।

— — —

## স্বাধীনতা সংগ্রাম

১৯৩৯ সালে দ্বিতীয় মহাযুদ্ধ শুরু হইল। সঙ্গে সঙ্গেই ভারতের খেতাজ ভাইসরয় (বড়লাট) ব্রিটিশ সাম্রাজ্যবাদের স্বার্থে এক ঘোষণা দ্বারা ভারতবর্ষকে যুদ্ধে জড়াইয়া দিলেন। ভারতবর্ষের জনসাধারণ ছিল এই সাম্রাজ্যবাদীযুদ্ধের বিরোধী। তাই বোম্বাই শহরের লক্ষ লক্ষ শ্রমিক এই যুদ্ধ ঘোষণার বিরুদ্ধে ধর্মঘট ও মিছিল করিয়া ভারতীয় শ্রমজীবী জনতার অভিমত ব্যক্ত করিল। স্পষ্টভাবে সাম্রাজ্যবাদী যুদ্ধের বিরুদ্ধে সংগঠিত গ্রামাঞ্চলের কৃষক সাধারণও তাহাদের মত ব্যক্ত করিল। সুসং ও নালিতাবাড়ির কৃষকরা প্রকাশ্য সভা, শোভাযাত্রা করিয়া যুদ্ধের বিরুদ্ধে আওয়াজ তুলিল,—“সাম্রাজ্যবাদী যুদ্ধ নিপাত যাউক”। শহরে শহরে পত্র-পত্রিকা ও পোস্টার মারফৎ ভারতীয় নাগরিকদের অভিমত জানানো হইল। কিন্তু ভারত সরকার তাহার যুদ্ধ ব্যবস্থা চালু রাখায় জন্য ভারতরক্ষা আইনের নাগপাশে প্রগতিশীল কর্মীদের গ্রেপ্তার ও অন্তরীণাবদ্ধ করিতে লাগিল। বিপ্লবী রাজনৈতিক নেতারা তখন আত্মগোপন করিয়া জনসাধারণের আশা আকাঙ্ক্ষাকে বাস্তবে রূপায়িত ও জয়যুক্ত করার জন্য সচেষ্ট

হইলেন। এই সময় স্রুঙ্গ এলাকায় ললিত সরকার, বিপিন গুণ, পরেশ ও পদ্মলোচন প্রমুখ ১৫ জন এবং নালিতাবাড়ি এলাকার জামেশ্বর, জার্মান ভালু, বিরাট সরকার প্রমুখ ৭ জন আদিবাসী নেতা আত্মগোপন করিয়া যুদ্ধ ব্যবস্থা বনচাল করার জন্য সক্রিয়ভাবে আত্মনিয়োগ করিলেন। তাহাদের প্রচার আন্দোলনের ফলে ভারত সরকার আশ্রয় চেষ্টা করিয়াও এই অঞ্চলের জনসমর্থন লাভ করিতে পারিল না। ১৯৩৯-৪১ সাল পর্যন্ত পশ্চিমে ভর্তি করার জন্য বহু চেষ্টা করিয়াও কোন রিক্রুট সংগ্রহে সমর্থ হইল না। এমন কি পাদ্রি মিশনারীদের অনুরোধ পর্যন্ত আদিবাসীগণ উপেক্ষা করিল। দ্বিতীয়তঃ, এই সময় যুদ্ধ ভাঙারে অর্থ সংগ্রহের চেষ্টাও তাহাদের প্রচার আন্দোলন ও সংগঠনের জোরে বনচাল হইল। যুদ্ধ-ভাঙারে চাঁদা না দিলে চৌকিদারি ট্যাক্স লওয়া হইত না। ইহার ফলে পাঁচগাও, লেঙ্গুরা, জিগাতলা, ঘোষণাও, গাজির ভিটা, ভুবনকুড়া, কাকড়কান্দি, মণ্ডলীয়া পাড়া, মানপাড়া, পোড়াগাঁও, বিনাইগাতী, কাংসা প্রভৃতি ইউনিয়নের চৌকিদারি ট্যাক্স বন্ধ হইয়া গেল লক্ষ্য করিয়া ভারপ্রাপ্ত সার্কেল অফিসারগণ ইউনিয়ন বোর্ডগুলিকে গোপন নির্দেশ দিতে বাধ্য হইলেন যে আদিবাসীদের ক্ষেত্রে যুদ্ধের চাঁদা না দিলেও যেন চৌকিদারি ট্যাক্স লওয়া হয়।

এই সব কাজকর্ম ছাড়াও, যেন যে কোন মুহূর্তে যাহাতে সশস্ত্র বৈপ্লবিক অভ্যুত্থান ঘটানো যায় সেইজন্য গোপন সংগঠন গড়িয়া তোলার কাজ করা হইত। রাজনৈতিকভাবে বিশ্বস্ত ও দুর্ধর্ষ কৃষকদের সম্ভবমতো সকল রকমের আগ্নেয়াস্ত্র ব্যবহার এবং হাত বোমা প্রভৃতি প্রস্তুত প্রণালী শিক্ষা দেওয়া হইত। গেরিলা যুদ্ধের তত্ত্ব ও বাস্তব ক্ষেত্রে তাহার অনুশীলনের ব্যবস্থাও করা হইত। প্রায় ১০০০ হাজং, ডালু, কোচ, গারো, হদি প্রভৃতি কৃষককে গেরিলা যুদ্ধের শিক্ষা দেওয়া হইয়াছিল। তাহা ছাড়া সাধারণভাবে সংগঠনের প্রায় সমস্ত বিশ্বস্ত কর্মীদের অস্ত্র ব্যবহারের প্রাথমিক শিক্ষা দেওয়া হইয়াছিল। এমন কি মেয়েরাও অনেকে বন্দুক ও রাইফেল চালনা শিখিয়াছিল।



এই অঞ্চলে বিপ্লবী সংগঠনকে মোটামুটি নিম্নোক্তরূপে গঠন করা হইয়াছিল :—

সমগ্র অঞ্চলের জগু সর্ব বিষয়ে যোগ্যতম ৭ জন সদস্যবিশিষ্ট একটি উচ্চতম কমিটি ।

তাহার অধীনে পূর্ব (সুসং), পশ্চিম (নালিতাবাড়ী) ও মধ্য (হালুয়াঘাট) এই তিনটি আঞ্চলিক কমিটি ।

১। পূর্ব আঞ্চলিক কমিটি :—সুসংএর অধীনে ছিল তিনটি এলাকা কমিটি ।

(ক) মোহনপুর (শ্রীহট্ট জেলার বিশরপাশা থানা) হইতে পশ্চিমে খাড়নৈ নদী পর্যন্ত পাঁচগাঁও এলাকা কমিটি ।

(খ) খাড়নৈ নদীর পশ্চিম তীর হইতে সোমেশ্বরীর তীর পর্যন্ত লেঙ্গুরা এলাকা কমিটি ।

(গ) সোমেশ্বরীর পশ্চিম তীর হইতে নিতাই নদী পর্যন্ত চারুয়া পাড়া এলাকা কমিটি ।

২। পশ্চিম আঞ্চলিক কমিটি :— নালিতাবাড়ি কমিটির অধীনে ছিল চারটি এলাকা কমিটি ।

(ক) পূর্বে হালুয়াঘাট থানার সীমা হইতে ভোগাই নদী পর্যন্ত তন্তুর এলাকা কমিটি ।

(খ) ভোগাই নদীর পশ্চিম তীর হইতে নলী পর্যন্ত বোনারপাড়া এলাকা কমিটি ।

(গ) নলী হইতে বিনাইগাতি পর্যন্ত ছিল বনকুড়া এলাকা কমিটি ।

(ঘ) বিনাইগাতি ইউনিয়নের সীমা হইতে এই জেলার শেষ প্রান্ত পর্যন্ত কাংসা এলাকা কমিটি ।

৩। মধ্য (হালুয়াঘাট) আঞ্চলিক কমিটির অধীনে ছিল দুইটি এলাকা সংগঠন ।

(ক) নিতাই নদীর পশ্চিম পাড় হইতে দাহাপাড়া ফুলবাড়ী পর্যন্ত ঘোষগাঁও এলাকা কমিটি ।

(খ) ঘোষগাঁও এলাকার সীমা হইতে পশ্চিমে নালিতাবাড়ী থানার

সীমা পর্যন্ত কুমারগাভী এলাকা কমিটি ।

এইসব আঞ্চলিক কমিটি ও এলাকা কমিটিগুলির দক্ষিণে কোন নির্দিষ্ট সীমারেখা ছিল না । যে কমিটি দক্ষিণে যতদূর তাহার সংগঠন বিস্তৃত করিতে পারিত তাহাই হইত উহার এলাকা । জেলা শহরে মূল কেন্দ্র পৌঁছানো, দক্ষিণের সংগঠন ও আন্দোলনের সঙ্গে নিবিড়ভাবে সংযুক্ত হওয়াই ছিল উহার লক্ষ্য । উপর হইতে নীচ পর্যন্ত এই সংগঠনে কাজ ছিল প্রধানত দুই ধরনের—সামরিক ও বে-সামরিক ।

সামরিক :—প্রত্যেকটি এলাকা কমিটিতে ১০০ হইতে ১২৫ জন পর্যন্ত সাধারণ রাজনৈতিক চেতনাসম্পন্ন ও সব রকমের অস্ত্র চালনায় শিক্ষিত গেরিলা থাকিত । ১০।১৫ বা উর্ধ্ব ২০ জন গেরিলা লইয়া এক একটি গ্রুপ বা দল থাকিত । প্রয়োজনমতো এই সংখ্যা কম-বেশী করা হইত । এলাকা কমিটির এই গেরিলাদল ছাড়াও ১৯৪৫-৪৬ সালে এবং ১৯৪৯-৫০ সালে উচ্চ কমিটির পরিচালনায় আরও ৯টি সামরিক শিবির স্থাপন করা হইয়াছিল । অস্ত্র সংগ্রহ ও বোমা প্রস্তুতের কাজ ছিল এই উচ্চ কমিটির হাতে । প্রধানত এই বিভাগের কাজ ছিল :—

১ । সময় ও সুযোগ হইলে যে মুহূর্তে থানা, ইউনিয়ন বোর্ড, পোস্ট অফিস, সরকারী কোর্ট, আদালত, জমিদারদের কাছারী, মহাজনদের গদী ও গোলা দখল করা । ইংরাজ সরকারের বশবদদের দালালদের বন্দী করা এবং গণ-আদালতের সামনে বিচার করা ।

২ । সর্বদা গ্রাম পাহারা দেওয়া, আক্রমণ হইলে শত্রুকে প্রতি-রোধ করা, শত্রুর সংখ্যা বেশী হইলে সাক্ষেতিক ভাবে অগ্নি গেরিলাদের আহ্বান করা এবং সমস্ত গ্রামবাসীদের শত্রুর আক্রমণ সম্পর্কে হুঁশিয়ার করা ।

৩ । শত্রুর ঘাঁটি ভাঙিয়া দেওয়া, একান্ত প্রয়োজন হইলে জ্বালাইয়া দেওয়া, সম্পত্তি দখল করা এবং অর্থ সংগ্রহ করা ।

৪ । পাহাড়ে, জঙ্গলে, প্রান্তরে, হাওড়ে গোপন আশ্রয়স্থল প্রস্তুত করা । মটর, জীপ, ট্রাক চলার রাস্তা, সেতু প্রভৃতি নষ্ট করিয়া দেওয়া ।

৫। সব রকম গোপন সংবাদ ও তথ্য সংগ্রহ করা। শত্রুপক্ষের গতিবিধি লক্ষ্য করা ও সংবাদ সংগ্রহ করা।

বে-সামরিক :—এই বে-সামরিক বিভাগের কাজ ছিল ব্যাপক ও বিস্তৃত। রাজনৈতিক প্রচার আন্দোলন ও গ্রামে সংগঠন গড়িয়া তোলা এই বিভাগের প্রধান কাজ। এই জন্ত গ্রাম্য বৈঠক, সভা, মিছিল, পোস্টার, ইস্তাহার বিলি করা, পুস্তক-পুস্তিকা বিক্রয় করা হইত। গোপন ছাপাখানা (Printing Press) ও সাইক্লোস্টাইল মারফৎ ছাপার কাজ চলিত। প্রতি পনের দিন অন্তর একটি করিয়া “বুলেটিন” বাহির হইত।

এই বিরাট অঞ্চলের রাজনৈতিক সাংগঠনিক কাজের জন্ত নিয়মিত অর্থ সংগ্রহ করা হইত। লেঙ্গুরার ললিত সরকার, কুমারগাতীর নারায়ণ মণ্ডল প্রভৃতি নেতৃবৃন্দ কেহ বা নিজেদের সমস্ত সম্পত্তি কেহ বা আংশিক সম্পত্তি সংগঠনের জন্ত দান করেন। এই সব স্থাবর ও অস্থাবর সম্পত্তি রক্ষণাবেক্ষণ করা ছিল সংগঠনের অগ্রতম কাজ।

গ্রামে গ্রামে ঠিক সময়মতো জমি চাষাবাদ করানো, যাহাদের হাল বলদ নাই তাহাদের “গাতা” প্রথায় (self-helf) জমি চাষ করিয়া দেওয়া, ‘মাগন কামলা’ সরবরাহ করা, এবং অধিক শস্ত্র উৎপাদনের জন্য খাল কাটা, বাঁধ বাঁধা, উৎকৃষ্ট বীজ সরবরাহ করা, ছুঁভিক্ষের দিনের জন্য ধর্মগোলা স্থাপন করা প্রভৃতি ছিল বে-সামরিক সংগঠনের বিশেষ উল্লেখযোগ্য কাজ।

তাহা ছাড়া কাজ ছিল, সারা অঞ্চলের জনস্বাস্থ্য উন্নয়ন, সংক্রামক রোগের প্রতিষেধক ব্যবস্থা অবলম্বন, ঔষধ ব্যবহারের প্রচলন এবং গ্রামের কর্মীদের প্রাথমিক চিকিৎসা, সেবা করা ও শিক্ষা দেওয়া।

সাধারণ অবস্থায় ও সংগ্রামের সময় অঞ্চলের সর্বত্র ও বাহিরের সঙ্গে সংযোগ রক্ষা করা এবং সেইজন্য যানবাহন, ঘোড়া, সাইকেল ও নৌকার ব্যবস্থা করা ছিল অন্যতম গুরুত্বপূর্ণ কাজ। নৌকাই ছিল প্রধান ও নিরাপদ যান। এই সংগঠনের ছোট নৌকা ছিল বারোটি এবং বড় নৌকা ছিল চারটি। প্রয়োজনমতো খাত্ত ও রসদ লইয়া

বিপ্লবী কর্মীরা মাসের পর মাস নৌকায় থাকিতেন। দিগন্ত প্রসারিত ভাটি অঞ্চল ছিল ইহাদের আশ্রয়স্থান একটি প্রধান ঘাঁটি।

সারা অঞ্চলে বিচার বিভাগ ছিল বিশেষ উল্লেখযোগ্য ও আদর্শ-স্থানীয়। গ্রাম্য মামলা মোকদ্দমা প্রায় সমস্তই এই বিচারালয়ে নিষ্পত্তি করা হইত। এমনকি ঘুষ লওয়া, মিথ্যা দাখিলা, ট্যাঙ্কের রসিদ দেওয়ার দরুণ সরকারী কর্মচারী, জমিদার কর্মচারীদের, চোরা-কারবারী মহাজনদেরও এই জনবিচারালয়ে বিচার করা হইত। পাঁচ হইতে সাত জন নির্বাচিত বিচারক উপস্থিত থাকিতেন। সপ্তাহে দুই দিন কোর্ট বসিত। বাদী-বিবাদী উভয় পক্ষের প্রতি নোটিশ জারি হইত এবং নির্দিষ্ট দিনে উভয় পক্ষের বক্তব্য শুনিয়া এবং সাক্ষী-সাবুদ লইয়া অধিকাংশ বিচারকের সিদ্ধান্তমতো রায় দেওয়া হইত। লেঙ্গুরা, কুমারগাতী ও মধ্যমকুড়ার বিচারালয় ছিল বিশেষ উল্লেখ-যোগ্য। বৈকুণ্ঠ গুণ, রাজকুমার সরকার ও দীগেন্দ্র সরকার ছিলেন জনপ্রিয় বিচারক। এই বে-সামরিক বিভাগের আর একটি প্রধান কাজ ছিল সমস্ত রকম বিষয়ে অঞ্চলের প্রতিনিধিত্ব করা; সরকারী আদালত ও জমিদারের কাছারীতে কৃষকদের স্বার্থে তদ্বির তদারক করা। গারো প্রগতিশীল যুবকদের “আচিক সংঘ” এই সময় নির্বাচিত কমিটিগুলির সঙ্গে একযোগে কাজ করিয়াছে।

১৯৩৬ সনে কৃষক আন্দোলন ও সংগঠনের সূচনা হইতে ১৯৫০ সন পর্যন্ত এই বিরাট অঞ্চলে যে গণ-আন্দোলন ও গণ-সংগঠন গড়িয়া উঠিয়াছিল তাহার সমস্ত দিকের পরিচয় জানা এবং সম্যক রূপে প্রকাশ করা সম্ভবপর নয়। বিংশ শতাব্দীর ভারতীয় স্বাধীনতা সংগ্রামে ইহা ছিল এক অভূতপূর্ব ও অত্যাশ্চর্য গণ-সংগ্রাম ও গণ-সংগঠন।

১৯৪১ সনের জুন মাসে হিটলারের নাৎসী বাহিনী সোভিয়েত দেশ আক্রমণ করিল। ফলে এই ফ্যাসিস্ট আক্রমণের বিরুদ্ধে সোভিয়েত ইউনিয়ন, গ্রেট-ব্রিটেন, মার্কিন যুক্তরাষ্ট্র ও চীনের মধ্যে মৈত্রী প্রতিষ্ঠিত হইল। এই মৈত্রীর মধ্য দিয়া ফ্যাসিস্ট পদানত ও আক্রমণাশঙ্কায় সঙ্কুচিত পৃথিবীর জনগণের এক ফ্যাসিস্ট বিরোধী মৈত্রী

গড়িয়া উঠিল। যুদ্ধের মূল চরিত্রই পরিবর্তিত হইয়া গেল। সামাজ্যবাদী যুদ্ধ রূপান্তরিত হইল বিশ্বের স্বাধীনতা যুদ্ধে। অপরদিকে ব্রিটিশ সাম্রাজ্যবাদের দুর্বলতা সারা বিশ্বে প্রকট হইয়া পড়িল, ভারতবর্ষের রাষ্ট্রক্ষমতা তাহার দুর্বল হাত হইতে ঝুঁসিয়া পড়িতে লাগিল।

১৯৪২ সনে এই অঞ্চলের সংগ্রামী জনতা এই আংশিক শাসন-সংস্কার বহির্ভূত এলাকাকে মুক্ত এলাকা বলিয়া ঘোষণা করার সিদ্ধান্ত গ্রহণ করিলেন এবং সেই অনুযায়ী সমস্ত সংগঠনকে প্রস্তুত থাকার জন্য নির্দেশ দিলেন। এই সিদ্ধান্তের অনুকূলে দক্ষিণের সমস্ত প্রগতিশীল ও বিপ্লবী সংগঠনের সক্রিয় সাহায্য ও সহানুভূতি লাভের উদ্দেশ্যে আত্মগোপনকারী কমরেড মনিসিং ও কমরেড প্রমথ গুপ্ত শহর অভিমুখে রওনা হইলেন। কিন্তু পথে জামালপুরের উপকণ্ঠে বজ্রাপুরে জনৈক গোপন আশ্রয় দাতার বিশ্বাসঘাতকতায় তাহার উভয়ে পুলিশের হাতে ধরা পড়িয়া জেলে আবদ্ধ হইলেন। ইতিপূর্বে বল্লভী বকসীও গ্রেপ্তার হইয়াছিলেন। উচ্চ কমিটির এই তিনজন বিশিষ্ট নায়ক হঠাৎ ধরা পড়িয়া যাওয়ায় পূর্ব সিদ্ধান্ত অনুযায়ী এই অঞ্চলকে প্রকাশ্যে মুক্ত এলাকা বলিয়া ঘোষণা করা হইল না। সারা অঞ্চলের জনসাধারণের মধ্যে বৈঠক সভা করিয়া, গোপন ইস্তাহার বিলি করিয়া কার্যত মুক্ত এলাকা গঠনের সিদ্ধান্ত জানাইয়া দেওয়া হইল। বাস্তব ক্ষেত্রে বিপ্লবী কর্মসূচী ও বলিষ্ঠ সংগঠনশক্তির জোরে এই অঞ্চলকে ব্রিটিশ আমলাতন্ত্র ও জমিদার মহাজনদের শোষণ মুক্ত এক স্বাধীন স্বতন্ত্র মুক্ত এলাকারূপে প্রতিষ্ঠা করা হইল। সংগঠনের প্রাণ্ড্যকটি কাজের পিছনে জনসাধারণকে অহুগত ও বিশ্বস্ত থাকিবার জন্য আহ্বান করা হইল। এই অঞ্চলের প্রশাসনিক ব্যবস্থা ও জনগণের সমস্ত রকম কাজকর্মে বিপ্লবী কমিটিগুলি কর্তৃত্ব করিতে লাগিল। সরকারের থানা পুলিশ সাক্ষী-গোপালের মতো দাঁড়াইয়া রহিল। অনেক ক্ষেত্রে জনগণের নির্বাচিত কমিটিগুলির নিকট আত্মসমর্পণ করিল এবং তাহাদের নির্দেশ মানিয়া চলিতে বাধ্য হইল।

বাস্তবক্ষেত্রে ব্রিটিশ সাম্রাজ্যবাদের দুর্বলতা অনগ্রসর জনতার মধ্যেও প্রকাশ পাইল। এই অঘোষিত মুক্ত এলাকার মধ্যে আত্মগোপনকারী কর্মীরাও প্রকাশ্যভাবে বিচরণ করিতে লাগিল। এই অঞ্চল হইতে অত্যাচারী জমিদার কর্মচারী, মহাজন, দালালশ্রেণীর দৃষ্ট লোকেরা ভয়ে শহরে পলাইয়া গেল। হুসং ও সেরপুরের জমিরদারগণ এই অঞ্চল হইতে কার্যত প্রায় উচ্ছেদ হইয়া গেল। এই অঞ্চলের প্রজাদের নিকট হইতে টংক ধান ও খাজনা আদায় করিতে না পারায় তাহারা কোর্ট-অব-ওয়াডের নিরাপদ আশ্রয় লইল। আংশিক শাসন-সংস্কার বহির্ভূত এলাকায় সমস্ত রকম প্রশাসনিক দায়িত্ব আদিবাসীদের বিপ্লবী কমিটি তথা জনসাধারণই গ্রহণ করিল। উত্তর-ময়মনসিংহের পাঁচটি থানার উত্তরাংশে জনগণের পরিচালিত অঘোষিত মুক্ত এলাকায় একটি প্রায় স্বাধীন ও স্বতন্ত্র সরকার অপর দিকে সমগ্র দক্ষিণ অঞ্চলে ব্রিটিশ সরকার, পাশাপাশি চলিতে লাগিল।

১৯৪২ সনের মার্চ হইতে ১৯৪৫ সনের জানুয়ারী পর্যন্ত হাজা, ডালু, গারোদের পুরোভাগে রাখিয়া জনগণের সরকার ঐ অঞ্চলের সমস্ত রকম শাসনব্যবস্থা পরিচালনা করিল। দ্বিতীয় বিশ্বযুদ্ধের যুগে ময়মনসিংহ জেলার জনসাধারণ এমনকি ইংরাজ সরকারের একান্ত বশব্দদরা পর্যন্ত সাগ্রহে ও সবিস্ময়ে লক্ষ করিল যে যখন সমস্ত বাংলা-দেশে ভীষণ দুর্ভিক্ষ, ঘুষাখোরী, দুর্নীতিপরায়ণতা, অত্যাচার, উৎপীড়ন ও ভীষণ মহামারী চলিতেছে, তখন এই মুক্ত আদিবাসী এলাকায় সাধারণ কৃষক সন্তানরা শান্তিপূর্ণ উপায়ে স্বচ্ছন্দে প্রশাসনিক ব্যবস্থা চালাইতেছে। এখানে সাধারণের নিত্যপ্রয়োজনীয় খাদ্য, বস্ত্র, ঔষধ প্রভৃতি লইয়া চোরাকারবারী ও মজুতদারী চলে নাই। যুদ্ধজনিত এই দুর্ভিক্ষ মহামারীর যুগে এখানে একটি প্রাণও অনাহারে নষ্ট হয় নাই, হাজার হাজার মণ ধান ধর্মগোলায় সংগৃহীত হইয়া অভাবীদের মধ্যে বিতরিত হইয়াছে এবং অঞ্চলের প্রয়োজন মিটাইয়া উদ্ধৃত্ত খাদ্য বাহিরে পাঠানোর অনুমতি দেওয়া হইয়াছে। হুসং, হালুয়াঘাট, নালিতাবাড়ী হইতে জনগণের নির্বাচিত প্রতিনিধিগণ সংলগ্ন দক্ষিণ অঞ্চলের বুড়ুক্ষদের

মধ্যে খান, চাউল, লবণ, কেরোসিন প্রভৃতি শ্রায্য দরে বিক্রয় বা বিনামূল্যে বিতরণের ব্যবস্থা করিয়াছেন। দক্ষিণে কংস ও ব্রহ্মপুত্র নদ পর্যন্ত বিস্তৃত বিরাট অঞ্চলে এমনই এক অভিনব রাজত্ব সকলেই বাস্তবে প্রত্যক্ষ করিল। গারামপাড়া, চৈতন্যনগর ঘোষণাও, নাগেরপাড়া, মধ্যমকুড়া, তন্তুর বোনারপাড়া, পোড়ারগাঁও, নলকুড়া, কান্দুলী, কাংসা প্রভৃতি ছিল এই অঞ্চলের এক-একটি বিশিষ্ট কর্মক্ষেত্র। কুমারগাতীর গণ-আদালত ও ধর্মগোলা, লেঙ্গুরার সামরিক সংগঠন এবং নালিতাবাড়ীর খাও সরবরাহ বিভাগ ছিল সমস্ত শ্রেণীর জনসাধারণের অত্যন্ত গর্বের বিষয়। এই অঞ্চলের জনগণই খনন করিয়াছে ফসল উৎপাদনের জন্য চণ্ডীগড়ের খাল, ভুবনকুড়ার দীঘি এবং রচনা করিয়াছেন হরিনাকুড়ি ও নয়াবিলের বাঁধ। কৃষক সমিতির কতৃদ্বৈ পাঁচগাও, ভারতপুর, মধ্যমকুড়ায় ও কাংসায় দাতব্য চিকিৎসালয় স্থাপিত হয়। কৃষক জনগণের পরিচালিত ভটপুরের হাইস্কুল আজও সারা এলাকার গর্বের বিষয়। জেলা বোর্ডের ডাক্তার, স্থানিটারী ইনসপেক্টর ও গ্রাম উন্নয়ন বিভাগের কর্মচারীগণ জনগণের নির্বাচিত কমিটির নির্দেশে সহজে ও সানন্দে কাজ সম্পন্ন করিত।

ব্রিটিশ শাসনমুক্ত অঞ্চল রূপে দাঁড়াইলেও এই এলাকা নিখিল ভারত ও বহির্জগতের সঙ্গে বিচ্ছিন্ন তো হয়ই নাই বরং গভীর সংযোগ রক্ষা করিয়াছে। তাই এই সময় জাতীয় নেতাদের মুক্তি ও স্বাধীন জাতীয় সরকারের দাবি করিয়া নালিতাবাড়ীতে বিখ্যাত শ্রমিক নেতা শামসুল হুদার সভাপতিত্বে ফ্যাসিস্ট বিরোধী সম্মেলন অনুষ্ঠিত হয়। এই সম্মেলন হইতেই এই অঞ্চলের কৃষক জনসাধারণ ফ্যাসিবাদ সম্পক্ষে জ্ঞান লাভ করেন এবং ফ্যাসিবাদ বিরোধী প্রচার আন্দোলন শুরু করেন। প্রয়োজন হইলে ফ্যাসিবাদ বিরোধী প্রতিরোধ সংগঠন গড়িয়া তোলার প্রস্তুতি গ্রহণ করেন।

## প্রাদেশিক কৃষক সম্মেলন

### ষষ্ঠ অধিবেশন

ময়মনসিংহ জেলা কৃষক সমিতির ৫ম অধিবেশন অনুষ্ঠিত হয় স্বেচ্ছা চুর্গাপুরে। এই সম্মেলনে সভাপতি ছিলেন রংপুরের বিশিষ্ট নেতা মণিকৃষ্ণ সেন এবং প্রধান অতিথি ছিলেন ভবানী সেন।

এই সময় বিশ্বব্যাপী ফ্যাসিবিরোধী যুদ্ধ চলিয়াছে জোরকদমে। বাংলা ও আসামে শক্তিশালী যুদ্ধঘাটি বসিয়াছে। এই জেলার মধ্য দিয়া চলিয়াছে হাজার হাজার বিদেশী সৈন্য, বিপুল পরিমাণ অস্ত্রশস্ত্র যুদ্ধের সাজ-সরঞ্জাম, রসদবাহী ট্রেন ও অটোমোবাইলস্। জেলার বৃকে শঙ্কুগঞ্জ, ছত্রপুর ও ভৈরবে ছিল সৈন্যবাহিনীর ঘাটি। ফলে আর্থিক ও সামাজিক দিক দিয়া কৃষক জনসাধারণের বহু বিপদ ও ঝুঁকি পোহাইতে হয়। তখনও সাম্রাজ্যবাদী ব্রিটিশ সরকারের দমন-নীতি সম্পূর্ণ শিথিল হয় নাই। একদিকে চলিয়াছে সাম্রাজ্যবাদী শাসন-শোষণ-উৎপীড়ন, ফ্যাসিস্ট জাপানের আক্রমণাশঙ্কা; অপর দিকে দেশের অভ্যন্তরে চলিয়াছে সামন্ততন্ত্র কায়েমী স্বার্থবাদীদের গোপন ফ্যাসিবাদী চিন্তা ও কর্মের উদ্যোগ। কৃষক ও কম্যুনিষ্ট কর্মীদের বিরুদ্ধে শুধু কুৎসাপূর্ণ প্রচার নয়, ব্যক্তিগত শারীরিক আক্রমণ পর্যন্ত শুরু হইয়াছে।

এই পটভূমিতে ১৯৪৩ সনে ১০ই, ১১ই ও ১২ই মে নালিতাবাড়ীতে অনুষ্ঠিত হয় বঙ্গীয় প্রাদেশিক কৃষক সম্মেলন। ইহা ছিল প্রদেশের ৬ষ্ঠ অধিবেশন। সম্মেলনের সভাপতিমণ্ডলীতে ছিলেন কমঃ মজাফ্ফর আহমেদ, বক্শিম মুখার্জী, সৈয়দ নৌশের আলী, প্রমথ ভৌমিক ও হাজী মহম্মদ দানেশ।

নালিতাবাড়ী সিংজানী রেল স্টেশন হইতে প্রায় ২৫ মাইল উত্তরে। খুবই কষ্টকর ও দুর্গম ছিল রাস্তাঘাট, যানবাহনের অবস্থা।



রেল স্টেশন হইতে সেরপুর ১১ মাইল, মাঝখানে ৩—৪ মাইল পথ ছিল ব্রহ্মপুত্রের চর ও বেলাভূমি। সেরপুর টাউন হইতে সম্মেলন স্থানটি ছিল ১৪ মাইল দূরে। আর এই চৌদ্দ মাইল রাস্তা ছিল ভাঙ্গাচোরা, পাহাড়ী নদীর খাল-বিল ও ডোবায় ভরা। কিন্তু সম্মুখে ছিল ঘননীল গারো পাহাড়ের সুস্নিগ্ধ মনোরম দৃশ্য। পথিক পথ চলার ক্লান্তি ভুলিয়া যাইত সেই প্রাকৃতিক সৌন্দর্যের আকর্ষণে। বন্দরের মধ্য দিয়া প্রবাহিত দূরন্ত পাহাড়ী নদী ভোগাই। পূর্ব পাড়ে নালিতাবাড়ী, পশ্চিমে তারাগঞ্জ। উভয় গঞ্জের ব্যবসায়ীদের মধ্যে চিরন্তন প্রতিযোগিতা। এই সম্মেলনে গঞ্জের প্রগতিশীল শক্তি প্রতিযোগিতা করিয়া সাহায্য করিয়াছেন। নালিতাবাড়ীর উত্তরে আদিবাসী কৃষকদের গ্রাম। শ্যামল উর্বর কৃষিভূমি, মাঝে মাঝে পাহাড়ী টিলা ও বনভূমি। দক্ষিণে অর্দ্ধ-উপজাতী, ঝাল, মাল, টিওর, কৈবর্ত ও সাধারণ মুসলমান কৃষকদের আবাস।

সম্মেলন মণ্ডপের নাম রাখা হয় ‘কায়ুর নগর’। মালাবারের কায়ুর গ্রামের কৃষক সন্তান মাদাতিল আপ্পু, কুঞ্জামবু, আবুবকর ও চিরুকুন্দন—এই বীর শহীদদের স্মৃতির উদ্দেশ্যে এই নগরের নামাকরণ হইয়াছিল। কমরেড বিনয় রায়ের উদাত্ত কণ্ঠের সঙ্গীত “দে দে ফিরাইয়া দে, মোদের কায়ুর কমরেড দেরে……” দীর্ঘদিন অম্লুরণিত হইয়াছিল কৃষকদের কণ্ঠে, প্রতিধ্বনিত হইত গারো পাহাড়ের গায়ে। প্রধান দুইটি তোরণের নাম পাঁচগাঁও ইউনিয়ন কৃষক সমিতির প্রতিষ্ঠাতা শহীদ ত্রিলোচনের নামে “ত্রিলোচন তোরণ” এবং শহীদ নীলমণি বকসীর নামে “নীলমণি তোরণ”। ঢাকার তরুণ সাহিত্যিক শহীদ সোমেন চন্দ্রের স্মৃতির উদ্দেশ্যে প্রদর্শনীর নামাকরণ হয় “সোমেন চন্দ প্রদর্শনী”। কমরেড সোমেন চন্দ ফ্যাসিবাদী আততায়ীর হাতে নিহত হন। এই প্রদর্শনী উদ্বোধন করেন অধ্যাপক গোপাল হালদার। প্রদর্শনীর রূপকার ছিলেন শিল্পী মণি রায় ও জিতেন সেন। সঙ্গীত প্রচার ও পরিবেশনে ছিলেন

বিনয় রায় ও তাহার কৃষ্টি বাহিনী। বিরাট ভলান্টিয়ার বাহিনীর কুচ-কাওয়াজ ও অভিযাদন গ্রহণ করেন সভাপতিমণ্ডলী ও পতাকা উত্তোলনে সমবেত প্রতিনিধিবৃন্দ। এই সম্মেলনে উপস্থিত প্রতিনিধি ও দূরের দর্শক ও ভলান্টিয়ার বাহিনীর খাওয়া সরবরাহ করেন কৃষকরা। চাল, লাকড়ী ইত্যাদি সরবরাহ করেন আদিবাসী কৃষকগণ। তরিতরকারী, লঙ্কা ইত্যাদি সরবরাহ করেন রাজবংশী ও মুসলমান কৃষকরা। আর ডাল, তেল, মুন, মসলা সাহায্য দিয়াছিলেন বন্দরের দোকানী ও ব্যবসায়ীবৃন্দ। শচী রায়, রাজেন্দ্র নাথ, শিবাজী মুখার্জী, বৃন্দাবন কর্মকার প্রমুখ স্বল্প মূল্যে চা, জলখাবার সরবরাহ করেন। মহিলা প্রতিনিধি ও দর্শকদের সাহায্যে নিযুক্ত ছিলেন জ্যোৎস্না নিয়োগী, তুলসী বকসী, বেলা পাল ও মজিরা খাতুন। প্রতিনিধি সম্মেলনের জন্য নির্দিষ্ট ছিল চারিদিক হইতে সুরক্ষিত বিরাট আটচালা ঘর। প্রতিনিধিদের জন্য ছিল পৃথক পৃথক বাসগৃহ। এই বিরাট সম্মেলন অনুষ্ঠানের চারিদিকে ছিল ভলান্টিয়ার বাহিনীর তাঁবু। প্রতিনিধিদের জন্য রন্ধনশালা ও খাওয়ার চত্তর এবং কয়েকটি শয্যাসহ একটি হাসপাতাল ছিল।

বাংলা দেশের ২৫টি জেলার ১৬৯ জন নির্বাচিত প্রতিনিধি ও শতাধিক ভ্রাতৃহুমূলক প্রতিনিধি ও দর্শক সম্মেলনে যোগদান করেন। বঙ্গীয় প্রাদেশিক কৃষক সভার ইতিহাসে ইতিপূর্বে কোন সম্মেলনেই এত বেশী সংখ্যক প্রতিনিধি যোগদান করেন নাই। শুধু তাহাই নয়, এই সম্মেলনে কৃষক ও নিম্নমধ্যবিত্ত ঘরের মেয়েদের ঐক্যবদ্ধ সমাবেশ অতীতে এমন আর দেখা যায় নাই। এই সম্মেলনের প্রস্তাবগুলির মধ্যে মুখ্য স্থান লাভ করে ‘খাওয়া সমস্যা ও সংগঠন’, ক্ষেত মজুরদের শ্রায্য মজুরী, পার্ট চাষ ও পার্টের দর ইত্যাদি। খাওয়া শস্য উৎপাদন বৃদ্ধির জন্য এবং সেই সাথে পার্ট চাষ পরিমিত ও নিয়ন্ত্রন করার জন্ত কৃষকদের কাছে আবেদন করা হয়। সেচ ব্যবস্থা, জল নিকাশ, খাল কাটা, বাঁধ বাধা, বীজ সংগ্রহ করা, পতিত জমি আবাদ করা, যে জমিতে সম্ভব একাধিক ফসল উৎপাদন করা, মামলা

মোকদ্দমা নিষ্পত্তি করার জ্ঞাত সালিশী ব্যবস্থা গ্রহণ করার নির্দেশ দেওয়া হয়।

এই প্রাদেশিক সম্মেলনে বর্গা প্রথা ও 'তেভাগা' সম্পর্কে বিস্তারিত আলোচনা হয় এবং তেভাগা সংগ্রাম সম্মুখে রাখিয়া সংগঠনকে প্রস্তুত করার নির্দেশ দেওয়া হয়।

১১ই মে বৈকাল ৪ টায় ছিল প্রকাশ্য সম্মেলন ও সাধারণ কৃষক সমাবেশের নির্ধারিত দিন। কিন্তু পাহাড়তলীতে শেষ রাত্রি হইতে প্রবল বর্ষণ শুরু হয় এবং ছপূর পর্য্যন্ত মুঘলধারে বৃষ্টি হয়। ফলে ভোগাই, নিতাই, দর্শা, মেলেং মালবী প্রভৃতি সমস্ত পাহাড়ী নদী-গুলিতে হ্রদাস্ত ঢল নামিয়া আসে। নদীগুলির সাঁকো, যোগাযোগ ব্যবস্থা পারাপার বিচ্ছিন্ন হইয়া পড়ে। ৫—৭ মাইল দূরের কৃষকদের পক্ষেও প্রকাশ্য সম্মেলনে যোগদান করা সম্ভবপর হয় না। সুসং-ছুর্গাপুর এবং লাউচাপরা, ধানশাইল, কাংসা অঞ্চলের সংগঠিত জাঠা গুলিও অর্ধপথে আটক পড়িয়া যায়। প্রকৃতির এই প্রতিবন্ধকতা সত্ত্বেও ১৫ হাজারের অধিক কৃষক সমাবেশ হইয়াছিল। সবচেয়ে বেশী উৎসাহ ও উদ্দীপনা সৃষ্টি করে ৪৫০০ লাল টুপিপরা লাঠিধারী 'কৃষক বাহিনীর' সমাবেশ। উপজাতী মেয়রাও এই সমাবেশে সামিল হন। নালিতাবাড়ী প্রাদেশিক সম্মেলনে সর্ব প্রথম লাল টুপি ও লাঠিধারী সুসংগঠিত কৃষক বাহিনী তাহাদের শ্রেণীস্বার্থে জঙ্গী সমাবেশ করেন। এই সম্মেলনের প্রচার আন্দোলনও সংগঠনের মধ্য দিয়া জামেশ্বর, যতীন, বিরটি, দীগেন্দ্র কুমার, পরেশ, অনিল প্রমুখ হাজং, ডালু সন্তানগণ সর্ব্বক্ষেত্রের জ্ঞাত কৃষক সমিতির কাজে আত্মনিয়োগ করেন। কৃষক কর্মী জলধর পাল, জমিয়ৎ আলী, কাঙ্গাল দাম প্রমুখ জননেতা বলিয়া সমস্ত শ্রেণীর নিকট প্রতিষ্ঠা লাভ করেন। নালিতাবাড়ী কৃষক সম্মেলন সম্পর্কে মহাস্বদা আবহুল্লাহ রসুল লিখিয়াছেন ;—“এ পর্য্যন্ত যতগুলি প্রাদেশিক সম্মেলন হইয়াছিল তার মধ্যে নালিতাবাড়ী সম্মেলন ছিল সবচেয়ে সুগঠিত ও বিভিন্ন দিক থেকে কর্মীদের জন্য সব চেয়ে উৎসাহজনক। জায়গাটা

ছিল বাইরের জগৎ থেকে বেশ দূরে। কাছাকাছি পাহাড় এলাকা ও আদিবাসী কৃষকদের বসতি।

কৃষক সভার জীবনে আন্দোলন ও সংগঠন সম্বন্ধে নালিতাবাড়ী সম্মেলন এক নতুন পরিস্থিতির সূচনা করে, নতুন নতুন কাজের ইঙ্গিত দেয়। কর্মী ও ভলান্টিয়ারদের মধ্যে নতুন উৎসাহ সৃষ্টি করে। পরবর্তীকালের আন্দোলন ও সংগঠনের তার সুস্পষ্ট ছাপ থেকে যায়।”

এই সময় ‘মহিলা আত্মরক্ষা সমিতি’র প্রচার আন্দোলন ও সংগঠন উপজাতীয় মহিলাদের মধ্যে ব্যাপক ভাবে গড়িয়া উঠে।

“১৯৪৩ সনের ২৫শে অক্টোবর মধ্য-ময়মনসিংহ জেলায় মহিলা সমিতির ১৯টি শাখা কেন্দ্র গঠিত হয়। জেলার প্রায় সকল মহকুমাতেই এই শাখাগুলি গড়িয়া উঠিয়াছিল। মহিলা কর্মীরা দলে দলে গ্রামে যাইতেন এবং মেয়েদের লইয়া বৈঠক করিতেন। দৃষ্টান্ত স্বরূপ নালিতাবাড়ীতে মহিলা সমিতির কর্মীরা প্রতি সপ্তাহে নিয়মিত দুইদিন করিয়া এই বৈঠক-সভা করিতেন। এই সব বৈঠকে নারী-অধিকার, বিবাহ বিষয়ে হিন্দুকোডবিল প্রভৃতি বিভিন্ন প্রশ্ন ও সমস্যা লইয়া আলোচনা করা হইত। ‘রাও কমিটির’ সমর্থনে গণস্বাক্ষর গ্রহণ অভিযান চালানো হইত। ‘এই ভাবেই মহিলা সমিতি এই অঞ্চলে মেয়েদের মধ্যে জনপ্রিয়তা লাভ করে। বিবাহ ও সম্পত্তির উত্তরাধিকার বিষয়ে আইন পরিবর্তনের সংগ্রামও প্রসারিত করেন। এই সব গ্রামাঞ্চল ছিল সমান্তরালের শক্তিশালী ঘাটি।”\*

শুধু তাহাই নহে ১৯৪৫ সনে নেত্রকোণায় যে সারাভারত কৃষক সভার নবম অধিবেশন অনুষ্ঠিত হয় তাহাতে এই পাহাড় সীমান্ত অঞ্চলের আদিবাসী কৃষকদের অবদান ছিল অপরিমিত ও আদর্শ স্থানীয়।

\*Communists in Indian Women's Movement. page—187.

By—Renu Chakraborty

## যুদ্ধোত্তর যুগে গণ-অভ্যুত্থান

ক্যাসিস্ট বাহিনীর পরাজয় ও সোভিয়েত রাশিয়ার নেতৃত্বে বিশ্ব জনগণের বিজয়ের মধ্য দিয়া দ্বিতীয় বিশ্বযুদ্ধের অবসান ঘটিল। ঋংসোন্মুখ ব্রিটিশ সাম্রাজ্যবাদের দুর্বলতা এই যুদ্ধে নগ্নভাবে প্রকটিত হইল। সারা বিশ্বে তাহারা তৃতীয় শ্রেণীর শক্তিতে পরিণত হইলেও ভারতবর্ষের উপর শেষবারের মতো সন্ত্রাস নীতি চালাইতে চেষ্টা করিল। ব্যাষ্টিন সাহেবকে পাঠানো হইল ময়মনসিংহের জেলা ম্যাজিস্ট্রেট রূপে। মিঃ ব্যাষ্টিন যুদ্ধ ফেরত সাজ-সরঞ্জাম ও অলস সামরিক বাহিনীর সাহায্যে উত্তর অঞ্চলের ব্রিটিশ শাসন মুক্ত অঞ্চলকে পুনরায় করায়ত্ত করার জন্ত তৎপর হইল। প্রথমে ভৈরব ছত্রপুর ও উজ্জুগঞ্জের মিলিটারী ক্যাম্প হইতে তিনটি দলে সৈন্যদের গারো পাহাড়ের জঙ্গলে শিকার করা এবং খ্রীষ্টিয় মিশনগুলি দেখার অজুহাতে পাঠানো হইল। এই সৈন্যগণ রানীকং, বিরুইডাকিনী, বাওয়াই বাদা প্রভৃতি রোমান ক্যাথলিক মিশনগুলিকে কেন্দ্র করিয়া এই অঞ্চলে ভৌগোলিক অবস্থা (Topography) সংক্রান্ত যাবতীয় খবরা-খবর সংগ্রহ করিল। বিশেষ বিশেষ গ্রামগুলির অবস্থান লক্ষ্য করিল। ইহার সপ্তাহকাল মধ্যেই থানাগুলিতে সিপাহী সংখ্যা প্রচুর পরিমাণে বৃদ্ধি করা হইল এবং ইউনিয়ন বোর্ডের ট্যাক্স আদায়ের টঙ্ক ধান ও মহাজনদের বাকি বকেয়া সাকুল্য টাকা আদায় করার জন্ত নোটিশ ও সার্টিফিকেট জারী করা হইল। অঞ্চলের বিশিষ্ট কর্মীদের নামে নূতন করিয়া গ্রেপ্তারী পরোয়ানা জারী করা হইল।

এলাকার সমস্ত কৃষকগণ ইহার উত্তরে জানাইয়া দিলেন যে চারি বৎসর পূর্বে কৃষকরা যে টঙ্ক প্রথা রদ করিয়াছেন, মহাজনদের ঋণ পরিশোধ বন্ধ করিয়াছেন তাহা আর দেওয়া হইবে না। বিগত পাঁচ বৎসর এই অঞ্চল যে ভাবে চলিয়াছে সেই ভাবেই চলিবে।

১৯৪৬ সন, ১৬ই ফেব্রুয়ারী ‘রশিদ আলী দিবস’। চারিদিকের গ্রাম হইতে ছোট বড় দলে ভাগ হইয়া জনতা নালিতাবাড়ী বন্দরে আসিতে লাগিল সেই দিবস পালনের উদ্দেশ্যে। গ্রামের পথে পথে ব্যাঙ্কিনের সৈন্যদল এই সব জনতাকে বিচ্ছিন্ন করিয়া গ্রামে ফিরিয়া যাওয়ার জন্য সৃষ্টি করিল নানা ধরনের বাধা। বন্দুক ও বেয়নেটের ভয় দেখাইল। উপর হইতে এরোপ্লেনে হেঁ মারিয়া সমিতির বাড়ির উপর উড়ানো ঝাণ্ডা ভাঙিয়া দিল। মিছিলের উপর বার বার হেঁ মারিল। তবুও জনতার অভিযান রোধ করা গেল না। প্রায় দশ বারো হাজার জনতা নালিতাবাড়ি পৌঁছিয়া রশিদ আলীর মুক্তি প্রস্তাব গ্রহণ করিল।

পরের সপ্তাহেই আসিল ঐতিহাসিক নো-বিজোহের সংবাদ। ঐ সংবাদকে ভিত্তি করিয়া ময়মনসিংহ শহরের কয়েকটি সরকারী অফিস গৃহ বিক্ষুব্ধ জনতা আগুনে পুড়াইয়া দিল। সদরে জনতার গণ-অভ্যুত্থান শুরু হইয়াছে, কোর্টে পুলিশের গুলি চলিতেছে—এই সংবাদ এই অঞ্চলে পৌঁছাবার সঙ্গে সঙ্গে কৃষক আন্দোলনের অন্যতম নায়ক ভূপেন ভট্টাচার্য তিন হাজার জনতার এক শোভাযাত্রা লইয়া হালুয়াঘাট অভিমুখে রওনা হইলেন। মিশনারী পাত্রীরা ভীত হইয়া কিছু সংখ্যক অস্ত্র সমর্থকদের দা, কুড়াল, চেওয়ার ও বন্দুক দিয়া চার্চ রক্ষা করার জয় দাঁড় করাইলেন। কিন্তু প্রতিবেশী হাজং, ডালুদের প্রতিশ্রুতি ও বন্ধুত্বপূর্ণ কথা শুনিয়া দেশপ্রেমিক খ্রীষ্টানগণ সাম্প্রদায়িক দাঙ্গার সর্বনাশা পথ হইতে ফিরিয়া দাঁড়াইলেন। দীর্ঘ শোভাযাত্রা নো-বিজোহীদের উদ্দেশ্যে জয়ধ্বনি তুলিয়া স্বাধীন ভারত ও মুক্ত এলাকার আওয়াজ দিয়া সন্ধ্যায় এক বিরাট সভা করিল। কেরার পথে জনতা বিজয়োল্লাসে থানা, জমিদার কাছারী ও মহাজনদের গদির উপর উঠিল।

মুক্তি ঝাণ্ডা উড়াইয়া দিল। ভারতের মুক্তিযুদ্ধ দ্ব্যর্থার হইয়া

এই সময় হঠাৎ সমগ্র দক্ষিণ দিকে “ইন্টার্ন কন্ট্রিয়ার রাইফেল বাহিনীকে” সমাবেশ করা হইল এবং যুগপৎ উত্তরে গারো পাহাড়ে

সমাবেশ করা হইল “আসাম রাইফেল বাহিনীকে”। মহেন্দ্রগঞ্জ, পোড়াকাশিয়া, বারেঙ্গাপাড়া, শিববাড়ী, বাঘমারা জগন্নাথপুর, ও মহিষ খোলাতে আসাম রাইফেল বাহিনীর ক্যাম্প বসিল। জনতার মুক্ত এলাকা এইভাবে যুগপৎ উত্তর ও দক্ষিণ দিক হইতে পরিবেষ্টিত হইল। এই সংকটপূর্ণ পরিস্থিতিতে বিপ্লবী কমিটি যেখানে যেখানে সম্ভব ছোট ছোট দলে ভাগ হইয়া সশস্ত্র প্রতিরোধের সিদ্ধান্ত গ্রহণ করিল এবং জনসাধারণকে নির্ভীক ও শাস্তভাবে গ্রামে থাকিতে নির্দেশ দিল। ভারতের স্বাধীনতা আন্দোলনের গোপন শত্রু রোমান ক্যাথলিক মিশনারীরা তখন খ্রীষ্টান কৃষকদের ইংরাজ সরকারের প্রতি আনুগত্য প্রকাশ করিতে নির্দেশ দিল এবং আদিবাসীদের মধ্যে বিভেদ সৃষ্টির প্রচেষ্টা শুরু করিল। যুদ্ধ ফেরত ঘোড়া ও জীপে চড়িয়া গ্রামে গ্রামে এই মিশনারীরা ব্যাষ্টিনের পক্ষে দালালী শুরু করিল। ফলে এই অঞ্চলের কিছু কিছু গ্রাম ব্যাষ্টিনের দখলে চলিয়া গেল এবং এই দুর্বলতার সুযোগ গ্রহণ করিল সশস্ত্র সৈন্যবাহিনী। তাহারা সংগঠিত গ্রামগুলিকে লক্ষ্য করিয়া আক্রমণ চালাইল এবং প্রায় ১০০টি সংগঠিত গ্রাম ভাঙিয়া তচনচ করিল অথবা আগুন জ্বালাইয়া পোড়াইয়া দিল। ব্যাষ্টিনের হুকুমে সৈন্যবাহিনী ধর্মগোলার হাজার হাজার মণ ধান, চাষীদের ব্যক্তিগত ধান, চাল, গরু, মহিষ, খালা, ঘটি, বাটী, নগদ টাকা পয়সা গহনা পত্র যাহা পাইল তাহাই লুণ্ঠ করিল। শুধু তাহাই নহে, তাহারা নষ্ট করিল কৃষক মা বোনদের ইচ্ছত, প্রকাশ্য দিবালোকে আগুনে পোড়াইয়া দিল কৃষকদের পুজার ঘর, সমিতির ঘর, পাঠশালা ও চিকিৎসালয়।

এই ভয়াবহ ধ্বংসলীলা ও অত্যাচারের তাণ্ডবের মধ্যেও কিন্তু বিপ্লবী চেতনাসম্পন্ন চাষীরা গ্রাম ত্যাগ করিল না। সুযোগ ও সুবিধা মতো তীর, ধনুক, চেওয়ার, বল্লম ও দা লইয়া ইংরাজ শক্তিকে প্রতিরোধ করিতে লাগিল। এই সময় স্রং পশ্চিম এলাকা কমিটির পুরোভাগে আসিয়া দাঁড়াইলেন বর্ষিয়সী হাজং মাতা রাসমণি ও মাইজপাড়ার সুরেন্দ্র। রাসমণি একটি সশস্ত্র বাহিনী গড়িয়া গ্রামে গ্রামে মেয়েদের

প্রতিরোধ সংগ্রামে উদ্বুদ্ধ করিতে লাগিলেন। সৈন্যদের রাইফেল, স্টেনগান, ব্রেনগান ও মেশিনগানের বিরুদ্ধে গেরিলা যুদ্ধের কৌশল শিখাইতে লাগিলেন। হঠাৎ কোন গ্রাম আক্রান্ত হইলে তিনি তাহার বাহিনীসহ গ্রামবাসীদের প্রতিরোধে সাহায্য করিতেন।

১৯৪৭ সনের ৩১শে জানুয়ারী একদল সৈন্য সোমেশ্বরী তীরে বহেরাতলী গ্রামে প্রবেশ করিল। গ্রামের পুরুষেরা তখন সবাই অনুপস্থিত। এই সুযোগে বর্বর সৈন্যেরা দুইটি হাঙ্গু মেয়ের ইজ্জৎ নষ্ট করিল। দুইজন সৈন্য কৃষকবধু সরস্বতী ও কুমুদিনীকে টানিয়া পশ্চিমের জঙ্গলের দিকে লইয়া চলিল। কুমুদিনী আর্তনাদ করিয়া সকলের সাহায্য প্রার্থনা করিল। বহেরাতলী গ্রামে সৈন্যেরা প্রবেশ করিয়াছে এই সংবাদ ইতিমধ্যে বিপ্লবীদের গোপন কেন্দ্রে একদল জঙ্গী পৌঁছাইয়া দিয়াছে। পাশে ছনগড়া গ্রামে জঙ্গীরা তখন আহ্বারের অপেক্ষায় বিশ্রাম করিতেছিল। রাসমণির নেতৃত্বে পাঁচ-ছয় জন মহিলা আত্মরক্ষা সমিতির কর্মীও সেই সঙ্গে ছিল। মুহূর্ত মধ্যে লাঞ্ছিতা কুমুদিনীর কাতর আর্তনাদ ও বহেরাতলী গ্রামবাসীদের আহ্বান রাসমণির কানে আসিয়া পৌঁছিলে তাহাকে চঞ্চল করিয়া তুলিল। অত্যাচারিতা কুমুদিনীর করুণ আর্তনাদ জঙ্গী বাহিনীর সমস্ত ক্রান্তি ও ক্ষুধা তৃষ্ণার জ্বালা ভুলাইয়া দিল। ক্ষিপ্ত হইয়া তাহাদের মনে প্রতিহিংসার আগুন জ্বলিয়া উঠিল। বিশিষ্ট-গেরিলা নেতারা তখন পরামর্শ করিতেছেন প্রকাশ্যভাবে আক্রমণ করা ঠিক হইবে কিনা। রাসমণি ও তাহার মেয়ে জঙ্গীরা কিন্তু এ সব চুলচেরা বিচারের অপেক্ষা করিলেন না। তাহারা নিঃশব্দে তুলিয়া লইল—দা, চেওয়ার, রক্তপতাকা।

জঙ্গী সাথীদের আহ্বান করিয়া সে বলিল “ময় তিমাং, তিমাতের ইজ্জৎ রক্ষা করিব, নাতে মরিব, তরা নীতি লইয়া বইয়া থাক্” ; এই কথা বলিয়া রাসমণি বহেরাতলীর দিকে ছুটিয়া চলিলেন। তাহার সঙ্গে গেলেন আরো দশ বারোজন। বিশিষ্ট জঙ্গী নেতা সুরেন্দ্র তখন পাঁচিশ জন জঙ্গীর একটি বাহিনী লইয়া দক্ষিণ দিক হইতে রাসমণির



সাহায্যে অগ্রসর হইলেন। রাসমণি তাহার জঙ্গীদের লইয়া উত্তরে বিজয়পুরের দিক হইতে সশস্ত্র সৈন্যদের দিকে অগ্রসর হইলেন। সোমেশ্বরীর গুলি বালুকাময় পশ্চিম তীরে সৈন্যেরা এই ভাবে দুই দিক হইতে অবরুদ্ধ হইল। পূর্বে সোমেশ্বরীর তীরে স্রোত সহজে পার হওয়া তাহাদের পক্ষে সুকঠিন। ভীত সৈন্যেরা তখন কুমুদিনীকে ছাড়িয়া পলাইয়া যাইতে চেষ্টা করিল। কিন্তু বাধা পাইল সোমেশ্বরীর বালুচরে। ইতিমধ্যে রাসমণি ও সুরেন্দ্র সৈন্যদের লক্ষ্য করিয়া তীর, বর্ষা ও পাথর ছুঁড়িতে লাগিল। বিপর্যস্ত সৈন্যদল দিক্‌বিদিক্‌ জ্ঞানশূন্য হইয়া এলোপাথারি গুলি ছুঁড়িতে লাগিল। কিন্তু গুলি উপেক্ষা করিয়া রাসমণির বাহিনী সৈন্যদের উপর ঝাঁপাইয়া পড়িল এবং দা, চেওয়ার দিয়া আঘাতের পর আঘাত করিতে লাগিল। সৈন্যদের গুলিতে কয়েকজন চাষী আহত হইল। তাহাদের পুরোভাগে দাঁড়াইয়া রণরঙ্গিনী মূর্তিতে দা চালাইতে লাগিলেন। বীরাজনা রাসমণি আর তাহারই পাশে দাঁড়াইয়া দক্ষ হাতে বর্ষা চালাইতে লাগিলেন সুরেন্দ্র। যে সৈন্যটি কুমুদিনী উপর পাশবিক অত্যাচার করিয়াছিল রাসমণি তাহাকে লক্ষ্য করিয়া দায়ের এক কোপ বসাইয়া দিলেন। দায়ের এক আঘাতেই সৈন্যের মুণ্ড দেহ হইতে বিচ্ছিন্ন হইল। পাশের সৈন্যটি রাসমণিকে লক্ষ্য করিয়া গুলি করিলেন। রাসমণির দেহ ক্ষতবিক্ষত হইয়া ধূলায় লুটাইয়া পড়িল। কিন্তু মূহূর্তমধ্যে সুরেন্দ্র তাহার বর্ষাধারা এই নারীহত্যাকারী সৈন্যটির বক্ষ বিদীর্ণ করিলেন। পরমুহূর্তেই একটি বুলেট সুরেন্দ্রকে শহীদের মৃত্যুদান করিল। সুরেন্দ্রের প্রাণহীন দেহ মাতা রাসমণির কোলেই লুটাইয়া পড়িল। এই ভাবে প্রায় তিন ঘণ্টাকাল লড়াই চলিল।

বিজ্রোহী চাষীদের রক্তে রঞ্জিত হইল সোমেশ্বরীর নীল জল ; আর নারীঘাতী ব্যাঙিনের সৈন্যদের কলুষিত রক্তধারায় তৃপ্ত হইল সোমেশ্বরীর গুলি ভষিত বালুকারাশি। সৈন্যদের মধ্যে দুই জন নিহত ও কমবেশী দশ জন আহত হইল। অপরদিকে বিজ্রোহীরা হারাইল।

বীরমাতা রাসমণি ও সুরেন্দ্রকে। এই দুই বিপ্লবীর মৃত্যুর বিনিময়ে এই অঞ্চলের সংগ্রামী চাষীরা অর্জন করিল সশস্ত্র যুদ্ধের অভিজ্ঞতা আর লাভ করিল ১টি রাইফেল ও ১টি স্টেনগান। বাংলা তথা ভারতের মুক্তি আন্দোলনে হাজং রমণী রাসমণির এই সশস্ত্র সংগ্রাম যেমন অতুলনীয় ও অনন্যসাধারণ তেমনই গৌরবোজ্জ্বল। ভারতের মুক্তিযুদ্ধের ইতিহাসে নারী জাতির ক্ষেত্রে ঝাঁকীর রাণী লক্ষ্মীবাই-এর পর রাসমণির মতো সংগ্রাম ও আত্মোৎসর্গের দৃষ্টান্ত একান্তই বিরল। লক্ষ্মীবাই দীর্ঘ বিস্মৃতির পর আজ তাহার যোগ্য সম্মান পাইয়াছেন। কৃষক রমণী রাসমণিকে আমরা জাতীয় মুক্তি সংগ্রামের শহীদ বীরঙ্গনারূপে শ্রদ্ধাভরে স্মরণ করিব আর কতদিন পরে? এই দুই বিপ্লবীর মৃত্যুর বিনিময়ে এই অঞ্চলের জনতার আন্দোলনে এক গুণগত পরিবর্তন সূচিত হইল।

এই সময় জেলার সর্বত্র তথা সারা বাংলায় চলিতেছিল বর্গা চাষীদের তে-ভাগা আন্দোলন। শহীদ রাসমণি ও সুরেন্দ্রের আত্মবলিদান এই তে-ভাগা আন্দোলনে এক অভিনব অনুপ্রেরণা সৃষ্টি করিল। বর্গাচাষীরা কায়েমী স্বার্থের অত্যাচারের বিরুদ্ধে প্রয়োজনমতো সশস্ত্র প্রতিরোধ সংগ্রাম করার পথনির্দেশ পাইল। ফলে, এই বিরাট তে-ভাগা আন্দোলন বাংলার কৃষি-বিদ্রোহে এক অমর ইতিহাস রচনা করিল।

এই আন্দোলন বাংলার প্রায় প্রত্যেকটি জেলায় পরিব্যাপ্ত হইয়াছিল। এই ময়মনসিংহ জেলা ছাড়াও উত্তরবঙ্গের জলপাইগুড়ি, রংপুর, দিনাজপুর ও মালদহ ছিল এই আন্দোলনের বিরাট ও বিস্তীর্ণ রণাঙ্গন। একমাত্র দিনাজপুর জেলাতেই ৪০ জন অধিয়ার শহীদের মৃত্যুবরণ করিয়াছেন। আর কারাবরণ করিয়াছিলেন ১২ শত কৃষক সম্ভ্রাম, সংঘর্ষে আহত হইয়াছিল ১০ হাজার কৃষক। ইহাদের অধিকাংশই রাজবংশী, পারিয়া, সাঁওতাল প্রভৃতি আদিবাসী।

এই রক্তক্ষয়ী সংগ্রাম ঋতুচক্রে ঘুরিয়া ফিরিয়া আসিল ১৯৪৮ সনের ২৬শে জানুয়ারী, ঐতিহাসিক “স্বাধীনতা দিবস”। স্বাধীন

অবস্থা ও সুযোগ সুবিধা বিচার করিয়া এই দিবস উদ্‌যাপনের সিদ্ধান্ত করা হইল চার দিন পিছাইয়া ৩০শে জানুয়ারী। স্থির হইল ঐ দিবস শহীদ রাসমণি ও সুরেন্দ্র দিবস হিসাবে প্রতিপালিত হইবে। সেই দিন ভোর হইতে না হইতেই গেরিলাগণ নিজ নিজ বর্শার মাথায় লাল ঝাণ্ডা বাঁধিয়া লাঠি হাতে সমবেত হইল চারুয়াপাড়ায় সুরেন্দ্র-রাসমণির সমাধিক্ষেত্রে। সেখানে অনুষ্ঠান শেষ করিয়া তাহারা বিভিন্ন পথে প্রচারের জন্ত রওনা হইল ঘোষণাও হাটের দিকে। এই হাটের দেড়মাইল দক্ষিণে ভালুকাপাড়া গির্জার সম্মুখে অকস্মাৎ একদল সিপাহী জঙ্গীদের পথরোধ করিয়া দাঁড়াইল এবং প্রচার বাহিনীর নেতাদের গ্রেপ্তার করিয়া কলসিন্দুর পুলিশ ক্যাম্পে লইয়া যাইবার জন্ত জবরদস্তি আরম্ভ করিল। নেতারা প্রতিবাদ করিয়া পথ ছাড়িয়া দিতে অনুরোধ জানাইয়া বলিলেন, “আমরা আজ বিরোধ করিতে আসি নাই। শান্তিপূর্ণ ভাবে স্বাধীনতা দিবসের প্রচার করিতে আসিয়াছি”। জঙ্গীদলকে একেবারে নিরস্ত ও অসহায় মনে করিয়া সিপাহীরা তাহাদের বন্দুক ও বেয়নেটের ভয় দেখাইল এবং বন্দুকে সজ্জিন পরাইতে শুরু করিল। দক্ষ ও চতুর নেতা নয়ান তখন হাজং ভাষায় সাধীদের ঝাণ্ডা খুলিয়া বর্শা ধরিতে বলিল এবং বিদ্রোহিতা একজন সিপাহীর হাত হইতে রাইফেল ছিনাইয়া লইয়া তাহারই বুকে বেয়নেট বসাইয়া দিল। মুহূর্ত মধ্যে উভয় পক্ষে হাতাহাতি সংগ্রাম শুরু হইল। কিন্তু দুর্দর্শ ও বলিষ্ঠ চাষীদের হঠাৎ আক্রমণে সিপাহীরা দিশাহারা হইয়া ইতস্ততঃ ছুটিতে লাগিল। ইতিমধ্যে আর এক জঙ্গীর বর্শার আঘাতে আর একজন সিপাহী ধরাশায়ী হইল। স্বাধীনতা দিবসে কৃষকদের এই শান্তিপূর্ণ প্রচার বাহিনী বাধ্য হইয়া এই ভাবে সশস্ত্র পুলিশ বাহিনীর সহিত সংঘর্ষে লিপ্ত হইল। এই সংঘর্ষে দুই জন সিপাহী নিহত হইল ও দুইটি রাইফেল জনবাহিনীর হস্তগত হইল। এই সম্পর্কে ভালুকাপাড়ার গির্জার পাড়ী সাহেবের মন্তব্যটি বিশেষ গুরুত্বপূর্ণ। তিনি বলিয়াছিলেন, “Baheratali was a drawn game, but this

one is definitely a winning fight for the insurgents both from the point of loss of lives and arms."

ঠিক এক বৎসর আগে বহেরাতলী সংগ্রামে বিপ্লবী কৃষকরা দুইটি প্রাণের বিনিময়ে দুইটি প্রাণ ও দুইটি আগ্নেয়াস্ত্র দখল করিয়াছিল। এইবার প্রাণ না দিয়াই দুইটি সিপাহীকে নিহত করিয়া দুইটি আগ্নেয়াস্ত্র দখল করিল। খণ্ডিত ভারতের স্বাধীনতা লাভের পর ঠিক পূর্ব মুহূর্তে এই অঞ্চলের কৃষি-সংগ্রামের ইতিহাসে আর এক ঝলক বিদ্যুৎ চমকাইয়া গেল। ভারতের স্বাধীনতা যুদ্ধকে করিল দীপ্ত ও গৌরবোজ্জ্বল।

---

## ভারতের মুক্তি

তারপর ১৯৪৭ সনের ১৫ই আগস্ট ভারতবর্ষ দ্বিখণ্ডিত হইয়া ব্রিটিশ সাম্রাজ্যবাদের হাত হইতে মুক্তি লাভ করিল। ভারত ও পাকিস্তান দুইটি পৃথক স্বাধীন রাষ্ট্র গঠিত হইল। সমগ্র দেশবাসীর সঙ্গে এই পাহাড় সীমান্ত অঞ্চলের আদিবাসী জনসাধারণও সেই দিন মুক্তি লাভে উৎসাহিত ও আনন্দিত হইয়া গ্রামে গ্রামে পাকিস্তানের রাষ্ট্রীয় পতাকা ও লালবাগা একত্রে উড়াইল। সেইদিন স্মরণীয় হুগাপুরের বৈকুণ্ঠ গুনের, হালুয়াঘাটে ধীরেন্দ্র সরকার ও রাজকুমার সরকারের, নালিতাবাড়িতে জামেশ্বর সরকারের এবং ভটপুরে রাজবংশী নেতা বলাই সরকারের নেতৃত্বে স্বাধীনতা দিবসে বিরাট বিরাট জন-বাহিনীসহ শোভাযাত্রা ও সভা অনুষ্ঠিত হইল। এই নেতৃবৃন্দ অকুণ্ঠ-চিন্তে নবগঠিত পাকিস্তান রাষ্ট্রের প্রতি আনুগত্য প্রকাশ করিয়া অভিনন্দন জানাইলেন এবং রাষ্ট্রের কর্ণধারদের নিকট অবিলম্বে সকল রাজনৈতিক কর্মীদের উপর হইতে বাধানিষেধ ও পরোয়ানা প্রত্যাহারের এবং বিনা ক্ষতিপূরণে জমিদারী প্রথা উচ্ছেদের আবেদন পেশ করিলেন।

বছর ঘুরিল, ফিরিয়া আসিল ১৯৪৮ সনের স্বাধীনতা দিবস, ১৪ই আগস্ট। তবুও এই অঞ্চলে তথা পূর্ব পাকিস্তানে জমিদারী প্রথা বিলোপের কোন লক্ষণ দেখা গেল না। রাজনৈতিক কর্মীদের উপর হইতে প্রেস্তারী পরোয়ানা উঠিল না।

পূর্ব পাকিস্তানের মহামাণ্ড লাট বাহাডুর মিঃ বারোজ এই সময় এই অঞ্চল পরিদর্শনে আসিলেন। বিজয়পুর বাংলায় তিনি সমস্ত সম্প্রদায়ের প্রতিনিধিদের সহিত এক সাক্ষাৎকারের ব্যবস্থা করিলেন। এই বিজয়পুর গ্রামেই ত্রিভুবোধ হাজং এর বাড়ীতে এক গোপন

বৈঠকে কমরেড প্রমথ গুপ্ত ইংরাজীতে টাইপ করা স্মারকলিপি পাঠ ও ব্যাখ্যা করিয়া উপস্থিত সভ্যদের বুঝাইয়া দেন। সর্বসম্মতিক্রমে উহা গৃহীত হয়। হাজং, ডালু, কোচ, গারো প্রভৃতি আদিবাসীগণও নিজ নিজ সম্প্রদায়ের প্রতিনিধি স্বাধীন পাকিস্তানের প্রথম লাট বাহাদুরকে অভিনন্দন জানাইলেন। এই সংগ্রামী জনতার পক্ষ হইতে জামেশ্বর ও চল্ল সরকার লাট বাহাদুরকে শুদ্ধা জ্ঞাপন করিলেন এবং রাষ্ট্রের প্রতি সম্পূর্ণ আনুগত্য প্রকাশ করিয়া অবিলম্বে বিনা ক্ষতিপূরণে জমিদারী প্রথা উচ্ছেদের প্রার্থনা জানাইলেন। আনুষ্ঠানিক ভাবে এই জমিদারী প্রথা উচ্ছেদের আইন পাশ করিতে বিলম্ব ঘটায় সম্ভাবনা থাকিলে এক বিশেষ আইন ( Ordinance ) জারী করিয়া জমিদারী প্রথা অবসানের ঘোষণা করার জন্তও তাঁহারা অনুরোধ করিলেন। কিন্তু এক যুগ আগে একদা বাংলার হুক মন্ত্রি-মণ্ডলী কৃষকদের প্রতি ও রাজনৈতিক বন্দীদের প্রতি যে সমবেদনা ও উদারতা প্রকাশ করিয়াছিলেন, স্বাধীনতা লাভের পরবর্তীকালে লীগ মন্ত্রিমণ্ডলী সেটুকুও করিলেন না। বিপরীত পক্ষে, তাঁহারা বরং জমিদারের টঙ্ক ধান ও বাকি বকেয়া খাজনা আদায়ের জন্ত কোর্ট অব ওয়ার্ডের সার্টিফিকেট জারী শুরু করিলেন এবং জবরদস্তিমূলক “লেভী” ধান ( Procurement Department ) আদায় আরম্ভ করিলেন। তাই ১৯৪৮ সালের নভেম্বর-ডিসেম্বর মাসে কৃষকগণ আবার হাটে বাজারে প্রকাশ্যে প্রচার করিতে বাধ্য হইল “টংক প্রথা ধ্বংস হোক, জমিদারী প্রথা উচ্ছেদ হোক, জান দিব তবু ধান দিব না, এলাকার উদ্ধৃত্ত ধান শ্রায্য মূল্যে ক্রয় করা” প্রভৃতি। লীগ সরকার জনতার আশা-আকাঙ্ক্ষা তো পূর্ণ করিলই না বরং ঐক্যবদ্ধ কৃষকদের দাবি উপেক্ষা করিয়া বলপূর্বক পুলিশের সাহায্যে টঙ্ক ধান ও লেভী আদায় করার নির্দেশ দিল। শুধু তাহাই নহে, লীগ সরকার সমস্ত কুখ্যাত গুণ্ডাদের ক্রাশনাল গার্ড ও আনসার বাহিনীতে ভর্তি করিয়া এই সশস্ত্র বাহিনীকে আদিবাসীদের গ্রামে গ্রামে অত্যাচারের সনদ দিয়া ছাড়িয়া দিল। এইবার এই আদিবাসীদের সংগ্রামী গ্রামগুলিতে শুরু হইল আনসার ও ক্রাশনাল গার্ড

নামে কথিত দস্যুদের সীমাহীন অত্যাচার, উৎপীড়ন এবং পাশবিকতার তাণ্ডব। নির্বিচারে প্রহার, অপমান, বেপরোয়া লুণ্ঠন, এমন কি নারীধর্ষণ হইয়া দাঁড়াইল এইসব গ্রামের দৈনন্দিন ব্যাপার। জনতার বুকে তাই ধুমায়িত হইল প্রচণ্ড বিক্ষোভের আগুন।

লীগ সরকারের এই হৃদয়হীন ও জনবিরোধী শাসননীতি শাস্ত্র পাহাড় অঞ্চলকে ও তার শান্তিপ্রিয় আদিবাসীদের আবার করিয়া তুলিল অশান্ত ও উদ্বেলিত। স্বাধীন মাতৃভূমিতে সং নাগরিক হিসাবে সুখে শান্তিতে বসবাস করার এবং দেশ ও জাতিকে মনের মতো করিয়া গঠন করার দীর্ঘ দিনের স্বপ্ন ও আশা-আকাঙ্ক্ষা তাহাদের ধীরে ধীরে বিলীন হইয়া গেল। দীর্ঘ দিনের নির্যাতিত শোষিত চাষীদের আবার কঠিন সংগ্রামের দুর্গম পথে নামিতে বাধ্য করা হইল।

১৯৪৯ সনের ৮ই জানুয়ারী। কলমাকান্দা থানার চৈতন্যনগরের নিলচাঁদ হাজং এর ২০ মণ টঙ্ক ধান লইয়া যাওয়ার সময় গ্রামবাসীরা বাধা দিল এবং এই ধান কাড়িয়া আবার নিলচাঁদের গোলায় তুলিয়া দিল। জমিদারের লোকজন ব্যর্থ হইয়া ফিরিয়া গেল। ধান রক্ষার এই সাফল্যের সংবাদ গ্রাম হইতে গ্রামান্তরে জনতার মুখে মুখে ছড়াইয়া পড়িল এবং ইহা কেন্দ্র করিয়া সমগ্র অঞ্চলে প্রায় এক শত প্রচার বাহিনী বাহির হইল। হাটে বাজারে, গ্রামের পথে পথে আওয়াজ উঠিল,— “টঙ্ক নাই,” “আধি নাই,” “গরিব চাষীর উপর লেভি নাই,” “ফসলের উপর চাষীর অধিকার,” “ফসল কেটে ঘরে তোল দখল রেখে চাষ কর,” “জান দিব তবু ধান দিব না” ইত্যাদি। বনের আগুনের মতো সর্বত্র এইসব আওয়াজ ছড়াইয়া পড়িল। হিন্দু, মুসলমান, খ্রীষ্টান জনসাধারণ অকুণ্ঠভাবে প্রচার বাহিনীকে অভিনন্দন জানাইল। যুদ্ধোত্তর যুগের বিপ্লবী সংগ্রামের স্মৃতি আবার জাগিয়া উঠিল।

১৫ই জানুয়ারী বটতলা গ্রামের টঙ্ক ধান আটক পড়িল। সংবাদ পাইয়া পরদিন কলমাকান্দা থানার দারোগা, ছয় জন লশক্রে পুলিশ, সাত জন চৌকিদার ও উনিশ জন আমসার সহ বটতলা হামলা

করিল। পাঁচ জন চাষীকে গ্রেপ্তার করিয়া নির্মম প্রহার করায় জনৈক দুর্বল চাষী উক্ত ধানের সন্ধান বলিয়া দিল। দারোগা তখন সেই ২৫ মণ টঙ্ক ধান দুইটি গরুর গাড়িতে বোঝাই করিয়া রওয়ানা হইতেই চাষীরা সম্মিলিতভাবে আপত্তি জানাইল ও গাড়ির পথরোধ করিয়া দাঁড়াইল। আনসাররা হঠাৎ লাঠি চালাইয়া কয়েকজন চাষীকে আহত করিল। গ্রামবাসীরা ইহাতে ক্ষিপ্ত হইয়া আনসারদের হাত হইতে লাঠি ছিনাইয়া লইল।

মুহূর্ত মধ্যে পুলিশ গুলি চালাইতেই কৃষকেরা মাটিতে গুইয়া পড়িয়া আত্মরক্ষা করিল, ধানের গাড়ি আগাইয়া চলিতেই চাষীরা আবার উঠিয়া গাড়ির গতিরোধ করিল; —আওয়াজ তুলিল, “জান দিব তবু ধান দিব না,” পুলিশ গুলি করিয়া দুই চাষীকে মাটিতে ফেলিয়া দিল। ইহার পরও মৃত্যুভয়হীন টঙ্ক চাষীরা ধানের গাড়ি আটকাইয়া রাখিল। দারোগা হুকুম দিলেন, “আজ সন্ধ্যা হইয়া গেল, আমরা চলিয়া যাই।” গাড়োয়ান ধানের গাড়ি মাঠেই ফেলিয়া রাখিয়া গরু লইয়া চলিয়া গেল। রাত্রির অন্ধকারে পুলিশ আনসার দলও মিলাইয়া গেল। সংগ্রামী জনতা ধমকিয়া দেখিল তাহারা সবাই অনেক দূরে—গ্রামের বাহিরে প্রান্তরে আসিয়া পড়িয়াছে, গুলিবদ্ধ দুই জন চাষী কাতর আর্তনাদ করিতেছে। শ্রান্ত, ক্লান্ত চাষীরা তখন আহত সাথী দুই জনকে পিঠে বহন করিয়া গ্রামের দিকে ফিরিল।

১৯৪৯ সালে এই প্রথম আবার আগ্নেয়াস্ত্রের বিকট গর্জন পাহাড়ের গায়ে প্রতিধ্বনিত হইল। বটতলার এই গুলিবর্ষণের সংবাদ সর্বত্র দাবান্নের মতো ছড়াইয়া পড়িল। টঙ্ক চাষীর পুঞ্জীভূত ঘৃণা ও ব্যথা বেদনার শ্রোত উদ্ভাল হইয়া উঠিল। পরদিন লেঙ্গুরার কৃষক সমিতির পক্ষ হইতে চল্লিশ জন জঙ্গী কৃষকের একটি দল সমস্ত রকম হাতিয়ার ও প্রাথমিক চিকিৎসার ঔষধপত্র সহ বটতলা আসিয়া পৌঁছিল। প্রথমেই তাহারা সেই প্রান্তরে পড়িয়া থাকা ধানের গাড়ি দুইটি দখল করিল এবং আহত কৃষক দুইজনকে নিরাপদ



আশ্রয়ে পাঠাইয়া দিল। ছোট্ট একটি জনসভায় উদ্দীপনাময়ী বক্তৃতা দিয়া তাহারা শত্রুর প্রতি জেহাদ ঘোষণা করিল।

এই ঘটনার পরেই ২৩শে জানুয়ারী লেঙ্গুরা মৌজার কৃষকরা নুতন করিয়া বসানো হুসং জমিদারদের কোর্ট অব ওয়ার্ডের চৈতন্য-গড়ের কাছারীবাড়ি দখল করিল। পরদিন ভোর ৭ টায় কাছারী প্রাঙ্গনে কৃষকদের এক সমাবেশ হইল এবং গণ-আদালতের সামনে একজন তহশীলদার ও পঁাচ জন বন্দী পেয়াদা ও পিয়নের বিচার হইল। কাছারীর আসবাবপত্র সব কিছু আটক করা হইল, কাগজপত্র, দলিল-দস্তাবেজ সব আঙুনে পোড়ানো হইল। জনতার এই গণ-আদালত ঘোষণা করিল যে এই মৌজায় জমিদারের সব রকম বাকি-বকেয়া টংক ধান ও খাজনা রহিত করা হইল, কোন কৃষকই যেন আর টংক ধান না দেয়। পরে কোর্ট সব ওয়ার্ডের ম্যানেজার ও পুলিশবাহিনী হাতী জিপ লইয়া বার বার হামলা করিয়াও জনতার বৃহ ভেদ করিতে পারিল না। কাছারী বিদ্রোহীদের দখলেই রহিয়া গেল। এই ভাবে কলমাকান্দা থানার ছয় নং লেঙ্গুরা ইউনিয়ন সর্বপ্রথম বিদ্রোহী চাষীদের দখলে চলিয়া গেল। শুধু জমিদারদের কাছারীবাড়ি দখল করিয়া ও খাজনা টংক ধান বন্ধের ঘোষণা করিয়াই কাজ শেষ করা হইল না। দুই দিন বাদেই কালিকাপুরের দুই গাড়ি ধান আটক করা হইল। হাজং রমণী মাণিক, কলাবতী কুড়ি জন মেয়ে লইয়া ধানের গাড়ির সম্মুখে যাইয়া বাধা দিতেই বিহারী গাড়োয়ান দ্বিক্রান্তি না করিয়া মেয়েদের নির্দেশিত স্থানে ধান তুলিয়া দিয়া গেল। ইহাতে স্পষ্ট বোঝা গেল কৃষকদের গ্রায্য দাবির এই আন্দোলন গরিব জনতার মধ্যে কত ব্যাপক ও গভীর সমর্থন লাভ করিয়াছে।

ইতিমধ্যে লেঙ্গুরা এলাকার সংগ্রামের কথা পশ্চিম এলাকাগুলিতে পৌঁছিল। হুসং হুর্গাপুর থানার মাইজপাড়া ইউনিয়নে আন্দোলন বিস্তৃতি লাভ করিল। সরকারী কর্মচারীরা চারুয়া পাড়ার বিরুদ্ধে সরকারের একশত মণ মেডী ধান জোর করিয়া লইয়া চলিল।

বিশ্বেশ্বরের ছই স্ত্রী ও পুত্র-কন্যাদের আপত্তি ও আবেদন সম্পূর্ণ নিষ্পন্ন হইল। এমন সময়ে সংবাদ পাইয়া পরেশ সরকারের নেতৃত্বে জঙ্গী দল আসিয়া ধানের গাড়িগুলি অবরোধ করিল। অবস্থার গতি মন্দের দিকে যাইতেছে লক্ষ্য করিয়া বিশ্বেশ্বর বলিলেন, “আমার এই লেভী ধান ছস্থদের মধ্যে বিতরণ করা হোক, আমি সরকারের নিকট মূল্য বাবদ কিছুই চাহি না।” সরকারী কর্মচারীরা বিশ্বেশ্বরের এই উদার আবেদনও গ্রাহ্য করিলেন না। কিন্তু জঙ্গী দল হিন্দু মুসলমান জনতার মধ্যে জোর করিয়া উক্ত ধান বিতরণ করিয়া দিল। ফলে জনসাধারণের মনে বিপুল উৎসাহ ও প্রেরণা দেখা দিল। জাহ্নুয়ারীর তৃতীয় সপ্তাহে প্রতিদিনই গোড়াগাঁও, গৌরীপুর, কালিকাপুর, গোপালপুর, ছনগড়া, ভেদীকুড়া, বগাঝোরা, জাঙ্গালীয়া, কমলপুর, বাগপাড়া, কাশীপুর, কালিকাবাড়ী প্রভৃতি গ্রামে মহাজনদের ধান, টক্ক ধান, সরকারী লেভী ধান আটক পড়িতে লাগিল। হুসং পরগণার ফসল রক্ষার গণ-আন্দোলনের ঢেউ সেরপুর পরগণার শোষিত চাষীদের মনেও আঘাত দিতে লাগিল। “জান দিব তবু ধান দিব না, জমিদারী প্রথা উচ্ছেদ চাই” প্রভৃতি আওয়াজ সমস্ত শ্রেণীর কৃষকদের মধ্যে এক বিপ্লবী অঙ্গুপ্রেরণার সৃষ্টি করিল। স্বতন্ত্রভাবে সমস্ত রকম ধান আদায় বন্ধ হইয়া গেল। সরকারী কর্মচারীরা ধান আদায়ের নৈতিক বল হারাইয়া ফেলিল। ধান আদায়ের জন্য গ্রামে প্রবেশের নামেই ত্রাসের সঞ্চার হইল।

২৮শে জাহ্নুয়ারী লেজুরা পুলিশ ক্যাম্পের সম্মুখের ময়দানে ৫ হাজার কৃষক জনতার এক বিরাট জনসভা হইল। বেলা ২টা হইতে এলাকার দূর দূর গ্রাম হইতে চাষীরা দলে দলে আসিয়া সভায় যোগ দিল। এই জনসভায় কৃষক-নেতারা শেষ বারের মতো বক্তৃতা দিয়া আকুলভাবে আবেদন জানাইলেন যে, বিনা ক্ষতিপূরণে জমিদারী প্রথা উচ্ছেদ ও টক্ক প্রথা রদের ঘোষণা করা হোক, সরকারের রাজস্ব ও ট্যাক্স আদায় এবং খাদ্য সংগ্রহের কাজে স্থানীয় কমিটিগুলির সহযোগিতা লওয়া হোক এবং এই আংশিক শাসন সংস্কার বহির্ভূত

অঞ্চলের শাসনব্যবস্থা আদিবাসীদের স্বার্থের প্রতি দৃষ্টি রাখিয়া করা হোক। এই সভার গৃহীত প্রস্তাবাদিও লিখিতভাবে কর্তৃপক্ষকে জানানো হইল। সুসং অঞ্চলের এই জনসভা হইতে স্পষ্টই বোঝা গেল যে জমিদারী প্রথা ও টঙ্ক প্রথা উচ্ছেদ না হওয়া পর্যন্ত কৃষকদের গণ-আন্দোলন কিছুতেই থামিবে না। এই অঞ্চলের জাতীয় কৃষকরা ভূমি-ব্যবস্থার পরিবর্তন না হইলে নেতাদের কাছে শুধু রাজনৈতিক ক্ষমতা আসিয়াছে বলিয়াই স্বাধীনতা সংগ্রামের যবনিকা এখনই টানিতে রাজী নয়। জমিদারী প্রথা উচ্ছেদের এই আন্দোলনের সমর্থনে সারা জেলার হিন্দু-মুসলমান চাষীরা যশোদলে এক সম্মেলন করিলেন এবং রাষ্ট্র নেতাদের জনস্বার্থ-বিরোধী নীতির পরিবর্তন দাবি করিলেন। শুধু তাহাই নয়, করিমগঞ্জ, তারাইল, যশোদল, নিয়ামতপুর, ঝাউগড়া, বালী, বাংলা প্রভৃতি স্থানের কৃষকরা সংগ্রাম ঘোষণারও প্রস্তাব লইলেন।

১৯৪৯ সনের ৩০শে জানুয়ারী। আবার সেই স্বরণীয় শহীদ দিবস ফিরিয়া আসিল। ৩ বৎসর আগে এই দিনে বীর মাতা রাসমণি ও তাঁহার সাথী সুরেন্দ্র সশস্ত্র ব্রিটিশ শক্তির বিরুদ্ধে সংগ্রাম করিয়া শহীদ হইয়াছিলেন। জীবনের মূল্যে তাঁহারা প্রমাণ করিয়া গিয়াছেন যে, ঐক্যবদ্ধ জনতার শক্তি দুর্বীর ও অপরাধের। প্রমাণ করিয়াছেন, শত্রুর প্রতি সুতীব্র ঘৃণা ও গভীর শ্রেণীচেতনা লইয়া সংগ্রাম করিলে নিরস্ত্র জনতাও শত্রুর আগ্নেয়াস্ত্রকে পরাভূত করিতে পারে। সুরেন্দ্র-রাসমণির নিকট হইতে এই অঞ্চলের কৃষকরা হাতেনাতে সেই বিপ্লবী শিক্ষা ও অভিজ্ঞতাই লাভ করিয়াছে। ইতিমধ্যে বটতলা গ্রামে কায়েমী-স্বার্থবাদীরা রাইফেলের গুলিতে টঙ্ক চাষীর তপ্ত রক্ত ঝরাইতে শুরু করিয়াছে। স্বাধীনতা লাভের পরেও আবার শহীদদের রক্ত-রাঙা পথে চাষীদের সংগ্রামে টানিয়া নামানো হইয়াছে। জানুয়ারী মাসের ৫তম সপ্তাহে এই বিস্তীর্ণ অঞ্চলের প্রতিটি হাটে-বাজারে, গ্রামে গ্রামে বিক্ষুব্ধ চাষীরা প্রচার অভিযান চালাইল। আন্দোলনের ঢেউ সারা অঞ্চল প্লাবিত করিল। কলমাকান্দা, দুর্গাপুর, হালুয়াঘাট, নালিতাবাড়ী

খানার উত্তরে শত শত গ্রাম হুর্ভেদ্য হুর্গে পরিণত হইল। ঐ অঞ্চলের কোথাও পুলিশ সিপাহী প্রকাণ্ডে জাগ্রত জনশক্তির সম্মুখে দাঁড়াইতে সাহস করিল না। পাহাড় অঞ্চল আবার জনতার দখলে চলিয়া গেল।

১লা ফেব্রুয়ারী জনতার এক বাহিনী দক্ষিণের কলসিন্দুর পুলিশ ক্যাম্পের পাশ দিয়া নিতাই নদীর পাড়ে প্রচার করিয়া চলিয়াছে। এমন সময় ৩০ জন সিপাহী ৫০ জন আনসার লইয়া দুইদিক হইতে প্রচারবাহিনীকে নদীর বাঁকে অবরোধ করার জ্ঞাপ্ত অগ্রসর হইল। সংগ্রামের অভিজ্ঞতায় শিক্ষিত কৃষকরা মুহূর্তে, ঝোপে, ঝাড়ে, নদীর বাঁকে, উই টিপি ও আলের আড়ালে আত্মরক্ষা ও আক্রমণের জ্ঞাপ্ত আশ্রয় লইল। আর কয়েক কদম আসিলেই শত্রুর নিস্তার নাই, একসাথে সবাই ঝাঁপাইয়া পড়িবে। কিন্তু সশস্ত্র সিপাহীর দল আর অগ্রসর হইতে সাহস পাইল না। দূর হইতে গুলি ছুঁড়িতে লাগিল। জাঙ্গালীয়াপাড়ার বৃদ্ধ রামদয়াল ও রামচরণ কলসিন্দুর হাট হইতে ফেরার পথে সিপাহীদের এই এলোপাথারি গুলিতে মৃত্যুবরণ করিল। এই হত্যাকাণ্ড বিজোহী কৃষকের ক্রোধান্বিতে ইন্ধন জোগাইল।

নেত্রকোণায় গ্রামবাসী ও পুলিশের মধ্যে গুরুতর সংঘর্ষ।

ধান্য সংগ্রহে সরকারী কর্মচারীদের বাধাদান : সীমান্ত

রক্ষীদলের একজন নিহত—আদিবাসীদের

আদিস্তান দাবী।

নেত্রকোণা ৯ই ফেব্রুয়ারী,—হুর্গাপুর খানার এলাকাধীন লেঙ্গুরান্ন গ্রামবাসী ও পুলিশের মধ্যে গুরুতব সংঘর্ষের সংবাদ পাওয়া গিয়াছে। গ্রামবাসীরা কম্যুনিষ্টদের ধ্বনিসহ ধাত্য সংগ্রহে সরকারী কর্মচারীদের বাধা দেয়। জেলা ম্যাজিষ্ট্রেট অন্যান্য কর্মচারী অকুস্থল অভিমুখে যাত্রা করিয়াছেন। পূর্বোক্ত খানার এলাকাধীন ঘোষগাঁও এ সীমান্ত রক্ষীদলের একজন নিহত হইয়াছে বলিয়া জানা গিয়াছে। ইউ. পি

(ফেব্রুয়ারী ১১—১৯৪৯, ১৯শে মার্চ—১৩৫৫ ২৭ বর্ষ—৩২০ নং  
আনন্দবাজার পত্রিকা)

৪ঠা ফেব্রুয়ারী শুক্রবার বিখ্যাত লেজুরা হাট। এই হাটের পাশেই পরিখা ব্যারিকেড প্রস্তুত করিয়া প্রায় সব রকম আগ্নেয়াস্ত্র সজ্জিত ৩০ জন সিপাহীর একটি ক্যাম্প রহিয়াছে। সপ্তাহকাল আগেই এই ক্যাম্পের সম্মুখস্থ মাঠে ৫ হাজার কৃষক-জনতার এক জনসভা হইয়াছে। সিপাহীরা সব কিছু শুনিয়াছে ও দেখিয়াছে। কিন্তু আজ সূর্যোদয়ের আগেই দুই জন কুখ্যাত দালাল সুবেদারকে মিথ্যা সংবাদ পৌঁছাইল যে, গড় রাতে এই এলাকার বিদ্রোহী টঙ্ক চাষীরা সিদ্ধান্ত করিয়াছে আজ হাট বসিলে যে কোন সুবিধামতো সময়ে তাহারা ক্যাম্প আক্রমণ করিবে ও সমস্ত অস্ত্রশস্ত্র লুট করিবে। এই মিথ্যা সংবাদ পাইয়া সিপাহীরা আতঙ্কগ্রস্ত হইল। কেহ কেহ ক্যাম্প ছাড়িয়া স্রুং চলিয়া যাইতে পরামর্শ দিল, কিন্তু পাঞ্জাবী সুবেদার ভীকর মতো পলাইয়া যাইতে চাইল না। সে পনের জন পাঞ্জাবী সিপাহীর উপর নির্ভর করিল এবং সব কয়টি আগ্নেয়াস্ত্রে গুলি ভরিয়া উন্নতের মতো টহল দিতে লাগিল। বেলা ১১টার প্রতিদিনকার মতো হাট জমিয়া উঠিল। এমন সময় উত্তরের পথ ধরিয়া পঁচিশ জন জঙ্গী টঙ্ক চাষীর একটি প্রচার বাহিনী হাটের দিকে নামিয়া আসিতে লাগিল। তাদের পিঠে বর্শা, কোমরে ভোজালী লালঝাণ্ডা, পোস্টার, ড্রাম ও বিউগল। প্রচারবাহিনী হাটের উত্তর সীমানায় আসিয়া আওয়াজ তুলিল—জমিদারী প্রথা উচ্ছেদ কর, ধান সিজ বন্ধ কর, জান দিব তবু ধান দিব না, ইনকিলাব জিন্দাবাদ ইত্যাদি। হাটের জনসাধারণ আনন্দে অল্পপ্রাণিত হইয়া একসাথে গগন বিদীর্ণ করিয়া মুহুমুহু সেই আওয়াজে কণ্ঠ মিলাইল। প্রচার-বাহিনী আরও অগ্রসর হইল। হাটের প্রান্তে দাঁড়াইয়া নায়ক মঙ্গলচান বলিলেন; “ভাইসব! স্বাধীনতা লাভের পরেও আমরা অতীতের দুইশত বৎসরের মতোই পরাধীনতার আলা, যন্ত্রণা, অত্যাচার অবিচার ভোগ করিতেছি, আজও জমিদারী প্রথার উচ্ছেদ হইল না।

শুধু তাহাই নয় সাত বৎসর আগে আমরা যে জমিদারী জুলুম গ্রাম হইতে দূর করিয়াছিলাম আজ তাহাই আবার দেখা দিয়াছে। আবার নূতন করিয়া পুলিশ ক্যাম্প বসানো হইয়াছে। জুলুম করিয়া লেভী ধান আদায় করা হইতেছে। তাই আসন্ন আমরা আওয়াজ তুলি—জমিদারী প্রথার অবসান হউক, গরীব চাষীর ধানে লেভী নাই, এলাকার উদ্ধৃত খাদ্য নগদ মূল্যে ক্রয় কর ইত্যাদি।” বক্তৃতা শেষ করিয়া মঙ্গলচান তাহার বাহিনী লইয়া হাটের অপর দিকে রওনা হইতেই ক্যাম্পের সিপাহীরা প্রাণের ভয়ে শিহরিয়া উঠিল। স্বেদারের আদেশে তাহারা পরিধার মধ্যে আশ্রয় লইল। রাইফেল লইয়া স্বেদার নিজে বালুর বস্তার পিছনে আড়াল লইল,—সিপাহীদের আগ্নেয়াস্ত্র অগ্নি উদগীরনের জন্ত একদম প্রস্তুত হইল। ক্যাম্পের অনুমান ২০।২২ গজ পাশ দিয়া প্রচারবাহিনী অগ্রসর হইতেই সহসা সিপাহীদের রাইফেল গর্জিয়া উঠিল, এক ঝাঁক গুলি বর্ষিত হইল। চোখের নিমেষে শিক্ষিত ও অভিজ্ঞ চাষীরা মাটিতে শুইয়া পড়িল। কিন্তু আশ্রয়স্থানের কোন ভাল আড়াল সেখানে ছিল না, মাথা তুলিয়া দাঁড়ানো বিপদজনক, ফিরিবার পথ নাই। এদিকে হাটের জনতা প্রথমে হতচকিত, পরে শঙ্কিত হইয়া যে যেদিক পারিল ছুটিতে লাগিল। জীবন-মরণের এই সন্ধিক্ষণে বীর নায়ক মঙ্গলচান সঙ্গীদের আহ্বান করিয়া বলিলেন—“ভাইসব, আজ আমাদের বিপ্লবী জীবনের কঠিন পরীক্ষা, নিশ্চিত মৃত্যুর হাত হইতে রক্ষার একমাত্র উপায় শত্রুকে প্রতিআক্রমণ করা। স্তবরাং, চল আমরা বৃকে হাটিয়া অগ্রসর হই।” সকলের আগে মঙ্গলচান কখনও বৃকে হাটিয়া, কখনও হামাগুড়ি দিয়া অগ্রসর হইয়া চলিলেন। এই ভাবে প্রায় ক্যাম্পের ছয়ারে পৌঁছিতেই এক ঝাঁক গুলি তাঁহার চোখ, মুখ, বক্ষ বিদীর্ণ করিল। শুধু একবার মাত্র শোনা গেল—“অগ্রসর হও।” তৎক্ষণাৎ বীর অগেল্য চিৎকার করিয়া বলিল—“মঙ্গলদার রক্তের প্রতিশোধ লইতে অগ্রসর হও।” বৃকে হাঁটিয়াই জঙ্গীরা শত্রুর অনেক কাছে পৌঁছিয়াছে। হাটের হতাহত জনতা চিৎকার করিতেছে।

উষে' রাইফেলের মুহূৰ্ছ গর্জন। কিছুক্ষণের মধ্যেই অগেল্প্র ও গুলিবদ্ধ হইয়া ধূলায় লুটাইয়া পড়িল এবং আর্তকণ্ঠে বলিল—  
 “আমাদের মৃত্যুর প্রতিশোধ নিও— লালবাগা তুলিয়া ধর।”  
 জঙ্গীরা দীর্ঘদিনের বহু আন্দোলনের সাথী মঙ্গলচান ও অগেল্প্রর রক্তাশ্রুত দেহের দিকে ফিরিয়া তাকাইল। কিন্তু মাটি হইতে মাথা তুলিতে পারে না, — তুলিলেই শত্রুর গুলিবদ্ধ হইতে হয়।  
 জীবনের ইহা এক কঠিন মুহূর্ত। পর পর দুইজন প্রথম শ্রেণীর বিদ্রোহী নায়ক মাত্র এক ঘণ্টার মধ্যে শত্রুর গুলিতে নিহত হইল। এই অঞ্চলের সর্ববৃহৎ এক হাটের সমগ্র জনসাধারণের সম্মুখে দাঁড়াইয়া কৃষকদের স্বার্থে সংগ্রাম করিয়া তাহারা শেষ বিদায় লইল। বিদ্রোহী কৃষকদের রক্ত আর জনসাধারণের রক্ত একসাথে প্রবাহিত হইল এবং পূর্ব-পাকিস্তানের ইতিহাসে এক বিরাট গণ-বিদ্রোহের স্মৃতি করিল।

লেঙ্গুরা হাটে গুলি চলিতেছে, মঙ্গলচান, অগেল্প্র মারা গিয়াছে—  
 বহু লোক হতাহত হইয়াছে, এখনও যুদ্ধ চলিতেছে। এই ধরনের নানা সংবাদ জনতার মুখে মুখে বিদ্যুৎবেগে চারিদিকে ছড়াইয়া পড়িল এবং চারদিক হইতে উত্তেজিত হিন্দু-মুসলমান মেয়ে-পুরুষ, কিশোর-বৃদ্ধ কৃষকেরা লাঠি, জাঠি, বর্শা, ফালা, রামদা যে যাহা পাইল তাহা লইয়াই উন্মত্তের মতো স্বতঃস্ফূর্তভাবে লেঙ্গুরা হাটের দিকে ছুটিয়া চলিল। তাহাদের মুখে শুধু এক কথা “হত্যার প্রতিশোধ চাই”।  
 বেলা ৩টার মধ্যে লেঙ্গুরার পুলিশ ক্যাম্প চারিদিক হইতে বিক্ষুব্ধ বিদ্রোহী জনসাধারণ কর্তৃক অবরুদ্ধ হইল। মৃত্যু ভয়ে ভীত সিপাহীরা ক্যাম্প হইতে পলায়নের জগ্গ দুই তিন বার পথ খুঁজিল। কিন্তু কোথায় পথ? চতুর্দিকে গ্রামের সম্মুখে মাঠে সশস্ত্র জনতা পলায়নের সমস্ত পথ রুদ্ধ করিয়াছে। ইতিমধ্যে ৩০।৪০ জনের একদল জঙ্গী আত্মরক্ষার কোন কোঁশল অবলম্বন না করিয়াই বিদ্যুৎবেগে ক্যাম্পের উপর ঝাঁপাইয়া পড়িল। সিপাহীরা নিশ্চিত মৃত্যুর হাত হইতে রক্ষা পাওয়ার জগ্গ অবিরাম গুলি বর্ষণ করিয়া চলিল।

একদিকে সাধারণ কৃষকের হাতিয়ার, আর অন্যদিকে ত্রিশটি আধুনিক আগ্নেয়াস্ত্র। অভূতপূর্ব, অতুলনীয় বীরত্ব প্রদর্শন করিয়া কৃষকরা একে একে মৃত্যুবরণ করিল। তবুও কেহ পশ্চাদপসরণ জানে না। হাজং বধু শঙ্খমণী আহত হইল, পাশেই তাহার স্বামী তাহাকে সাহায্যের জন্য হাত বাড়াইতেই বীর কণ্ঠা বলিয়য়া উঠিল,—“মকে না চা, শত্রুকে মার, ওলা রক্ত লা’।” (১) একটু দূরেই কুমারী কন্যা রেবতী লুটাইয়া পড়িল গণেশ্বরীর শুষ্ক বালুচরে। শঙ্খমণী, রেবতী, সারথী, যোগেন, বদক, স্বরাজ একে একে এমনই ১৫ জন বিপ্লবী চাষী প্রায় ৩ ঘণ্টা সংগ্রাম করিয়া শহীদের মৃত্যু বরণ করিল। কিন্তু সিপাহীরা তখনও চতুর্দিক হইতে অवरুদ্ধ। সূর্য অস্ত গেল, ক্রমে সন্ধ্যার অন্ধকার রণাঙ্গণ ঢাকিয়া ফেলিল ও সংগ্রাম থামিল। পাহাড়ীয়া নদী গণেশ্বরীর ক্ষীণ স্রোত বিজোহীদের রক্তধারা দক্ষিণে প্রবাহিত করিয়া লইয়া চলিল। আর তাহারাই ধূসর বুকে রচিত হইল পনেরোটি বীর কৃষক সন্তানের বালুকাময় সমাধি।

নেত্রকোণায় পুলিশ ও সৈন্যদের গুলিতে শতাধিক হাজং নিহত  
ধান্য সংগ্রহ লইয়া সরকারী কর্মচারী ও কৃষকদের  
মধ্যে বিরোধের জের।

নেত্রকোণা (ময়মনসিংহ) ১০ই ফেব্রুয়ারী,—ভূর্গাপুর থানার এলাকা-  
ধীন লেঙ্গুরা ইউনিয়নের কয়েকটি গ্রামে গভর্ণমেন্ট কর্তৃক ধান্য  
সংগ্রহ লইয়া কৃষক ও সরকারী কর্মচারীদের মধ্যে যে সংঘর্ষ হয়—  
সেই সম্পর্কে লেঙ্গুরা হইতে আগত যে সমস্ত সংবাদ পাওয়া গিয়াছে  
তাহা হইতে জানা যায় পুলিশ ও কৃষকদের মধ্যে সংঘর্ষের ফলে এক-  
শতাধিক কৃষক নিহত হইয়াছে। কৃষকদের অধিকাংশই হাজং।  
সরকার হইতে তাহাদের উপর যে ধান দেওয়ার নির্দেশ ছিল তাহার  
উহা দিতে অস্বীকার করে এবং অস্ত্রশস্ত্র লইয়া বাধা দেয়। প্রকাশ,



কৃষকরা নাকি কমিউনিষ্টদের দ্বারা পরিচালিত। ময়মনসিংহের জেলা ম্যাজিস্ট্রেট, পুলিশ সুপার, মহকুমা হাকিম ও অন্যান্য সরকারী কর্ম-চারীগণ ঘটনা স্থলে গিয়াছেন। গত রবিবার কৃষকরা পুলিশ ফৌজকে আক্রমণ করিলে সৈন্য ও পুলিশ বাহিনীকে গুলি চালান্বিত হইয়াছে, পরে চারিদিকের পাহাড়গুলি তন্ন তন্ন করিয়া তল্লাস করা হয় এবং গুলির আঘাতে আহত—অনুমান ৫০ জন হাজংকে গ্রেপ্তার করা হয়। ইউ. পি. আর।

(সোমবার—১৪ই ফেব্রুয়ারী ১৯৪৯, ২রা ফাল্গুন ১৩৫৫, ২৭ বর্ষ, ৩২৩শ সংখ্যা, আনন্দবাজার পত্রিকা।)

রাত্রির ঘন অন্ধকার নামিয়া আসিতেই মাত্র বারো জন দুর্ধর্ষ গেরিলা দুইদলে ভাগ হইয়া সিপাহীদের পলায়নের পথে ওত পাতিয়া রহিল। সিপাহীরা নিজ নিজ অস্ত্র পিঠে ফেলিয়া রাত্রির অন্ধকারে সুসং ভূর্গাপুরের পথে রওনা হইল। জিলাতলার মাঠ পার হইয়া কালিকাপুর মাঠে পৌঁছিতেই গেরিলাদের হাতবোমা নিক্ষিপ্ত হইল। বিক্ষোভে দুই জন সিপাহী আহত হইল। একজন দশ বারো গজ অগ্রসর হইতেই বিদ্রোহীদের হাতে নিহত হইল। মুহূর্ত মধ্যে আর একটি হাত বোমা নিক্ষেপ করিয়া আরও চার জন সিপাহীকে জখম করা হইল। সিপাহীরা অন্ধকারে দক্ষিণদিকে ছুটিয়া পালাইল। ৫০।৬০ জন কৃষকের প্রাণের বিনিময়ে মাত্র একটি সিপাহীকে হত্যা করা সম্ভব হইল; জখম হইল বেশ কয়েকজন। পরদিন সারা সুসং পরগণায় শতাধিক সিপাহীর সমাবেশ করা হইল। এই ভাবে গ্রামে গ্রামে ও হাটে বাজারে নির্বিচারে গুলি বর্ষণ ও নিরীহ কৃষক জনসাধারণকে হত্যা করিয়া পূর্ব পাকিস্তান সরকার নাগরিকদের বিভ্রান্ত ও বোকা বানানোর উদ্দেশ্যে এক কমিউনিকই প্রচার করেন।

হাজং জনতার উপর গুলিবর্ষণ

পূর্ববঙ্গ সরকারের ইস্তাহার

ঢাকা ১৫ই ফেব্রুয়ারী,—পূর্ববঙ্গ সরকার কর্তৃক প্রচারিত এক ইস্তাহারে বলা হইয়াছে যে, গত ২০শে জানুয়ারী, ময়মনসিংহ জেলার

আংশিক শাসন বহির্ভূত অঞ্চলের হাঙ্গ চাষীদল সীমান্ত রক্ষীদের একজন নায়ককে হত্যা এবং একজন পুলিশ কনেষ্টবলকে প্রহার করে। গত ৪ঠা ফেব্রুয়ারী, কম্যুনিষ্ট দলভুক্ত হাঙ্গদের এক বিরাট জনতা বর্শা ও দা লইয়া লেঙ্গুরার পুলিশ ক্যাম্প ঘেরাও করে। জনতা চলিয়া যাইতে অস্বীকার করাতে পুলিশ গুলি চালাইতে বাধ্য হয়। দুই ঘণ্টা পরে আরও বহুসংখ্যক লোক আসিয়া তথায় সমবেত হয় এবং তাহাদের ছত্রভঙ্গ করার জন্ত পুলিশ পুনরায় গুলি চালাইতে বাধ্য হয়। গত ৯ই ফেব্রুয়ারী দুর্গাপুর ও হালুয়াঘাট থানা অঞ্চলের দুই ক্ষেত্রে পুলিশ অগ্নিরূপ অবস্থায় গুলি চালাইতে বাধ্য হয়। উল্লিখিত প্রত্যেক ক্ষেত্রে জনতাকে চলিয়া যাইবার জন্ত যথেষ্ট সময় দেওয়া হইয়াছিল এবং জনতা অত্যধিক উত্তেজিত হইয়া আক্রমণ চালাইবার উদ্যোগ করাতে পুলিশ গুলিবর্ষণে বাধ্য হয়। গুলি বর্ষণের ফলে মোট ১৩ জন নিহত হয়। অবস্থা এক্ষণে সম্পূর্ণ আয়ত্তে। ইউ. পি.

(বুধবার—১৬ই ফেব্রুয়ারী ১৯৪৯, ৪ঠা ফাল্গুন ১৩৫৫, ২৭ বর্ষ, ৩২৫শ সংখ্যা। আনন্দবাজার পত্রিকা)

লেঙ্গুরা হাটের এই সশস্ত্র সংগ্রামের সংবাদ নানাভাবে পল্লবিত হইয়া সমগ্র পাহাড় অঞ্চল ছড়াইয়া পড়িল। বিদ্রোহী কৃষকরা এইবার রাসমণি, সুরেন্দ্র ও নয়ানের সংগ্রামের সময় সংগৃহীত আগ্নেয়াস্ত্র ব্যবহারের জন্ত প্রস্তুত হইল। বটতলা জাঙ্গালিয়া পাড়া ও লেঙ্গুরার সংগ্রামের অভিজ্ঞতা হইতে তাহারা বুঝিল—জমিদারী প্রথার উচ্ছেদ শুধু কৃষকদের রক্ত দানেই সফল হইবে না। শাসক শ্রেণীর রক্তেরও প্রয়োজন রহিয়াছে, ইংরাজ চলিয়া গেলেও তাহার প্রেতাশ্বা এই রক্ত চাহিতেছে।

হুসং পরগণার সশস্ত্র সংগ্রামের কথা শেরপুর পরগণার কৃষকদের উত্তেজিত ও চঞ্চল করিয়া তুলিল। শেরপুরের জর্নৈক তালুকদার এই সময় প্রচুর অর্থব্যয়ে পাঁচ জন সশস্ত্র সিপাহী ও পঁচিশ জন আনসারকে তাহার মধ্যমকুড়া কাছারি বাড়িতে বসাইয়া টঙ্ক ধান ও খাজনা আদায় করিতেছে। দুই দিন আগেই আলী হুসেন ও হুসেন

আলীর সমস্ত ধান জোর করিয়া আদায় করিয়াছে, গ্রামের হিন্দু-মুসলমান কৃষকগণ ঐক্যবদ্ধভাবে প্রতিবাদ করিলেও অধ্যক্ষের বিরুদ্ধে দাঁড়াইয়া, প্রতিরোধ করিতে পারে নাই। কিন্তু গত সাত দিনের মধ্যেই কৃষকদের ধান রক্ষার আন্দোলন একাধিক জায়গায় সশস্ত্র সংগ্রামের উচ্চতর পর্যায়ে পৌঁছিয়া যাওয়ায় এই অঞ্চলেও তাহার প্রভাব পড়িল। ৯ই ফেব্রুয়ারী একদল জঙ্গী কাকডুকান্দি, বিন্নিবাড়ী, কাউলারা প্রভৃতি গ্রামে প্রচার করিয়া শালমারা পৌঁছিতেই হঠাৎ সিপাহীদের মুখোমুখি আসিয়া পড়িল। বিনা প্ররোচনায় অকস্মাৎ সিপাহীরা গুলি ছুঁড়িতেই জঙ্গী কৃষকরা গেরিলা কায়দায় বিরাট বিরাট শালগাছের আড়াল হইতে তীর, বর্ষা, ফালা নিক্ষেপ করিতে লাগিল। উভয় পক্ষেই কঠিন সংগ্রাম চলিতেছে এমন সময় তিন মাইল দূরবর্তী নালিতাবাড়ী হইতে পনের জন সিপাহী ও বহু আনসার প্রচুর পরিমাণে কাতু'জ সহ আসিয়া সিপাহীদের শক্তি বৃদ্ধি করিল। জঙ্গীদল চারিদিক হইতে পরিবেষ্টিত হইয়া পড়িতে পারে এই আশঙ্কায় পিছনে হঠিয়া গেল। এই সংগ্রামের নায়ক সতীন্দ্র ডালু শহীদের মৃত্যু বরণ করিল এবং শচীন্দ্র ঘোষ গুলিতে অন্ধ হইয়া বন্দী হইল।

এই কয়টি সশস্ত্র সংগ্রামের পর সুনং, হালুয়াঘাট ও নালিতাবাড়ী থানার পঁচিশটি পুলিশ ক্যাম্পে সশস্ত্র সিপাহীর সংখ্যা বৃদ্ধি করা হইল এবং অসংখ্য আনসার সমাবেশ করা হইল। সারা অঞ্চল জুড়িয়া অত্যাচারের তাণ্ডব শুরু হইল। ৫ই ফেব্রুয়ারী রাত্রি ১টা'য় জনৈক উচ্চ পুলিশ-কর্মচারী প্রচুর সিপাহী ও আনসার লইয়া নালিতাবাড়ী এলাকার বিপ্লবীদের প্রধান কেন্দ্র হলদিগ্রাম চতুর্দিক হইতে ঘিরিয়া ফেলিলেন। তাঁহারা সকালের আলোতে আক্রমণ করার জন্য প্রতিক্ষায় রহিলেন। বিপ্লবীদের গোপন সংবাদবাহী এই সংবাদ রাত্রেই কেন্দ্রে পৌঁছাইল। সেখানে যে নেতারা ছিলেন তাঁহারা তৎক্ষণাৎ স্থির করিলেন যে, এই রাত্রির অন্ধকারেই সমস্ত গোপন মালপত্র লইয়া সিপাহী বেঁটনীর বাহিরে চলিয়া যাইতে হইবে; অগ্রথায় দিনের আলোতে আক্রমণ

করিলে সীমাহীন ক্ষয়ক্ষতির আশঙ্কা। সুতরাং সেইভাবে দুর্গম পাহাড়িয়া পথে চলিতে দক্ষ ও অভিজ্ঞ জঙ্গীদের পুরোভাগে রাখিয়া নেতারা দুই দলে শত্রু-বেষ্টনীর অপেক্ষাকৃত দুর্বল স্থান লক্ষ্য করিয়া অগ্রসর হইলেন। মেয়ে কর্মীরাও পুরুষ জঙ্গীর ছদ্মবেশে শত্রুর ব্যূহ ভেদ করার জন্য উভয় দলেই রহিল। স্থানীয় জনৈক চৌকিদার বিদ্রোহীদের গতি অনুমান করিয়া বলিতেই সিপাহীরা টর্চের আলো ফেলিয়া গুলি ছুঁড়িল। জঙ্গীরাও পাল্টা জবাব দিল। পাহাড়ী পথঘাট সম্পর্কে অভিজ্ঞ বিদ্রোহী চাষীরা জিতেন মৈত্র ও কনা পালকে পুরোভাগে রাখিয়া পাহাড়ের আড়ালে ও ঝরনার জলে গা ঢাকিয়া নিরাপদ স্থানে চলিয়া গেল। কিন্তু অপর এক দল সিপাহীদের ব্যূহ ভেদ করিতে পারিল না। ভীষণভাবে আহত হইয়া দুই জন নায়ক কমঃ রবি নিয়োগী ও জলধর পাল ভোরের দিকে বন্দী হইলেন। উভয় পক্ষেই বহু আহত হইল। পরদিন সকালে পুলিশ আগুন জ্বালাইয়া গ্রামটি পুড়াইয়া দিয়া দ্রুত সরিয়া পড়িল। এই অঞ্চলের প্রধান নায়কদের এইভাবে গ্রেপ্তারের সংবাদ পাইয়া জনসাধারণের বিক্ষোভ চরমে উঠিল। বেলা ৮টায় এক বিরাট জনতা নন্দী, বারোয়ামারী, নালিতাবাড়ী সিপাহী ক্যাম্পের দিকে স্বতঃস্ফূর্তভাবে অভিযান করিলে পুলিশ গুলিবর্ষণ করিয়া উত্তেজিত জনতাকে ছত্রভঙ্গ করিল। ক্রোধে উদ্গত কৃষক জনতা তখন পথের সেতু ভাঙ্গিয়া ফেলিল, কারণ, এই পথেই শত্রুর জীপ, ট্রাক সহজে আসিয়া গ্রাম তছনচ করিয়াছে। এক সপ্তাহের মধ্যেই পূর্ব-পাকিস্তানী রাইফেল বাহিনী ও আনসার বাহিনী এই এলাকায় বীভৎস অত্যাচার শুরু করিল। শতাধিক চাষীকে গ্রেপ্তার ও নির্ধাতন করিয়া পঁচিশ জনকে জেলে পাঠান হইল। নালিতাবাড়ীর হলদীগ্রাম এই অঞ্চলের “হলদীঘাট” নামে পরিচিত হইল।

লেঙ্গুরাহাটে সশস্ত্র সংগ্রামের পর হইতেই সারা পাহাড় সীমান্তে একটা বর্বর অত্যাচারের প্রবল বহু্য বহিয়া চলে। আধুনিক অস্ত্র সজ্জিত পাজাবী ও পাঠানী কোঁজ সশস্ত্র পুলিশ ও আনসার মোট

এক হাজার সশস্ত্র বাহিনীর দ্বারা এই অঞ্চল ঘিরিয়া রাখা হয়। এই ফৌজের দল অবিরত গুলি করিয়া মানুষ হত্যা করিয়াছে, শত শত কৃষকের বাড়িঘর লুণ্ঠ করিয়া ধ্বংস করিয়াছে। ইহারা মেয়েদের উপর পাশবিক অত্যাচার করিতেও কুণ্ঠিত হয় নাই। ক্যাম্পগুলি হইয়াছে হিংস্র পশুর আস্তানা। সেখানে প্রতিদিন বহু হাঙ্গ, গারো ও মুসলমান চাষীকে ধরিয়া নিয়া বিদ্রোহীদের খোঁজ দেওয়ার জন্য অমানুষিক অত্যাচার করা হইয়াছে।

স্বীকারোক্তি আদায় করার জন্য চাষীদের নখের নীচে সূচ ফুটাইয়া দেওয়া হইয়াছে। টঙ্ক চাষীদের ধান-চাঁউল, গরু, মহিষ প্রভৃতি লুণ্ঠরাজ্য করিয়া লওয়া, ঘর-দুয়ার ভাঙিয়া ফেলা, কোথাও আগুনে পোড়াইয়া ফেলা হইয়াছে। পিটুনি ট্যাক্স বা পাইকারী জরিমানা আদায়ের অত্যাচার সীমা ছাড়াইয়া গিয়াছে। এক-একটি ইউনিয়নে ৫১৭ হাজার টাকা ট্যাক্স আদায়ের জন্য ৫০৬০ হাজার টাকার সম্পত্তি ত্রোক করা হইয়াছে। হালুয়াঘাট থানার একমাত্র ভূবনকুড়া ইউনিয়ন হইতেই ৫১৭ লক্ষ টাকার স্থাবর অস্থাবর সম্পত্তি আটক করা হইয়াছে।

মার্চ মাসের এক ভোরে লক্ষ্মীকুড়া তে-রাস্তার মোড়ে তিনখানা ট্রাক ও জীপ গাড়ী হইতে সিপাহীরা দ্রুত নামিয়া পড়িল। পিছনে সুরক্ষিত জীপ হইতে নামিলেন পুলিশ সাহেব নিজে। গ্রামের মধ্যে ঢুকিয়াই স্থানীয় চৌকিদার দফাদারের সাহায্যে সিপাহীরা চল্লি সরকারের বাড়ি চতুর্দিক হইতে ঘিরিয়া ফেলিল। পুলিশ সাহেব গর্জন করিয়া জিজ্ঞাসা করিলেন,—“চল্লি কোথায়?” কেহ কোন উত্তর না করিতেই সিপাহীরা বাড়ির ছনের ঘর, মাটির দেওয়াল, হাতীর সাহায্যে ভাঙিয়া চুরমার করিয়া দিল। ঘরের বাসন-কোসন, শিশি-বোতল, বিছনা-বালিশ সব ভাঙিয়া ছিঁড়িয়া চুরমার করিয়া উঠানে ছড়াইয়া ফেলিল। গ্রামের মেয়েদের চুলের মুঠি ধরিয়া খানের ক্ষেতের মধ্য দিয়া হেঁচড়াইয়া নিয়া চলিল। কোলের শিশুরা লাঞ্ছিতা মায়ের করণ অবস্থা দেখিয়া কাঁদিয়া মায়ের নিকট

যাইতে চেষ্টা করিতেই সিপাহীরা বুটের লাখি মারিয়া কচি শিশুদের দূরে ছুঁড়িয়া ফেলিল। তবুও কৃষক মেয়েরা “চন্দ্র কোথায়” বলিল না।

দল-মত, স্ত্রী-পুরুষ নির্বিশেষে সমস্ত কৃষকদের উপর এইভাবে অত্যাচার করার ফলে সংগঠিত বিদ্রোহী চাষীগণ তখন সাধারণ গ্রামবাসীদের নিকট হইতে খানিকটা দূরে থাকিয়া প্রতিরোধ সংগ্রাম পরিচালনা করার কৌশল গ্রহণ করিল। এই অঞ্চলের দুর্ভেদ্য পাহাড়ের ফাঁকে ফাঁকে সশস্ত্র প্রতিরোধের পক্ষে সুবিধজনক স্থানে পরিখা খনন করিয়া ও শালের খুঁটির বেঠানী রচনা করিয়া অম্বুলোকা, দামুক, চেড়াখালি, মেলেং, পানিহাটা, ছিয়াপানী, রাংটিয়া, চান্দুভুই, হালচাটি, পোড়াকাশিয়া প্রভৃতি নামক স্থানে ১২টি গেরিলা ক্যাম্প স্থাপন করিল। এই সঙ্গে আগ্নেয়াস্ত্র নির্মাণের জগ্নু সুরক্ষিত স্থানে তিনটি কারখানা স্থাপিত হইল। এই কারখানায় গাদা বন্দুক, দেশী পিস্তল, ৬'×৩" মাপের বড় বড় গাদা কামান এবং বিভিন্ন ধরনের হাত বোমা তৈরী করা হইত। এই সব ক্যাম্পে প্রাথমিক চিকিৎসার সাজ-সরঞ্জাম, ঔষধ-পত্র এবং অভিজ্ঞ ডাক্তারেরও ব্যবস্থা করা হইল। সারা বৎসরের প্রয়োজনীর খাওয়া সংগ্রহ করিয়া রাখা হইল। এক কথায় এই ক্যাম্পগুলিকে স্বয়ংসম্পূর্ণ ও সর্বতোভাবে সংগ্রামের জগ্নু প্রস্তুত করা হইল এবং সংগ্রামের পদ্ধতিও খাঁটি গেরিলা কৌশল ও নীতি অনুযায়ী চলিল।

পাকিস্তানী সৈন্যদের আসামের গারো পাহাড় জেলায়

অবৈধ প্রবেশ : পলাতক বলিয়া কথিত হাজং

কম্যুনিস্টদের সন্ধান।

( নিজস্ব সংবাদদাতা প্রেরিত )

গৌহাটী—২২শে মার্চ,—জানা গিয়াছে যে, বিগত কিছুকাল যাবৎ সশস্ত্র পাকিস্তানী সৈন্যগণ পলাতক কম্যুনিস্টদের সন্ধানে পূর্ববঙ্গ

সীমান্তস্থিত আসামের গারো পাহাড় জেলার গ্রাম সমূহে অবৈধভাবে প্রবেশ করিতেছে। প্রকাশ, বর্তমান মাসের প্রথম ভাগে ১২৫ জন পাকিস্তানী সৈন্য পূর্ববঙ্গ হইতে পলাতক বলিয়া কথিত হাজং কম্যুনিষ্টদের খোঁজে নলুয়াগিরি ও দশনগিরি গ্রামে প্রবেশ করে। তাহাদের নির্বিচারে গুলি বর্ষণের ফলে দুই জন হাজং গুরুতর আহত হয়।

অপর একটি ক্ষেত্রে ৭ জন পাকিস্তানী সৈন্য বাঘমারার ১০ মাইল পূর্ব দিকস্থ দামুক নামক গ্রামে যায়— সেখানে তাহারা গগল সাংমা নামক জনৈক গারো গ্রামবাসীকে অক্রমণ করে। পলাতক কম্যুনিষ্টদের বাসস্থান সম্পর্কে জিজ্ঞাসিত হইয়া সে কোন উত্তর দিতে পারেনা। ইহাতে তাহাকে প্রহার করা হয়, সে পলাইয়া জনৈক প্রতিবেশীর ঘরে ঢুকিয়া পড়ে। তিনজন পাকিস্তানী সৈন্য তাহাকে আক্রমণ করিয়া ঐ স্থানে পায়। ইহার পর তাহাদের মধ্যে ধস্তাধস্তি আরম্ভ হয়; চতুর্থ পাকিস্তানী সৈন্যটি ২ টি গুলি বর্ষণ করে; ইহাতে তাহাদের জনৈক সহকর্মী আহত হয়। একটি গুলি গগলের পাঁজরায় বিদ্ধ হয়। আহত অবস্থায় সে জঙ্গলে পলাইয়া যাইবার চেষ্টা করে, কিন্তু পূর্বোক্ত গৃহ হইতে একশত গজ দূরে গেলেই তাহার মৃত্যু হয়। পাকিস্তানী সৈন্যরা আহত ও মৃত ব্যক্তিকে লইয়া চলিয়া যায়।

( ২২শে মার্চ— ১৯৪৯ আনন্দবাজার পত্রিকা )।

বিপ্লবী চাষীদের সুরক্ষিত এই সামরিক ক্যাম্প-জীবন লক্ষ্য করিয়া ছোট ছোট গ্রামের সাধারণ কৃষকগণও নিজেদের নিরাপত্তার খাতিরে একত্রে বাস করিবার জগু তিন-চারিটি জন-ক্যাম্প গঠন করিল। এই সব জায়গায় দিনের বেলায় কৃষকরা নিজ নিজ গ্রামে ক্ষেতে চাষের কাজ করিত। সিপাহীদের আগমন ও আক্রমণ আশঙ্কা করিলেই কাঁশি, ঘণ্টা, শঙ্খ বা সিঙ্গা বাজাইয়া বিপদের সঙ্কেত জানাইত। রাত্রি বেলায় আবার আগুন জ্বলাইয়া বা আকাশ প্রদীপ তুলিয়া গোপন সঙ্কেত জানাইত। এই সঙ্কেত-ধ্বনি বা ইঙ্গিত পাইলেই গ্রামে গ্রামে চাষীরা হুঁশিয়ার হইয়া যাইত। এমনকি গ্রামের

মাঠে মাঠে রাখাল ছেলেরাও যে কোন আক্রমণ আশঙ্কা করিলে, গাছে উঠিয়া কাপড় উড়াইয়া বা বাঁশী বাজাইয়া শত্রুর গতিবিধি সম্পর্কে বিপ্লবীদের সতর্ক করিয়া দিত।

সারা পাহাড় সীমান্তে সংগ্রামের এই কৌশল পরিবর্তনে সাধারণ গ্রামবাসীরা কিছুটা অসহায় বোধ করিলেও বিপ্লবী নায়ক ও জঙ্গীদের শত্রুর হাত হইতে রক্ষা করার দায়িত্ব হইতে অনেকটা মুক্ত রহিল। গ্রামগুলিও সিপাহী ও বিদ্রোহীদের প্রত্যক্ষ হাত হইতে অনেকটা নিরাপদ রহিল। ১৯৪৯ সনের মে হইতে সেপ্টেম্বর মাস পর্যন্ত গেরিলাদের কাজ হইল ভীষণ অত্যাচারী পুলিশ ক্যাম্প ও দালালদের ঘাঁটিগুলি বাছিয়া বাছিয়া অকস্মাৎ আক্রমণ করিয়া পশুদন্ত করা। প্রথমেই তাহারা সানখোলা, খাড়নে ও হাতিপাগারের ক্যাম্প তিনটি বোমা, রাইফেল, স্টেনগান ও প্রচুর গাদা বন্দুকের সাহায্যে রাত্রির অন্ধকারে আক্রমণ করিয়া হঠাইয়া দিল। সিপাহীরা ক্যাম্পের চতুর্দিকে পেট্রোমাক্স লাইটের ব্যবস্থা করিল এবং সেটি বন্ধ স্থাপন করিয়া পাহারার ব্যবস্থা করিল।

আমিরখাঁকুড়া হইতে ধান লইয়া যাওয়ার সময় দুই জন অত্যাচারী আনসার নিহত হইল এবং তাহাদের লাস বস্তা বন্দী করিয়া সেই গাড়িতেই ফেরৎ পাঠানো হইল। খাড়নে, ঝলঝলিয়া, জামগড়া, সন্ধ্যাকুড়া, কাংসা প্রভৃতি পঁচিশটি মহাজনের খামারের ধান দখল করিয়া তুংসু গারো ও মুসলমানদের মধ্যে বিতরণ করা হইল। বাগপাড়া খামারটি সম্পূর্ণভাবে আগুনে পোড়াইয়া দিল। মে মাসে হাল চাষ করার সময় ঘিলাগড়ার মাঠে সংগ্রাম করিয়া ভীম, বদক ও রহিম সিপাহীদের হাতে মৃত্যু বরণ করিল। দুই জন সিপাহীও আহত হইল। কালিকাপুর, মাইজপাড়া, ঘিলাবই, রামচন্দ্রকুড়া, মায়ামাসি, বিক্রিকুড়া, ধানশাইল প্রভৃতি গ্রামের পঁয়ত্রিশ জন দালালকে প্রাণদণ্ডে দণ্ডিত করা হইল এবং তাহাদের অস্থাবর সম্পত্তি জনসাধারণের মধ্যে বিলি করিয়া দেওয়া হইল ও বন্দুকগুলি গেরিলারা দখল করিল। এই কয়মাস প্রত্যহ এই বিস্তৃত



এলাকার কোথায়ও না কোথায়ও সশস্ত্র সিপাহীদের সঙ্গে সাধারণ কৃষক অথবা জঙ্গী গেরিলাদের সংঘর্ষ চলিতে লাগিল। এমনকি হাটের মধ্যে সিপাহী আনসারদের জোরজুলুমের বিরুদ্ধে জনসাধারণ স্বতঃ-স্ফূর্তভাবে প্রতিরোধ চালাইতে লাগিল। কুমারগাতি কৃষক সমিতির সম্মুখের মাঠে ভূবনকুড়া গ্রামে, গোড়াগাওয়ে পরপর কয়েকটি সশস্ত্র সংঘর্ষ হইল এবং উভয় পক্ষেই বহু লোক আহত হইল, অনেক চাষী গ্রেপ্তার হইয়া জেলে গেল। সারা অঞ্চলের সর্বত্র যেন তখন বারুদ ছড়াইয়া রহিয়াছে। প্রতিদিন প্রতি মুহূর্তে বিক্ষিপ্তভাবে জনতার বিক্ষোভ বিদ্রোহে ফাটিয়া পড়িতেছে। ভূবনকুড়া ইউনিয়নের পাইকারী জরিমানার ধান লইয়া যাওয়ার সময় গেরিলা নায়ক স্মদর্শন মাত্র সাত জন সাথী লইয়া কড়াইতলা গ্রামের একটি ঝোপ হইতে সশস্ত্র সিপাহীদের উপর তিন-চারটি হাত বোমা নিক্ষেপ করিয়া পাঁচ-সাত জনকে আহত করিল। আনসার ও গাড়োয়ানরা দৌড়াইয়া পালাইয়া বাঁচিল। কুড়ি জন সশস্ত্র সিপাহী তখন ঝোপটি লক্ষ্য করিয়া অজস্র গুলি বর্ষণ করিল। ফলে নায়ক স্মদর্শন ও হরি সিং ডালু ঐ ঝোপের মধ্যেই মৃত্যুবরণ করিল। দুইটি বীর কৃষক সন্তান জান দিল—তবু ধান লইয়া যাইতে দিল না।

সেরপুরের জরৈনক জমিদার এই সময় পাইক বরন্দাজ সহ খাজনা আদায় করিতে গেলে বান্দরকাঁটা অস্থায়ী কাছরী হইতে বিদ্রোহী প্রজারা কৌশলে তাহাকে বন্দী করিয়া বিচারের জন্ত গেরিলা ক্যাম্পে পাঠাইয়া দেয়। জমিদারবাবু গণ-আদালতের বিচারকদের নিকট প্রতিজ্ঞা করিলেন যে, তিনি এবং তার বংশের কেহ আর কোনও দিন এই জমিদারীর উপরসহ ভোগ করিতে আসিবেন না। গেরিলা ক্যাম্পের বিচক্ষণ বিচারক বন্দী জমিদারবাবুকে মুক্ত করিয়া দেন এবং নিরাপদে সংগ্রামী এলাকার বাহিরে পৌঁছাইয়া দেন। যে সব জমিদার মহাজন এই অঞ্চলের সংগ্রামী কৃষকদের দাবি মানিয়া লইয়াছে তাহারা সকলেই এইভাবে বিদ্রোহী কৃষকদের নিকট হইতে রেহাই পাইয়াছে।

ময়মনসিংহ পাহাড়-সীমান্ত অঞ্চলের সামন্ততন্ত্র-বিরোধী এই

সংগঠন ও সংগ্রাম প্রতিবেশী গ্রীহট্ট জেলার সুনামগঞ্জ মহকুমা পর্যন্ত বিস্তৃত ছিল। বিশরপাশা থানা ও মোহনপুর, বড়ছরা, বংশীকুণ্ডা, লাউড়, রাধানগর প্রভৃতি গ্রামেও 'জ্ঞান দিব তবু ধান দিব না' আওয়াজ তুলিয়া কৃষকগণ মরণবিজয়ী সংগ্রাম করিতেছিল। এই এলাকার নেতা সুনামগঞ্জের রবি দামের পরিচালনায় একদল জঙ্গী কৃষক জমিদার, জোতদার, মহাজনদের ধান ও সরকারের লেভী ধান না দিয়া তাহা গরীব জনসাধারণের মধ্যে বিতরণ করিতেন। জুলাই মাসের একরাতে মোহনপুর গ্রামে মজুত ধান বিলি করিতে গেলে গোপন সূত্রে সংবাদ পাইয়া কুড়ি জন সশস্ত্র পুলিশ ও ৩০।৩৫ জন আনসার গ্রামটির চতুর্দিক হইতে অবরোধ করে এবং মেগাজিন ভর্তি রাইফেলের বেয়নেট উঠাইয়া অকস্মাৎ জঙ্গীদের আক্রমণ করে। ছরসু সাহসী ও সুরঠামদেহী রবি দাম মুহূর্তে বজ্রমুষ্টিতে জনৈক সিপাহীর রাইফেল চাপিয়া ধরিয়া তাহাকে মাটিতে ফেলিয়া তাহার বুক চাপিয়া বসে। রাইফেল হইতে গুলি ছুটিলেও তাহা ব্যর্থ হইয়া যায়। বীর যোদ্ধা রবি নিজের পিঠ হইতে বন্দুক খোলার সুযোগ না পাইয়া কোমর হইতে ছোরা বাহির করিয়া শত্রুর কণ্ঠনালাতে আমূল বসাইয়া দেয়। কিন্তু তৎক্ষণাৎ আর একটি সিপাহী রবি দামের পিঠে স্টেনগান বসাইয়া পর পর আট দশবার গুলি ছুঁড়িল। সশস্ত্র সংগ্রামের দক্ষ নায়ক রবি দামের দেহ ক্ষত বিক্ষত হইয়া মাটিতে লুটাইয়া পড়িল। শত্রুর সাথে এই মুখোমুখি সংগ্রামে আরও একজন কৃষক গুলিতে মৃত্যুবরণ করিল। চার জন সিপাহীও বর্ষার আঘাতে জখম হইল। মোহনপুরের চাষীর আঙ্গিনা সেই দিন বিপ্লবী বীর ও শাসকশ্রেণীর ভাড়াটিয়া সিপাহীর রক্তে প্লাবিত হইল। দুই দিন পর শহীদ রবি দামের অসাড় দেহ নৌকা যোগে সুনামগঞ্জে পৌঁছিলে শহরের জনসাধারণ ভাঙিয়া পড়িল এবং বীরের প্রতি যোগ্য শ্রদ্ধা নিবেদন করিল। বাংলার কৃষি বিজ্রোহের ইতিহাসে মধ্যবিন্ত যুবকের আত্মবলিদানের ইহা আর একটি জ্বলন্ত দৃষ্টান্ত।

এই ভাবে দিনের পর দিন মাসের পর মাস সশস্ত্র সংগ্রাম

চলিতে লাগিল। প্রত্যহ কোথাও না কোথাও রক্তক্ষয়ী ঘটনা ঘটিতে লাগিল। তবুও মরণবিজয়ী কৃষকগণ কিছুতেই পিছু হটিল না, পরাজয় স্বীকার করিল না। বিরামহীন এই সংগ্রাম ক্রমশঃ দীর্ঘস্থায়ী হইয়া চলিল। অবস্থার গুরুত্ব উপলব্ধি করিয়া লীগ সরকার কেন্দ্রের সাহায্য লইয়া আরও অধিক পরিমাণে পাজাবী, পাঠানী ও বালুচ ফৌজ ও পূর্ব পাক রাইফেল বাহিনীর সিপাহী সমাবেশ করিল এবং সুদীর্ঘ নব্বই মাইল (প্রায় ৭৫০ বর্গ মাইল) এলাকা জুড়িয়া প্রচণ্ড দমন নীতি চালাইয়া সন্ত্রাসের রাজত্ব কায়েম করিল। সিপাহীরাও বার বার বিদ্রোহীদের হাতে মার খাইয়া এক একজন আহত পশুর মতো হিংস্র হইয়া উঠিল। কিন্তু কিছুতেই গেরিলাদের গোপন ঘাঁটিগুলি সন্ধান করিয়া আক্রমণ করিতে না পারায় তাহারা গ্রামে গ্রামে নিরস্ত্র কৃষক জনসাধারণের উপর আক্রমণ চালাইয়া পাইকারী হারে নরহত্যা ও লুণ্ঠরাজ্য শুরু করিল।

কলমাকান্দা থানার জাগীরপাড়া গ্রামটি এক গভীর রাত্রে পাঁচশত সিপাহী পুলিশ আনসার হঠাৎ ঘিরিয়া ফেলিয়া আক্রমণ করিল এবং স্ত্রী-পুরুষ, শিশু-বৃদ্ধ নির্বিশেষে চল্লিশ জন ঘুমন্ত চাষীকে নির্বিচারে হত্যা করিল। কৃষকরা প্রতিরোধ বা পলায়নের সুযোগ পর্যন্ত পাইল না। এমন জঘন্য বীভৎস হত্যাকাণ্ড যে কোন দেশের কৃষি-বিদ্রোহের ইতিহাসেই বিরল।

এই ভাবে সর্বত্র হত্যাকাণ্ড ও লুণ্ঠরাজ্য দ্বারা কৃষকদের মনোবল ভাঙিয়া দিবার চেষ্টা করা হইল। এমনকি কৃষকদের এই অঞ্চল হইতে সমূলে ধ্বংস করিবার উদ্দেশ্য লইয়াই তীব্র দমননীতি চালাইল। ইহার বিরুদ্ধে শক্তিশালী প্রতিরোধ গড়িয়াছিল সুসং পশ্চিম এলাকার কৃষকরা ও তাহাদের গেরিলাবাহিনী। পাহাড় ঝরনার সুরক্ষিত বঁকে ছিল চেরাখালীর জন-ক্যাম্প, আর তাহারই অদূরে পাহাড়ের অভ্যন্তরে ছিল গেরিলা ঘাঁটি। এই সুন্দর সুরক্ষিত ভৌগোলিক পরিবেশে পর পর অনেকগুলি খণ্ড সংগ্রামে সশস্ত্র সিপাহীরা গেরিলাদের হাতে ভীষণ-

ভাবে মার খাইয়া পিছু হটিতে বাধ্য হইয়াছে। তাই চেরাখালী হইতে সাধারণ কৃষকদের না সরানো পর্যন্ত বিদ্রোহীদের কাবু করা যাইবে না, শত্রু পক্ষ ইহা বেশ বুঝিয়াছিল। তাই সিপাহীরা প্রায় প্রত্যহ চেরাখালীর জন-ক্যাম্প আক্রমণ করার জন্ত মরিয়া হইয়া চেষ্টা করিতে লাগিল। ফলে সাধারণ গ্রামবাসীদের দৈনদিন জীবন, চাষ-আবাদ, প্রায় অচল হইয়া পড়িল। এই অবস্থায় ঘটিল গেরিলাদের ধৈর্যচ্যুতি।

একদিন সিপাহীরা নলগড়া, কমলপুর, সোহাগীপুর লুণ্ঠরাজ করিয়া মাঠে দাঁড়াইয়া তুরবীণের সাহায্যে চেরাখালীর সব কিছু পর্যবেক্ষণ করিতেছিল। ইহা লক্ষ্য করিয়া জঙ্গীরা গ্রামের প্রান্তে খোলা জায়গায় আসিয়া দাঁড়াইতেই সিপাহীরা দূর হইতেই তাহাদের লক্ষ্য করিয়া গুলি করিল। জঙ্গীরাও উত্তেজিত হইয়া পড়িল। গুলির আওয়াজ শুনিয়া কুড়ি জন গেরিলা তাহাদের সুরক্ষিত ঘাটি হইতে ছুটিয়া বাহির হইল এবং দুই দলে ভাগ হইয়া জঙ্গী কৃষকদের সাহায্যের জন্ত অগ্রসর হইল। সিপাহীরা কিছুটা ইটিয়া রাণীপুরের খোলা মাঠে চলিয়া গেল। জঙ্গীরাও ধীর স্থির ভাবে চিন্তা না করিয়া হঠাৎ এক ভুল আদেশে সেই খোলা মাঠে নামিয়া পড়িল। গেরিলা দলটিও জঙ্গীদের রক্ষার জন্ত নামিয়া গেল। অকস্মাৎ সিপাহীরা তিন চার ঝাঁক গুলি চালাইতেই জঙ্গী ও গেরিলা মাটিতে আড়াল হইল। সিপাহীরা গুলি না করিয়া আগইয়া আসিতেছে লক্ষ্য করিয়া জঙ্গীরা উঠিয়া দাঁড়াইতেই সিপাহীরা আর এক ঝাঁক গুলি করিল, জঙ্গীরা অড়াল লইল। তারপর বিদ্রোহী কৃষক ও সিপাহীরা রাণীপুরের উন্মুক্ত মাঠে পরস্পরের মুখোমুখি আসিয়া সম্মুখ সমরে দাঁড়াইল। তীর, বর্শা, দা লইয়া জঙ্গীরা মাটি হইতে একটু উঠিতেই সিপাহীরা গুলি নিক্ষেপ করে। আবার সিপাহীরা উঠিতেই গেরিলারা হাত বোমা ও বন্দুক ছুঁড়িতে থাকে। এই ভাবে প্রায় ১ ঘণ্টা কাল গুলি বিনিময়ের পর গেরিলাদের টোটা ও হাতবোমার সংখ্যা কমিয়া আসিল। দশ জন গেরিলা (প্রথম দলটি) ও পঁচিশ জন দুর্ধর্ষ জঙ্গী সিপাহীদের রাইফেল ও স্টেনগানের কয়েক শত গুলি কোঁশলে ব্যর্থ করিল। উভয়পক্ষে পঁচ সাত জন করিয়া আহত হইল। দূর

পাল্লার সংগ্রাম ক্রমশ সংকীর্ণ হইয়া গেল লক্ষ্য করিয়া গেরিলা নায়ক ছবরাজ ও ক্ষীরোদ হঠাৎ সিপাহীদের মধ্যে ঝাঁপাইয়া পড়িয়া ধারালো অস্ত্রে পর পর চার পাঁচ জন সিপাহীকে গুরুতর ভাবে আহত করিল। রাইফেল বা স্টেনগানের গুলিতে ইহাদের দুই জনকে বিদ্ধ করিবার সুযোগ না পাইয়া সুবেদার নিজে রিভলবারের গুলি ছুঁড়িল ও এক সাথে কয়েকটি বেয়নেটের আঘাতে ছবরাজ ও ক্ষীরোদকে নিহত করিল। ছবরাজ ও ক্ষীরোদ অপূর্ব বীরত্বের সহিত লড়াই করিবার সময় অনন্ত ও চন্দ্র উভয়ে একজন সিপাহীকে আক্রমণ করিয়া নিহত করিল। অনন্ত মৃত সিপাহীর রাইফেলটি লইয়া ছুটিতেই পিছন হইতে গুলিবিদ্ধ হইয়া পড়িয়া গেল। রাজেন্দ্র ও অম্ম আক্রমণ করিল সুবেদারকে। কিন্তু চোখের নিমেষে গুলির আঘাতে রাজেন্দ্র মাটিতে লুটাইয়া পড়িল। নীরেন্দ্র, বীরঙ্গ, রমেশ, অতুল বীরত্বের সঙ্গে লড়াই করিল, পরে তাহারাও গুলিতে ক্ষত বিক্ষত হইয়া শহীদের মৃত্যু বরণ করিল। রাণীপুরের শস্যশ্যামল কৃষিভূমি ১২টি বীর কৃষক সন্তানকে কোলে তুলিয়া লইল। সিপাহীরা নিহত হইল ৩ জন। উভয় পক্ষে আহত হইল দশ পনের জন। শহীদ চন্দ্র অম্মর ৬৫ বৎসরের বয়স্কা বিধবা মা পাকুড়ী নিজ হাতে দুই ছেলেকে একে একে সমাধিস্থ করিয়া ফুল ছড়াইয়া দিলেন। আর কিনাই তাহার স্বামী নরেন্দ্রের সমাধি লাল শালুতে ঢাকিয়া দিয়া চোখের জলে ধোয়া দুইটি গোলাপ সেখানে রাখিল। রাণীপুরের সংগ্রাম এই অঞ্চলের কৃষি-বিদ্রোহের ইতিহাসে সবচেয়ে বীরত্বপূর্ণ বলিয়া আজও কৃষকরা শ্রদ্ধাসহ স্মরণ করেন।

গুলিসের গুলিতে ১২ জন নিহত ও বহু আহত

ময়মনসিংহের পল্লীতে ঘটনা।

ময়মনসিংহ (পূর্ববঙ্গ) ২৭শে জুলাই,—এখানে এই মর্মে খবর আসিয়াছে যে গত ১৮ই জুলাই তারিখ এই জিলার জর্গাপুর থানার রাণীপুর গ্রামে সশস্ত্র এক হাজং (সীমান্ত উপজাতি) জনতার উপর

পুলিশের গুলি বর্ষণের ফলে অনুমান ১২ জন লোক মারা গিয়াছে এবং আরও অনেক আহত হইয়াছে। রাণীপুর গ্রামটি আসাম পাকিস্তান সীমান্তের নিকট অবস্থিত।

প্রকাশ যে, স্থানীয় কম্যুনিষ্টগণ পরিচালিত হাজংদের এক জনতা রাণীপুরে মোতায়েন পুলিশ দলকে অক্রমণ করে। আক্রমণকারীদের সংখ্যাধিক্যে পুলিশদল পশু'দস্ত হইয়া উহাদিগকে বিভাড়ণের জন্ত গুলি চালায়। অনুমান ১২ জন লোক নিহত হইয়াছে বলিয়া মনে করা যাইতেছে, তন্মধ্যে ৪টি মৃতদেহ পুলিশ উদ্ধার করিয়াছে। অবশিষ্ট মৃতদেহগুলি ও আহতদিগকে হাজংরা বহন করিয়া লইয়া গিয়াছে। জেলা ম্যাজিস্ট্রেট ও উচ্চপদস্ত পুলিশ কর্মচারীরা ঘটনাস্থল পরিদর্শন করিয়াছেন। অবস্থা বর্তমানে স্বাভাবিক। পি. টি. আই. আর।

শুক্রবার ১৩ই শ্রাবন ১৩৫৬, জুলাই—২৯, ১৯৪৯

( আনন্দবাজার পত্রিকা )

রাণীপুরের বীরত্বপূর্ণ সংগ্রামের পরেই বিরাটসংখ্যক পূর্বপাক রাই-ফেল বাহিনী দলবলসহ চেরাখালী জনক্যাম্প ও আশে পাশের গ্রামগুলি দখল করিল। সিপাহী, পুলিশ ও আনসার মিলিয়া গ্রামবাসীদের উপর অমানুষিক বর্বরোচিত অত্যাচার চালাইল। উন্নত সিপাহীরা কৃষকদের আবালবৃদ্ধবনিতাকে ত্রেপ্তার করিল এবং নির্বিচারে কৃষক রমণীদের উপর পাশবিক অত্যাচার চালাইল। গ্রামবাসীদের সম্পদ বলিতে যাহা কিছু ছিল সব কিছু তাহারা লুণ্ঠন করিল। এই অঞ্চলের মোট পঞ্চাশ জন চাষীকে দীর্ঘদিন জেলে আবদ্ধ করিয়া রাখা হইল। তাদের মধ্যে সাত জন ময়মনসিংহ জেলখানায় মৃত্যু বরণ করিল।

১৯৪৯ সন, বহু বীর কৃষক সম্ভ্রানের আত্মবলিদান ও দীর্ঘদিন রক্তক্ষয়ী সংগ্রামের মধ্যদিয়া অতিবাহিত হইল। ১৯৫০ সনের প্রথম দিকে এই অঞ্চলে সংগ্রাম ও সংগঠনের কয়েকটি গুরুত্বপূর্ণ দলিল ও সংবাদ সহ গোপন সংবাদবাহিকা অশ্বমণি, ভদ্রা ও রহেলা সেমেশ্বরী নদী

পার হওয়ার সময় গ্রেপ্তার হইল। পুলিশ ইহাদের ক্যাম্পে আবদ্ধ করিয়া বিদ্রোহীদের সমস্ত গোপন সংবাদ জানার জন্ত অকথ্য নির্যাতন করিল এবং শেষ পর্যন্ত দীর্ঘ দিনের জন্ত ময়মনসিংহ ও রাজসাহী জেলে আটক রাখিল।

ঠিক একইভাবে কংশ নদীর পাড়ে গোপন সংবাদ আগ্নেয়াস্ত্রের রসদ বাহী রমণী কর এক গভীর রাত্রে টহলদারী সিপাহীদের হাতে হঠাৎ ধরা পড়িল। সিপাহীরা রমণীর দেহ তল্লাসী করিয়া অস্ত্রসব জিনিসের সঙ্গে নগদ পাঁচ হাজার টাকা পাওয়ায় তাহার গ্রেপ্তারের সংবাদ ক্যাম্পে ডায়েরী না করিয়া অসহায় রমণীকে মাঠের মধ্যেই গুলি করিয়া হত্যা করিল এবং মৃতদেহটি গোয়াতলার হাওড়ে ফেলিয়া রাখিল। এমন বিভৎস ও করুণ ঘটনার মধ্য দিয়া বিদ্রোহ আপন গতিতে অগ্রসর হইয়া চলিল।

১৯৫০ সনের ৩০শে জানুয়ারীতে আবার ফিরিয়া আসিল শহীদ দিবস। ইতিমধ্যে এই অঞ্চলে শহীদ হইয়াছেন অনেকে। তাই এইবার শহীদ দিবস প্রতিপালিত হইল সারা অঞ্চলের সমস্ত গেরিলা দল ও আগ্নেয়াস্ত্র সমাবেশ করিয়া চান্দুভূঁই গ্রামের পাহাড় ঘেরা বিরাত উন্মুক্ত মাঠে। প্রতিদলে দশ জন করিয়া মোট ত্রিশটি গেরিলা দল নিজেদের রাইফেল, স্টেনগান, কাতুঁজ বন্দুক, গাদা বন্দুক ও হাত বোমা লইয়া সভার চতুর্দিকে পাহারা দিল; আর ১৫ হাজার সাধারণ কৃষক নিজ নিজ দেশী অস্ত্র ও নানা ধরনের হাতিয়ার লইয়া সভায় যোগদান করিল। সিপাহীরা দূর হইতে অসংখ্য ঝাণ্ডা একত্রে উড়িতে দেখিয়া ছুটিয়া আসিতেই গেরিলারা দূর পাল্লার রাইফেল ও বন্দুকের গুলি ছুঁড়িল এবং এক সাথে কয়েকটি বোমার আওয়াজ করিল। সিপাহীরা অমনি থমকিয়া দাঁড়াইয়া গেল, আর অগ্রসর হইল না। দীর্ঘ দুই ঘণ্টাকাল সভা চলিল, শহীদের উদ্দেশে শ্রদ্ধা নিবেদন করিয়া করিয়া আবার প্রস্তাব গ্রহণ করা হইল, জমিদারী ও টঙ্ক প্রথার অবসান না হওয়া পর্যন্ত কৃষকদের সংগ্রাম চলিতেই থাকিবে। এই সভার শেষে প্রায় সাড়ে তিন শত আগ্নেয়াস্ত্র একসাথে পর পর তিনবার ফাটার করা

হইল এবং বোমা বিস্ফোরণ করা হইল। সমবেত বিদ্রোহী কৃষকেরা নূতন প্রেরণা লইয়া নিজেদের বহু দূর দূর ঘাঁটিতে ফিরিয়া গেল। ১৯৫০ সনের জমিদারী ও টঙ্ক প্রথা উচ্ছেদের প্রস্তাবও কৌশলে বিভিন্ন পোস্ট অফিস হইতে সরকারের নিকট পাঠানো হইল।

১৯৫০ সনের ফেব্রুয়ারী মাসে ফরেস্ট বিভাগের এক গোপন সূত্রে সংবাদ পাইয়া পূর্বপাকিস্তান রাইফেল বাহিনীর দুই শত সিপাহী নালিতাবাড়ীর পশ্চিম এলাকার রাংটিয়া পাহাড় অরণ্য পূর্ব-পশ্চিম ও দক্ষিণ দিক হইতে অবরোধ করিল এবং উক্ত পাহাড়ের শিখরে গেরিলাদের একটি ঘাঁটি আক্রমণ করিল। মাত্র দশ জন গেরিলা বহুক্ষণ পর্যন্ত নিরাট সশস্ত্র বাহিনীর সঙ্গে সংগ্রাম করে, পরে গেরিলা নায়ক কালিয়া গুলিতে ভয়ানকভাবে আহত হইয়া পশ্চাদপসরণ করে এবং কিশোর যোগেন্দ্র হাজং সংগ্রামে নিহত হয়। তখন পাক বাহিনী গেরিলাদের ঘাঁটি দখল করিয়া প্রচুর ঔষধ পত্র ও খাদ্য সামগ্রী হস্তগত করে।

এই মাসের হুসং-এর বগাউড়া পাহাড়ের উপর হইতে গেরিলারা পঁচ মাতটি বোমা নিক্ষেপ করিয়া সিপাহীদের একটি চলন্ত মোটর ট্রাক বিধ্বস্ত করে এবং আট দশ জন সিপাহী তাহাতে হতাহত হয়।

হুসং শহরের ঠিক উত্তরের ভবানীপুর পাহাড় হইতে অকস্মাৎ রাইফেল ও স্টেনগান চালাইয়া বিদ্রোহীরা টহলদারী একদল সিপাহীকে আক্রমণ করে। এই আক্রমণে দুই জন সিপাহী নিহত হয়। সারা জানুয়ারী ও ফেব্রুয়ারী মাস এই ভাবে চোরাগোস্তা আক্রমণ ও সংঘর্ষ চলিতে থাকে। তেভাগা টঙ্ক চাষীদের এই গণ অভ্যুত্থানে প্রাণ বলিদান করেন এক মধ্যবিত্ত যুবক নালিতাবাড়ির শচী রায়। এই অঞ্চলের গেরিলা বাহিনীর সে ছিল অগ্রতম অস্ত্রশিক্ষক। শচী নিজ হাতে দেশী গাদা বন্দুক তৈয়ারী করিত, বন্দুক ও রাইফেল মেরামত করিত। সর্বোপরি বিভিন্ন ধরনের হাতবোমা প্রস্তুত করায় সে ছিল একজন দক্ষ কারিগর। একদিন হাত-বোমা তৈয়ার করার সময় হঠাৎ বিস্ফোরণে সে শহীদের মৃত্যু বরণ করে। আর তাহার সাথী পূর্ণ হাজং বিকালাজ হইয়া আজও সেই বিপ্লব প্রচেষ্টার স্মৃতি বহন করিতেছে।



ঠিক এই সময় (১৯৫০ সনের ফেব্রুয়ারী মাসে) পাকিস্তান ও ভারতের বিভিন্ন স্থান আবার এক নারকীয় ভ্রাতৃহত্যার স্বংসযজ্ঞে নিক্ষিপ্ত হইল। কায়মী স্বার্থবাদীদের চক্রান্তে বাংলা, বিহার ও আসামে পুনরায় সাম্প্রদায়িক দাঙ্গা বাধিল। মার্চ ও এপ্রিল মাসে বিহার ও আসাম হইতে দলে দলে মোহাজেরগণ (মুসলমান উদ্বাস্তু) পূর্ববঙ্গে আসিয়া পুনর্বাসনের জন্ত লীগ সরকারের দারস্থ হইল। এই বারের সাম্প্রদায়িক দাঙ্গা লীগ সরকারের নিকট আসিল “শাপে-বর” হইয়া। সে এই সুযোগে এক ঢিলে দুই পাখি মারার হীন চক্রান্ত ফাঁদিল। পূর্ব-পাকিস্তান সরকার অবিলম্বে উক্ত মোহাজেরদের এই সংগ্রামী অঞ্চলের মানাগুলিতে আনিয়া শমাবেশ করিলেন। সঙ্গে সঙ্গে সুপরি-কল্পিতভাবে পুলিশ সিপাহীদের দিয়া আদিবাসীদের গ্রামগুলিতে একটা ভীষণ অত্যাচার ও নির্যাতনের বণ্ণা বহাইয়া দিল। মুসলমানদের পুনর্বাসনের জন্ত জোর জুলুম করিয়া আদিবাসী চাষীদের জমি, বাড়ি ও গ্রাম হইতে উচ্ছেদ করিতে লাগিল। প্রথমে স্রুং, দুর্গাপুর ও কলমাকান্দা থানার গ্রামে গ্রামে তাহারা বিহারী মোহাজেরদের বসাইল। পরে মার্চ, এপ্রিল ও মে মাসে আসামের মোহাজেরদের আনিয়া হালুয়াঘাট নালিতাবাড়ি ও শ্রীবর্দি থানার গ্রামে গ্রামে সংগ্রামী কৃষকদের জমি বাড়িতে জোর করিয়া বসাইয়া দিলেন। আদিবাসীদের উচ্ছেদ করার জন্ত অসংখ্য আনসার পুলিশ, সিপাহী ও ৭।৮ টি হাতী ব্যবহার করা হইল। এই সীমান্তের কাংসা, বিনাইগাতী, বনকুড়া, কাকড়কান্দী, মানপাড়া, জুগলী, ভুবনকুড়া, গাজির ভিটা, ঘোষগাও, মাইজপাড়া, ভেদীকুড়া, জিগাতলা, লেঙ্গুরা, চৈতগুনগর, খাড়নৈ, পাঁচগাঁও প্রভৃতি ইউনিয়নের প্রায় ১৫০ টি গ্রাম হইতে আদিবাসী কৃষকদের সম্পূর্ণরূপে উচ্ছেদ করা হইল। ইহা ছাড়া আংশিকভাবে উচ্ছেদ করা হইল আরো অনেক গ্রাম। এই সময় গ্রামের সমস্ত যুবক ও মোড়লদের সম্পূর্ণ অগ্নায় ভাবে গ্রেপ্তার করিয়া ময়মনসিংহ জেলে বন্দী করা হইল; অসহায় শিশু, নারী ও পুরুষদের জোর করিয়া টানিয়া ঘর হইতে বাহির করিয়া পথের

“ফকির” করা হইল। ময়মনসিংহ জেল হাজতে অকথ্য নির্যাতনের ফলে ২৫ জন আদিবাসী কৃষক সন্তান প্রাণত্যাগ করেন এবং প্রায় শতাধিক বন্দি নানা ধরনের জটিল ও হুরারোগ্য ব্যাধিতে আক্রান্ত হইলেন।

সাম্প্রদায়িক দাঙ্গার স্রোতে এই ভাবে সংখ্যালঘু কৃষকদের সমূলে উচ্ছেদ করার বিরুদ্ধে সংগ্রামী কৃষকগণ তখন ব্যাপক প্রচার আন্দোলন শুরু করেন। তাহারা বহিরাগত মোহাজেরদের নিকট এই অঞ্চলের জমিদারী প্রথা তথা টঙ্ক প্রথা উচ্ছেদের আন্দোলনের সমস্ত ইতিবৃত্ত বিশদ ভাবে ব্যাখ্যা- বিশ্লেষণ করেন গোপনে ও প্রকাশ্যে সভা বৈঠক করেন এবং ইশতেহার ও পোস্টার দেন। মোহাজেরদের নিকট তাহারা আবেদন করেন, স্থানীয় কৃষকদের জমি বাড়ি দখল না করিয়া জমিদার মহাজনদের খাস পতিত ও খামার জমিতে বসার জ্ঞা। সুসং-এ বিহারী কৃষক উদ্বাস্তুগণ এই প্রচার আন্দোলনে তেমন সাড়া না দিলেও আসাম প্রত্যগত মোহাজেরগণ কিছুটা সাড়া দেয়। হালুয়াঘাট, নালিতাবাড়ী থানার কোন কোন জমিদারের জমি ও খামার জমি তাহারা দখল করিয়া বসিল। লীগ সরকার তখন উদ্বাস্তুদের এই মনোভাব টের পাইয়া তাহাদের উপরেও অত্যাচার উৎপীড়ন চালায়। কিছু সংখ্যক উদ্বাস্তু নেতাকে গ্রেপ্তার করা হয়, কাহাকেও বা অগত্যা দূরে সরাইয়া দেওয়া হয়। বাদবাকি উদ্বাস্তুদের নানাভাবে উত্তেজিত প্রলুব্ধ করিয়া এমনকি লাঠির ভয় দেখাইয়া আদিবাসী কৃষকদের জমি, বাড়ি, গ্রাম দখল ও অস্থাবর সম্পত্তি লুণ্ঠনে লাগানো হয়। হিংস্র পূর্ব-পাক রাইফেল বাহিনীর সিপাহীরা প্রায় দুই বৎসরকাল জোর-জুলুম-অত্যাচার এমনকি নির্বিচারে নর-নারী-শিশু হত্যা করিয়াও সংগ্রামী চাষীদের যে গ্রামগুলি দখল করিতে পারে নাই, এইবার এই সাম্প্রদায়িক দাঙ্গার স্রোতে অচেতন উদ্বাস্তু মুসলমান কৃষক জনতাকে পুরোভাগে ঠেলিয়া দিয়া সংগ্রামী আদিবাসী কৃষকদের উচ্ছেদ করার মতলব লীগ সরকার হাসিল করিল। সুদীর্ঘকাল স্থানীয় মুসলমান কৃষকদের দ্বারা যাহা করানো সম্ভব হয় নাই, এই দাঙ্গার

পটভূমিতে বহিরাগত ( বিহারী, অসমীয়া ) মুসলমান কৃষকদের সাহায্যে তাহাই করা হইল। অসংগঠিত চাষীদের সংগঠিত কৃষকদের বিরুদ্ধে শিখণ্ডী হিসাবে দাঁড় করাইয়া লীগ সরকার কার্যোদ্ধারে অগ্রসর হইল।

সুদীর্ঘ দিনের বহু আন্দোলনের ঐতিহ্যবাহী এই অঞ্চলের কৃষকদের সংগ্রামের সম্মুখে তখন এক কঠিন সমস্যা দেখা দিল। জমিদার-সামন্ততন্ত্রের রক্ষক সিপাহী পুলিশ দল অচেতন উদ্বাস্তু মুসলমানদের পিছন হইতে সশস্ত্র ভাবে দমননীতি চালাইয়া বিদ্রোহী চাষীদের কাবু করিতে লাগিল। এই সময় মে মাসে কড়ইতলা গ্রাম রক্ষা করিতে যাইয়া এক সংঘর্ষে উভয় পক্ষে শুধু কয়েকজন কৃষক সন্তানের প্রাণ গেল। শত্রুপক্ষ উদ্বাস্তু জনতার আড়ালে থাকিয়া সম্পূর্ণ অক্ষতই রহিয়া গেল। এই নূতন পরিস্থিতিতে বিপ্লবী কৃষক-নেতৃত্বের সম্মুখে সংগ্রামের নূতন কৌশল অবলম্বনের প্রয়োজন জরুরী হইয়া দেখা দিল। কারণ, পুরাতন পদ্ধতিতে সংগ্রাম চালানোর অর্থ কৃষকদের বিরুদ্ধে কৃষকের লড়াই।

সুসং এলাকার দায়ুক শিবিরে সংগ্রামী কৃষকদের ৫ দিন ব্যাপী এক সম্মেলনে সিদ্ধান্ত হইল যে বর্তমান সাম্প্রদায়িক দাঙ্গার ফলে উদ্ভূত পরিস্থিতিতে ছুর্গত মুসলমান উদ্বাস্তুদের বিরুদ্ধে কোন সংগ্রাম চালানো সম্ভবপর নয় এবং তাহাদের ডিঙাইয়া শত্রুর সশস্ত্র বাহিনীকেও আক্রমণ করা অসম্ভব। এই অবস্থায় বিদ্রোহী কৃষকদের সংগ্রামের ধারা ও কৌশল পরিবর্তন একান্ত অপরিহার্য। এই পটভূমিতে এই অঞ্চলের কৃষক নেতৃত্ব সশস্ত্র প্রতিরোধ সংগ্রাম বন্ধ করিলেন এবং নিয়মতান্ত্রিক পথে আন্দোলন পরিচালনার প্রস্তাব গ্রহণ করিলেন। তদনুযায়ী পূর্ব বাংলার সমস্ত কৃষক দরদী ও গণতান্ত্রিক নেতা ও দলের নিকট জমিদারী প্রথা, টক প্রথা অবসানের জন্য সক্রিয়ভাবে হস্তক্ষেপ করার আবেদন জানাইয়া সশস্ত্র সংগ্রাম প্রত্যাহার করিলেন।

এমনিভাবেই শেষ হইল এক গৌরবোজ্জ্বল সংগ্রামের যুগ। স্বাভূ-চক্রের আবর্তনে বৎসর ঘুরিয়া চলে। মেঘনা, পদ্মা, ব্রহ্মপুত্র ও গীর্ণা

বুড়ীগঙ্গার বৃকে প্রবাহিত হয় নিত্য নব স্রোতধারা। পূর্ব বাংলার জনগণের মনে আসে আবার নতুন করিয়া গণতান্ত্রিক আন্দোলনের চেতনা। সমস্ত শ্রেণীর জনতার মধ্যে দেখা দেয় গণ-আন্দোলনের তীব্র জোয়ার। এই পরিবর্তিত পটভূমিকায় সশস্ত্র কৃষকবিদ্রোহের প্রচণ্ড আঘাতেব ফলে ভাঙিয়া পড়ে লীগ-শাহীর স্বৈরতন্ত্রেব ভিত, উচ্ছেদ হয় ঘৃণ্য টক্ক আর জমিদারী প্রথা। সুদীর্ঘ কালব্যাপী বিভিন্ন ধারায় পবিচালিত কৃষক সংগ্রাম এতদিনে লাভ কবে আকাজক্ষিত সাফল্য। সার্থক হয় টিপু পাগল, ছবরাজ, রাসমণি, সুরেন্দ্র প্রমুখ বীর শহীদের আত্মবলিদান।

সোমেশ্বরী, ভোগাই, গণেশ্বরীর বৃকে আজও বহিয়া যায় অগণিত অশান্ত চেঁউ, আর তাহারই কলতান প্রতিধ্বনিত হয় বেলাভূমিতে ও দূরের পাহাড়ে শহীদদেব সমাধিক্ষেত্রে। মৃৎ বাতাসের অশরীরী কণ্ঠে শোনা যায় শহীদের জয়গান। এই অঞ্চলের দিগন্তজোড়া বিস্তীর্ণ ক্ষেতে ক্ষেতে দোলে সেই গানের সঙ্গে পাকা ধানের শীষগুলি। এই ধান রক্ষার জন্যই প্রাণ দিয়েছিল জানা-অজানা অসংখ্য কৃষক সন্তান। এই অঞ্চলের অমর জনতা আজও ভোলে নাই সেই রক্তরাঙা অসংখ্য সংগ্রামের অমর কাহিনী। কিন্তু সত্যাভিমানী ঐতিহাসিকের দৃষ্টিতে আজও সে কাহিনী ধ্বা পড়ে নাই, আজও তাহা স্থান পায় নাই জাতীয় মুক্তি-সংগ্রামের ইতিহাসের পাতায়। সেদিন কি আসিবে না যেদিন টিপুসুলতানের পাশে লেখা হইবে টিপুপাগলের নাম, ঝান্সীব রানী লক্ষ্মীবাইয়ের পাশে স্থান পাইবে কৃষক মেয়ে রাসমণি, রেবতী, শঙ্করমণি, শহীদ কানাইলাল-সুদিরামের সঙ্গে শ্রম্ভার আসন পাইবে মঙ্গলচাঁন, অগেন্দ্র, নয়ান আব রবি দাম? আমাদের জাতীয় আন্দোলনের সেই ইতিহাস লেখা হইবে কান্ধে।

### ৪ পরিচিতি

ময়মনসিংহ জেলার সূসং ও সেরপুর পরগণা আদিবাসীদের প্রধান বাসভূমি—এই আদিবাসীরা হল : হাজং, গারো, কোচ, ডাল, বানাই

প্রভৃতি। এই অঞ্চলেই “টংক” প্রথা নামে এক অদ্ভুত ধরনের খাজনা প্রথা প্রবর্তিত আছে। এই প্রথা বিলোপের জন্ত টংক চাষীরা আন্দোলন করে আসছে।

কুখ্যাত টংক প্রথা ছাড়াও এই অঞ্চলের গারো, হাজং, ডালু, হিন্দু-মুসলমান প্রভৃতি বর্গাচাষীরা তাদের উৎপন্ন ফসলের তেভাগার দাবিতে আন্দোলন চালিয়ে যাচ্ছে। এই দাবিগুলির প্রতি জনসাধারণের দৃষ্টি আকর্ষণের উদ্দেশ্যে এবং তাদের সমর্থন লাভের জন্ত সুসং ও তদসংলগ্ন এলাকার কৃষকেরা বিশাল বিশাল সভা সমাবেশ সংগঠিত করছে। জমিদার-জোতদাররা সবসময় এই আন্দোলন দমন করার জন্ত নানা কৌশল অবলম্বন করছে। সরকারও তাদের মদত দিয়ে চলেছে।

ইতিমধ্যে ১৯৪৭ সালের ২৮শে জানুয়ারী ইস্টার্ন ফ্রন্টিয়ার রাইফেলসের শক্তিশালী বাহিনীকে সুসং পাঠানো হয়। ১৯শে জানুয়ারী সমগ্র হাজং এলাকায় তাদের বিমান মহড়া চলে।

৩১ জানুয়ারী কর্তৃপক্ষ হামলা শুরু করে। ঐ দিনই পুলিশ কিছু ইস্টার্ন রাইফেলস-এর দলবল সহ বাহেরতলী গ্রামে তিনবার হান দেয়। ইতিপূর্বে এই গ্রামে পুলিশ যে বর্বর সন্ত্রাস ও লুণ্ঠন চালায় তাতে কৃষকদের মধ্যে আতংক সৃষ্টি হয় এবং গ্রামের প্রায় সমস্ত পুরুষ পুলিশ আসার সঙ্গে সঙ্গেই গ্রাম ছেড়ে পালিয়ে যায়। পুলিশ কাউকে ধরতে না পেরে লঙ্কেশ্বর হাজং-এর স্ত্রী কুমুদিনীকে গ্রেপ্তার করে। পুলিশ কুমুদিনীর উপর বর্বর নির্যাতন চালায় এবং সারা গ্রামে পুলিশ কুমুদিনীকে নিয়ে টহল দেয়। সমগ্র এলাকায় এ সংবাদ ছড়িয়ে পড়ে এবং স্বভাবতই সরল প্রাণ কৃষকেরা বিক্ষুব্ধ হয়ে উঠে। যখন পুলিশ কুমুদিনীকে নিয়ে ক্যাম্পের দিকে যেতে থাকে তখন প্রায় ৬০ জন হাজং নারী-পুরুষ পুলিশের পথ অবরোধ করে এবং কুমুদিনীর মুক্তির দাবি জানাতে থাকে। পুলিশ এই দাবির জবাবে গুলি বর্ষণ শুরু করে। গুলিতে রাসমণি এবং অপর এক ব্যক্তি নিহত হন ও বহু ব্যক্তি আহত হন। নিজেদের আত্মরক্ষা ছাড়া কৃষকদের আর কোন

থিক্ক ছিল না এবং এর ফলে যে সংঘর্ষ শুরু হয় তাতে শুধু ২ জন পুলিশই নিহত হয়নি বহু সংখ্যক নারী-পুরুষ গ্রামবাসী নিহত হয়।

এই এলাকার গারো, হাজংদের কাছে জিঙাসাবার্ডা ছাড়াও স্থানীয় রামকৃষ্ণ মিশনের প্রধানের কাছ থেকেও জানা গেল যে রাসমণি ও অগ্নাগ্রদের নৃশংস ভাবে হত্যা করার পরই সাধারণ মানুষ ক্ষিপ্ত হয়ে ওঠে এবং উপরোক্ত ঘটনা ঘটে। এই একটি একক ঘটনা ছাড়া আজ পর্যন্তও কৃষকেরা কোন হিংসাত্মক কাজে লিপ্ত হয়নি।

২ ফেব্রুয়ারি থেকে জিলা ম্যাজিস্ট্রেট ব্যাষ্টিনের প্রত্যক্ষ পরিচালনায় পুরাদমে সাগরিক ও পুলিশী সন্ত্রাস শুরু হয়। তারা বাহেরাতলী গ্রামে প্রবেশ করে এবং নাংসী কায়দায় সমগ্র গ্রামখানি বিধ্বস্ত করে, স্কুলের পড়ার বই, ধর্মগ্রন্থ, দলিলপত্র ইত্যাদি টুকরো টুকরো করে ছিড়ে নিঃশিচ্ছ করে দেয়। তারা ধান চাল লুণ্ঠ করে, শজ্জীবাগান ধবংস করে ও কলাগাছগুলো উৎপাটিত করে, বাসনপত্র ভেঙ্গে ফেলে। এই পুলিশ ও মিলিটারী বাহিনী গ্রাম থেকে ফিরে যাওয়ার পথে বিজয়পুর গ্রামের জর্নৈক হুবোধ মাষ্টারের বাড়ী আগুণ লাগিয়ে দেয়, সংগরী গ্রামটি ঘেরাও করে এবং রামজয় নামে ৬০ বছরের জর্নৈক অন্ধব্যক্তিকে গ্রেপ্তার করে।

৩ ফেব্রুয়ারি ব্যাষ্টিনের নেতৃত্বে স্টেনগান, মেসিনগান প্রভৃতি আধুনিক যুদ্ধাস্ত্রে সজ্জিত পুলিশ মিলিটারী বাহিনী লেঙ্গুরা গ্রাম আক্রমণ করে। তারা নিরস্ত্র কৃষকদের উপর ঝাঁপিয়ে পড়ে বাড়ী ঘরে আগুন ধরিয়ে দেয় ও লুণ্ঠপাট চালিয়ে যায়। তারা ললিত হাজং-এর বাড়ী ও কৃষক সমিতির আফিস পুড়িয়ে দেয়। অগ্নাগ্র বাড়ীঘর গুলিও আধুনিক “নাদির শাহের” নৃশংস অভিযানের সাক্ষ্য বহন করছে। একই দিনে তারা জিগাতলা গ্রামে অম্লরূপ বর্বার আক্রমণ চালায় এবং রামসুন্দর পঞ্চায়েতের কাছ থেকে প্রায় ৩০০ টাকা লুট করে নেয়।

৪ ফেব্রুয়ারি পুলিশবাহিনী দুর্গাপুর থানার অধীন চাকরাপাড়া গ্রাম ঘেরাও করে। লেঙ্গুরা বাজারের ৪০টি দোকান তারা ভস্মীভূত

করে এবং চারুয়াপাড়ার মাধ্যমিক ইংলিশ স্কুল পুড়িয়ে দিয়ে ফ্যাসিস্ট অত্যাচারের এক নজীর স্থাপন করে। ব্রিটিশ সরকার বিগত ১৫০ বছর ধরে যে “আদিবাসীদের” পশ্চাদপদ আদিম অবস্থার মধ্যে আবদ্ধ রেখেছে “আদিবাসী বিশেষজ্ঞ” মিঃ ব্যাস্টিন আদিবাসীদের জাগরণকে আর সহ্য করতে পারেননি বিশেষ করে যখন তারা লেখাপড়া শুরু করেছে ও নিজেদের অবস্থা সম্পর্কে সচেতন হয়ে উঠছে। এই ব্যাস্টিন সাহেবই আদিবাসীদের বাড়ীঘর লুণ্ঠপাট করার নেতৃত্ব দেন এবং এই লুণ্ঠপাটের ফলে ১৫০০ টাকা নগদ, বিপুল পরিমাণ ধান চাল ও গহনাপত্র লুণ্ঠিত হয়। লুণ্ঠতরাজের পর পুলিশ বিগ্গেঞ্জরের স্ত্রী এবং জনৈক মহিলার ধর্ষণ করে। তারা মধ্যম পাড়ায় ৬ জনকে গ্রেপ্তার করে—এদের মধ্যে ২ জন মহিলা ও ১ জন পুরুষ গুলিবিদ্ধ ছিল। ১০ বছর বয়স্ক বালক সহ চারুয়াপাড়া থেকেও পুলিশ ৫ জনকে গ্রেপ্তার করে।

৫ই ফেব্রুয়ারী পুলিশ বাহিনী হুসং-এ বঙ্গীয় প্রাদেশিক কিষাণ সভার সহকারী সভাপতি শ্রীযুক্ত মণীন্দ্র সিংহের ও শ্রীযুক্ত ফণী গোস্বামীর (একজন সন্ন্যাসী রাজনৈতিক নেতা) বাড়ী হানা দেয়। উভয় স্থলেই পুলিশ সমস্ত ধান, চাল, কাপড় ও যাবতীয় আসবাবপত্র প্রভৃতি যা কিছু পেয়েছে সবই আটক করেছে যদিও এই ধানচাল ও আসবাবপত্র শ্রীযুক্ত সিংহ ও শ্রীযুক্ত গোস্বামী একান্তভুক্ত পরিবারের যৌথ সম্পত্তি। শ্রীযুক্ত গোস্বামীর মা ও শ্রীযুক্ত সিংহের বৌদির পরিহিত বস্ত্রটি ছাড়া আর কিছুই ছিল না।

এ ধরনের লুণ্ঠতরাজ, গ্রেপ্তার, হত্যা ও জুলুমবাজী চালিয়েও পুলিশ শান্ত হয়নি। তাই তারা ৬ই ফেব্রুয়ারী পুনরায় লেঙ্গুরা ও জিঞ্জাতলা গ্রাম ঘেরাও করে এবং আরও ৭ জনকে গ্রেপ্তার করে।

৭ই ফেব্রুয়ারী পুলিশ নানকান্দী, ভরতপুর, মনখোলা, কামালপুর, মুল্লীপাড়া, নলগোড়া ও জাঙ্গিলপাড়া গ্রামগুলির বিভিন্ন বাড়িতে হানা দিয়ে ধানচাল, আসবাবপত্র প্রভৃতি যাবতীয় মালামাল লুণ্ঠ করে।

৮ই ফেব্রুয়ারী হরিণাপুর গ্রামে পুলিশ কিষাণ সমিতির অফিস ভাঙচুর করে।

৯ই ফেব্রুয়ারী ময়মনসিংহ শহরে সমস্ত ছাপাখানা (১৭ টি) খানাতল্লাসী করা হয়। পুলিশী দমননীতির প্রতিবাদে সম্পূর্ণ বৈধভাবে ইস্তাহার ছাপানোর অপরাধে এই খানাতল্লাসী। উল্লেখযোগ্য যে, গত জানুয়ারীতে সরকার নিজেরাই উদয়ন প্রেস থেকে বে-আইনীভাবে যে ইস্তাহার ছাপায় তাতে প্রেসের নাম ও প্রকাশকের নাম দেওয়া হয়নি। ঐ ইস্তাহারগুলি বিমান থেকে আংশিক বহির্ভূত এলাকায় ছড়ানো হয়। এ ভাবে বে-আইনীভাবে ইস্তাহার ছাপানোর জন্য কোন ব্যবস্থা গ্রহণ করা হলবা অথচ বৈধভাবে প্রকাশিত ইস্তাহারের জন্য প্রেসগুলির বিরুদ্ধে ব্যবস্থা গ্রহণ করা হয়।

১০ই ফেব্রুয়ারী বাগাজোড়া গ্রামে পুলিশ হানা দেয় এবং ব্রজমণি নামে জর্নৈক কৃষক রমণীকে বুলেটবিদ্ধ অবস্থায় গ্রেপ্তার করে।

১১ই ফেব্রুয়ারী এক শস্ত্র পুলিশ বাহিনী কুড়িখাই বাজার ঘেরাও করে— স্থানীয় কিষাণ সমিতি বিধ্বস্ত করে দেয় এবং ২ ব্যক্তিকে গ্রেপ্তার করে। জামালপুর মহকুমার ঝাউগড়া গ্রামে আলত মহকুমা কৃষক সম্মেলনের উপর ১৪৪ ধারা বলে নিষেধাজ্ঞা জারী করা হয়। পুলিশ স্থানীয় কিষাণ সমিতির অফিসে হানা দেয় ও অফিস ঘরের রেডিও, বই-পত্রিকা, ফেটুন, ইস্তাহার, কাগজ-পত্র ইত্যাদি বাজেয়াপ্ত করে। এই সঙ্গে ৩ ব্যক্তিকে গ্রেপ্তার করা হয় ও তাদের উপর নৃশংসভাবে মারপিট চালানো হয়।

১২ই ফেব্রুয়ারী পুলিশ বাহিনী নালিতাবাড়ী গ্রাম ও বাজারকে তাদের দমন পীড়ন মূলক অভিযান পরিচালনার কেন্দ্র হিসাবে ব্যবহার করে অথচ এই এলাকায় কোন ঘটনা ঘটেনি এবং আজ পর্যন্তও সেখানের অবস্থা শান্ত রয়েছে। স্থানীয় কমিউনিস্ট পার্টি ও কিষাণ সমিতির অফিসে লুণ্ঠরাজ চালানো হয় ও অফিস দুইটি বিধ্বস্ত করে দেয়া হয়। পুলিশ সেই সঙ্গে ছাত্র কংগ্রেসের অফিসও ভাঙচুর করে।



এই এলাকার বাজারটি হল পুলিশ ও ইস্টার্ন ফ্রন্টিয়ার রাইফেলস্ বাহিনীর অবোধ লুঠতরাজের স্থল। বাজারের হিন্দু ও মুসলমান বিক্রেতাদের বিনামূল্যে এই পুলিশ ও রাইফেল বাহিনীর লোকদের দেয়া কোটা মত জিনিষপত্র দিতে বাধ্য করা হয়। যদি কোন বিক্রেতা ও দোকানী তাদের জিনিষপত্র বিনামূল্যে দিতে অস্বীকার করে তবে পুলিশ ও রাইফেলস্ বাহিনীর লোকেরা এই প্রতিবাদকারী দোকানীকে লাথি মেরে রাস্তায় ফেলে দেয়, তারপর তার উপর চলে অকথা অত্যাচার— অবশেষে রক্তাক্ত অবস্থায় তাকে ফেলে রাখা হয়। জর্নৈক প্রবীন মুসলীমলীগপছী মীর শেব মহম্মদ এবং অপর একজন প্রবীন কংগ্রেসী নগেন্দ্র দাশ এই উভয়ের উপরেই এ ধরনের অত্যাচার চালানো হয়েছে। তারা উভয়েই এ বিষয়ে সাক্ষ্য দেবেন।

১২ই ফেব্রুয়ারী তন্তুর, হাতিপাগার, নলকুড়া, বোনারপাড়া প্রভৃতি গ্রামে পুলিশ ও মিলিটারী একযোগে হানা দেয় ও লুঠতরাজ চালিয়ে ধানচাল, কাপড়, গহনা, টাকা-পয়সা ইত্যাদি আত্মসাৎ করে। এমনকি তারা হাতিপাগার কৃষকদের যৌথ ধানের গোলা থেকেও ধান লুঠ করে। বোনার পাড়া ও নলকুড়ায় স্থানীয় কৃষাণ সমিতির ও কমিউনিস্ট পার্টির অফিসে পুলিশ আগুন লাগিয়ে দেয়। এ দিন ১২০টি বাড়ীতে পুলিশ মিলিটারী যুগপৎ হানা দেয় ও লুঠতরাজ চালায়।

১৩ই ফেব্রুয়ারী ধানাসি গ্রামে পুলিশ হানা দিয়ে ৩ ব্যক্তিকে গ্রেপ্তার করে। একই দিনে হুর্গাপুর থানার নালুয়া পাড়া, মধ্যমপাড়া ও চারুয়াপাড়ায় পুলিশ পুনরায় হানা দেয় এবং নালুয়াপাড়া থেকে পুলিশ ৯ ব্যক্তিকে এবং চারুয়াপাড়া থেকে ২ জনকে গ্রেপ্তার করে।

১৪ই ফেব্রুয়ারী ধারাপানি, ধূপকুড়া, মালদিগ্রাম ও মাণিককুড়া গ্রামগুলিতে পুলিশ হানা দেয় এবং সমগ্র বাড়ীতেই লুঠতরাজ চালায়। এই গ্রামগুলি হালুয়াঘাট থানার অধীনে অবস্থিত। এখানে কোন অশান্তি বা গোলযোগের খবর জানা যায়নি।

পুলিশী নির্ধাতনের প্রতিবাদ জানিয়ে ইস্তাহার প্রকাশের

অভিযোগে ১৫ই ফেব্রুয়ারী নেত্রকোনায় একটি ছাপাখানায় খানা তল্লাসী চালানো হয়— অবশেষে পুলিশ ছাপাখানাটি বাজেয়াপ্ত করে। একই দিনে পুলিশ মধ্যমকুড়া ও বিন্নিবাড়ী গ্রামে হানা দেয়— ২৭টি বাড়ীতে লুণ্ঠরাজ চালায় এবং ৪ জনকে গ্রেপ্তার করে। টাকা পয়সা ও গহনাপত্র ছাড়াও পুলিশ মন্দিরে ব্যবহৃত জিনিষ পত্র হস্তগত করে।

১৬ ফেব্রুয়ারি পিপলস্ রিলিফ কমিটি ডাঃ বেরার সঙ্গে ৩ জন কর্মী যখন লেঙ্গুরা বাজারের দিকে যাচ্ছিলেন তখন পুলিশ তাদের স্পেশাল পাওয়ার্স অর্ডিন্সেন্সে গ্রেপ্তার করে।

১৭ ফেব্রুয়ারি কলমাকান্দা থানার হরিণকুরি, বাওলা, বাস্তপুর্ন, বাগড়বি ও শালিখাপাতন গ্রামে পুলিশ পুনরায় হানাদেয় ও স্থানীয় থানা কংগ্রেসের সম্পাদক ও ২ জন স্কুল শিক্ষককে গ্রেপ্তার করে। এখানে লুণ্ঠরাজ চালানো হয় এবং পুলিশ একটি উচ্চ ইংরেজী বিদ্যালয় থেকে চালের টিনও খুলে নেয়।

১৮ ফেব্রুয়ারি কলমাকান্দার গুজাকুলিয়া গ্রামে পুলিশ যখন হানা দেয় তখন তারা জনৈক মহিলার উপর চড়াও হয়। এই মহিলাটি “জেলে সম্প্রদায় ভুক্ত”। ‘তেভাগা’ অথবা ‘টংক’ আন্দোলনের সঙ্গে তাদের কোন সম্পর্ক নেই। উপস্থিত লোকজন যখন মহিলাটিকে উদ্ধারের জন্য এগিয়ে আসে তখন পুলিশ গুলি বর্ষণ করে” রাজকুমার দাস নামে জনৈক ব্যক্তিকে হত্যা করে এবং তার বৃদ্ধ পিতা মহেন্দ্র দাসের উপর অমানুষিক মারপিট চালায়। স্থানীয় চৌকিদার ঈশ্বরদাস এ ধরনের হামলার বিরুদ্ধে প্রতিবাদ জানালে পুলিশ তার হাত পুড়িয়ে দেয় এবং তার বিরুদ্ধে মামলা দায়ের করার হুমকি দেয়। একই দিনে নালিতাবাড়ী থানার নালীতাবাড়ী নিচপাড়ার জলধর পালের বাড়ী পুলিশ হানা দেয় এবং তার বাবা ও ভাই-এর সম্পত্তি লুণ্ঠ করে ও সমস্ত জিনিষ পত্র তছনছ করে। একই গ্রামে জিতেন মৈত্রের বাড়ীতেও পুলিশ অহরূপ হামলা চালায়।

সরকার হিন্দু ও মুসলীম কায়েমী স্বার্থবাদীদের সমর্থনে গণ অভ্যুত্থান ও গণসম্মার্সের ভূমি কাহিনী ছড়াচ্ছে। সম্পূর্ণভাবে নিজেদের

আত্মরক্ষার জন্য হাজংরা শুধু একটি মাত্র ক্ষেত্রে হিংসাত্মক ঘটনায় জড়িত হয়, তাছাড়া এমন কোন ঘটনা ঘটেনি যার ফলে বিপুল সেনাবাহিনী ও সশস্ত্র পুলিশ মোতায়েন করার কারণ উপস্থিত হয়েছিল।

স্বাযোগসন্ধানীরা এই মর্মে অপর একটি গুজব ছড়ায় যে ২৬ জানুয়ারি সন্ধ্যা ১০ হাজার হাজং জমায়েত হয় এবং থানা ও পোস্টাফিস ধ্বংস করে। কিন্তু এ সম্পর্কে তদন্ত করার জন্য যখন স্থানীয় কংগ্রেস নেতারা ও বেসরকারী তদন্ত কমিটির সদস্যগণ সন্ধ্যামিনে উপস্থিত হন তখন তাঁরা প্রত্যক্ষ করেন যে, থানা বা পোস্টাফিস কোন কিছুই ধ্বংস হয়নি এবং সেখানে লুণ্ঠরাজও হয়নি। পোস্টাফিসের কর্মীরা বলেন যে, পোস্টাফিসের কাজকর্মও ব্যাহত হয়নি। প্রকৃত পক্ষে, যে ঘটনা ঘটে তা হল : স্বাধীনতা দিবস উদযাপন উপলক্ষ্যে হাজংরা জমায়েত হয় এবং সেই সমাবেশে ২২ জানুয়ারি ময়মনসিংহে শান্তিপূর্ণ নাগরিকদের উপর পুলিশের যে গুলিবর্ষণ চলে তার প্রতিবাদ জানানো হয়। এই গুলিবর্ষণের ফলে ১ জন ছাত্র নিহত হয় এবং একজন ছাত্রীসহ ৭জন হিন্দু-মুসলীম ছাত্র আহত হয়।

প্রসঙ্গত, অপর যে একটি বিষয় বিবেচনা করে দেখতে হবে তা হল, এই অঞ্চলে খ্রীষ্টান মিশন ও মিশনারীদের কার্যকলাপ। বিরিসিরি ব্যাপ্টিষ্ট মিশনের (ভূর্গাপুর থানা) রেভাঃ হোয়াইট এবং দাওধারা মিশনের (নালিতাবাড়ী থানা) রেভাঃ মার্ক সাধারণ ধর্মান্তকরণের অভিযান পরিচালনা করছেন এবং তারা ছশিয়ারি করে দিয়েছেন যে, যদি কৃষকেরা রাজনৈতিক দলগুলির সঙ্গে সম্পর্ক ত্যাগ না করে এবং খ্রীষ্ট ধর্ম গ্রহণ না করে এবং ক্রস চিহ্ন সম্বলিত পতাকা উত্তোলন না করে তবে পুলিশ তাদের বিরুদ্ধে অত্যাচার ও লুণ্ঠন চালিয়ে যাবে। এটা বিশ্বাসের কথা যে, যারা 'খ্রীষ্টান পতাকা' উত্তোলন করেছে এবং মিশনের তহবিলে টাকা দিচ্ছে তারাই কতৃপক্ষের লুণ্ঠরাজ বাহিনীর হাত থেকে রক্ষা পায়।

উপরোক্ত ঘটনাবলী থেকে এটা সুস্পষ্ট ভাবে প্রমাণিত যে “আইন শৃঙ্খলা” প্রবর্তনের নামে এ ধরনের বর্বরতা চালানো যেতে পারে না। কতৃপক্ষ বে-আইনীভাবে প্রায় ১০০টি বাড়ীঘর ধ্বংস করেছে, প্রায় ৫০ হাজার টাকা নগদ ও প্রায় শত শত মণ ধান চাল লুণ্ঠন করেছে। সেনাবাহিনী ও পুলিশ ৮০ জনকে জখম করেছে, কমপক্ষে ২০ জন মহিলার শ্রীলতা হানি করেছে এবং ৪ জন নারী-পুরুষকে হত্যা করেছে।

সুতরাং, আমরা এ সিদ্ধান্তে পৌছতে বাধ্য হয়েছি যে ‘শান্তি রক্ষার’ নামে যে প্রচার চালানো হয়েছে তা উদ্দেশ্য প্রনোদিত।

বিন্দুমাত্রও গ্রাম-নীতি প্রদর্শন না করে এ ধরনের বর্বরতা ও অমানুষিক অত্যাচারের উদ্দেশ্য হল, প্রথমতঃ, গরীব কৃষকদের উন্নয়নের জগ্ন একটি বৈধ আন্দোলন দমন করা। দ্বিতীয়তঃ, এই অভিযানের পেছনে গভীর রাজনৈতিক উদ্দেশ্য রয়েছে বলে আমরা সন্দেহ করি। এই উদ্দেশ্য হল : বাংলা ও আসাম সীমান্তে তথা কথিত আদিবাসী সম্প্রদায়ের জগ্ন পৃথক প্রদেশ গঠন করা। এ কারণেই আমরা আমরা অনুমান করি যে, বাংলার গভর্নর ১৯৪৬ সালের নভেম্বরে সুসং সফর করেন এবং আদিবাসী বিশেষজ্ঞ বলে কথিত মিঃ ব্যাণ্টিনকে ১৯৪৬ সালের ডিসেম্বরে ময়মনসিংহের জিলা ম্যাজিস্ট্রেট হিসাবে নিয়োগ করা হয়। সাধারণ রাজনৈতিক চেতনা সম্পন্ন হাজং জনগণের উপর ১৯৪৭ সালের জানুয়ারী থেকে পুলিশ-মিলিটারী অপারেশন শুরু হয়। এই রাজনৈতিক উদ্দেশ্য চরিতার্থের জগ্নই হাজংদের মধ্যে মিশনারীরা জোর প্রচার চালাচ্ছে যাতে করে তারা সমস্ত রাজনৈতিক দল থেকে নিজেদের বিচ্ছিন্ন রাখে এবং মিশনারী ও সরকারী কতৃ-পক্ষের প্রতি অনুগত থাকে।

[সংক্ষেপিত]

কলিকাতা, ১লা মার্চ, ১৯৪৭

---

\* ভারতের তদানিন্তন গণ-পরিষদ সদস্য সোমনাথ লাহিড়ী ১৯৪৭ সালের ৪ঠা মার্চ লিখিত এক চিঠির সঙ্গে এই রিপোর্টটি ভারতের অন্তর্বর্তীকালীন সরকারের ভাইস-প্রেসিডেন্ট পণ্ডিত জগন্নাথলাল নেহরুর কাছে পেশ করেন।



## ময়মনসিংহ জিলার শহীদদের সংক্ষিপ্ত পরিচয়

- (১) ত্রিলোচন হাজং (৪৫) পাঁচগাও ইউনিয়নের গারাম পাড়া গ্রামে জন্ম। মৃত্যু ময়মনসিংহ হাসপাতালে ১৯৪২ সালে। ইনি পাঁচগাও অঞ্চলের কৃষক সমিতির অগ্রতম প্রতিষ্ঠাতা।
- (২) ফণি চক্রবর্তী (২২) ময়মনসিংহ সদরে আততায়ী কর্তৃক ছুরিকাঘাত হইয়া মৃত্যু ১৯৪৩ সালে।
- (৩) লালমোহন হাজং (২৪) নালিতাবাড়ি থানা—মানপাড়া গ্রামে জন্ম। ১৯৪২ সালে জামালপুর হাসপাতালে মৃত্যু। ইনি নালিতাবাড়ি অঞ্চলের কৃষক আন্দোলনের একজন বিশিষ্ট কর্মী ছিলেন।
- (৪) মণি চক্রবর্তী (২৫) সেরপুর টাউনের বাগরাশা গ্রামে জন্ম। মৃত্যু ১৯৪৩ সালে। ইনি সেরপুর অঞ্চলের হৃদয় স্ফুটন সঙ্ঘদায়ের মধ্যে নানকার আন্দোলন গড়িয়া তোলেন।
- (৫) ভানু মজুমদার (২৩) ১৯৪৩ সালে ময়মনসিংহে মৃত্যু।
- (৬) ভিখা চৌহান (২৫) মৃত্যু ১৯৪৪ সালে। সেরপুর এলাকায় দিনমজুর ও নানকার আন্দোলনের অন্যতম কর্মী।
- (৭) মহাবীর চৌহান (২৩) সেরপুর শহরে ঢাকলহাটি অঞ্চলে বিহারী শ্রমিকের ঘরে জন্ম। নানকার আন্দোলনের একজন কর্মী। মৃত্যু ১৯৪৫ সালে।
- (৮) রাসমণি (৫০) স্বেচ্ছা চুর্গাপুর থানার অন্তর্গত ভেদিবুড়া ইউনিয়নের বগাঝোরা গ্রামের এক ক্ষেতমজুরের বিধবা স্ত্রী। তিনি ১৯৪২ সাল হইতে মহিলা সমিতির আন্দোলনের একজন বিশিষ্ট কর্মী। স্বেচ্ছা অঞ্চলের হাজং

প্রসূতিদের মধ্যে তিনি ছিলেন একজন দক্ষ দাই বা খাত্তী। শিশু-রোগ, ভেষজশাস্ত্র ও দ্রব্যগুণ সম্বন্ধে যথেষ্ট জ্ঞান ও অভিজ্ঞতাসম্পন্ন ছিলেন। ১৯৪৬ সালে বহেরাতলী গ্রামে ইস্টার্ন ফ্রন্টিয়ার রাইফেল বাহিনীর মুখোমুখি দাঁড়াইয়া সংগ্রাম করিয়া শহীদের মৃত্যু বরণ করেন। কৃষক-রমণীর মধ্যে রাসমণি প্রথম শহীদ।

- (৯) সুরেন্দ্র হাজং (২৭) সুরং দুর্গাপুর থানার মাইজপাড়া গ্রামের এক গরিব চাষীর ঘরে জন্ম। ইনি একজন টঙ্ক চাষী। ১৯৪৬ সালে বীরমাতা রাসমণির সহযোদ্ধা হিসাবে ইস্টার্ন ফ্রন্টিয়ার রাইফেল বাহিনীর বিরুদ্ধে লড়াই করিয়া শহীদের মৃত্যু বরণ করেন।
- (১০) ভূপেন ভট্টাচার্য (৩৫) জন্ম নেত্রকোনা মহকুমার কাড়ইর গ্রামে। ১৯৩০ সালে বিপ্লবী আন্দোলনে যোগদান করায় আন্দামানে সেলুলার জেলে প্রেরিত হন। ১৯৩৮ সাল হইতে সুরং পরগণায় কৃষক আন্দোলনে যোগদান করেন। ১৯৪৮ সালে হালুয়াঘাটে সক্ষ্যাকুড়া গ্রামে মৃত্যু বরণ করেন।
- (১১) মঙ্গল চাঁন (৩০) জন্ম শ্রীবর্দি থানার লাউচাপড়া গ্রামের এক হাজং কৃষক পরিবারে। ১৯৪৯ সালে ফেব্রুয়ারী মাসে লেঙ্গুরা হাটে এক সশস্ত্র সংগ্রামে পুলিশের গুলিতে নিহত হন।
- (১২) অগেল হাজং (৩১) জন্ম ভরপুর গ্রামে। লেঙ্গুরা হাটে পুলিশের গুলিতে মারা যান।
- (১৩) রেবতী ( হাজং মেয়ে, বরস-১৯ ) মৃত্যু লেঙ্গুরা হাটে পুলিশের গুলিতে।
- (১৪) শঙ্খমণি (১৭) লেঙ্গুরা হাটে পুলিশের গুলিতে নিহত।
- (১৫) সারথী (২১) কৃষককর্মী কাজাল দাসের স্ত্রী। লেঙ্গুরা হাটে মৃত্যু।\*

---

\* লেঙ্গুরা হাটের আরও শহীদের নাম আছে।

- (১৬) বদরু (২৮) মৃত্যু সানখলার মাঠে ।
- (১৭) রহিম (৩০) সানখলার মাঠে পুলিশের গুলিতে নিহত ।
- (১৮) রামদয়াল সরকার (৫৮) } জাঙ্গালিয়া গ্রামের দুই বৃদ্ধ চাষী ।  
 (১৯) রামচরণ (৬২) } কলসিন্দুর হাট হইতে ফেরার  
 পথে পুলিশের গুলিতে নিহত ।
- (২০) সুদর্শন (২৭) হালুয়াঘাট থানার গবরাফুড়া গ্রামে জন্ম ।  
 কড়াইতলা গ্রামে সশস্ত্র পুলিশের সঙ্গে লড়াই করিয়া  
 মৃত্যুবরণ করেন ।
- (২১) হরিসিং ডালু (২৫) হালুয়াঘাট থানার কুমারগাতী গ্রামে  
 জন্ম । মৃত্যু কড়াইতলা গ্রামে পুলিশের গুলিতে ।
- (২২) সতীন্দ্র ডালু (৩০) নালিতাবাড়ি থানার মধ্যমকুড়া গ্রামে  
 জন্ম । শালমারা গ্রামে এক সশস্ত্র সংগ্রামে পুলিশের  
 গুলিতে নিহত ।
- (২৩) সর্বেশ্বর ডালু (৪০) নালিতাবাড়ি থানার গেরাপচা গ্রামে  
 ধান দখল করিতে যাইয়া মৃত্যু ।
- (২৪) ছবরাজ (৩২) হুসং হুর্গাপুর নয়াপাড়া গ্রামে জন্ম । বিশিষ্ট  
 গেরিলা-নায়ক, রাণীপুর ময়দানে পুলিশের সশস্ত্র বাহিনীর  
 সঙ্গে প্রকাশ্য সংঘর্ষে মৃত্যু ।
- (২৫) ক্ষীরোদ (৪০) সানখলা গ্রামে জন্ম । মৃত্যু রাণীপুর  
 ময়দানে সশস্ত্র সংগ্রামে ।
- (২৬) অনন্ত হাজং (৫০) হুসং হুর্গাপুর থানার ভেদীকুড়া গ্রামে  
 জন্ম । প্রথম জীবনে বৈষ্ণবপন্থী । ৫ম শ্রেণী পর্যন্ত  
 পড়াশোনা করেন । পরবর্তী কালে বিশিষ্ট কৃষক সংগঠক ।  
 রাণীপুর ময়দানে সশস্ত্র সংগ্রামে মৃত্যু ।
- (২৭) নরেন্দ্র (৩৪) হালুয়াঘাট থানার ঘোষগাও গ্রামের একজন  
 মধ্যচাষী । মৃত্যু—রাণীপুর ময়দান ।
- (২৮) বীরজ (৩০) সাং ঘোষগাও (হালুয়াঘাট) মৃত্যু—রানীপুর  
 ময়দান ।



- (২৯) বিনোদ (৪২) মৃত্যু—রাণীগাঁওর ময়দান ।
- (৩০) চন্দ্র (৩৫) { দুই সহোদর ভাই । জন্ম—রাণীগাঁওর । মৃত্যু  
(৩১) অনুরূপ (২৮) { রাণীগাঁওর ময়দান ।
- (৩২) যোগেন্দ্র (১৭) ভটপুর হাইস্কুলের ছাত্র । ধানসাইল গ্রামে জন্ম । পুলিশের গুলিতে রাংটিয়া পাহাড়ে গেরিলা ক্যাম্পে মৃত্যু ১৯৫০ সালে ।
- (৩৩) রবি দাম (২৮) ওরফে সাধু । সুনামগঞ্জ শহরে জন্ম । মোহনপুর গ্রামে (বিশরপাশা থানা) সশস্ত্র সংগ্রামে মৃত্যু ।
- (৩৪) চন্দ্র সরকার । পিতা গঙ্গাধর (৫২) হালুয়াঘাট থানার লক্ষ্মীকুড়া গ্রামে জন্ম । এই অঞ্চলের অগ্রতম প্রধান নায়ক । স্বভাব কবি । কবিরাজ বলিয়া সর্বত্র পরিচিত । ১৯৪৯ সালে গ্রেপ্তার হইলে পুলিশ তাহার মাথা হইতে পা পর্যন্ত লোহার হাতুড়ি দিয়া পিটায় । অকথ্য দৈহিক নির্যাতনের ফলে ১৯৫০ সালে ময়মনসিংহে মৃত্যু বরণ করেন ।
- (৩৫) দ্বিজমোহন হাজং (৩৩) সুনামগঞ্জ থানার ভরতপুর গ্রামে জন্ম । নিজের বাড়ির আঙ্গিনায় স্টেটগানের গুলির দ্বারা নিহত করা হয় ।
- (৩৬) বিজয় মণ্ডল (৪৫) হালুয়াঘাট থানার ঘোষগাও গ্রামে জন্ম । বিশিষ্ট কৃষককর্মী । ১৯৫০ সালে চেরাখালি জন-ক্যাম্পে মৃত্যু ।
- (৩৭) গোষ্ঠ সিংহ (৬৪) ছমগাঁও গ্রামে জন্ম । গেরিলা ক্যাম্পে ১৯৫০ সালে মৃত্যু ।
- (৩৮) মণীন্দ্র কর (৩১) সংবাদবাহী বিশিষ্ট কর্মী । মৃত্যু ১৯৪৯ সালে । নেত্রকোনা কাইলাটি গ্রামে জন্ম ।
- (৩৯) নয়ন সরকার (৪৫) সুনামগঞ্জ হুগাঁওর থানার কালিকাবাড়ি গ্রামে জন্ম । ১৯৪৭ সালে ভালুকাপাড়া গ্রামে অস্ত্র দখল করেন । ১৯৫০ সালে চেরাখালী ক্যাম্পে মৃত্যু বরণ করেন ।
- (৪০) বীর হাজং (৩২) সুনামগঞ্জ হুগাঁওর থানার নলপড়া গ্রামে

জন্ম । মৃত্যু—চেরাখালী ।

(৪১) বলেশ্বর হাজং (২১) হালুয়াঘাট থানার লক্ষ্মীকুড়া গ্রামে  
জন্ম । মৃত্যু—১৯৪৮ সালে ।

(৪২) গিরীন্দ্র, যতীন্দ্র, মহেশ্বর, কুন্তিবাস, যোগেন্দ্র, পরমেশ্বর,  
অনন্ত, বিজ্ঞানধর, জার্মানী, পদ্মমণি, নীলমণি প্রমুখ ৪০ জন  
কলমাকান্দা থানার জাগিরপাড়া গ্রামে এক গভীর রাত্রে  
অন্ধকারে পুলিশের গুলিতে নিহত হন ।

(৪৩) কমল হাজং—ময়মনসিংহ জেলে মৃত্যু—১৯৪৯ সাল ।

(৪৪) ব্রজ মোহন— “ “ “ “

(৪৫) সুরেন্দ্র ডালু (৩৬) “ “ “ ১৯৫০

(৪৬) রবীন্দ্র— “ “ “ “

(৪৭) গোপীনাথ— “ “ “ “

(৪৮) ঘাওয়া রাম—ময়মনসিংহ জেলে মৃত্যু—১৯৫০ সাল

(৪৯) গোপাল— “ “ “ “

(৫০) গৌরান্ধ— “ “ “ “

(৫১) কেনারাম— “ “ “ “

(৫২) জগন্মজুম— “ “ “ “

(৫৩) রতিকান্ত প্রভৃতির জেলে মৃত্যু ।

(৫৪) শচা রায় (৩৫) নালিতাবাড়ির বিশিষ্ট ব্যবসায়ী সতীশ চন্দ্র  
রায়ের পুত্র । ১৯৩০ সাল হইতে রাজনৈতিক আন্দোলনে  
অংশ গ্রহণ করেন । এই অঞ্চলের সশস্ত্র বিদ্রোহে বোমা  
প্রস্তুত করার সময় এক বিস্ফোরণে মৃত্যু হয় ।

(৫৫) ফণি চক্রবর্তী—(৩০) চান্দেমনগর নানকার আন্দোলনের  
সংগঠক, সর্পাঘাতে মৃত্যু ।

(৫৬) সুধেন্দু ভট্টাচার্য—(২৫) রাজসাহী জেলে পুলিশের গুলিতে  
নিহত ।

(৫৭) রজনী সরকার—(৩০) ঘোষগাও হালুয়াঘাট অঞ্চলের  
কৃষকসংগঠক । ১৯৫০ সালে চেড়াখালি পুলিশের গুলিতে  
মৃত্যু বরণ করেন ।

## ময়মনসিংহ পাহাড় সীমান্ত অঞ্চলের কয়েকজন বিশিষ্ট

নেতা ও সংগঠক :—

- ১। শ্রীমণি সিংহ—পিতা কালীকুমার; সুসং হুর্গাপুর। ইনি এই অঞ্চলের অন্যতম বিশিষ্ট নেতা। ১৯২০-২১ সালে অসহযোগ আন্দোলনে ও বিপ্লবী দলে যোগদান করেন। এক সময় মেটিয়াবুরুজ ও কলিকাতার উপকণ্ঠে শ্রমিক সংগঠন গড়িয়া তোলেন। ১৯৩০ সালে রাজবন্দী হন, ১৯৩৫ সালে হুর্গাপুরে আন্তরীণ থাকাকালে এই অঞ্চলে কৃষক সংগঠনের ভিত্তি স্থাপন করেন।
- ২। শ্রীললিত সরকার—পিতা জয়নাথ, গ্রাম লেঙ্গুরা, সুসং। ইনি এই অঞ্চলের অন্যতম বিশিষ্ট নেতা। ১৯২০-২২ সালে অসহযোগ আন্দোলনে যোগদান করেন। ১৯৩০ সালে নিজ গ্রামে প্রাথমিক কংগ্রেস কমিটি স্থাপন করেন ও আইন অমান্য আন্দোলনে অংশ গ্রহণ করেন। ১৯৩৬ সাল হইতে গ্রামে গ্রামে সারা ভারত কৃষকসভার সংগঠন গড়িয়া তোলেন এবং এই কাজে তাঁহার সম্পত্তি দান করেন।
- ৩। শ্রীবিপিন গুন—পিতা টিকারাম; লেঙ্গুরা, সুসং। এই অঞ্চলের বিশিষ্ট কৃষকনেতা।
- ৪। শ্রীপরেশ সরকার—বাগপারা শিক্ষিত হাজং যুবক। এই অঞ্চলের আদিবাসীদের প্রিয় নেতা।
- ৫। শ্রীজলধর পাল—পিতা বলরাম, নালিতাবাড়ি। ইনি ছাত্রাবস্থায় বিপ্লবী দলে যোগদান করেন, আন্তঃপ্রাদেশিক বড়যন্ত্র মামলায় অভিযুক্ত হন। জেল হইতে মুক্তি পাইয়া নিজের জন্মভূমি ময়মনসিংহ পাহাড় সীমান্ত অঞ্চলে কৃষক আন্দোলন ও সংগঠন গড়িয়া তোলেন।

- ৬। শ্রীজামেশ্বর সরকার—পিতা গৌরচরণ, নাগেরপাড়া, হালুয়াঘাট। শিক্ষিত হাজং যুবক। এই অঞ্চলের কৃষক সংগঠন গড়িয়া তোলায় প্রচুর অবদান রহিয়াছে।
- ৭। শ্রীরূপচাঁদন সরকার—পিতা দয়ালচন্দ্র, ডাহাপাড়া হালুয়াঘাট। এই অঞ্চলের আদিবাসীদের অন্ত্যতম সংগঠক।
- ৮। শ্রীধীরেন্দ্র রায়—পিতা ব্রজমোহন, সন্ধ্যাকুড়া, হালুয়াঘাট। একজন বিশিষ্ট জনপ্রিয় কৃষকনেতা, প্রথম জীবনে পাঠশালার শিক্ষক। এই অঞ্চলের আন্দোলনে অপরিসীম অবদান রহিয়াছে।
- ৯। শ্রী গজেন্দ্র সরকার—পিতা শরনাথ; ভরতপুর, মুসং। অসহযোগ ও আইন অমান্য আন্দোলনে অংশ গ্রহণ করেন। পরে সারা ভারত কৃষকসভার বিশিষ্ট সংগঠক।
- ১০। শ্রীরাজকুমার সরকার—পিতা অক্ষয়চন্দ্র,—কুমারগাতি, হালুয়াঘাট। ইনি ডালু সম্প্রদায়ের একজন বিশিষ্ট নেতা। দীর্ঘকাল গ্রাম পঞ্চায়েত ছিলেন। জমিদার-বিরোধী ভূমিকায় স্বাভাবিক চেতনা দেখা দেয়। পরে নিজের এলাকায় সারা ভারত কৃষকসভার সংগঠন গড়িয়া তোলেন।
- ১১। শ্রীঅনিল ডালু—পিতা নন্তীরাম, তন্তুর, নালিতাবাড়ী। শিক্ষিত ডালু সন্তান। এই অঞ্চলে সংগঠন গড়িয়া তোলায় বিশেষ ভূমিকা রহিয়াছে।
- ১২। শ্রীহংসনাথ—পিতা হরকান্ত, রামচন্দ্রকুড়া, নালিতাবাড়ী। উচ্চশিক্ষিত হাজং যুবক। ময়মনসিংহ কলেজে ছাত্রাবস্থায় বিশিষ্ট ছাত্রনেতা। পরে এই অঞ্চলের কৃষক আন্দোলনের নেতৃত্ব গ্রহণ করেন। দীর্ঘ দিন যাবৎ জেলে রাজবন্দী আছেন।
- ১৩। শ্রীভারত সাংমা—খড়খড়িয়া কান্দা, নালিতাবাড়ী। ইনি এই অঞ্চলের কৃষক আন্দোলনের বিশিষ্ট কর্মী। নিজ সম্প্রদায়ের মধ্যে সংগঠন গড়িয়া তোলেন।

- ১৪। শ্রীরবি নিয়োগী—পিতা রমেশচন্দ্র। সেরপুর টাউন। ছাত্রজীবনে বিপ্লবী দলে যোগদান করেন। ময়মনসিংহের সেরপুর কংগ্রেস কমিটির একজন বিশিষ্ট কর্মী। ১৯৩০ সালে আইন অমান্য আন্দোলনে প্রথম কারাবরণ করেন। ১৯৩১ সালধা মামলায় অভিযুক্ত হন এবং দীর্ঘদিন আন্দামান জেলে আবদ্ধ থাকেন। ১৯৩৭ সালে মুক্তি লাভ করিয়াই কৃষক আন্দোলনে যোগদান করেন। নানকার ও ভাওয়ালী আন্দোলনের বিশিষ্ট নেতা।
- ১৫। শ্রীবল্লভী বক্সী—পিতা গৌরকিশোর। সেরপুর টাউন। ছাত্রজীবন হইতেই বিপ্লবী দলের সংস্পর্শে আসেন। ১৯৩৭ সাল হইতে কৃষক আন্দোলনে যোগদান করেন। সুসং পরগণার অগ্রতম সংগঠক।
- ১৬। শ্রীতেজেশ নাগ (রামু) পিতা—যোগেশ চন্দ্র। সেরপুর পরগণার হাজং ও রাজবংশীদের মধ্যে সংগঠন গড়িয়া তোলেন।
- ১৭। শ্রীরাজ কুমার বিখাস—নাক্সী, নালিতাবাড়ী। হদি ক্ষত্রিয় সম্প্রদায়ের বিশিষ্ট নেতা। বেগার প্রথার উচ্ছেদের বিরুদ্ধে আন্দোলন পরিচালনার নেতৃত্ব করেন।
- ১৮। শ্রীভূপেন নাগ—পিতা দেবেন্দ্র চন্দ্র। নাগপাড়া সেরপুর। ১৯৩০ সালে আইন অমান্য আন্দোলনে অংশ গ্রহণ করিয়া কারাবরণ করেন। প্রথম জীবনে কংগ্রেস কর্মী, পরবর্তী কালে হদি ক্ষত্রিয় ও হাজংদের সঙ্গে কৃষক আন্দোলনে যোগদান করেন।
- ১৯। সুরেশ দত্ত—পিতা প্রকাশ চন্দ্র। হালুয়াঘাট কৃষক সভার বিশিষ্ট কর্মী।
- ২০। শ্রীসুরেন্দ্র কোচ } গোবরাঝুড়া, হালুয়াঘাট কোচ  
শ্রীকৈলাস কোচ } সম্প্রদায়ের বিশিষ্ট নেতা।
- ২১। শ্রীসেবারাম বানাই—জামগড়া, বানাই উপজাতীয়দের বিশিষ্ট

নেতা । নিজ সম্প্রদায়ের মধ্যে আন্দোলন ও সংগঠন গড়িয়া  
তোলায় বিশেষ অবদান রহিয়াছে ।

- ২২ । শ্রীজিতেন মৈত্র—পিতা জগন্নাথ । বিপ্লবী দলের কর্মী ।  
আনুঃপ্রাদেশিক মামলায় অভিযুক্ত হন । মুক্তি পাওয়ার পর  
হুইতেই এই অঞ্চলের কৃষক আন্দোলনে আত্মনিয়োগ করেন ।
  - ২৩ । শ্রীবলাই সরকার—কান্দুলী, সেরপুর পরগণার ভাওয়ালী  
আন্দোলনের বিশিষ্ট রাজবংশী নেতা ।
  - ২৪ । শ্রীসমন বর্মণ—নন্নী—রাজবংশী সম্প্রদায়ের একজন বিশিষ্ট  
কৃষক সংগঠক ।
  - ২৫ । বিরাট সরকার—কাংসা লাউচাপরা অঞ্চলের বিশিষ্ট হাজং  
সংগঠক ।
-













